

## চিতা বহিমান

[www.6oiR6oi.blogspot.com](http://www.6oiR6oi.blogspot.com)

তপতী বড় হইয়া উঠিল।

মেয়েদের বিবাহের বয়স সম্বন্ধে আধুনিক যুগে অবশ্য কোন বাধাধরা নিয়ম নাই, তথাপি একমাত্র কন্যার বিবাহটা একটু শীঘ্রই দিবার ইচ্ছা মিঃ শঙ্কর চ্যাটার্জির। সম্বন্ধও পাকা এবং দিনও স্থির হইয়া গিয়াছে। বাকি শুধু বিবাহটার।

তপতী এবার বি-এ পরীক্ষা দিবে, তাহারই জন্ম ব্যস্ত সে। বিবাহের নামে বাঙালী মেয়েরা যেরূপ উচ্ছ্বসিত হইয়া উঠে তপতীর তাহা কিছুই হয় নাই। কেন হয় নাই, জিজ্ঞাসা করিলে সে বলিবে—বাপ-মার হাতের দেওয়া অনিবার্য শাস্তি যখন লইতেই হইবে, তখন ভাবিয়া লাভ কি! বিয়েটা হইয়া গেলেই আনন্দ-বা-নিরানন্দ যাহোক একটা করা যাইবে। এখন পরীক্ষার পড়াটা করা যাক।

কিন্তু ইহাতে ভাবিবার কিছুই নাই। তপতীর জন্ম ভদ্রবংশের জনৈক শিক্ষিত এবং স্বন্দর যুবক প্রস্তুত হইতেছেন। আর তপতী তাঁহাকে দেখিয়াছেও। বিবাহের পর যুবকটিকে বিলাত পাঠান হইবে পূর্তবিজ্ঞা শিখিবার জন্ম, ইহাই মিষ্টার এবং মিসেস চ্যাটার্জির ইচ্ছা।

এই তপতী—শিক্ষিতা, আধুনিকা এবং প্রগতিবাদিনী। উহাকে লাভ করিবার জন্ম সোমাইটির কোন যুবক না সচেষ্টে। দিনের পর দিন তপতীকে ঘিরিয়া তাহার গুণ তুলিয়াছে, গান করিয়াছে, গবেষণা করিয়াছে তপতীর ভবিষ্যৎ লইয়া। হ্যাঁ, তপতী অনিন্দ্য, অনবজ্ঞানী, অসাধারণীয়া। কিন্তু এছেন তপতীকে লাভ করিবে মাত্র একজন, ইহা সহ করা অপরের পক্ষে অত্যন্ত কঠিন। কিন্তু উপায় কি, ধনী পিতা তাহার, যাহাকে উপযুক্ত মনে করিবেন, তাহারই হাতে কণা দান করিবেন। অপরের তাহাতে কি বলিবার থাকিতে পারে।

মিঃ চ্যাটার্জির “তপতী-নিবাস” নামক নবনির্মিত বিশাল প্রাসাদে মহাসমারোহে বিবাহোত্তোগ চলিতেছে। বর এখনো আসিয়া পৌঁছায় নাই, কিন্তু বরযাত্রীগণ প্রায় অনেকেই আসিয়াছেন এবং থাইতেছেন। রাত্রি প্রায় দশটা,

অতি মলিন বেশ ছেঁড়া একটা কামিজ গায়ে মাথার চুল সম্পূর্ণভাবে মুণ্ডিত একটি যুবক আসিয়া মিঃ চ্যাটার্জির সহিত দেখা করিতে চাহিল। বিবাহ সভায় এরূপ অতিথি কেই বা পছন্দ করে! কিন্তু যুবক দেখা করিবেই।

মিঃ চ্যাটার্জি কতটা সম্প্রদানের জন্য প্রস্তুত হইয়াছিলেন, তথাপি যুবকের সহিত সাক্ষাৎ করিতে নিজেই খাসকামরায় নামিয়া আসিলেন।

একখানি জীর্ণ দলিল বাহির করিয়া যুবক বলিল,—আমার বাবার বাস্ত্বে এই দলিলখানি পেয়েছি, এটা আপনার—আর সম্ভবতঃ দরকারী। দয়া করে গ্রহণ করুন। মিঃ চ্যাটার্জি বিস্মিত হইয়া বলিলেন,—তুমি মহাদেবের ছেলে? এত বড়ো হয়েছে! বসো বাবা, আজ আমার মেয়ের বিয়ে, এখানেই থেয়ে যাবে।

—আমার কিন্তু অল্প কাজ ছিল। যুবক সবিনয়ে জানাইল।

—তা থাক, কাজ অল্পদিন করবে, বসো।

মিঃ চ্যাটার্জি দলিলখানি গ্রহণ করিলেন। সত্যিই দরকারী দলিল। যুবককে আর একবার বসিতে অনুরোধ করিয়া তিনি ভিতরে গেলেন।

বর আসিয়াছে এবং বরের পিতা তাঁহার জন্য অপেক্ষা করিতেছেন। মিঃ চ্যাটার্জি আসিতেই তিনি বলিলেন,—

—পণ-এর টাকাটা আমায় দিন, তারপর ছেলেআপনার, যা-খুসি করবেন তাকে নিয়ে।

—হ্যাঁ, বেয়াই-মশাই, কাল পরশুই আপনার টাকাটা দিয়ে দেবো।

—কেন? আজই দিয়ে ফেলুন না! ছেলেতো আমি বেচেই দিচ্ছি। নগদ কারবারই ভালো।

—এ রকম কথা কেন বলছেন বেয়াই-মশাই। মিঃ চ্যাটার্জি অত্যন্ত আহত হইয়া জিজ্ঞাসা করিলেন।

—বলছি যে আমায় যে নগদ পঞ্চাশ হাজার টাকা দেবার কথা সেটা দিয়ে ছেলেকে আপনার নিজস্ব করে নিন, আমি নগদ কারবারই ভালবাসি।

—কিন্তু আজই তো দেবার কথা নয়। আর এই রাত্রে অত টাকা কি করে দেওয়া যাবে বলুন! নগদ টাকাটা কাল নিলে কি ক্ষতি হবে আপনার!

—ওসব চলবে না চাউজোমশাই, টাকা না পেলে আমি পাত্র উঠিয়ে নিয়ে যাবো।

—উঠিয়ে নিয়ে যাবেন?

বিরাট বিবাহ সভা শুভিত হইয়া গেল। সভা, শিক্ষিত সমাজে এরূপ একটা কাণ্ড ঘটতে পারে, কেহ কল্পনাও করে নাই। মিঃ চ্যাটার্জি রুদ্ধ-বোধ দমন করিয়া বলিলেন—আচ্ছা, যান উঠিয়ে নিয়ে, টাকা দেবো না।

—হেমন—চলে এসো—বলিয়া বরকর্তা ডাক দিলেন। বর তৎক্ষণাৎ হুড়হুড় করিয়া উঠিয়া আসিল। বরকর্তা মিঃ চ্যাটার্জিকে উদ্দেশ্য করিয়া বলিতে লাগিলেন—ফাঁকি দিয়ে বিয়েটি সেরে নিয়ে কাল উনি আমায় কলা দেখাধেন। ওসব চলবে না, চাটুজ্যোমশাই, আমার পণ-এর টাকাটা ফেলে দিয়ে মেয়ে জামাই নিয়ে যা ইচ্ছে করুন! আপনি তো ধনী, টাকাটা না-দেবার কি কারণ থাকতে পারে?

—টাকা দেবো না! মিঃ চ্যাটার্জি সরোষে বলিয়া উঠিলেন।

—আচ্ছা, তাহলে—হেমন, চলে এসো!

বর ও বরকর্তা উঠিয়া গেলেন। সভাস্থ সকলে “আঃ কি করেন ঘোষাল মশাই, বহ্নন”, বলিয়া উঠিলেন, কিন্তু মিঃ চ্যাটার্জি দারোয়ানকে ডাকিয়া বলিলেন,—গুঁরা বেরিয়ে গেছেন? বেশ, গেট বন্ধ করে দাঁও আর যেন না ঢোকেন।

সকলে অবাক হইয়া গেল। মিঃ চ্যাটার্জি খাসকামরায় আসিয়া ডাকিলেন—তোমার বিয়ে এখনো হয়নি তো বাবা?

—আজ্ঞে না। কেন?

—এসো তোমার বাবার সঙ্গে আমার কথা ছিল, তোমাকে আমার জামাই করবো। এতদিন ভুলে ছিলুম, তাই ঈশ্বর আজ ঠিক দিনটিতে তোমায় পাঠিয়ে দিয়েছেন। এস বাবা!

—আমি? আমি কি আপনার মেয়ের যোগ্য?

—নিশ্চয়! তুমিই তার যোগ্য।

ঘণ্টাখানেকের মধ্যে অসামান্য সোমাইটি গার্ল তপতী চ্যাটার্জির সহিত এক নিতান্ত দীনহীন ব্রাহ্মণ যুবকের বিবাহ হইয়া গেল।

তপতীর পুরুষ বন্ধুরা, যাহারা কোশলে এই বিবাহ পণ্ড করিবার জন্য ঘোষাল মহাশয়কে টাকা চাহিতে বলিয়াছিল, বুঝাইয়াছিল যে মিঃ চ্যাটার্জির মতলব ভাল নয়—তাহারা নীরবে দাঁড়াইয়া দেখিল, তপতীকে গ্রহণ করিবার জন্য তাহাদের কাহাকেও ডাকা হইল না। সব আশায় তাহাদের ছাই পড়িল দেখিয়া তাহারা মুণ্ডিত-মস্তক, বোদ্দবদ্ধ গোবেচারী বরের মুণ্ডপাত করিয়া ঘরে ফিরিল। কিন্তু নিশ্চিন্ত রহিল না।

পরদিন সকালে কুশণ্ডিকার পর বরকে জিজ্ঞাসা করা হইল—বাবাজি কতদূর পড়াশুনো করেছো? উত্তরে তপনজ্যোতি জানাইল, অকালে পিতৃবিয়োগ হওয়ায় স্থল হইতে তাকে বিদায় গ্রহণ করিতে হইয়াছে। অবশ্য নিজে বাড়ীতে

সে তাহার পর যৎকিঞ্চিৎ লেখাপড়ার চৰ্চা করিয়াছে। পিতৃবিয়োগের পরবৎসরই মাতৃবিয়োগ হওয়ায় সে অনাথ হইয়া নানা স্থানে ঘুরিয়া বেড়াইয়াছে। সম্প্রতি গয়ায় পিতৃতর্পণ শেষ করিবার সময় পিতার বাস্তবের কাগজপত্রাদি নদীর জলে বিসর্জন দিতে গিয়া মিঃ চ্যাটার্জির দলিলখানি দেখিতে পায় এবং উহাই তাহাকে এখানে আসিতে বাধ্য করে।

শুনিয়া সকলেই স্তম্ভিত হইয়া গেল। তপতী চ্যাটার্জির মত সুন্দরী শিক্ষিত বি-এ পড়া মেয়ের এই কি উপযুক্ত বর! মেয়েরা নাসিকা কুঞ্চিত করিলেন, পুরুষেরা শাস্ত্রনার সুরে বলিলেন, যা হবার হয়ে গেছে—ওকে তো আর চাকরী করতে হবে না। সেই করতে পারলেই চলে যাবে। তপতীর সমবয়সী বন্ধুগণ সামনে সহানুভূতি জানাইয়া অন্তরালে বলিল,—আচ্ছা হয়েছে! যেমন অহঙ্কারী মেয়ে!

তপতী নিজে কিছুই বলিল না। গত রাত্রে ব্যাপারটার আকস্মিকতা তাহাকে প্রায় বিহ্বল করিয়া দিয়াছিল। ভাবিতে ভাবিতে কখন সে ঘুমাইয়া পড়িয়াছিল, বরের সহিত আলাপ করা হইয়া উঠে নাই। পিতা তাহাকে নিশ্চয়ই অযোগ্যের হাতে দিবেন না, এই বিশ্বাসই তাহার ছিল, আজ কিন্তু সমস্ত শুনিয়া পিতার বিরুদ্ধে তাহার মন বিদ্রোহী হইয়া উঠিল। কিন্তু এখন আর কিছুই করিবার নাই।

মিঃ চ্যাটার্জি ও মিসেস চ্যাটার্জি হুঃখিত হইলেন। জিদের বশে তিনি যাহা করিয়াছেন, তাহার জ্ঞাত অতীত হইলেন, কিন্তু নিকৃপায়েব শাস্ত্রনা স্বরূপ তিনি ভাবিলেন, তাহার জামাতাকে তো কেবাগীগিরি করিতে হইবে না। নাইবা হইল সে বি-এ, এম-এ পাশ। কতাকে ডাকিয়া তিনি শুধু বলিলেন, খুকী, তোর বাবার অপমানটা ও বাঁচিয়েছে, মনে রাখিস।

খুকী তথাপি চুপ করিয়া রহিল এবং পরীক্ষার পড়ায় মনোযোগ দিবার জ্ঞাত পার্শ্বগৃহে চলিয়া গেল।

তপনজ্যোতি জানাইল,—সে যেখানে থাকে তাহাদিগকে বলিয়া আসা হয় নাই, অতএব সে আজ যাইতেছে, আগামীকাল সকালে ফিরিয়া আসিবে।

উৎসবগৃহ ধীরে ধীরে স্তিমিত হইয়া গেল।

ফুলশয্যার রাত্রে স্তম্ভিত প্রকোষ্ঠের সংলগ্ন বারান্দায় একথানা সোফা পুষ্প-পত্র দিয়া সাজান হইয়াছে। চন্দ্রালোকে তাহা স্নিগ্ধ হইয়া বর-বধূর অপেক্ষা করিতেছে। তপনজ্যোতিকে আনিয়া সেখানে বসানো হইল। দুই চারজন বসিকা তাহার সহিত রহস্যলাপের চেষ্টাও করিল, কিন্তু তপনজ্যোতি বিশেষ কোন সাড়া দিল না। সকলেই বুঝিল—পাড়াগাঁয়ের ছেলে, কথা কহিতে জানে

না। বিরক্ত হইয়া সকলে চলিয়া গেল। তপনজ্যোতি তখন ভাবিতেছিল, যাহাকে সে বিবাহ করিয়াছে, কেমন সে, তপনজ্যোতিকে সে গ্রহণ করিতে পারিবে কি না। মন তাহার এতেই উন্মনা হইয়া উঠিয়াছে যে অন্ধ কাহ্নরও সহিত কথা বলা প্রায় অসম্ভব হইয়া পড়িয়াছে। অধীর চিন্তে সে বধূর অপেক্ষা করিতে লাগিল। সঙ্গিনীগণ তপতীকে লইয়া আসিল। তপনের হৃদয় নবোঢ়া বধূর মতোই দুরু দুরু করিয়া উঠিল। তপতী কিন্তু সঙ্গিনীগণকে দরজা হইতেই বিদায় করিয়া দিয়া ঘরে ঢুকিল এবং যে বারান্দাটুকুতে বর বসিয়াছিল, তাহার ও ঘরের মধ্যকার দরজাটি সজোরে বন্ধ করিয়া দিয়া যেন তপনকে বুঝাইয়া দিল যে, শয়নক্ষেত্রে বরের প্রবেশ নিষেধ।

কাচের সার্শির মধ্যে চাহিয়া তপন দেখিতে লাগিল, তপতী শয়নের বেশ পরিধান করিল; তারপর উজ্জল আলোটা নিবাইয়া দিয়া স্নিগ্ধ নীল আলো জ্বলাইল এবং সটান শয্যা লুটাইয়া পড়িল।

তপন স্তম্ভিত! অনেকক্ষণ পরে তাহার মনে হইল, হয়ত তপতী জানে না যে, সে এখানে বসিয়া আছে। ধীরে ধীরে সে রুদ্ধ দরজার বাহিরে করাঘাত করিয়া ডাকিল,—তপতী! দরজাটা খোল!

তপতী পিছন ফিরিয়া শুইয়াছিল। তেমনি ভাবেই জবাব দিল,—এখানেই থাকুন।

তপনের সমস্ত ইন্দ্রিয়গ্রাম বিমূঢ় হইয়া আসিতে লাগিল। তবে তো তাহার আশঙ্কাই সত্য হইয়াছে। তপতী তাহাকে গ্রহণ করিবে না। তাহার পঞ্চবিংশ বর্ষের নির্মল নিষ্কলুষ প্রেমকে তপতী এমন দৃঢ়ভাবে প্রত্যাখ্যান করিল! কিন্তু কি কারণে! অর্থাভাবে সে কলেজে পড়িতে পারে নাই, কিন্তু পড়াশুনা সে যথেষ্টই করিয়াছে এবং এখনো করে। এই কথা সে আজ নিজে তপতীকে জানাইবে ভাবিয়াছিল, কিন্তু শুরুতেই তপতী তাহাকে এমনভাবে বাধা দিল যে কিছুই আর বলিবার উপায় রহিল না। নীরবে সে ভাবিতে লাগিল, তাহাকে গ্রহণ না-করিবার কি কি কারণ তপতীর পক্ষে থাকিতে পারে। সে ভিগ্রীধারী নয়, কিন্তু পড়াশুনা সে ভালই করিয়াছে এবং সে-কথা গতকল্য যতদূর সম্ভব জানাইয়াছে। অবশ্য আশ্বস্তাঘা করা তাহার প্রকৃতিবিরুদ্ধ। তাই যথাসম্ভব বিনয়ের সহিত জানাইয়াছে। দ্বিতীয়, সে পল্লীগ্রামে জন্মিয়াছে কিন্তু সে তো শহরবাসের অভিজ্ঞতাও লাভ করিয়াছে। তৃতীয়, ব্রাহ্মণস্বের গোড়ামী তাহার একটু বেশী, তপতী একথা মনে করিতে পারে—কিন্তু বি-এ পড়া মেয়ের পক্ষে কাহাকেও কিছুমাত্র চিনিবার চেষ্টা না করিয়াই একটা বিরুদ্ধ ধারণা করা কি ঠিক! তপনের চেহারা এমন কিছুই খারাপ নয় যে তপতীর চক্ষু পীড়িত হইবে।

বরং চেহারার প্রশংসাই তপন এতাবৎকাল শুনিয়াছে। তবে হইল কি ?

স্নিগ্ধ জ্যোৎস্নালোকে তপনের ছুটি চক্ষু জ্বালা করিয়া উঠিল। জীবনের কত সাধ, কত আশা আজই বুঝি চূর্ণ হইয়া যাইতেছে। তপনেরই অন্তর-বেদনা যেন শিশিরে শিশিরে ঝরিতেছে। কিন্তু এই গভীর বেদনাকে এত শীঘ্র বরণ করিয়া লইবে তপন ! নাঃ—আর একবার চেষ্টা করিয়া দেখা যাক। তপন বলিতে চাহিল,—ওগো, তুমি যাঁহা মনে করিয়াছ, তাহা আমি নহি, আমায় স্বযোগ দাও, আমি তোমার যোগ্য হইবার চেষ্টায় জীবনপাত করিব।

তপন পুনরায় উঠিয়া দেখিতে লাগিল, তপতীর শয্যালুপ্তিত স্নকোমল দেহখানি। তপতী ঘুমাইয়া গিয়াছে। স্নদীর্ঘ বেগী ছুটি পিঠের উপর দিয়া নামিয়া কোমরের নীচে তলাইয়া গিয়াছে, যেন দুইটি কৃষ্ণকায় সর্প তাহাকে পাহারা দিতেছে। স্নত্বস্তির স্নদীর্ঘ নিশ্বাস তপনকে জানাইয়া দিল—তপতী তাহার নহে, তাহার হইলে এত সহজে, এত নিরুদ্ধেগে সে এমন করিয়া ঘুমাইতে পারিত না।

চর্কিতে তপনের মস্তিষ্কে একটা বিভ্রাৎচিন্তা খেলিয়া গেল। তবে, তবে হয়ত যাহার সহিত তপতীর বিবাহ হইল না, তাহাকেই সে ভালবাসে—কিন্তু—ভাবিতে গিয়া তপন অন্তরে শিহরিয়া উঠিল। যুগসঞ্চিত হিন্দুসংস্কারে গঠিত তাহা-মন যেন কোন অতল বিষ-সাগরে ডুবিয়া যাইতেছে। একি হইল ! তাহার স্নন্দর স্ননির্মল জীবনে এ কার অভিশাপ ! সে তো ইহা চাহে নাই। ধনীর কন্যাকে বিবাহ করিবার লোভ তাহার কোনদিন ছিল না। কিন্তু যাক—তপন স্থির করিয়া ফেলিল, তপতীকে কিছুই সে বলিবে না। তাহার বাস্তবিকে—যদি অবশ্য তপন ব্যতীত অপর কেহ তাহার বাস্তবিত হয়—ফিরিয়া পাইতে তপন সাহায্য করিবে।

তপন সেই যে ভোরে উঠিয়া গিয়া তাহার জন্ম নির্দিষ্ট কক্ষটিতে শয়ন করিয়াছে, বেলা বায়োটো বাজিয়া গেল, এখনো ওঠে নাই। প্রথমে সকলেই ভাবিয়াছিল, ইহা বধুর সহিত রাত্রি জাগরণজনিত অনিদ্রার আলম্ব। কিন্তু তপতী দিবা ঘুরিয়া বেড়াইতেছে, তাহার দেহমানে ক্লাস্তির কোন লক্ষণ নাই দেখিয়া মা জিজ্ঞাসা করিলেন,—হাঁরে তপন কখন ঘরে গিয়ে শুয়েছে ? এখনো উঠছে না কেন ?

—আমি তার কি জানি। বলিয়া তপতী অগত্যা চলিয়া গেল।

ইহাকে নবোন্মার লজ্জা মনে করিয়া সকলেই হাসিয়া উঠিল। কিন্তু মা চিন্তিত মুখে তপনের ঘরে আসিয়া দেখিলেন,—গা অত্যন্ত গরম—তপন চোখ বুজিয়া পড়িয়া আছে। প্রথম ফুলবাসরের পরেই জামাইয়ের অব—আধুনিক

সমাজের মধ্যে বাস করিয়াও তপতীর মা'র মনের সাধারণ বান্দালী মেয়ের সংস্কার ইহাকে অমঙ্গল-সূচক মনে করিল। ব্যগ্র ব্যাকুল ভাবে তিনি জিজ্ঞাসা করিলেন—জ্বর কেন হোল বাবা? কখন থেকে হোল?

তপন চক্ষু মেলিয়া চাহিয়া দেখিল, শিয়রে জ্যোতির্ময়ী জননীমূর্তি। তাহার চিরদিনের স্নেহবুভুক্ষু মন কাঁদিয়া উঠিল—

“স্নেহ-বিহ্বল করুণা ছলছল শিয়রে জাগে কার আঁখিরে”।

তপন বিস্মিত হইয়া ভাবিতে লাগিল, এই মা, আর ঐ তাঁর মেয়ে। ইহা অপেক্ষা বিশ্বয়ের ব্যাপার তপন জীবনে আর দেখে নাই। দ্বিধা শিশুকণ্ঠে সে উত্তর দিল—একটু ঠাণ্ডা লেগেছে মা, কিছু ভয়ের কারণ নাই, একটা দিন উপোষ দিলেই সেরে যাবে!

—ডাক্তার ডাকি বাবা। জননীর স্নেহকরপুট তপনের ললাটে নামিল।

—না মা ওষুধ আমি খাইনে—কিছু ভাবনা নেই আপনার। আমি কালই ভালো হয়ে যাবো মা—আপনার মঙ্গল হাতের ছোঁয়ায় অস্থ কতক্ষণ টিকতে পারে?

পুত্রবক্ষিতা শিক্ষিতা জননী এমন করিয়া মা ডাক কোনদিন শুনে নাই। অন্তর তাঁহার বিমল মাধুর্যে ভরিয়া উঠিল।

আপনার গর্ভজাত পুত্রের স্থানেই তিনি তপনকে সেই মুহূর্তে বরণ করিয়া লইলেন, বলিলেন—কি খাবে বাবা, মাঝু?

—না মা, মাঝু আমি খেতে পারি নে, বেড়াচির মত দেখতে লাগে।

—আচ্ছা বাবা, একটু গ্লাকসো দিই।

—শুধু একটু গরম দুধ দেবেন মা,—এ বেলা আর কিছু খাবো না। আর আমি একা শুয়ে থাকবো—আপনার খুকীর বন্ধুরা যেন আমায় জ্বালাতন না করে এইটুকু দেখবেন।

—আচ্ছা, আমি বারণ করে দেবো।

মা চলিয়া গেলেন, তপন শুইয়া শুইয়া ভাবিতে লাগিল। কুলহীন পারহীন চিন্তা-সমুদ্রে সে যেন তলাইয়া যাইতেছে। কিরূপে আত্মরক্ষা করিবে আজ? এতাবৎকাল সে নিজের জীবনকে যে ভাবে গঠিত করিয়াছে তাহাতে তপতীকে বিবাহ করিবার পর অল্প কাহাকেও গ্রহণ করা তাহার কল্পনারও অতীত, অথচ তপতীকে পাইবার সমস্ত আশাই বুঝি নিমূল হইয়া গেল? কিন্তু মা! আশ্চর্য ঐ মহিমাযমী নারী উহার গর্ভে জন্মিয়াছে সে, যাহাকে গত রাত্রে তপন দেখিয়াছে। যে নিষ্ঠুরা নারী শীতের রাত্রে একজনকে বাহিরের বারান্দায় রাখিয়া নিশ্চিন্তে নিরুদ্বেগে ঘুমাইতে পারে! কিম্বা তপন ভুল দেখিয়াছে, সে ইহার কথা নহে। কিন্তু যতদূর মনে হয়, ইনিই মা এবং এই সংসারের কর্ত্তা।



ইহারই কথায় এত নির্ভর হইল কিরূপে ? হিন্দুনারী হইয়াও আপনার স্বামীকে বুঝিবার চেষ্টা পর্যন্ত করিল না, বুঝাইবার স্বেচ্ছা পর্যন্ত দিল না ! ইহার অন্তর্নিহিত রহস্য যতই ভীতিপ্রদ হউক, যেমনই কদর্য হউক, তখন তাহাকে আবিষ্কার করিবে । তারপর যথা কর্তব্য করা যাইবে ।

ভাবিতে গিয়া তখন আতঙ্কিত হইয়া উঠিল ।—যদি সে দেখে তপতী অস্বাস্থ্য, তপতী তাহার অন্তরে অপরের মূর্তি আঁকিয়া পূজা করিতেছে—তখন কি করিবে ? ভাবিতে গিয়া তপনের মনে হইল—হয়ত তাহাই সত্য, তখনকে তাহাই সহ্য করিবার জ্ঞান প্রস্তুত থাকিতে হইবে এবং তপতীকে স্বেচ্ছা দিতে হইবে তাহার ব্যক্তিগত লাভ করিবার জ্ঞান । বর্তমানে ইহা অপেক্ষা আর অধিক কিছুই ভাবিবার নাই । যদি সত্যই সে কাহাকেও ভালবাসে তবে তাহাকেই লাভ করুক । অকৃত্রিম তাহার কুমারী-হৃদয় একদিন তপনের কাছে ফিরিয়া আসিবে—সেই শুভদিনের জ্ঞান অপেক্ষা করিবে তপন । যদি তাহাও না হয় তবে তপনের জীবন—সে তো চিরদিনই দুঃখের তিমির-গর্ভে চলিয়াছে, তেমনিই চলিবে ।

ক্লান্ত তপন কখন এক সময় ঘুমাইয়া পড়িল ।

শহরতলীর সর্পিলা পথ ধরিয়া চলিয়াছে বিনায়ক । মন তাহার বিবাদধিন্ন । তার একমাত্র অভিন্ন-হৃদয় বন্ধু তপনের অন্তরে বিদ্যাক্ত কণ্টক বিদ্ধ হইয়াছে । সে কাঁটা তুলিয়া ফেলার উপায় বাহির করা সহজ নহে, কারণ তুলিতে গেলে তপনের হৃদপিণ্ডটিকে জখম করিতে হয় । বিনায়ক ভাবিতেছে আর চলিতেছে । দিকে দিকে বাসন্তী শ্রী ফুটিয়া উঠিতেছে ; মাঘ মাসের শেষ হইয়া আসিল । সরস্বতী পূজা, কিন্তু পূজার শ্রেষ্ঠ পুরোহিত তপন আসিবে না । বিনায়কের মন বিদ্রোহী হইয়া উঠিল তপনের বিরুদ্ধে । কেন সে না দেখিয়া গুনিয়া বিবাহ করিতে গেল ? মিঃ চ্যাটার্জির বিষয়-সম্পত্তির প্রতি তো তপনের লোভ নাই । লোভ তাহার কিছুতেই নাই । আজ দ্বাদশ বৎসর বিনায়ক তপনকে দেখিয়া আসিতেছে । অথচ সেই তপন কিনা এক কথায় মিঃ চ্যাটার্জির মেয়েকে বিবাহ করিয়া বসিল ? যেমন কর্ম তেমনি ফল হইয়াছে । নইলে সারা বাংলা দেশে তপনের মত ছেলের বধু যোগাড় করা কিছুই কঠিন ছিল না ।

বিনায়ক গভীর দুঃখের মধ্যে আত্মবঞ্চনার শাস্তি লাভ করিতেছে, তাহার হাসি পাইল নিজের বোকামির জ্ঞান । তপন কোনদিন বিনা কারণে কিছুই করে না । তপনের হৃদয়, আকাশের তপনের মতই জলন্ত, জাগ্রত, জ্যোতির্ময় ।

কারখানায় আসিয়া পড়িল বিনায়ক। খেলনা তৈয়ারীর ছোট কারখানা। তপনের মস্তিষ্কউদ্ভূত নানাপ্রকার খেলনা তৈরী হয় শিশুমনের উৎকর্ষতার উপযোগী করিয়া। তপনই ইহার জনক এবং বিনায়ক তাহার মালিক ও পরিচালক। তপন নিজের খাওয়া পরার যৎসামান্য খরচ ছাড়া কিছুই গ্রহণ করে না। কারণ সে একা, তাহার খরচ খুবই কম, আর বিনায়কের মা-ভাই-বোন আছে, বাড়ী ভাড়া করিয়া থাকিতে হয় এবং বাজার করিয়া খাইতে হয়।

বিনায়ককে একা আসিতে দেখিয়া শ্রমিকবর্গ উৎকণ্ঠিত হইয়া কহিল, ছোট্টা কই বড়দাদাবাবু?

প্রাস্তকণ্ঠে বিনায়ক উত্তর দিল—অস্থস্থ। তোমাদের জন্ত মা'র কাছে প্রার্থনা জানিয়ে ছু'লাইন কবিতা পাঠিয়েছে—

“দীর্ঘ জীর্ণ জীবনে তোমার বাসন্তী বিভা ছড়ায়ে দিও,

—দুঃখ-আর্ত বঞ্চিত প্রাণে নব যৌবনে আশ্বাসিও।”

এইবার এসো ভাই সব, পূজায় বসি।

সকলেই ক্ষুধা হইল, উদ্বিগ্ন হইল কিন্তু পূজার সময় হইয়াছে। বিনায়ক পূজায় বসিল। করজোড়ে কর্মীগণ উপবিষ্ট রহিল।

পূজা শেষে প্রসাদ বিতরণ করিয়া বিনায়ক বলিল—তোমাদের ছোট্টা ছু'চারদিন আসতে পারবে না ভাই সব, অস্থস্থের জন্ত নয়, অল্প কারণ আছে। ভেবো না তোমরা।

—তিনি ভালো আছেন তো?

—হ্যাঁ, সামান্য সর্দি মত হয়েছে।

বিনায়ক একাকী ফিরিয়া চলিল। দুই পাশে কচুরীপানার জঙ্গল শুকাইয়া উঠিয়াছে। দূরে দূরে দুই একটা গাছে লাল ফুল ফুটিতেছে। বাসন্তীর আগমনে সবই যেন লাল হইয়া যায়, এমন কি তপনের হৃদয়টাও আজ রক্তে রাঙা হইয়া উঠিয়াছে। বিনায়ক নিঃশ্বাস ফেলিল একটা।

তপন, তাহার বাল্যবন্ধু তপন—জীবনে যে কোনদিন কোনরূপ অসৎ কার্য করে নাই, কাহারও মনে বেদনা দেয় নাই, জীবন পণ করিয়া যে পরোপকারবৃত্তি অবলম্বন করিয়াছে, সেই তপনের জীবনে এমন ছু'বিপাক কেন ঘটিল? তপন না থাকিলে মাতা-ভ্রাতা-ভগিনীকে লইয়া বিনায়ক আজ ভাসিয়া যাইত। এম-এ পাশ করিয়াও যখন চল্লিশ টাকার চাকুরী জুটিল না তখন একদিন নিরাশ নয়নে গড়ের মাঠে বিনায়ক বসিয়া ভাবিতেছিল, আত্মহত্যা তাহাকে করিতে হইবে। ঠিক সেই সময় তপন রাস্তার উপর দাঁড়ানো মোটরগাড়ীর আরোহীগণকে বিক্রয় করিতেছিল তাহার স্বহস্তের প্রস্তুত খেলনা। বিনায়ককে ক্লান্ত অবসাদমগ্ন

দেখিয়া সেই তো এই কারখানার পত্তন করে নিজের হাতের আংটি বেচিয়া। সেদিন ছিল তিন টাকা ভাড়ার একটি চালাঘর এবং দুইজন শ্রমিক বিনায়ক আর তপন। সে আজ আট বৎসর পূর্বের ঘটনা। আজ এই কারখানায় পঞ্চাশ জন শ্রমিক কাজ করে। প্রস্তুত খেলনা বিদেশী খেলনার সহিত প্রতিযোগিতা করে। নীট্ট আয় মাসিক দুই শত টাকার কম নয়।

কিন্তু তপন ইহার কতটুকু অংশ গ্রহণ করিয়াছে। মাসে পনের টাকাও সে গ্রহণ করে নাই, বিনায়কের সংসার পালনের জন্ত দান করিয়াছে। এই অসাধারণ বন্ধুবৎসল তপন আজ ভাগ্যের ফেরে ক্ষতচিহ্ন, আতঁহুদয়—অথচ বিনায়ক তাহার কোন উপকার করিতে পারে না! হয়ত পারে! বিনায়ক দ্রুত পা চালাইয়া নিকটবর্তী একটি দোকানে আসিয়া কয়েক আনা পয়সা দিয়া ফোন করিল।

অস্থস্থ তপন আসিয়া ফোনে বলিল—কি বলছিস বিহু?

—তুই আত্মপরিচয় কেন দিবিনে তপু—তাহলে সে তোকে ভালবাসবে।

—না, তার দরকার নাই। যে আমায়, কুৎসিত দেখে ভালবাসলে না, সে আমায় স্তম্ভর দেখে ভালবাসতে পারে না, যে আমায় মূর্খ ভেবে গ্রহণ করলে না, আমাকে পণ্ডিত দেখে গ্রহণ করবার তার আর অধিকার নেই। যদি সে অন্য কাউকে চায় তবে তারই হাতে গুকে তুলে দেবো।

—কিন্তু তাহলে—

—থাক বিহু—এসব কথা ফোনে হয় না।

তপন ফোন ছাড়িয়া দিয়াছে। বিনায়ক গভীর শান্তিতে এলাইয়া পড়িল। বাড়ী আসিয়া যখন সে পৌঁছিল তখন একটা বাজিয়া গিয়াছে এবং স্নেহময়ী জননী তাহার আহাৰ্ধ লইয়া বসিয়া চুলিতেছেন।

বিনায়ক থাইতে বসিল।

তপতী চ্যাটার্জি সাবানঘষা একরাশ চুলে লাল ফিতা বাঁধিয়া বাসন্তী রং-এর কাপড় পরিয়া সেতার কোলে চলিয়াছে কলেজ-হোষ্টেলে সরস্বতী পূজা করিবার জন্ত। সেখানে সে গাছিরে, নাচিবে এবং রূপের বিদ্যাতে সকলকে চমকিত করিয়া দিবে।

মা বলিলেন—খুকী, তপন ওঘরে সরস্বতী পূজা করছে যা প্রণাম করে আয়।

নাক বাঁকাইয়া তপতী কহিল,—তুমি যাও, আমার প্রণাম করিবার ঢের জায়গা আছে।

তপতী গিয়া গাড়ীতে উঠিল। তপতীর দুই একজন বন্ধু, যাহারা তাহাকে ডাকিতে আনিয়াছিল, তাহারা কিন্তু তপনকে একবার দেখিবার লোভ সম্বরণ করিতে পারিল না। তপনের কক্ষদ্বারে গিয়া দেখিল, ফোম বস্ত্র-পরিহিত, উত্তরীয়-আবৃত দেহ তপন পিছন ফিরিয়া পূজা করিতেছে। তাহার মুণ্ডিত মস্তকের উপর লাউয়ের বোঁটার মত টিকিতে একটা গাঁদা ফুল। তরুণীর দল আর স্থির থাকিতে পারিল না। একটা ছোট কাঁচি আনিয়া তপনের টিকিটি আমূল ছাঁটিয়া দিল। হাসির উচ্ছল শব্দে মুখ ফিরাইয়া তপন দেখিল, ঘরে চাঁদের হাট। সে পুনরায় মুখ ফিরাইয়া পূজা করিতে লাগিল। তাহার চন্দন-চর্চিত মুণ্ডিত মুখশ্রী আধুনিক আলোক-প্রাপ্তাদের মোটেই ভাল লাগিল না। তাহার উপর তপন কয়েকদিনের অসুস্থতার জন্য দাড়ি কামায় নাই, ইহা তাহার দ্বিতীয় অপরাধ। সর্বোপরি সে যে পুস্তকখানির উপর পুষ্পার্ঘ অর্পণ করিতেছিল, সকলে সবিস্ময়ে দেখিল, লালচে রং-এর কাগজের মলাটে তাহার নাম লেখা “হারু ঠাকুরের পাঁচালী।”

ঐ বটতলার নিদারুণ অশ্রীল বই তপন পড়ে এবং সরস্বতী পূজার জন্য উহারই উপর পুষ্পাঞ্জলি অর্পণ করে, ইহা অপেক্ষা কদর্ঘতার পরিচয় আর কি হইতে পারে! উহার আর কোন বই নাই, আর কিছু পড়িবার যোগ্যতা নাই! কি হইবে উহার সহিত রসিকতা করিয়া। তরুণী দল বাহিরে আসিল মুখ টেপাটেপির হাসিতে। তপতীর অদৃষ্ট সম্বন্ধে যাহারা এতাবৎ ঈর্ষাপরায়ণা ছিল, তাহারা বেশ একটু আত্মপ্রসাদ লাভ করিল, তপনের অর্বাচীনতাটা তাহারা আজ আবিষ্কার করিয়া ফেলিয়াছে।

গাড়ীতে বসিয়া তপতী বিরক্তিতে তিল হইয়া উঠিতেছিল। বন্ধুর দিয়া কহিল—এরকম দেবী করলে যাবো না আমি। রেবা মুহু হাসিয়া বলিল,—দেখে এলাম তোর বর—পাঁচালী পড়ছে। এবার সচিত্র প্রেম পস্তর আউড়ে চিঠি দেবে তোকে—“মাও পাখী বলো তাকে—”

সকলে খিলখিল করিয়া হাসিয়া উঠিল। একজন তপনের কর্তিত টিকিটি আনিয়াছিল, তপতীর অঞ্চল-বিদ্ধ ব্রোচটিতে সেই টিকিটি আটকাইয়া দিয়া কহিল—তোর বরের মাথার ধ্বজা—রাখ বুকে গুঁজে!

আবার হাসি! রাগে তপতীর যেন বাকরুদ্ধ হইয়া গিয়াছে; বোধকণায়িত নয়নে সে ড্রাইভারকে ধমক দিল—জলদি চালাও—জলদি! বান্ধবীদের মধ্যে একজন সহানুভূতি দেখাইয়া কহিল,—তপু, কি করে জীবনটা কাটাবি তুই?

অগ্নজন বলিল,—রিয়েলি, উই আর সো স্মরি।

তৃতীয়া বলিল,—মন্দই বা কি ভাই! বেশ হুকুম মতো চলবে, গা-হাত-পা

টিপে দেবে, মাঝে মাঝে পাঁচালী-পড়ে শোনাবে, দরকার হলে রান্না-বাঁধাটাও—

হো হো করিয়া হাসিতে হাসিতে আর একজন বলিল,—চেহারাটাও ঠিক রাঁধুনি বামুনের মতন।

তপতীর আপাদমস্তক জলিতেছে, কিন্তু উপায় নাই। ইহারা যাহাকে দেখিয়া আসিয়াছে, সে ঐরকমই নিশ্চয়, বিরুদ্ধে তপতী কিছুই বলিতে পারে না। তাহার যত রাগ গিয়া পড়িল তাহার বাবার উপর। বাবা তাহার একি করিলেন? একটা নিতান্ত অশিক্ষিত, সভ্য সমাজে অপাংক্বেয় ছেলের সহিত তপতীর বিবাহ দিলেন। আশ্চর্য! ইহাই যদি বাবার মনে ছিল তবে তপতীকে তিনি এত লেখাপড়া শিখাইলেন কেন? তপতী তো ঠাকুরদার কাছে যতটুকু লেখাপড়া শিখিয়াছিল তাহাতেই বেশ চলিত। ঠাকুরদা মারা যাওয়ার পর তপতীকে কলিকাতায় আনিয়া তিনি কলেজে ভর্তি করিয়াছেন। তাহার জন্ম গানের মাষ্টার বাথিয়াছেন, নাচের মাষ্টার বাথিয়াছেন। পাঁচটা মাতটা ক্লাবে তাহাকে ভর্তি করিয়া দিয়াছেন, এক কথায় সম্পূর্ণ আধুনিক হাঁদে তপতীকে গড়িয়া তুলিয়াছেন, তাহা কি ঐ পাঁচালী পাঠকারী টিকিওয়ালা গণ্ডমূর্খের জন্তাই! বেশ—তপতী ইহার শোধ তুলিয়া তবে ছাড়িবে।

তপতীর ব্যবহার কয়েকদিন মিসেস চ্যাটার্জি লক্ষ্য করিতেছিলেন। আজ তাহার মুখে বিজ্রোহের বাণী শুনিয়া তিনি শঙ্কিত হইয়াই অপেক্ষা করিতেছিলেন। গভীর রাত্রে বাড়ী ফিরিয়া তপতী নীমাহীন তিস্ততার সহিত জানাইল, আমার বন্ধুরা তোমার জামাইয়ের কাছে যেন না যায়, বুঝেছো—তা হলে আমায় বাড়ীছাড়া হতে হবে।

—কেন? মা শিথুকণ্ঠেই প্রশ্ন করিলেন।

—কেন! তপতীর কণ্ঠে অগ্ন্যুদগার হইল—কেন, তা জানো না! একটা হতভাগ্য মূর্খ লোককে ধরে এনেছো—টিকি রাখে, পাঁচালী পড়ে—আবার কেন! লজ্জা করলো না জিজ্ঞাসা করতে?

মা নিঃসহায় বোধ করিতে লাগিলেন। মুহূর্তে সামলাইয়া কহিলেন,—গয়ায় পিণ্ডি দিয়ে এসেছে, তাই টিকি রয়েছে, ওটা তুই ছেঁটে দিস।

—তুমি ছাঁটো গিয়ে, ধুয়ে ধুয়ে জল খাবে—আর পাঁচালী শুনবে—

—পাঁচালী পড়তে আমি বারণ করে দেবো, থুঁকী।

—কিছু তোমার করতে হবে না, শুধু এইটি করো যেন আমার কোন বন্ধুর সঙ্গে তার দেখা না হয়, তা'হলেই বাধিত থাকবো।

তপতী রোষভরে শয়নকক্ষে চলিয়া গেল। মা একবার তপনের কক্ষে

আসিয়া উকি দিয়া দেখিয়া গেলেন, ক্লান্ত অল্পস্থ তপন একক শয্যায় ঘুমাইতেছে। কক্ষের মৃদু আলোক তাহার প্রশস্ত ললাটে আসিয়া পড়িয়াছে—যেন রূপকথার রাজপুত্র, সোনার কাঠির ছোঁয়ায় এখনি জাগিয়া উঠবে। মিসেস্ চ্যাটার্জি একটা নিশ্বাস ফেলিয়া ভাবিলেন, এমন হৃদয় ছেলে, লেখাপড়া কেন যে শেখে নাই। পর মুহূর্তেই মনে পড়িল তপনের দারুণ অবস্থা-বিপর্যয়ের কথা। পিতার মৃত্যুর পর পিতৃহীন হইয়া তপনকে পাঠ্য পুস্তক বেচিয়া বাড়ী ফিরিতে হয়। কিন্তু কি-ই-বা উহার বয়স? এখনো তো পড়াশুনা করিতে পারে।

মিসেস্ চ্যাটার্জি স্বামীর কক্ষে আসিলেন। মিঃ চ্যাটার্জি এখনও তাহার অপেক্ষায় জাগিয়া ছিলেন, জিজ্ঞাসা করিলেন,—থুকী ফিরেছে?

—হ্যাঁ, এইমাত্র ফিরলো।

মিঃ চ্যাটার্জি নিজের আয়োজন করিতেছেন। মিসেস্ চ্যাটার্জি কয়েক মিনিট থামিয়া বলিলেন,—থুকী কিন্তু তপনকে মোটেই পছন্দ করছে না।

বিশ্বয়ের দ্বারে মিঃ চ্যাটার্জি কহিলেন,—কেন! অপছন্দের কি কারণ?

—ছেলেটাকে আমার তো খুব ভাল লাগছে গো, তবে লেখাপড়া ভালো জানে না, পাঁচালী, ছড়া, এইসব নাকি পড়ে! থুকী তো এই ক’দিনে একবারও তার কাছে যায় নি। কতবার বললাম, জর হয়েছে, একবার যা, কাছে গিয়ে বোস, তা কথাই কানে তুললো না। আজ আবার এসে বললো, তার বন্ধুরাও যেন ওর কাছে না যায়। আমি বাবু বেশ ভাল মনে করছি না, অতবড় মেয়ে।

পত্নীর এতগুলি কথার উত্তরে মিঃ চ্যাটার্জি হাসিয়া উঠিলেন, পরে বলিলেন,—থুকীর পরীক্ষাটা হয়ে যাক—তারপর দেখে নিও। ও ছেলেকে আমি ছেলেবেলা থেকে জানি, আর জানতাম ওর বাবাকে। সেই বাপের শতাংশের এক অংশও যদি পেয়ে থাকে, তা হলে ও হবে অসাধারণ।

—কিন্তু থুকী ওর সঙ্গে মিশছেই না—বলে, মূর্খ, পাড়াগোয়ে।

—মূর্খ তো নয়ই, পাড়াগোয়েও নয়। আমি দুচাঁরটা কথা কয়েই বুঝেছি। কিছু ভেবে না তুমি, আমি ওকে পরশু থেকেই আমার ব্যবসায় লাগাব, আর তোমার থুকী ইতিমধ্যে পরীক্ষাটা দিয়ে নিষ্ক। তারপর দুজনকে শিলংএ নতুন বাড়ীটাতে দেব পাঠিয়ে—স্বাভিক হয়ে যাবে।

—আচ্ছা, পাঁচালী, ছড়া এসব পড়ে কেন? ইংরাজী না জাহুক বাংলা ভালো বই, মাসিকপত্র, এসব তো পড়তে পারে?

—তুমি বোলো সে কথা। আর ইংরাজী যে একেবারে জানে না, তা তো নয়, যা জানে তাতে আমার অফিসের কাজ চলে যাবে। আর তোমার ঐ আধুনিক সমাজের ধারাদ্বয় শিখতে মাসখানেকের বেশী লাগে না। আমি

ওকে আপ-টু-ডেট করে দিচ্ছি। ভেবো না তুমি।

মিসেস্ চ্যাটার্জি কতকটা আশ্বস্ত হইয়া শয়ন করিলেন।

পরদিন মিসেস্ চ্যাটার্জি তপনকে চা খাওয়াইতে বসাইয়া বলিলেন,—তুমি পাঁচালী কেন পড় বাবা? খুকীর বিস্তর মাসিক পত্রিকা আছে—সেইগুলো পড়ো। ভাল বাংলা বই পড়ো, বুঝলে।

উত্তরে তপন স্মিত হাস্তে কহিল,—পাঁচালী বাংলার আদি সাহিত্য মা, ওর ওপর এত রাগ কেন আপনাদের।

—না বাবা, আজকাল ওগুলো আর চলে না কিনা, তাই বলছি আধুনিক সমাজে ওর কদর নেই।

—কিন্তু আমি আধুনিক নই মা, অত্যন্ত প্রাচীন, আপনার শ্বশুরের মতন প্রাচীন। আর ঐ পাঁচালীখানা আপনার শুশ্রমশায়ের—আপনারই বাড়ীতে পেয়েছি কাল।

শিঙ মধুর হাসিয়া মিসেস্ চ্যাটার্জি বলিলেন,—ওঃ তাই বলো বাবা তুমি শ্বশুর—আবার ফিরে এলে বুঝি?

তখন মৃদু হাসিয়া বলিল,—হ্যাঁ মা, এবার ছেলে হয়ে এলাম।

মিসেস্ চ্যাটার্জি যে সমাজে বাস করেন সে সমাজে একুশ কথা চলন বিশেষ নাই, সেখানে কথা-বাতীর শ্রোত আন্তরিকতাহীন কৃত্রিমতার মধ্যে বহিয়া যায়। কিন্তু সে সব ছেঁদো কথা এমন করিয়া তো মনকে আকর্ষণ করে না, এ যেন নিমেষে আপন করিয়া লয়। তপন যেন ক্রমশঃ তাঁহার পুত্রহীনতার স্থানটিকে জুড়াইয়া দিতেছে। এমন সুন্দর ছেলেকে খুকী তাঁহার গ্রহণ করিবে না! নিশ্চয় করিবে। খুকীর পরীক্ষাটা হইয়া যাক—তারপর মিসেস্ চ্যাটার্জি খুকীর উপর চাপ দিবেন। তপন তো বাড়ীতেই রহিল। ব্যস্ত হইবার কিছু কারণ নাই।

পরদিন সাহেব কোম্পানীর দোকানের কোট-প্যান্টালুন পরাইয়া মিঃ চ্যাটার্জি তপনকে নিজের অফিসে লইয়া গেলেন। তপন এখন হইতে তাঁহাকে কাজ কর্মে সাহায্য করিবে।

অতি প্রত্যুষে উঠিয়া আপনার টু-সীটার থানায় থানিকটা বেড়াইয়া আসিয়া তপতী স্নান করে এবং বাপের সহিত চা খাইয়া পড়িতে বসে। তপন সে সময় আপনার ঘরে স্নান করিয়া পূজা করিতে থাকে। যখন থাইতে আসে তখন একমাত্র মিসেস্ চ্যাটার্জি ছাড়া আর কেহই থাকে না।

খাইয়াই তপন বাহির হইয়া যায়, বহুস্থানেই তাহাদের কোম্পানীর কন্ট্রাক্টে বাড়ী নির্মিত হইতেছে, তাহাই দেখিতে। ফিরিয়া যখন আসে তখন তপতী

খাইয়া বিশ্রাম করিতেছে আপনার ঘরে। তপন মধ্যাহ্নে ভোজন সারিয়া আবার বাহির হয় অফিসে। বিকাল সাড়ে পাঁচ-ছটায় ফিরিয়া আসে জল খাইবার জন্ত। তপতী তখন কোনদিন বন্ধুদের লইয়া বাইরে বেড়াইতে গিয়াছে, কোনদিন বা লনে টেনিস খেলিতেছে, কোনদিন হয়ত বন্ধুবান্ধবদের সহিত সঙ্গীতের আসর জমাইয়া তুলিয়াছে। তপনের সহিত তাহার সাক্ষাতের অবসর নাই, ইচ্ছে তো নাই-ই। দৈবাৎ উহা ঘটিলেও ঘটিতে পারিত, কিন্তু তপতী যতখানি এড়াইয়া চলে, তপন এড়াইতে চায় ততোধিক। বৈকালিক জলযোগ সারিয়া তপন পুনরায় বাহিরে চলিয়া যায় এবং ফিরিয়া আসে রাত্রি সাড়ে দশটার আগে নয়।

মিষ্টার বা মিসেস্ চ্যাটার্জি তাহাকে এতখানি পরিশ্রম করিতে দিতে চান না, কিন্তু তপন মৃদু হাসিয়া বলে,—গরীবের ছেলে মা আমি খেটে খেতেই তো জন্মেছি। মিসেস্ চ্যাটার্জি ক্ষুব্ধের বলেন,—সে যখন ছিলে বাবা, এখন তো তোমার কিছু অভাব নাই, এত খাটুনি কমাও তুমি। তপন আরও মধুর করিয়া উত্তর দেয়—বাবাকে একটু সাহায্য করার জন্ত আমি চেষ্টা করছি মা,—আমার বিত্তে-সাধিা অল্প, তাই খুব সাবধানে কাজ করি, যাতে ভুল কিছু না হয়। খাটুনি আমার কিছু লাগে না মা।

মিসেস্ চ্যাটার্জির আর কিছু কথা যোগায় না। অনেকক্ষণ পরে তিনি বলিলেন,—তোমার জন্ত একটা গাড়ী কিনে দিই বাবা।

—কি দরকার মা? ট্রামে তো দিবা যাচ্ছি-আসছি।

কিন্তু পরদিন মিঃ চ্যাটার্জি তপনের জন্ত একখানা গাড়ী বিনিয়া আনিলেন। তপন পরদিন নূতন গাড়ী চড়িয়া অফিসে গেল। বিকেলে ফিরিয়া গাড়ীখানা গাড়ীবারান্দায় রাখিয়া সে জল খাইতে বসিয়াছে, তপতী দেখিল, নূতন গাড়ী-খানা দেখিতে খুবই সুন্দর সে অল্প সিঁড়ি দিয়া নামিয়া আসিয়া গাড়ীটাকে লইয়া বেড়াইতে চলিয়া গেল। তপন নীচে আসিয়া দরওয়ানের মুখে দিদিমণির কীর্তি শুনিয়া মৃদু হাসিল এবং ট্রামের পাশখানা পকেটে ঠিক আছে দেখিয়া লইয়া হাঁটিয়া গিয়া ট্রামে উঠিল।

রাত্রে ফিরিতেই মিসেস্ চ্যাটার্জি বলিলেন,—খুকীটা বড্ড চুপ্ত বাবা, তোমার গাড়ী নিয়ে বেড়াতে চলে গিয়েছিল। আবার বকতে গেলুম, তো হাসে।

—নিক্ না মা; ছেলেমানুষ, ঐ গাড়ীটা যদি ওর ভাল লাগে তো নিক্—আমি ট্রামে বেশ যাতায়াত করতে পারি।

—না বাবা, তুমি এমন কিছু বুড়ো মানুষ নও। আর খুকীর তো গাড়ী রয়েছে। তুমি দিও-না ওকে তোমার গাড়ী।



উত্তরে তপন যুহু হাসিল, কিছুই বলিল না। খাইতে খাইতে সে ভাবিতে লাগিল, তপতীর ইহা নিছক ছেলেমানুষি, নাকি ইহার অন্তরালে আরো কিছু আছে? এই দীর্ঘ পনেরদিন একটিবারও তপনের সহিত তাহার দেখা হয় নাই। দুজনই দুজনকে এড়াইয়া চলিয়াছে; হঠাৎ তাহার জন্য ক্রীত গাড়ীখানা লইয়া তপতীর বেড়াইতে যাইবার উদ্দেশ্য কি? সে কি চায় যে তপন তাহার সহিত মিশুক, তাহার সহিত বেড়াইতে যাক—কিন্তু তাহার বিপরীত। তপন কিছুই স্থির করিতে পারিল না। থাওয়া শেষ করিয়া আপনার কক্ষে গিয়া শয়ন করিল।

কিন্তু ঘুম কি আসিতে চায়। তপতী তাহার পঞ্চবিংশতি বর্ষের জীবনে আলা ধরাইয়া দিয়াছে। তপন এই কয়দিন লক্ষ্য করিয়াছে, যাহাদের সহিত তপতী বেড়াইতে যায়, গান করে, টেনিস খেলে, তাহারা সকলেই আধুনিক সমাজের তরুণ-তরুণী। স্ত্রী, সভা এবং সর্বতোভাবে তপতীর যোগ্য। এত লোককে ছাড়িয়া কেন মিঃ চ্যাটার্জি তপনের সহিত কন্যার বিবাহ দিলেন, তপন তাহা ভাবিয়া পায় না, তাহার পিতার সহিত নাকি মিঃ চ্যাটার্জির বন্ধুত্ব ছিল। তপন যখন নিতান্ত ছোট তখনই নাকি মিঃ চ্যাটার্জির কন্যার সঙ্গে তপনের বিবাহের কথা হয়। কিন্তু মিঃ চ্যাটার্জি সে কথা ভুলিয়াই বা রহিলেন কেন, আর আজ এতকাল পরে সেই অ ঘটনটা ঘটাইয়াই বা দিলেন কেন! কিন্তু ভাবনা, নিষ্ফল। যাহা হইবার হইয়া গিয়াছে।

সকালে উঠিয়া স্নান পূজা যথারীতি সারিয়া সে বাহিরে যাইবার জন্য আজ্ঞা তাহার গাড়ীখানি লইতে আসিয়া দেখিল, তাহারই গাড়ী লইয়া তপতী প্রাতেভ্রমণে বাহির হইয়া গিয়াছে, এখনো ফিরে নাই। তপতীর গাড়ীটা অবশ্য গ্যারেজেই রহিয়াছে, কিন্তু তপনের উহা লইতে সঙ্কোচ বোধ হইল। শুধু সঙ্কোচ বলিলে যথেষ্ট হয় না, হয়তো একটু ঘৃণার ভাবও মনে আসিল তাহার। কতদিন তপন দেখিয়াছে, ঐ গাড়ীখানার চালকের স্থানে তপতী এবং পাশে মিঃ ব্যানার্জী না হয় মিঃ অধিকারী কিনা মিঃ চৌধুরী—কোনদিন বা তিনজনই। ও গাড়ী না লওয়াই ভালো। তপন ট্রাম ধরিবার জন্য বাহির হইয়া গেল।

তপতী বাড়ী ফিরিয়া দেখিল, তাহার টু-সীটার গ্যারেজে রহিয়াছে। চাকরকে জিজ্ঞাসা করিল,—জামাইবারু গাড়ী নেহী লিয়া?

—নেহী হুজুর—ট্রামমে চলা গিয়া।

তপতী উপরে চলিয়া আসিল এবং নিঃশব্দে আপন ঘরে ঢুকিয়া পড়িতে বসিল; মা কিন্তু সমস্তই জানিয়াছেন; কন্যার ঘরে আসিয়া একটু উত্তপ্ত কর্ত্তেই প্রশ্ন করিলেন,—খুকী, আজও তুই ওর গাড়ী নিয়েছিলি?

—নিলুম তো কি হলো মা? ও আমার গাড়ীটাও চড়লো না কেন? বলে:

দিও ঐটা নিতে। এ গাড়ীটা বেশ দেখতে, তাই নিয়েছিলুম। এই গাড়ীটাই আমি নেবো এবার থেকে।

মা বিশ্বয়ের সহিত বলিলেন,—কেন, তোর গাড়ী মন্দ?

—মন্দ কেন—এটা নতুন, বেশ রংটা আর দৌড়ায় খুব। কিন্তু আমার গাড়ীটাও খারাপ নয়—চড়ে দেখতে বলো একদিন।

তপতী মধুর হাসিল। মা ভাবিলেন, খুকী তাঁহার জামাতার সঙ্গে ভাব করিতে চায়। বয়স্কা মেয়ে, লজ্জায় সব কথা খুলিয়া বলে না, আর এ-যুগের মেয়েদের চিনিবার উপায় নাই। হয়ত খুকী তপনের সঙ্গে কথাবার্তা কিছু কহিয়াছে,—হয়ত ইহা ভালরই লক্ষণ। মা খানিকটা স্বস্তির হাসি হাসিয়া বলিলেন,—বেশ তো, হুজনে বদলাবদলি করিস।

—হ্যাঁ, তুমি বলে দিও সে কথা!

তপতী পাঠে মন দিল। মা চলিয়া আসিলেন। ছপুবে তপন খাইতে আসিলে মা বলিলেন,—তুমি খুকীর গাড়ীটাই নাও বাবা, তোমার গাড়ীর সবুজ রং ওর বড্ড পছন্দ হয়েছে, তাই তোমারটাই নিতে চাইছে।

—বেশ তো মা, ও নিক—গাড়ীর আমার কী-ই বা দরকার? তখনও যেমন চলছিলাম, এখনও তেমনি চলবো ট্রামে।

—না বাবা—না। মা ব্যস্ত হইয়া উঠিলেন। তাহলে আমি খুকীর কাছ থেকে গাড়ীটা কেড়ে নেবো।

—ছিঃ মা, ওর এখন পড়ার সময়, মনে আঘাত পাবে। আমি কিছু মনে করছি না মা, দুটো গাড়ীই থাকলো, যখন যেটাতে খুসি ও চড়বে।

—তুমি তাহলে কি ট্রামেই চড়বে বাবা? মাতার স্বরে আতঙ্কের আভাস স্পষ্ট ফুটিয়া উঠিল।

হাসিয়া তপন বলিল—আচ্ছা মা, আমি একটা মোটর বাইক কিনে নেবো।

—বড্ড বিপদজনক গাড়ী বাবা—ভয় করে।

—কিছু ভয় নেই মা, আমার জীবনে কোন অকল্যাণ স্পর্শ করে না।

মা খানিকটা আশ্বস্ত হইয়া বলিলেন,—মেয়েটার কি যে কাণ্ড!

—আপনার খুকীর গাড়ী না হলে একদিনও চলে না, আর আমার পা-গাড়ীতে আমি পঁচিশ বছর চলে এলুম। আমার জন্ম অত ভাবছেন কেন মা! তাছাড়া মোটর বাইকে চড়তে আমি ভালোবাসি।

—বেশ বাবা, তাই করো তাহলে—আজই কিনে নাও একখানা মোটর বাইক।

খাওয়ার শেষে আপন কক্ষে আসিয়া তপনের হাসি পাইতে লাগিল। প্রাচুর্যের মধ্যে যাহাদের বাস তাহারা অর্থ-সম্পদ দিয়াই মাতৃষকে বশ করিতে

চায়। কিন্তু মানুষ যে অর্থের অপেক্ষা অন্য একটা জিনিষের বেশী আকাঙ্ক্ষা করে, তাহা ইহারাকি রূপে জানিবে? যাক্, মোটর বাইক একখানা কিনিতেই হইবে নতুবা মা ভাবিবেন, খুকীর উপর তপন রাগ করিয়াছে।

পরদিন তপন একটা মোটর বাইকে চড়িয়া বাড়ী ফিরিল।

পরীক্ষার জন্য তপতী কিছুদিন যাবৎ অত্যন্ত ব্যস্ত তাই তাহার সঠিক স্বরূপ তপন দেখিতে পাইতেছে না। তথাপি সে বেশ বুঝিতে পারিয়াছে, তপতীর নিকট তপনের কোন আশা নাই। তপতী তাহার বন্ধুদের মধ্যে কাহাকেও নিশ্চয় ভালবাসে, কিম্বা এমনও হইতে পারে, তপতী আজো কাহাকেও ভালবাসিবার স্রোণ পায় নাই, তবে তপনকে যে সে কোন দিন গ্রহণ করিবে না, ইহা নানা ভাবে বুঝাইয়া দিতে চায়।

আজও তপন বাহির হইবার পূর্বে তাহার মোটর বাইকখানা লইয়া সেই যে তপতী লনের চক্রাকার পথে ঘুরিতে আরম্ভ করিয়াছে; নামিবার নামটি নাই। তপন নীরবে গেটের নিকট মিনিটখানেক দাঁড়াইল,—ভাবটা,—তাহাকে দেখিয়া যদি তপতী বাইকখানা ছাড়িয়া দেয়। তপন পিছন ফিরিয়া দাঁড়াইয়া আছে, তপতী বাইকের বিকট শব্দ করিয়া বাহির হইয়া গেল একজন পুরুষ বন্ধুর সঙ্গে। অর্থাৎ এবাড়ীর সব জিনিষেই তপতীর অধিকার, তপনের কিছুমাত্র অধিকার নাই। তপন হাটিয়া গিয়া ট্রামে উঠিল। তারপর সে সনাতন ট্রামেই যাতায়াত আরম্ভ করিয়া দিল।

মা কয়েকদিনের মধ্যেই ব্যাপারটা জানিতে পারিয়া অত্যন্ত ক্রুদ্ধস্বরে মেয়েকে বলিলেন,—এসব তোর কি কাণ্ড খুকী!

উচ্ছল হাসিতে ঘর ভরাইয়া তুলিয়া খুকী জবাব দিল,—জানো মা মোটর গাড়ী সব মেয়েই চালায়, কিন্তু মোটর বাইক চালাতে বেশী মেয়ে জানে না—আমি তাদের হারিয়ে দিলাম।

মা খুশী না হইয়া বিরক্তির সঙ্গে বলিলেন,—তোর বাবাকে বল, তোর জন্তে একখানা কিনে দিক; ওরটা কেন নিলি?

—নিলুম, তাতে তোমার জামাই ধন্য হয়ে যাবে বুঝেছো!

তপতী হাসিয়া আপন কক্ষে চলিয়া গেল একটা ইংরেজী গানের এক লাইন গাহিতে গাহিতে।

খুকীর মন তপনের প্রতি অস্থূল না প্রতিকূল! আপনার গর্তজাত কণ্ঠার অন্তররহস্য মা আজ কিছুমাত্র অনুধাবন করিতে পারিতেছেন না। তাঁহাদের সময়ে এসব ছিল না। ধনী স্বস্তুরের আদরিণী পুত্রবধূ হইয়া তিনি আসিয়াছিলেন, প্রথম দর্শনের দিনটি হইতেই স্বামীকে আপনার বলিয়া

চিনিয়াছিলেন, স্বামীও তাঁহাকে আপনাত করিয়া লইয়াছিলেন। কিন্তু এ-যুগের আবহাওয়া কখন কোন দিক দিয়া প্রবাহিত হয় তাহা বুঝিবার সাধা স্বয়ং মহাকালের আছে কিনা সন্দেহ।

তপন বাড়ী ফিরিলে তিনি উৎকণ্ঠিত ভাবেই প্রশ্ন করিলেন,—ট্রামেই তো এলে বাবা তপন ?

—হা মা। কিন্তু আপনি এত ভাবছেন কেন ! ট্রামে বিস্তর বড়লোকের ছেলে চড়ে। ট্রাম কিছু খারাপ নয় মা।

মা কিছুক্ষণ চুপ করিয়া রহিলেন। দরিদ্র এই ছেলেটি নিজেকে দরিদ্র বলিয়া প্রচার করিতে কিছুমাত্র দ্বিধা করে না। এখন হয়ত বালরা বসিবে, “আমি ফুটপাথের মামুষ মা, আপনার আবুহোসেনি রাজত্বে এসে নাই-বা চড়লাম মোটরে। রাজত্ব তো রয়েছে!” আর ইহাকে দেওয়া জিনিস যখন তাঁহারই মেয়ে কাড়িয়া লইয়াছে তখন বেশী কিছু বলিতে যাওয়া উচিত নয়। হয়ত মনে করিবে, নিজের মেয়েকে বলিতে পারেন না, যত কথা তাহাকেই বলা হয়। উহার ভালমানুষির স্বেযোগ লইয়া থুকী কিন্তু বড়ই অগ্নায় করিতেছে। একটু ভাবিয়া বলিলেন—থুকীর গাড়ীটাই বা কেন তুমি নাও না বাবা ?

—গাড়ীর দরকার নেই মা, অনর্থক কেন ভাবছেন আপনি ! আর দরকার যখন হবে তখন নেবো ও নিয়ে আর মাথা ঘামাবেন না। আমরা বুঝব সে সব !

মা ভাবিলেন, হয়তো তাহাই ঠিক,—থুকীর সহিত তপনের কোনরূপ কথাবার্তা হইয়া থাকিবে। তিনি আর উচ্চবাচ্য করিলেন না।

আহারান্তে তপন চলিয়া যাইতেছিল, মা বলিলেন,—থুকীর জন্মদিন বাবা, আজ একটু সকাল সকাল ফিরো !

—চেষ্টা ক’রবো মা। বলিয়া তপন চলিয়া গেল।

সন্ধ্যায় বাড়ীতে মহাসমারোহ ! আধুনিক সমাজে বিবাহের পূর্বেই অবশ্য মেয়ের জন্মদিন-উৎসব ধুমধামে হইয়া থাকে, বিবাহের পর উহার প্রয়োজন ফুরাইয়া যায় ! কারণ, জন্মদিন-উৎসবটা ছেলেদের ও মেয়েদের পরস্পর পছন্দ করিয়া বিবাহ-বন্ধনের জগৎ প্রস্তুত হইবার দিন ! কিন্তু তপতী ইহাদের একমাত্র কন্যা, তাই জন্মদিনটা এবারও হইতেছে।

তপতীর বন্ধুর দল তাহাকে ঘিরিয়া বসিয়া আছে। গান গাছিতেছে একটি মেয়ে ! বহু গণ্যমান্য ব্যক্তি তপতীকে আশীর্বাদ করিয়া গেলেন ! অনেকে মিসেস চ্যাটার্জিকে জামাইয়ের কথা জিজ্ঞাসা করিলেন। মিসেস চ্যাটার্জি প্রত্যেককে জানাইলেন, সে জরুরী কাজে গিয়াছে, এখন আসিবে।

মিসেস চ্যাটার্জির কথায় মিঃ অধিকারী কহিলেন—সেই বামুন ঠাকুরটি কোথায় গেলেন ? ভয়ে পাঁালিয়েছেন নাকি ?

মিঃ ব্যানার্জি উত্তর দিলেন—ভয়ে নয় ভাবনায়, আমরা তার বোকামী ধরে ফেলবো বলে !

মিঃ চৌধুরী বলিলেন,—রেবা দেবী সেদিন তার টিকি কেটে দিয়েছেন ।

রেবা দেবী কলিলেন,—মাথাটা মড়ানো আছে, তুই ঘোল ঢেলে দিস তপতী ।

—না না না মিস চ্যাটার্জি, ঘোল নয়, গুর মাথায় কড়লিভার অয়েল দেবেন, চুলগুলো একটু ভিটামিন খেয়ে বাঁচবে !

সকলেই হাসিয়া উঠিল ! মিস চ্যাটার্জি আখ্যাত তপতী কহিল,—চুপ ককন, মা শুনতে পেলে বকবেন এত্থনি ।

—বকবেন কি ? এর জন্ত দায়ী তো আপনার মা আর বাবা ! আপনার মত সর্বগুণাশ্রিতা মেয়েকে একটি বানরের গলায় দিতে ওঁদের বাধলো না ?

তপতী চুপ করিয়া রহিল । ক্ষণ পরে কহিল—মিঃ ব্যানার্জি তো আমায় “চল” দিয়েছেন, মিঃ চৌধুরী দিলেন ব্রোচ, মিঃ অধিকারীর কথা ছিল যা দেবার তা না দিয়ে অল্প একটা বাজে জিনিস দিলেন, ওঁর শাস্তি হওয়া দরকার ।

সকলেই একসঙ্গে বলিয়া উঠল,—“সার্টেনলি ।”

মিঃ অধিকারী কহিলেন,—সে জিনিস আপনি নিলে আমি কৃতার্থ হ’য়ে যাবো ।

—নিশ্চয়ই নেবো, দিন !

—জিনিসটা কি মিঃ অধিকারী !—প্রশ্ন করিলেন মিঃ ব্যানার্জি ।

—একটা ডায়মণ্ড রিং । উত্তর দিল তপতী স্বয়ং ।

সকলে একটু বিচলিত হইল । বিবাহিত মেয়েকে আংটি দেওয়া চলে কি ? কিন্তু তপতী নিঃসংশয়ে প্রমাণ করিয়া দিতে চায়, সে আজো বিবাহিত নহে এবং এ জন্তই “মিস চ্যাটার্জি” নামে অভিহিত হইতে আপত্তি করে না । মিঃ অধিকারী ধনীর সন্তান । তিনি তপতীর জন্ত আংটি কিনিয়া আনিয়াছিলেন । তৎক্ষণাৎ তাহা বাহির করিয়া তপতীর দিকে অগ্রসর হইলেন । তপতী তাহা পরাইয়া দিবার জন্ত বাঁ হাতখানি বাড়াইয়া দিল ।

মিঃ অধিকারীর আংটি পরানো তখনো শেষ হয় নাই, মা’র সঙ্গে তপন আসিয়া চুকিল, হাতে তাহার একগুচ্ছ ফুল । মা তপতীর কাণ্ড দেখিয়া মুহূর্তে থ হইয়া গেলেন, কিন্তু তপনের সামনে কোনরূপ উচ্চবাচ্য না করিয়া কহিলেন,—প্রণাম কর খুকী……

তপতী উঠিল না, যেমন ছিল তেমনি বসিয়া রহিল । তপন একমুহূর্ত

অপেক্ষা করিয়া বলিল,—থাক মা, আমি এমনি আশীর্বাদ করছি। বলিয়া সে অশোকগুচ্ছটি তপতীর হাতে দিতে গেল এবং সঙ্গে সঙ্গে উচ্চারণ করিল,—তোমার জীবনে পবিত্র হোমশিখা জ্বলে উঠুক....

তপতী পুষ্পগুচ্ছটা টানিয়া ছুঁড়িয়া দিয়া সরোষে বলিল,—যাত্রা দলে পে করে নাকি ? আশীর্বাদেই হটাৎ দেখো !

বন্ধুদল হাসিয়া উঠিল, কিন্তু মা অত্যন্ত কুণ্ঠিত হইয়া পড়িলেন। তিনি কিছু বলিবার পূর্বেই তপন মা'কে কহিল,—বলুকগে মা, আমি কিছু মনে করি নি।

তপন আপন কক্ষে চলিয়া গেল। মা'ও অত্যন্ত বিরক্ত এবং বিরত হইয়া চলিয়া গেলেন। বন্ধুর দল হাসি খামাইয়া বলিল,—সত্যি একটা ওরাংওটাং।

পরদিন সকালে আসিল শিখা, তপতীর বন্ধুদের মধ্যে নিকটতমা। আসিয়াই বলিল,—কাল সবে এসেছি ভাই, তোর বর কোথায় বল—আলাপ করব।

—আলাপ করতে হবে না, সে একটা যাচ্ছেতাই।

—ওমা, সেকি ? কেন ?

—যা কপালে ছিল ঘটেছে আর কি। হুঁ, ঠাকুরদা নাকি গণনা করে বলেছিলেন, আমার বর হবে অদ্ভুত, তাই অদ্ভুত হয়েছে, যাত্রাদলের ভাঁড় একটা।

শিখা বিশেষ উৎকণ্ঠিত হইয়া প্রশ্ন করিল—কেন তপু, ব্যাপার কিরে ?

—ব্যাপার তোর মাথা ! যা, দেখে আয়, ওঘরে রয়েছে !

শিখা আর কোন কথা না বলিয়া তপনের কক্ষদ্বারে আসিয়া দাঁড়াইল। তপন তখন পূজা শেষ করিয়া প্রণাম করিয়া উঠিতেছে। পিছন ফিরিতেই শিখার সহিত চোখ মিলিল। তাহার চন্দনচর্চিত পূত দেহকান্তি, উন্নত প্রশস্ত ললাটে ত্রিগুণক রেখা, গলায় শুভ্র উপবীত শিখাকে মুহূর্তে যেন অভিভূত করিয়া দিল। শিখা ভুলিয়া গেল, সে দেখা করিতে আসিয়াছে। তাহার বন্ধুর বরের সঙ্গে। ভুলিয়া গেল উহার সহিত শিখার সম্বন্ধ কি ! যুক্তকর ললাটে ঠেকাইয়া নমস্কার করিতে গিয়া শিখা আভূমি স্পৃষ্ট হইয়া তপনকে প্রণাম করিয়া বসিল।

মৃৎ হাসিয়া তপন কহিল,—তুমি কে ভাই দিদি ? এ সমাজে তোমাকে দেখবার আশা তো করি নি ?

পাঁচ সাত সেকেণ্ড শিখার কণ্ঠরোধ হইয়া রহিল। তারপর ধীরে ধীরে সে কহিল,—আমি আপনার ছোট বোন আর তপতীর বন্ধু আর জাষ্টিশ মুখার্জির মেয়ে।

—ওঃ ! তুমিই শিখা। কিন্তু একটা কথা আছে !

—বলুন !

—এখানে আমাকে তুমি কেমন দেখলে, কি দেখলে, কিছুই বলবে না তোমার বন্ধুর কাছে বা কারো কাছে। আজ বিকেলে আমি তোমাদের বাড়ী গিয়ে যা-কিছু বলবার বলবো—অনেক কথা আছে। তুমি এখন বাড়ী চলে যাও ভাই শিখা।

—যাচ্ছি। কিন্তু আমার নাম জানলেন কি করে ?

—মা'র কাছে শুনেছি। আচ্ছা, এখন আর কথা নয়।

শিখা বাহিরে আসিয়া আপনার গাড়ীতে উঠিয়া প্রস্থান করিল, তপতীর সহিত আর দেখাও করিল না।

তপনের অভ্যর্থনার জন্য শিখা পরিপাটি আয়োজন করিয়া রাখিয়াছে। কয়েক-মিনিটের-দেখা তপনের কথা শিখা আজ সারাদিন ভাবিয়াছে। আশ্চর্য ঐ মানুষটি ! মুহূর্তে যে এমন করিয়া আপন করিয়া লইতে পারে, তপতী তাহার সম্বন্ধে কেন ওরূপ কথা বলিল ! শিখা সমস্ত দিন ভাবিতেছে ইহার মধ্যে নিশ্চয়ই কিছু রহস্য আছে। তপতীর ববাহের গোলযোগের কথা ভাগলপুরে থাকিতেই সে শুনিয়াছিল তার মা'র চিঠিতে। আজ তপতীর সেই বরকে দেখিয়া সে মুগ্ধ হইয়া গিয়াছে। শিখার দুই বোন, দাদা বা ছোট ভাই নাই,—তপন যদি শিখার দাদা হয়,—শিখা যেন উচ্ছ্বসিত হইয়া উঠিল,—হাঁ, হইয়াছেনই তো !

তপতীর সহিত ফিরিবার সময় দেখা না করিয়া আসাটা ভাল হয় নাই। কিন্তু উনি যে বারণ করিলেন। গুরুর কথার অবধ্য তো হওয়া যায় না। তপতী রাগ করে করুক—তাহার ভাব করিতে বেশী দেবী হইবে না। ব্যাপারটা তো শোনা যাক দাদার মুখ হইতে।

তপন আসিয়া পৌঁছিল। পরনে অফিসের পোষাক, হাট-কোট-প্যান্ট। শিখা আগাইয়া যাইতে হাসিমুখে বলিল, চিনতে পাচ্ছিস ভাই, দিদি ?

—চিনিবার তো কথা নয় যা ভোল বদলেছো—বদলেছেন।

—থাক, আর 'ছেন' জুড়তে হবে না। দুজনেই হাসিয়া উঠিল। শিখা আবেগজড়িত কণ্ঠে বলিল,—কখন যে মনের মধ্যে দাদার আসনখানি জুড়ে বসেছে, টেরই পাইনি। নিজের অজ্ঞাতমারেই তুমি বলে ফেললাম।

—তোমার কাছে এমনটাই আশা ক'রছিলাম ভাই। চল, বাবা মা'কে প্রণাম করি গিয়ে।

উচ্ছ্বসিত আনন্দে শিখা তপনকে ভিতরে আনিয়া তাহার মা-বাবার সহিত পরিচয় করাইয়া দিল। তপন হেঁট হইয়া তাঁহাদের প্রণাম করিয়া উঠিয়াই

বলিল,—আমি নিজে নিমন্ত্রণ নিয়েছি কাকীমা, আপনায় তুষ্ট মেয়ে নিমন্ত্রণ করেনি।

হ্যা, করেনি—নিমন্ত্রণ করবার স্বযোগ দিয়েছিলে? যাওয়া মাত্র তাড়িয়ে ছাড়ল মা। এতো তুষ্ট!

জাপিঁশ মুখার্জি অত্যন্ত নিরীহ এবং গম্ভীর প্রকৃতির মানুষ। তাঁহার গম্ভীর টুটাইয়া তিনি কহিলেন,—শঙ্কর বলছিল যে জামাই তাঁর খুব ভালো হ'য়েছে, তা এতো ভালো হয়েছে কে জানতো! খুব ভালো ছেলে!

—তোমার খুব ভালো লেগেছে,—নয় বাবা? এতো কথা বলে ক্ষেপ্ত্রে যে! শিখা কৌতুক হাস্তে চাহিল তার বাবার পানে।

শিখার মা দাঁড়াইয়া দেখিতেছিলেন, বলিলেন,—তোমার আর একটা জোড় নেই বাবা? দুটোকেই বাঁধতুম!

শিখা চকিত হইয়া বলিয়া উঠিল,—ওকি গরু নাকি মা, বাঁধতে চাইছো?

—তোর বন্ধু সেদিন স্ত্রীর রমেনের বাড়ীর পাটিতে ব'লছিল, তার বর নাকি হ'য়েছে একটা গরু। তাই তোর জন্তেও একটা এমনি গরু আমরা খুঁজছি।

—না মা, গরুটর বলো না, আমার দাদা যে ও। শিখা মুহূ হাসিয়া বলিল।

—নিশ্চয় আপনি বলবেন কাকীমা। আমার মা আমায় শেষ দিন পর্যন্ত গরু আর গাধা ব'লতেন। তারপর থেকে আর কেউ বলে নি। আপনি বলুন তো, আপনায় ক'ণে আমার মা'র ক'ণস্বর শুনে নিই আর একবার!—তপনের ছুটি চক্ষু ছিল ছিল করিয়া উঠিল। শিখার মাতা বিস্মল হইয়া উঠিলেন, বলিলেন,—তুমি যদি গরু হও বাবা, তাহ'লে মানুষ কে, তাই ভাবছি। কিন্তু বাবা, অধিস থেকে আসছো তো? এসো, হাত-মুখ ধুয়ে খেতে বসে গল্প করবে'খন।

থাইতে বসিয়া তপন বলিল,—শিখার বিয়ে দিতে চান কাকীমা! আপনায় কিছু ঠিক করা নেই তো?

—না বাবা, ঠিক কিছু নেই। মেয়েকে আর বড় ক'রতে ভুলসা করিনে বাবা; চারিদিকে দেখছো তো, ধিকি মেয়েরা সব মোটরে চড়ে হাওয়া খেয়ে বেড়াচ্ছে। বয়স বাড়ছে, বিয়ে হ'চ্ছে না। সমাজে কত মেয়ে যে আইবুড়ো র'য়েছে তার ঠিক নেই।

—আপনাদের সমাজের তো এই রকমই গতি কাকীমা। কিন্তু সমাজের উপর আপনি চট্টলেন কেন?

—না বাবা, আমাদের সেকালের সমাজই ভালো ছিল। বিয়ে করবে না, বিদ্বিপনা করে বেড়াবে, তারপর বয়স বাড়লে আর বিয়েই হবে না। এই তো হ'চ্ছে আকৃছার!

—আশায় আশায় থাকে কাকীমা, মনে করে, আরো ভালো বর জুটবে,



তারপর আরো ভালো, এমনি করেই বয়েস বেড়ে যায়। আর আমাদের সমাজের মত আপনারা তো কচি মেয়ের জোর করে বিয়ে দেন না; জোর করে বিয়ে দেবার অবস্থা আমিও পক্ষপাতী নই, তবে ষোল থেকে কুড়ি একুশের মধ্যেই মেয়েদের বিয়ে দেওয়া উচিত।

শিখা এতক্ষণ নতমুখে তপনের চা তৈরী করিতেছিল, বাগ পাইয়া বলিয়া উঠিল,—তপির বয়স এখনো কুড়িও পেরোয়নি, অতএব মাইভে দাদা!

—তুই থাম—গুরুজনদের সঙ্গে কথা বলার সময় বাগড়া দিস নে!

শিখা অনাবিল আনন্দে তপনের মুখের দিকে চাইল। শিখার দাদার অধিকারটি তপন অতি সহজে গ্রহণ করিয়াছে। এমন করিয়া কেহ কোনদিন তাহাকে শ্রমক দেয় নাই, এমন মিষ্ট, এমন আন্তরিকতাপূর্ণ। হাসি মুখে সে চা আগাইয়া দিয়া বলিল,—আচ্ছা, গুরুজনদের সঙ্গে কথা শেষ হ'লে ভেকো আমায়।

শিখা চলিয়া যাইতেছে, মা বলিলেন,—যাচ্ছিস কেন?

শিখা দুই পা ফিরিয়া আসিয়া বলিল, ভাবছো কেন মা? ও তোমার আধুনিক যুগের চ্যাটার্জি, ব্যানার্জি, মুখার্জি, ঘোষ, বোস, মিত্রের নয়। শিখা না থাকলেও ওর চলবে, বরং ভালোই চলবে। আমি কিছু বেগ ফুল তুলে নিয়ে আসি।

শিখা চলিয়া গেল। তপন মধুর হাসিয়া বলিল,—কাকীমা, এই আধাবিলেতি সহরের বুকের ওপর মেয়েকে আপনারা কি ক'রে এমন শুদ্ধাচারিণী রেখেছেন?

—আমি ওকে খুব কড়া নজরে রাখি বাবা। চারিদিকে তো দেখছি। আমি ছিলুম ভট্টাচার্য্য বামূনের মেয়ে, একেবারে সনাতনপন্থী; এখানকার সব দেখে মনে হয় ভাল আমাদের সমাজে অনেকেই ছিল, মন্দ যে না ছিল তা নয়, কিন্তু মন্দটা বেছে না ফেলে আমরা ভালমন্দ সবই বিসর্জন দিয়েছি অথচ যাদের অল্পকরণ করতে চাইছি, তাদের ভালোগুলো ছেড়ে মন্দগুলোই নিচ্ছি।

তপন হাসিমুখে শুনিছিল, তারপর ধীরে ধীরে বলিল,—আমি দেখেই বুঝেছিলাম কাকীমা, আপনার সতী-শোণিত ওর প্রীতি শিরায় বইছে। আচ্ছা কাকীমা আপনি আমার উপর নির্ভর যদি করেন তো ওর যোগ্য এবং আপনার মনের মত ছেলে আমি ওর জন্তে এনে দেবো। কিন্তু আমি যে আপনার বাড়ী এসেছি বা মাঝে মাঝে আসবো, একথা যেন কোনরূপে আমার শ্বশুরবাড়ী প্রকাশ না পায়। কারণ শিখার সঙ্গে আমার যে সম্পর্ক হওয়া উচিত বলে ওঁরা মনে করেছেন, শিখা তার থেকে আমার ঢের বেশী আপনার।

—তুমি ওঁদের বলে আসনি বুঝি।

—না,—এবং কোনদিন বলে আসবো না। কারণ ওঁদের জামাই সম্পর্কে তো আর আমি আপনার বাড়ীতে আসছি না, আসছি আপন বোনটিকে দেখতে

আমি কায়-মন এক ক'রে কথা বলি কাকীমা, শিখার সঙ্গে আমার সহোদর বোনের আর কিছু তফাৎ নাই। আমি তো আজকালকার “দা-জাতীয়” জীব নই—যাকে তাকে আমি “দাদা” বলতে অন্তমতি দিই না।

—বেশ বাবা, তুমি শিখার দাদা, এ তার গৌরব। তোমার ক'টি ভাই-বোন?

—আমার কেউ নেই কাকীমা, একটা খুঁড়তুতো বোন আছে। এই সারা বিশ্ব-মংসারে আজ সকাল পর্যন্ত সেই একমাত্র মেয়ে ছিল, যার সঙ্গে আমি যখন তখন কথা বলি, ছুঁই, মি করি। আজ থেকে হলো আমার দু'টি বোন শিখা আর সে!

শিখা আসিয়া পড়িল একটা রূপার রেকাবিতে কতকগুলি ফুটন্ত বেল ফুল লইয়া। বলিল,—পা দুটি বাড়ো তো! তোমার পায়ে শ্বেতপুষ্প ছাড়া আর কিছুই দেওয়া যায় না।

মা বলিলেন,—তোমরা গল্প করো বাবা, আমি ঘরের কাজ দেখি। তিনি চলিয়া গেলেন।

তপন বলিল,—লক্ষ্মী বোনটি একটা কথা তোকে জিজ্ঞাসা ক'রবো, সন্তি উত্তর দিস।

—তোমার কাছে মিথ্যে বলবো না দাদা, যদিও মিথ্যে অনেক সময়ই বলি আমি।

তপন তাহার বিবাহ হওয়ার পর হইতে এই দুই মাসের ঘটনা শিখাকে বলিয়া গেল। তারপর জিজ্ঞাসা করিল,—ওর মতবল কি শিখা, ও কি কাউকে ভালোবাসে?

—তাতো জানিনে দাদা, সেবকম কিছু তো দেখিনি! দাদা, তোমায় ও ভুল বুঝেছে। আমি কালই ওকে বুঝিয়ে দেবো।

—না! তপনের কণ্ঠস্বর অত্যন্ত দৃঢ়—না শিখা, তাহলে তোকে আর ভগ্নীস্নেহ দিতে পারবো না। সে আমায় ভালো যদি বাসে, এমনিই বাসবে, কারো প্ররোচনায় নয়! আমি যেমন, যেমনটি সে আমায় দেখেছে, তেমনি ভাবেই আমি তার হৃদয় জয় করতে চাই। যদি না পারি, জানবো সে আমার নয়।

কয়েক মিনিট নীরবে কাটিয়া গেল। তপন পুনরায় আরম্ভ করিল—আমি তো আধুনিক কোন ককেট মেয়েকে বিয়ে করতে আসিনি শিখা, আমি ভেবে-ছিলুম বিয়ে ক'রছি স্বর্গীয় মহাত্মা শ্যামসুন্দর চ্যাট্‌জোর নাতনিকে। যুক্তকর লগাটে ঠেকাইয়া তপন সেই স্বর্গীয় মহাত্মার উদ্দেশে নতি জানাইল। তারপর বলিল,—আর শুনলাম, আমার বাবা নাকি মিঃ চ্যাটার্জিকে কথা দিয়েছিলেন, তাই

পিতৃসত্য পালন আর বিপন্ন মিঃ চ্যাটার্জিকে সাহায্য করতে চেয়েছিলাম আর ভেবেছিলাম, আমার অনন্ত জীবনের সাথীকে হয়ত ঐ বাড়ীতেই খুঁজে পাবো।

বাথায় বেদনায় তপনের কণ্ঠ মলিন শুনাইতেছে। শিখা অভিভূতের মত তপনের দিকে চাহিয়া রহিল, চোখ তাহার জলে ঝাপসা হইয়া আসিতেছে। এই অপরূপ স্নন্দর হৃদয়বান মানুষটিকে তপতী গ্রহণ করে নাই—আশ্চর্য!

—তুমি আমায় অনুমতি করো দাদা, আমি কালই তোমার সাথীকে এনে দেবো—সে তোমায় চেনে নি!

—না শিখা, তা হয় না। আমার স্বরূপ উদ্ঘাটিত ক'রে তার ভালবাসা পাওয়া এখন আর আমার আকাঙ্ক্ষার বস্তু নয়। আমি জানি প্রত্যেক মেয়েই চায়, তার স্বামী রূপবান, জ্ঞানবান, ধনবান হোক, কিন্তু, দুর্ভাগ্যক্রমে যদি তা কারো না হয়, তবে সে কি এমন ক'রে স্বামীর অন্তর চূর্ণ ক'রে দেবে? হিন্দু নারী সে, পবিত্র বৈদিক-মন্ত্রে তার বিয়ে হয়েছে—যে বিয়ের জের জন্ম হতে জন্মান্তরে চলে বলেই—না শাস্ত্রের বিশ্বাস—সেই ধর্মের মেয়ে হ'য়ে সে স্বামীকে একটা সুযোগ পর্যন্ত দিল না নিজেকে প্রকাশ করবার! আমি বুঝেছি শিখা, এই অহঙ্কারের মূলে দুটো জিনিস থাকতে পারে। এক, সে অল্প কাউকে ভালবাসে, যাকে পেল না বলে গভীর ক্ষুব্ধ হয়েছে; নয় ত, সে আজো অন্ত্যাসক্তা, পবিত্র আছে, কাউকেই ভালবাসে না। যদি শেষের কারণ সত্যি হয়, তবে আমি তাকে এমনি থেকেই ফিরে পাব, আর যদি প্রথম কারণটা সত্যি হয়, তাহ'লে সে আমায় হাজার ভালবাসলেও আমি তাকে গ্রহণ করবো না। আমার জীবনে অন্ত্যাসক্তা নারীর ঠাই নেই।

শিখা শিহরিয়া উঠিল। তপতী এ কি করিয়া বসিয়াছে। যে অদ্ভুত চরিত্রবান স্বামী সে লাভ করিয়াছে, তাহাতে তপতীকে অন্ত্যাসক্তা ভাবিয়া ভাগ করা তপনের পক্ষে কিছুই বিচিত্র নহে।—গভীর স্তব্ধতার মধ্যে শিখা ভাবিতে লাগিল।

—বোনটি, আমার মায়ের পেটের বোনের সঙ্গে তোর আজ কিছু তফাৎ নেই। আমার কথা রাখবি তো?

—নিশ্চয় দাদা, তোমার কথাই অবাদ্য হবো যেদিন সেদিন তোমায় দাদা বলবার যোগ্যতা হারাবো যে।

তপতীর পরীক্ষা হইয়া গিয়াছে। আজ সে আসিয়া বসিবে বন্ধুদের আসরে। উপরে প্রসাধনে সে বাস্তু। বন্ধুগণ ততক্ষণ আসরটা জমাইয়া তুলিতেছেন।

রেবা দেবী বলিলেন,—এবার কিন্তু তপতী বরের সঙ্গে মিশবার বিস্তর সময় পাবে—বুঝেছো, এতকাল তো বুথাই কাটালে সব। এখনো সে দেখেনি, কিন্তু

একবার দেখলে আর রক্ষে নাই।

সমস্তরে ব্যানার্জি-চ্যাটার্জি-ঘোষ প্রশ্ন করিলেন—কেন?

—কারণ ছেলেটা যেমন দেখতে সুন্দর তেমনি সুন্দর কথা; তপতী আবার কাব্যপ্রিয়, ওর একটা কথাতেই মুগ্ধ হ'য়ে যাবে।

—বলো কি! সে তো একটা বোকায়াম, মূর্থ!

—মোটাই না! আমি মাত্র একদিন গিয়েছিলাম তার কাছে। আমায় দেখে কি বললে জানো?

—কি বললে!

—বললে, আহ্নন! আপনি কোন্ দেশীয়া? নমস্কার না করমর্দন করবো! আমি বললাম, একদম স্বদেশী, নাম শ্রীমতী রেবা দেবী! তা বললে কি জানো? বললে রেবা তো উপল-বিষমে বিষীর্ণ। কিন্তু আপনি তো দেখছি শীর্ণ নন!

—উত্তরে তুমি কি বললে?—মিঃ ব্যানার্জি প্রশ্ন করিলেন।

—বললাম, আমি মোটা হলে তো কিছু যায় আসে না, তপতী খুব স্নিগ্ধ।

—ও কথা তুমি বলতে গেলে কেন? তপতীর রূপ ওর না দেখাইতো দরকার।

—শোনই-না কথাটা। তপতী স্নিগ্ধ শুনে বললে, বড় খুসী হলুম শুনে; ওর তস্কী দেহ-তরবারী দিয়ে অনেককে জবাই করতে পারবে, কি বলেন? আমি তো অবাক! বল্লুম, হা আমাদেরগুলো একদম ভোঁতা।

—তাতে কি বললে? মিঃ ব্যানার্জি শুধাইলেন!

—বললে, শান দিয়ে নিন। অত কজ-পাউডার লিপষ্টিক রয়েছে কি জন্মে! শুনে আমি চূপ করে গেলুম। ও মুখ ফিরিয়ে 'হক ঠাকুরের পাঁচালী' পড়তে লাগলো। পরদিন তপতীর মা বারণ করলেন ওখানে যেতে। নইলে ওর জবাব আমি দিতাম।

—বারণ করলেন কেন?

—তা জানি না, বোধহয়, ও বিরক্ত হয়।

—বিরক্ত নয়, ভয় করে, ওর বিত্তে প্রকাশ হয়ে পড়বে।

—ওর বিত্তে প্রকাশ হলে তোমাদের বিশেষ স্ববিধে হবে না। কারণ ও সত্যি বিদ্বান—তোমাদের মত শ্রালো নয়।

ইতিমধ্যে মিঃ অধিকারী আসিয়া পৌঁছিলেন। এই মিঃ অধিকারীকে এখন আর ইহারা স্ননজরে দেখিতেছেন না। কারণ তপতী তাহার কাছ হইতে আংটি লইয়াছে। অধিকারীই, তাহা হইলে তপতীর মন আকর্ষণ করিয়াছে সর্বাপেক্ষা অধিক!

রেবা তাহাকে দেখিয়া বলিল,—আহ্নন—মিঃ অধিকারী এবার আমাদের

মেঘদূতের আপনিই তো যক্ষ !

মিঃ অধিকারী আত্মপ্রসাদের হাস্ত করিলেন। ওদিকে তিন-চারিটি যুবক তাহার দিকে জনান্তিকে ক্রুদ্ধ ক্রুর কটাক্ষপাত করিতেছে। বিনয়ের সহিত অধিকারী কহিলেন,—বেশ, আমি সম্মত।

—কিন্তু সম্মতি যঁার কাছ থেকে পাওয়া চাই, তিনি এখনো টয়লেটে ব্যস্ত ; ঐ এসে পড়েছে।

তপতী তর তর বেগে সিঁড়ি দিয়া নামিয়া আসিল। সুদীর্ঘ বেণী সর্পাকারে ঢলিতেছে, তাহার অর্ধেকটা আচ্ছন্ন করিয়া ধূপছায়া রঙের অঞ্চলপ্রান্ত পিঠের উপর দিয়া কোমরের কাছে পড়িয়াছে। সমস্ত তত্ত্বলতা ঘিরিয়া একটা শিথল স্বরভি। সকলে তাহাকে সহাস্তে অভিবাদন করিল। একজন প্রশ্ন করিল,—পরীক্ষা নিশ্চয় ভাল দিলেন !

—হাঁ, আজকার প্রোগ্রাম কি ! অকাজে বসে থাকা ?

—না, নিশ্চয় না। আজই আমরা ঠিক করবো আগামী মেঘদূত উৎসবে কে কি রোলে নামবেন ! প্রথমে দু'একটা গান হোক একটু নাচও যদি হয় আপনার।

হাসির বিদ্যৎ ছড়াইয়া তপতী কহিল—নাচ আজ নয়, বড় ক্লান্ত। পরন্তু বরং চলুন ষ্টিমার ভাড়া করে থানিকটা বেড়িয়ে আসি।

সকলে সম্মতের চীৎকার করিয়া উঠিল,—হুরে ! এইতো চাই ! থি, চীয়ার্স কর মিস চ্যাটার্জি !

তপতী আত্মপ্রসাদ লাভ করিবার অবকাশ পাইবার পূর্বেই মিঃ ব্যানার্জি শুধাইলেন—সেই ভঙ্গলোকটির খবর কি, ছোট গুড, গুড ম্যান ?

মধুর হাসিয়া তপতী বলিল,—থাক, তার কথায় কি দরকার ! ওর ওপর জেলাস হবার কোন দরকার নাই, ও আমাদের ছায়াও মাড়াবে না।

—গুড্। না মাড়ালেই আমরা খুশী থাকব।

তপতী এবং আরো অনেকের গান গাওয়ার পর আগামী উৎসবের কর্মসূচী প্রস্তুত হইল এবং আগামী কল্যাকারও একটা থসড়া তৈরী হইল। রাত্রি অনেক হইয়াছে। সকলে চাঁলিয়া গেলে তপতী উপরে আসিয়া দেখিল, তপন থাইতে বসিয়াছে। মা সমুখে বসিয়া থাওয়াইতেছে। তপতীকে প্রবেশ করিতে দেখিয়া মা ডাকিলেন,—আয় খুঁকি খেয়ে নে। তপন ওদিকে মুখথানা এতই নীচু করিয়া দিয়াছে যে প্রায় দেখা যায় না। মা দেখিয়া বলিলেন,—থাও বাবা এত লজ্জা কেন !

তপতীর দিকে তপন পিছন ফিরিয়াই ছিল, সেই ভাবেই উত্তর দিল,—লজ্জা

না মা অনভ্যাস ! খাওয়া হয়ে গেছে, উঠলাম ।

—দুধ খাও নি বাবা এখনো !

—আজ আর দুধ খাব না মা, বড় ঘুম পাচ্ছে । তপন মুখ ফিরাইয়া চলিয়া গেল ।

মিসেস চ্যাটার্জি তপতীকে বলিলেন, খাওয়ার পর তুই আজ ওর ঘরে গিয়ে শুবি খুকী !

তপতী অত্যন্ত বিরক্ত এবং ক্রুদ্ধ হইয়া বলিল,—তুমিও সেকলে হ'য়ে যাচ্ছ মা ! কোন ঘরে শুতে হবে, না হবে, আমি খুব ভালো জানি । আমি আর কচি খুকীটি নই ।

মিসেস চ্যাটার্জি অত্যন্ত শঙ্কিতা হইয়া বলিলেন—সে কি খুকী, তোরা মতলব কি তা'হলে !

ব্যাপারটা অত্যন্ত বিস্তী হইয়া উঠিতেছে বুঝিতে পারিয়া তপতী সাবধান হইয়া গেল । বলিল,—তুমি মিছেমিছি অত ভাব কেন মা । দিন পালিয়ে গেল নাকি ? বলিয়া তপতী হাসিয়া উঠিল ।

মা ভীতভাবেই বলিলেন,—কিন্তু আজই-বা গেলি ?

—না-মা-না, ভাল একটা দিনক্ষণ ঠিক করো । তোমার ঐ গোঁড়া বামুন জামাইয়ের কাছ কৃষ্ণপক্ষের দিনে নাই বা গোলাম ।

মা খানিকটা প্রসন্ন হইলেন । তাঁহারা দিনক্ষণ না-মানিলে কি হইবে তপন তো মানে । হ্যা, সেই ভাল হইবে । একটা ভাল দিন তিনি ঠিক করিবেন ।

তপতী আহার সারিয়া আপন কক্ষে গিয়া হাসিতে লুটাইয়া পড়িল । মা'কে কত সহজে ফাঁকি দেওয়া যায় । কিন্তু পাঁজিতে ভাল দিনের অভাব নাই এবং মা কালই বাহির করিবেন । আচ্ছা তখন অল্প মতলব খাটানো যাইবে । তপতী নিশ্চিন্তে ঘুমাইয়া পড়িল ।

একখানা প্রকাণ্ড গাড়ি আসিয়া থামিল, নামিল তপন আর শিখা—বিনায়ক অভ্যর্থনা করিতে আসিয়া থামিয়া গেল ; কর্মিগণ বিব্রত হইয়া উঠিল । মীরা ব্যতীত নারী অতিথি এখানে কখনো কেহ আসে নাই । বিনায়ক কোনরূপে নিজেকে সামলাইয়া একটা নমস্কার করিল । অগ্ন্যাত্ত সকলেই তাহার অমুলসরণ করিল কোন প্রকারে ! কিন্তু শিখা সহজ হাসিতে সকলকে চকিত করিয়া দিয়া বলিল—সব কিন্তু খুঁটিয়ে দেখাবেন বিনায়কবাবু, চলুন আগে অফিস দেখি আপনার ।

কে এ ? তপন যাহাকে বিবাহ করিয়াছে, সে নয় নিশ্চয়ই । তপনটা

কি ফন্দিবাজ! কাহাকে লইয়া আসিতেছে কিছুমাত্র জানায় নাই। তপন বলিল—তুই ওর সঙ্গে ঘুরে সব দেখে তাই শিখা, আমি ততক্ষণ একটা নতুন খেলার নক্সা করি—কেমন? তপন গদীতে আসিয়া বসিল।

—আচ্ছা,—আসুন বিনায়কবাবু।

নিকপায় বিনায়ক শিখাকে লইয়া কারখানা দেখাইতে গেল। ছোট ছোট যন্ত্রগুলি হাতেই চলে। একটা মাত্র বিদ্যুৎ পরিচালিত কল রহিয়াছে। যতদূর সম্ভব শিখা বুঝিতে চেষ্টা করিল। বিনায়ক ধীরে ধীরে বলিয়া গেল এই কারখানা প্রতিষ্ঠার করুণ ইতিহাস, তাহার দরিদ্র জীবনের কাহিনী। লাজুক বিনায়ক নতমুখেই কথা কহিতেছে; বড় স্তম্ভ লাগিল শিখার। কোনরূপ ঐক্য নাই, সহজ অনাড়ম্বর লোকটি। বন্ধুবাৎসল্যে চোখ দুইটি ছলছল করিতেছে। বিনায়ক বলিয়া চলিল,—তপনকে যদি না পেতাম শিখা দেবী, তা'হলে হয়ত বিনায়কের অস্তিত্বও মুছে যেতো। কিন্তু তপনের কিছুই করতে পারলাম না।

—ক'রতে পারলেন না কেন! চেষ্টা করেছেন?

—কি চেষ্টা ক'রবো? তপন তো হাত পা বেঁধে দিয়েছে?

শিখাও নীরব হইয়া গেল। তপনকে সে এই কয়দিনে ভাল রকমই চিনিয়াছে। খানিক পরে বিনায়ক জিজ্ঞাসা করিল, আপনি কি চেনেন তাকে, কিসের অত অহঙ্কার তার।

—গুধু চিনি নয় সে আমার বিশেষ বন্ধু। আপনার মত আমারও হাত-পা দাদা বেঁধে দিয়েছেন।

বিনায়ক গুধু বলিল,—হঁ।

শিখা বলিল,—কিন্তু আপনি ভাববেন না বিনয়বাবু, যতদূর জানি তপতী এখনও নিষ্কলঙ্ক আছে। সে নিশ্চয়ই নিজের ভুল বুঝতে পারবে।

বিনায়ক আবার একটা হঁ দিল।

একটি কিশোর কর্মী আসিয়া বলিল,—বড়দাদাবাবু, ছোট-দা ডাকছেন আপনাদের।

—যাচ্ছি। বলিয়া উভয়ে উঠিল। চলিতে চলিতে শিখা বলিল,—আপনারা বুঝি এদের বড়দা আর ছোটদা।

—হঁ, এখানে চাকর কেউ নেই। সবাই তাই তাই, সব অংশীদার।

—সব নিয়মই বুঝি আপনাদের দুজনের মস্তিষ্ক-প্রসূত?

—সবই ঐ তপনের সৃষ্টি দেবী। মাথা আমার খোলে না। ও যা বলে, তাই আমি করে যাই।

আশ্চর্য! এই লোকটির মত বন্ধুর উপর এমন অগাধ স্নেহ আর শ্রদ্ধা এক-  
যোগে পোষণ করিতে শিখা আর কাহাকেও দেখে নাই। নিজে তিনি কেমন,  
তাহা বুঝাইবার চেষ্টা মাত্র করিলেন না। বিনায়কের দিকে একটা সশ্রদ্ধ  
দৃষ্টিপাত করিয়া শিখা হাসিয়া বলিল,—সবই ত ঠর বলছেন, আপনার নিজের  
কি কিছুই নাই?

—আছে, আমার নিজের অতুল সম্পদ আছে। ঐ বন্ধু, আমার তপন।

শিখা অভিভূত হইয়া গেল। হৃজনে অফিস ঘরে আসিয়া পৌছিল।  
অফিস দেখিয়া শিখার চোখ জুড়াইয়া যাইতেছে। দেওয়ালে টাঙানো  
শিবমূর্তিগুলি যেন জীবন্ত। মেঝের আলপনাগুলি কোন্ অতীত যুগের সহিত  
যেন বর্তমানের যোগ স্থাপন করিতেছে। ঘরে ধূপ-স্বরভিত বাতাস মন্থর-  
মদির। চতুর্দিকে শান্তির আবহাওয়া। একটাও চেয়ার বা টেবিল নাই;  
থাকিলেও যেন এ ঘরে মানাইত না।

শিখা দ্বিধাহীন মনে ঠিক তপনের ছোট বোনটির মতই পলাশপাতাটা  
টানিয়া লইয়া খাইতে বসিল। খাইতে খাইতে বলিল,—তোমাদের এখানে তো  
ভাই রোজ পিকনিক—আমার কিন্তু যেদিন খুসী ভাগ রইল এতে।

বিনায়ক বলিল,—খুসীটা যেন আপনার রোজই হয়।

শিখা বলিল,—আপনার ভাগে তাহ'লে কম পড়ে যাবে। হুই ভাইবোনে  
জুটলে আপনি পাবেন না।

হাসিতে হাসিতে বিনায়ক কহিল—না-হয় হেরেই জিতবো।

—অর্থাৎ! শিখা তাকাইল।

তাহার চোখের দিকে চাহিয়া বিনায়ক বলিল,—অর্থাৎ এত বেশী হারবো  
যে হারের দিক দিয়ে আমিই হব ফস্ট।

তিনজনেই হাসিয়া উঠিল।

তপতী আসিয়া অনুরোধ করিল,—সকাল থেকে তিনবার ফোন করলাম  
মা, শিখা কিছুতেই আসছে না—আমাদের পাটিতে যাবে না ব'লছে।

—কেন? কি হল তার? যাবে না কেন? মা নিরীহের মত প্রশ্ন করিলেন।

—কে জানে! তোমার জামাই কিছু ব'লছে নাকি? সেই যে সেদিন  
ওর সঙ্গে দেখা ক'রতে গেল তারপর থেকে আর শিখা আসে নি।

—জামাই কি বলবে খুকী! ওর নামে মিছেমিছি কেন বদনাম দিচ্ছিস?

মা বিরক্ত হইতেছেন, কিন্তু তপতী ঝঙ্কার দিয়া কহিল, খুব বলতে পারে। যা  
অসভ্য। ভদ্র মেয়েদের সঙ্গে কথা বলতে গিয়ে অভদ্রতা করা কিছু বিচিত্র নয়।



—ও কথাই বলে না তো বেশী, ভদ্র কি আর অভদ্রই কি। তোদের পাটিতে ওকে নিয়ে যাচ্ছিস তো আজ—দেখে নিস্ আমার কথা ঠিক কি না।

—ওকে নাই-বা নিয়ে গেলুম মা, বিস্তর বড় বড় লোক যাবে সেখানে যদি কিছু অসভ্যতা করবে বসে, গঙ্গার জলে সে লজ্জা ধোয়া যাবে না।

—সে কি খুকী, ওকে না নিয়ে গেলে ভাববে কি। লোকেই-বা বলবে কি?

নিরুপায় তপতী রাজি হইল, নতুবা মা হয়ত একটা ‘সীন ক্রীয়েট’ ক্রিয়া বসিবেন। বলিল,—আচ্ছা, তাহলে এই জিনিস কটা কিনে নিয়ে যেতে বলো। তপতী একটা লিষ্টে দিল।

বন্ধুবর্গের সহিত তপতী পূর্বেই যাত্রা করিল। তপনকে মা যেমনটি আদেশ করিয়াছিলেন, সে তেমনি ভাবেই গিয়া ষ্টিমারে উঠিল এবং জিনিসগুলি চাকরের হাতে দোতলায় তপতীর নিকট পাঠাইয়া দিয়া নীচেই বসিয়া রহিল। যথাসময়ে ষ্টিমার ছাড়িয়া গেল।

উপর হইতে সঙ্গীতের মধুর স্বরলহরী ভাসিয়া আসিতেছে। তপন অত্যন্ত সঙ্গীতপ্রিয়। কান পাতিয়া শুনিতে লাগিল, আর ভাবিতে লাগিল—ঐ সভায় গিয়া একখানি গান গাহিলেই সে তপতীকে আকর্ষণ করিতে পারে কিন্তু যে নারী অগ্ন পুরুষের প্রতি আসক্তা, তাহাকে তপনের আর কোন প্রয়োজন নাই। তপনের জীবনসঙ্গিনীর স্থানে সে বসিতে পাইবে না।

তপতীর পরিচিতের সংখ্যা শতাধিক। প্রায় সকলেই আসিয়াছে। অবড় ষ্টিমারখানা জুড়িয়া নানাভাবে নানা কথাবার্তা চলিতেছে। পরিচিত হিসাবে মিঃ ঘোষাল, যাঁহার সহিত তপতীর বিবাহ হইবার কথা ছিল, তিনিও আসিয়াছেন। তাহাকে দেখিবামাত্রই তপতী বলিয়া উঠিল, —আসুন, বাপের লক্ষ্মী ছেলে—আছেন কেমন?—এই বিক্রপ সকলেই উপভোগ করিল কিন্তু মিঃ ঘোষালের বুকের ভিতর কোথায় যেন একটা আনন্দের শিহরণ জাগিতেছে। বাপের ডাকে বিবাহ-সভা হইতে উঠিয়া যাওয়া তাঁহার চরম নিবৃদ্ধিতা, কিন্তু তাঁহার উদ্বেগ তো তাহা ছিল না। তপতীর বাবাই তো যত গোল বাধাইলেন। টাকাটা ফেলিয়া দিলেই চুকিয়া যাইত। মিঃ ঘোষালের জীবনে এই ব্যর্থতার ক্ষতি কোনদিন পূরণ হইবে না তথাপি আজ তিনি আনন্দিত হইলেন এই ভাবিয়া যে, তপতীর অহুযোগের অভ্যস্তরে ধ্বনিত হইয়া উঠিতেছে তাহার প্রতি ভালোবাসার ইঙ্গিত। তপতী সেদিন তাহাকে চাহিয়াছিল, আজো তাহাকে না পাওয়ার দুঃখ অনুভব করে। প্রীতকণ্ঠে তিনি বলেন,—বরাতে সইলো না তপতী দেবী, আমার দোষ কি বলুন? নইলে বাবার কথাকে মান্য আমি জীবনে ঐ

একবারই করেছি, আর এবারই শেষ বার। কিন্তু এখন তো...

—হাঁ, এখনো লক্ষী ছেলের মত চুপ করে থাকুন।

যে তাঁহার মুখের গ্রাস কাড়িয়া লইয়াছে তাহাকে দেখিবার ইচ্ছা হওয়া মিঃ ঘোষালের পক্ষে স্বাভাবিক কিন্তু যাহাদের তিনি দেখিতেছেন, সকলেই প্রায় পরিচিত, স্বল্পপরিচিত। প্রশ্ন করিলেন,—তিনি কি আসেন নি—আপনার স্বামী?

‘স্বামী’ কথাটা উচ্চারিত হইতে শুনিয়াই তপতীর মুখ লজ্জারক্ত হইয়া গেল।

—কি জানি, আছে কোথায় ওদিকে। বলিয়াই সে অর্গান লইয়া বলিল। চাকরটাকে জিজ্ঞাসা করিয়া সকলে জানিল, জামাইবাবু নীচে একাই বসিয়া আছেন। চপলা তরুণীর দল তৎক্ষণাৎ নামিয়া আসিল এবং তপনকে জোর করিয়া ধরিয়া লইয়া গেল। অতিথিবর্গ দেখিল, তাহার চোখে, একটা ঘন সবুজ রংএর ঠুলি, কপালে ও গণ্ডে চন্দনপঙ্ক। এদিকে পরনে কোট প্যান্ট এবং মাথায় হাট। এই অদ্ভুত বেশ দেখিয়া সকলেই বিস্মিত, বিরক্ত হইল এবং একটা বিজয়ের উল্লাসও অনেকেই অনুভব করিল। তপতীর অহঙ্কার চূর্ণ হইয়া গিয়াছে। তপতী কোন দিন স্বামীর দিকে চাহে নাই, আজো চাহিল না। তরুণীর দল তপনকে লইয়া এক জায়গায় বসাইয়া দিল, বলিল,—স্বদেশী আর বিদেশীতে মেলাচ্ছেন বুঝি। কিন্তু টুপিটা খুলুন টিকি আর কাটবো না—অভয় দিচ্ছি।

তপন শাস্ত করে বলিল,—ভরসা পাচ্ছিনে টিকির বদলে মাথাই যদি...

হাসিতে হাসিতে একজন বলিল,—মাথা তাহলে আছে আপনার? আমরা ভেবেছিলাম, তপতী সেটা ঘুরিয়ে দিয়েছে অনেক আগেই।

তপন নিতান্ত গোবেচারার মত বলিল,—টিকি না থাকায় গুঁর ঘোরাতে অস্ববিধা হচ্ছে।

রেবা দেবী আসিয়া বলিল,—আমি কেটেছিলাম টিকি, আমি শ্রীমতী রেবা...

—আপনি আমার বড্ড উপকার করেছেন রেবা দেবী, টিকির উপর দিয়েই ফাঁড়াটা উতরে গেল। মাথাটা বাঁচতেও পারে।

—বাঁচবে না, ওটাকে আজ তপি’র পায়ে সমর্পণ করবো।

অত্যন্ত করুণ কণ্ঠে তপন কহিল,—গুঁর পা খেঁতলে না যায়।

তপতী ওদিক হইতে ত্রুক্ষুরে ডাকিল,—কি ক’রছিস তোরা? এদিকে আয়না সব!

—তোর বর যে যাচ্ছে না। বলিয়াই তাহারা তপনকেও ধরিয়া আনিয়া একটা টিপয়ের কাছে বসাইয়া দিল। তাহার অদ্ভুত বেশ প্রত্যেকের দৃষ্টি আকর্ষণ করিতেছে। মৃদুগুঞ্জে বিদ্রূপ স্বর হইয়া গিয়াছে। তপতীর কানেও দুই চারিটা কথা ভাসিয়া আসিল কিন্তু এখানে সে নিরুপায়। অত্যন্ত বিরক্তির সহিত সে

একবার তপনের দিকে আঁখিপাত করিল। চোখের ঠুলি এবং চন্দনে মুখখানা আচ্ছন্ন। লোকটা কালো কি কৃষ্ণ তাও বোঝা যায় না। মাথায় টুপি থাকার জন্য চুলও দেখা যাইতেছে না। গন্ধা-বক্ষে এই অপরূপ মূর্তি দেখিয়া হাসিই পাওয়া উচিত কিন্তু হাসিতে গিয়াই মনে পড়িয়া গেল, ঐ কিস্তুত কিমাকার লোকটা তাহার স্বামী! তপতীর কান্না পাইতে লাগিল। আত্মনন্দন করিবার জন্য সে রেলিংএর ধারে আসিয়া দাঁড়াইল।

নীরবে চাটুকু শেষ করিয়া উঠিয়া তপন বলিল,—নমস্কার, আসি নীচেই বসিছি গিয়ে।

তাহার রূপ, আচার, ব্যবহার দেখিয়া সকলেই বুঝিয়াছিল, এখানে বসিবার সে যোগ্য নয়। কেহই বিশেষ কিছু বলিল না। তপতী হাঁফ ছাড়িয়া বাঁচিল। কিন্তু তপন চলিয়া যাইবামাত্র মিঃ ঘোষাল কহিলেন,—ওই লোকটা আপনার বর? আশ্চর্য! আপনার বাবার বুদ্ধির প্রশংসা করতে পারলাম না।

অত্যন্ত উন্মাদ সহিত তপতী জবাব দিল,—থাক, আমার বাবা আপনার বুদ্ধি ধার করতে যাবেন না নিশ্চয়।

তপতীর মনের অবস্থা বুঝিয়া সকলেই এ আলোচনা বন্ধ করিয়া দিল। তপতী কিন্তু আর কোন কথাই কহিল না। অপমানে তাহার সারা অন্তর জ্বলিতেছে। ষ্টিমার জেটিতে ফিরিবামাত্র সে চার পাঁচজন অন্তরঙ্গ বন্ধু লইয়া নিজে গাড়ী চালাইয়া বাড়ী চলিয়া গেল।

তপন একধারে দাঁড়াইয়া দেখিল। আপন মনে হাসিল। উহাদের সে নিষ্ঠুর ভাবে ঠকাইয়া দিয়াছে। ধীরে ধীরে আসিয়া সে ট্রামে উঠিল।

তপতী গৃহে ফিরিয়া শয্যায় লুটাইয়া অনেকক্ষণ কাঁদিল। আজ তাহার ঠাকুরদার কথাগুলি মনে পড়িতেছে। তিনি বলিতেন—“তোর যা বর হবে দিদি, তার আর জোড়া মিলবে না”—তঁার সেই ভবিষ্যৎবাণী নিয়তির এমন নিষ্ঠুর বিক্রম হইয়া দেখা দিবে—কে জানিত! তপতী স্থির করিয়া ফেলিল—অপমান করিয়া ঐ বর্বরকে বাড়ী হইতে তাড়াইয়া দিবে। মারা জীবন তপতী এক থাকিবে, সেও ভালো—তপতীর উহার সহিত এক গৃহে বাস অসম্ভব।

দুঃস্বপ্নের মধ্যেই তপতীর স্নাত্তি কাটিয়া গেল। প্রভাতে তাহার গা-হাত পা বাথা করিতেছে, উঠিল না। মা আসিয়া ডাকিলেন,—শরীর খারাপ খুকী! উঠছিস না কেন?

মায়ের উপর এক চোট ঝাল ঝাড়িয়া লইতে গিয়া তপতী থামিয়া গেল। বেচারী মা, উহার কি দোষ? জামাইকে স্নেহ মমতা করা শাস্ত্রীর কর্তব্য।

তপতী উঠিয়া পড়িল। স্নান সারিয়া চা খাইতে আসিয়া দেখিল, রবিবার

বলিয়া তপন বাহিরে যায় নাই, চা খাইতেছে। তপতীর গলার স্বর শুনিয়াই সে মুখ নীচু করিল, যেন তপতী তাহাকে দেখিতে না পায়।

তপতী আসিয়া তপনকে দেখিয়াই জলিয়া উঠিল। কক্ষ স্বরে বলিল, —বৈরাগী আগে চা খেয়ে যাক, তারপর আমি খাবো।

মা রাগিয়া বলিলেন,—ছিঃ খুকী, কি সব বলছিস ?

তপন হাসিয়া কহিল,—ভালোই তো বলেছে মা। বৈরাগী যেন আমি হতে পারি। অনেক তপস্শ্রায় মানুষ বৈরাগী হয় মা। বৈরাগ্য সাধনার ধন।

রোষ ভরে তপতী বলিয়া চলিল,—যথেষ্ট হয়েছে আর দরকার নাই। তপতী চলিয়া গেল।

মা বলিলেন—কিসব তোমাদের ব্যাপার বাবা, ঝগড়া করেছো নাকি ?

—কিছু না মা, ঝগড়া আমি করি নে। আমার চন্দন তিলক ওর পছন্দ নয় ; তা কি করা যায় বলুন ! কারো কচির খাতিরে চন্দন মাখা আমি ছাড়তে পারবো না।

তপনের মুখের হাসি দেখিয়া মা আশ্বস্ত হইলেন। ছোটখাটো কিছু একটা উদ্দাহের হইয়া থাকিবে। দম্পতীর কলহ, ভাবনারও কিছুই কারণ নাই।

তপন চা খাইয়া উঠিয়া গেলে তপতী আসিল। মুখ অত্যন্ত গম্ভীর। মা হাসিয়া বলিলেন,—ঝগড়া টগড়া করিস নে খুকী—ছেলেটা বড় ভালো।

—অতো ভালো ভালো নয় বুঝলে মা। অত ভালো হতে ওকে বারণ করে দিও।

—তুই বারণ করিস, আমার কি দায় ?

তপতী কথিয়া উঠিল। বলিল—ঐ ‘ইডিয়ট’টাকে শাখ বাজিয়ে ঘরে তুলতে তো দায় পড়েছিল তখন—যত সব।

কিন্তু তপতী সামলাইয়া লইল। মা বিরক্ত হইয়া বলিলেন, চুপ কর খুকী, স্বামীকে ওসব বলতে নেই।

তপতীর ইচ্ছা হইতে ছিল, মাকে আচ্ছা করিয়া কয়েকটা কথা শুনাইয়া দেয়। বলে যে ‘তোমরা যাহাকে আনিয়াছ, সে আমার পদ-সেবার যোগ্য নহে। তাহাকে আমি লইব না। তোমরা তাহাকে লইয়া যাহা খুশি করিতে পারা’ কিন্ত ব্যাপারটা বিস্তী হইবে, বাবা শুনিবেন, এখন একটা কেলেঙ্কারী ঘটয়া যাইবে, অতএব সে ধামিয়া গেল।

মা বলিলেন—দিন ঠিক করেছে, পয়লা বোশেখ তোদের আবার কুলশয্যা হবে।

—আচ্ছা, পয়লা বোশেখ সে কথা ভাবা যাবে। বলিয়া তপতী চলিয়া আসিল।

শিখা কেন আসিল না কাল? তাহাকে যে তপতীর কি ভীষণ দরকার।  
তপতী আবার ফোন করিল।

শিখা ফোনে আসিয়া বলিল,—কি বলছিস তপ?

—আমার বিপদে তুই চিরকাল সাহায্য করেছিস; আজ আমার এই ঘোর  
দুর্দিনে কেন তুই লুকোচ্ছিস বল ত?

শিখা ভরা গলায় বলিল,—লুকোইনি তপু! আমি একজন সন্ন্যাসী দাদা  
পেয়েছি, তাঁর কাছেই এ কয়দিন কাটলো। এখনি আবার আসবেন তিনি।

—বেশ তো তাঁকেও নিয়ে আয়।

—যাবেন না। আলাপ-পরিচয় না হলে যাবেন কেন?

—তা হ'লে কি আমি যাবো তাদের বাড়ী?

—আসতে পারিস, তবে দাদার সঙ্গে দেখা হবে না।

—কারণ?

—দাদা চট করে কারো সঙ্গে আলাপ করেন না। তারপরে তুই আর্থনারী  
হয়ে স্বামীকে গ্রহণ করিস নি শুনলে চটে যাবেন।

মুহুর্তে তপতীর অন্তর রোবরক্তিম হইয়া গেল, বলিল—থাক ভাই, সেই  
আর্থপুত্রের সঙ্গে আলাপ করবার আমার দরকার নাই। তাহলে অসবি নে?

—না ভাই, মফ করিস?

—আচ্ছা, আর ভাকবো না তোকে।

তপতী ফোন ছাড়িয়া দিল। শুদিকে ফোন হাতে করিয়া শিখা বেদনায়  
মুহুমান হইয়া পড়িতেছে।

সকালবেলায় শীতল হাওয়া বহিয়া যাইতেছে। একটা চাঁপাগাছের তলায়  
তিনখানা বেতের চেয়ার পাতিয়া শিখা অপেক্ষা করিতেছিল। মাত্র মাসখানেক  
হইল তপনের সহিত তাহার পরিচয়, কিন্তু ইহারই মধ্যে তাহার কি অভাবনীয়  
পরিবর্তন হইয়া গিয়াছে। ঐ স্পর্শমণির পরশে শিখার অন্তর যেন সোনা হইয়া  
গেল। কিন্তু ঐ মণিটি যাহার সে উহাকে পাথর ভাবিয়া দূরে ফেলিয়া দিয়াছে।  
তার মত দুর্ভাগিনী আর কেহ আছে কি না, শিখা জানে না। তপতীর জন্ম  
শিখার অন্তর করুণায় দ্রব হইয়া উঠিল।

তপন ও বিনায়ক আসিয়া পৌছিল। শিখা প্রণাম সারিয়া বলিল,—একটা  
কথা শোন দাদা—একটা প্রার্থনা।

—কি বল। তোর প্রার্থনা পুরানো তো দাদার গৌরব।

—জানি। অন্তর্চিত কিছু চাইবো না দাদা। তুমি তপতীর সঙ্গে বা তার  
কাছে এমন দুচারটে কথা বল, যাতে সে তোমাকে চিনবার সুযোগ পায়, অন্তত

উৎসুক হয়।

—তাতে লাভ কি শিখা?

—আছে লাভ। আমার বিশ্বাস, তপতী আজো তোমার অযোগ্য হয়ে যাননি। ওর প্রথম জীবন অত্যন্ত সুন্দর, ওর ঠাকুমা-ঠাকুরদার হাতে গড়া। ও এই সোসাইটির চার্জে পড়ে নষ্ট হতে বসেছে, কিন্তু এখনো নষ্ট সে হয়নি। তুমি শুকে বাঁচাও দাদা।

—মরণ-বাঁচনের অধিকার আমার হাতে নেই শিখা। তবে যদি সে আজো অনগ্রপরায়ণা থাকে, যদি সে সতী থাকে, তাহলে তাকে আমি পাব। তার জ্ঞান আয়োজনের কিছু তো দরকার নেই। তবুও তোর কথা রাখবো যতটা সম্ভব।

শিখা নীরবে নত নেত্রে স্বহস্তে-প্রস্তুত খাবারগুলি মাজাইতে লাগিল। বিনায়ক ফুটন্ত চাঁপা ফুলের দিকে লোভাতুর দৃষ্টিতে চাহিয়া আছে। ফুলটা ফুটিয়াছে অনেক উঁচুতে নাগাল পাওয়া যায় না। বিনায়ক একটা লাফ দিল।

শিখার করুণ মুখশ্রী হাসিতে রঞ্জিত হইয়া উঠিল। বলিল, শুধু কারখানার হিসাবই দেখেন না, ফুলের খবরও রাখেন দেখছি।

হাসিমুখে বিনায়ক বলিল, রাখি, কিন্তু নিজের জ্ঞান নয়, মীরটা বড় ফুল ভালবাসে।

—আমার জ্ঞানও একটা পাড়বেন।

বিনায়ক স্বরিতে জবাব দিল, কেন, আপনার তো দাদা রয়েছে, দিক না পেড়ে।

ঠোট ফুলাইয়া শিখা কহিল, দাদা তো আছেই, আপনি বুঝি কেউ নন? কথাটা বলিয়াই শিখার অত্যন্ত লজ্জা বোধ হইতে লাগিল। চাহিয়া দেখিল তপন কিঞ্চিৎ দূরে একটা কুঞ্চুড়ার ছায়ায় দাঁড়াইয়া আছে। নিজেকে প্রচ্ছন্ন করিবার জ্ঞান থাকিল, দাদা থাকে এসো।

বিনায়ক কিন্তু কথাটার জের ছাড়ে নাই, কহিল, —আমার সঙ্গেও তাহলে একটা সম্পর্ক আপনার হওয়া দরকার। কী সম্পর্ক বাঙ্কনী আপনাকে?

—আপাততঃ বন্ধ। শিখা জবাব দিয়া সরবৎ তৈরী করিতে লাগিল।

ঐ “আপাততঃ” কথাটির মধ্যে রহিয়াছে যে ভবিষ্যতের ইঙ্গিত তাহাই ভাবিতে গিয়া শিখার হাতমুখের মুখের পানে চাহিয়া বিনায়ক বুঝিল, শিখাকে পাওয়া তাহার পক্ষে খুব কঠিন না-ও হইতে পারে। কিন্তু তাহার ভয় করিতেছে। তপনের দারুণ ভাগ্য-বিপর্যয়ের কথা তাহাকে আতঙ্কিত করিয়াছে। এই সোসাইটিতে দরিদ্র বিনায়ক আবার ঢুকবে। শিখা তাহার অকাজ্জব ধন, শিখাকে পাইলে ধনা হইয়া যাইবে বিনায়ক কিন্তু শিখাকে সে রাখিবে কোথায়?

—কি ভাবছিল্ বিহু। বলিয়া তপন ফিরিয়া আসিল।

—ভাবছেন, আমার সঙ্গে উনি কি সম্পর্ক পাতাবেন। বলিয়া শিখা গ্লাসের সরবৎ আরো বেগে নাড়িতে লাগিল। মুখে তাহার হাসি মাথানো।

তপন শিখার গায়ে একটা কুঞ্চুড়ার ঝরা ফুল ছুঁড়িয়া দিয়া কহিল,—তুই, আমার বন্ধুকে বিব্রত করে তুলেছিস্ ?

—কি করা যায় দাদা, তোমার বন্ধু যদি নিঃসম্পর্কীয় কাউকে ফুল তুলে না দেন, তাহলে, সম্পর্ক একটা পাতানো ভাল নয় কি ? মীরাটা কিন্তু বড্ড দেবী করছে।

—থাম্—তার স্বামী, শাশুড়ী, স্বশুর। সকালবেলা বিস্তর কাজ। ঐ তো এসেছে....

প্রকাণ্ড একটা গাড়ী গেটে ঢুকিতেই শিখা ছুটিয়া গিয়া মীরাকে জড়াইয়া ধরিল—আয় তুই, এতো দেবী করলি যে.....?

—চুপ চুপ বিহুদা এক্ষুনি মার লাগাবে। ওর কারখানার পাংচুরালিটি বড্ড কড়া। কিন্তু বিহুদার মুখটা যেন,—কি হয়েছে বিহুদা ? মীরা বিনায়কের মাথার চুলে হাতের আঙুলগুলি ডুবাইয়া নাড়িতে লাগিল।

—না বোনটি, কিছু হয়নি ; আয়, তোর জন্ম এই ফুলটা পেড়ে রেখেছি।

মীরা ফুলটা লইয়া খোঁপায় পরিতে পরিতে বলিল,—তোর কই শিখা ?

শিখা করুণ কণ্ঠে কহিল,—আমার দাদাও দিল না, তোর বিহুদাও না।

—বা-রে ! বিহুদা, ফুল পেড়ে দাও, আমার লুকুম, ওঠো।

বিনায়ক উঠিতে যাইতেই শিখা ব্যাকুলভাবে বলিয়া উঠিল,—না, না, আগে খেয়ে নিন—।

মীরা অত্যন্ত ক্রুদ্ধ হইয়াছে, এমন ভঙ্গি করিয়া বলিল,—বটে। আমার চেয়ে তোর দরদ ওর উপর বেশি ? আচ্ছা। তোমাকে ওর হাতে দিয়ে দিলুম বিহুদা, বুঝে কাজ কর এবার থেকে।

মীরা সটান তপনের পায়ের কাছে বসিয়া হাঁটুতে চিবুক রাখিয়া বলিল,—কাল কি হোল দাদা, কেঁদেছিলে সারারাত ?

—না বোনটি কাঁদবো কেন ? তোর দাদা কি এত দুর্বল।

কথাটা বলিয়াই তপন মীরার খোঁপা হইতে চাঁপা ফুলটা তুলিয়া লইয়া হাসিয়া বলিল—“আমারে ফুটিতে হোল বসন্তের অন্তিম নিঃশ্বাসে—আমি চম্পা।”

বাপারটা বেশ সরস হইয়া উঠিতেছিল, কিন্তু মীরার প্রতি উচ্চারিত তপনের শেষের কথাটি এই ক্ষুদ্র সভাটিকে সচকিত করিয়া দিল। এইখানে এমন একজন আছে, অতলান্ত সাগরের মত যাহার বেদনা পারহীন, ক্লহীন। তাহার কথা

শিখা বা বিনায়ক ভুলিয়া না গেলেও খুব তীক্ষ্ণ ভাবে মনে রাখে নাই।

তপনের কথায় শিখার নারী হৃদয়ের কোমলতা যেন উদ্বেল হইয়া উঠিল, তিরস্কারের স্বরে সে বলিল,—তুমি হয়তো খুব কঠিন দাদা, কিন্তু তুমি এমন করে কথা বলো যে পাষাণও কেঁদে ওঠে—শিখার দুই চোখ কারুণ্যে কোমল হইয়া উঠিল।

মীরা শিখার কানে আসিয়া স্নেহের মাধুর্যে কহিল,—দাদা আমার আকাশের তপনের মতই নিজেকে ক্ষয় ক'রে পৃথিবীকে আলোক দেবে। এই তার সাধনা শিখা।

—তোরা ভাই বোন ছ'জনেই সমান মীরা। তোদের হাসিভরা কথা শুনে জনহীন প্রান্তর পর্যন্ত কেঁদে ওঠে।

মীরা এবং তপন অপ্রস্তুতের মত চুপ করিয়া গেল। বিনায়ক অবস্থাটাকে একটু হালকা করিবার জন্য বলিল,—কান্না মাহুষের প্রথম অভিব্যক্তি।

রুথিয়া শিখা জবাব দিল,—তাই অমনি বন্ধু জুটিয়েছেন, প্রতি কথায় কাঁদবো।

বিনায়ক বলিল,—রোদনের মধ্যে দিয়েই আমরা শ্রেয়ঃ লাভ করি, শিখা দেবী।

—রাখুন আপনার ফিলজফি। শ্রেয়ঃ সম্বন্ধে আমার ধারণা আপনার সমান নাও হতে পারে।

—না হতে পারে, কিন্তু হতেও তো পারে। তপন টাঙ্গনি দিল।

—রাগিও না দাদা, ভাল লাগছে না। তোমার বন্ধুর শ্রেয়ঃ যদি দিনরাত কান্না দিয়ে পাওয়া যায়, তাহলে আমার তা চাইনে।

—আমরা কে কি চাই তা আমরা নিজেরাই জানিনে শিখা দেবী। বিনায়ক বলিল।

—রাখুন, রাখুন, এটা কলেজের ক্লাশরুম নয়। আমি কি চাই, তা আমি খুব ভাল ক'রেই জানি।

মীরা খিল খিল করিয়া হাসিয়া বলিল,—জানিস তে চেয়ে নে-না ভাই।

রোষবদ্ধ নয়নে শিখা ডাকিল—মীরা ভালো হচ্ছে না।

হাসি বিকশিত মুখে মীরা বলিল,—খুব ভালো হচ্ছে শিখা।

দোতলার বারান্দা হইতে শিখার মা ডাকিয়া বলিলেন—রোদটা কড়া হ'য়ে উঠলো তপন, ঘরে চলে এসো বাবা তোমরা।

তপন ও মীরা তৎক্ষণাৎ উঠিয়া চলিয়া গেল। এ যাওয়ার উদ্দেশ্য এতই স্পষ্ট যে শিখা লজ্জানতমুখে খাবারের বাসনগুলি গুছাইতে লাগিল। বিনায়ক একটা ফুল পাড়িয়া শিখার হাতে দিয়া বলিল,—বেশ তা'হলে বন্ধুই হলেন—কেমন, রাজি।



— রাজি ! শিখা নতমুখে বলিল কথাটা ।

ইচ্ছা থাকিলেও বেশীক্ষণ বিনায়কের কাছে একলা থাকিতে শিখার লজ্জা করিতেছিল । উভয়ে চলিয়া আসিল ছায়াঢাকা বারান্দায় ।

পয়লা বৈশাখ সকালে উঠিয়াই তপতীর মনে পড়িল, নববর্ষের নিমন্ত্রণ-লিপি কেনা হয় নাই । আজই বন্ধুগণকে তাহা পাঠান উচিত । বৎসরের প্রথম দিন বলিয়া হয়তো তপনের উপর তাহার মনটা একটু প্রশস্ত ছিল ।

মা'কে উদ্দেশ্য করিয়া বলিল, —আমার নববর্ষের নিমন্ত্রণ-লিপি কেনা হয় নি মা, এখনি যেতে হবে । সে আবার সেই কলেজ স্ট্রিট — এ পাড়ায়, পাওয়া যায় না ।

মা বলিলেন, —তা যা-না কলেজ স্ট্রিট, কিনে আনগে ।

—একা যাবো মা ? ওদিকে আমি বেশী যাইনে ।

মা এক মুহূর্ত কি ভাবিলেন, তারপরই হাস্যদীপ্ত কণ্ঠে কহিলেন, একা কেন যাবি তপনকে নিয়ে যা । যাও তো তপন, নববর্ষের কার্ড কিনে আনো গিয়ে ।

এতোটা তপতীর ইচ্ছা ছিল না ! ঐ অভদ্র লোকটাকে লইয়া বাজার করিতে যাইতে সে নারাজ । কিন্তু মা যেভাবে কথাটা বলিলেন তপতী আর না যাইয়া পারে না । সম্মতি সূচক ঘাড় নাড়িয়া বলিল, —বেশ, গাড়ীটা বের করুন ।

তপন নীরবে চা পান শেষ করিয়া উঠিয়া গেল এবং গ্যারেজ হইতে গাড়ী বাহির করিয়া চালকের আসনে বসিয়া তপতীর জগ্ন অপেক্ষা করিতে লাগিল ।

হৃন্দর একটা হালকা রং-এর শাড়ী পরিয়া তপতী নামিয়া আসিল । কিন্তু ঐ হৃবেশা তরুণীকে একটা চন্দন-তিলক আঁকা কিঙ্কতের পাশে দেখিলে লোকে ভাবিবে কি । ছুই মুহূর্ত ভাবিয়া তপতী ভিতরের আসনে উঠিয়া বসিল—তপন গাড়ী ছাড়িয়া দিল ।

কলেজ স্ট্রিটের একটা বড় দোকানের সম্মুখে আসিয়া দাঁড়াইল গাড়ী । নামিয়া তপতী দোকানে ঢুকিল । সম্ভ্রান্ত তরুণী দেখিয়া দোকানের কর্মীরাও প্রয়োজন জানিবার জগ্ন বাস্তব হইল ।

তপতী কার্ড দেখিতে চাহিল, একবার ঘাড় ফিরাইয়া দেখিল তপন গাড়ীতে বসিয়া রাস্তার ওপারে ফুলের দোকানটায় মাজানো ফুলগুলির দিকে চাহিয়া আছে । দোকানের একজনকে তপতী আদেশ করিল, —ওকে বলুন তো হুঁটার ফুল কিনে আহুক ।

সে ব্যক্তি দোকানের ভিতর হইতে চীৎকার করিয়া কহিল, —এ ড্রাইভার, হুঁরুপেয়াকো ফুল লে-আও ।

তপন নীরবে নামিয়া ফুলের দোকানে চলিয়া গেল। তাহাকে 'ডাইভার' সম্বোধন করায় তপতীর প্রথমটা লজ্জাই হইয়াছিল, কিন্তু ভাবিয়া দেখিল, দোকানের কর্মচারীর কিছুমাত্র অপরাধ নাই। মুহূ ভাবিয়া সে কার্ড চাহিয়া লইয়া এবং মূল্য দিয়া গাড়ীতে ফিরিয়া চালকের আসনে নিজে বসিল।

তপন অনেকগুলি ফুলের একটা বোঝায় মুখ আড়াল করিয়া ফিরিতেই তপতী নিজের বাঁদিকের খালি জায়গাটা দেখাইয়া দিয়া বলিল,—রাখুন।

তপন ফুলগুলি সেখানে রাখিয়া দেখিল, তপতীর পাশে বসিবার আর স্থান নাই। সে ভিতরের সীটে আসিয়া বসিলামাত্র তপতী গাড়ী ছাড়িয়া দিল।

মেডিকেল কলেজের কাছাকাছি একটি লোককে দেখিয়া তপতী গাড়ী থামাইয়া প্রশ্ন করিল,—এখানে কোথায়?

—কগী দেখিতে গিয়াছিলাম—ফিরছি।

—আসুন গাড়ীতে। বলিয়া তপতী ফুলগুলি স্বহস্তে তুলিয়া নিজের কোলের উপর রাখিয়া ভদ্রলোকের বসিবার স্থান করিয়া দিল আপনার পাশে। ভদ্রলোক তপনকে চিনেন না কিন্তু তপতী পরিচয় করাইয়া না দেওয়ায় তাহার দিকে একবার চাহিয়াই মুখ ফিরাইলেন।

তপন নীরবেই বসিয়া রহিল। তাহাকে এইভাবে অপমান করিবার জন্তই তবে তপতী সঙ্গে আনিয়াছে! ভালই। ব্যথা তপনের অন্তরে জাগিতেছে কিন্তু সহ্যশক্তিও তাহার অসীম। ওদিকে তপতী গাড়ী চালইতে চালাইতে কথা বলিতেছে,—এইখানেই নিমন্ত্রণ করছি, নিশ্চয়ই যাবেন বিকালে।

—নিশ্চয়ই যাবো। আপনার হাতের লিপি না পেলে বছরটাই মিছে হবে।

—খোসামুদি খুব ভাল শিখেছেন, দেখছি। কার কার স্তব করছেন আজকাল?

—স্তব করবার যোগ্য মেয়ে কমই থাকে মিস্ চ্যাটার্জি।

—যেমন আমি একজন। বলিয়াই তপতী উচ্ছলভাবে হাসিয়া উঠিল।

ভদ্রলোক বিব্রত হইতে গিয়া সামলাইয়া লইলেন, বলিলেন,—কথটা মতি।

—ওঃ! এইখানে নামবেন আচ্ছা—নমস্কার।

ভদ্রলোক তাহার বাড়ীর দরজায় নামিয়া গেলেন। তপতী আবার গাড়ী চালাইল। তপনকে সে যথেষ্ট অপমান আশ্রয় করিয়াছে। যদি সে মা'কে গিয়া সব কথা বলিয়া দেয়। তপতীর মাথায় এতক্ষণে একটা দৃষ্টান্ত জাগিল। পিছন ফিরিয়া দেখিল, তপন গাড়ীর কিনারায় মাথা রাখিয়াছে। তাহার কৃষ্ণ-কৃষ্ণিত কেশগুলি বাতাসে উড়িয়া বিপর্যস্ত হইয়া গিয়াছে। তপতী দেখিয়াছে তপনের মুণ্ডিত মস্তক, আজ দেখিল তাহার মাথার চুলগুলি নরম রেশমের মত থোকা।

থোকা হইয়া উড়িতেছে। তপতীর বুকে অকস্মাৎ একটা মমতার শিহরণ জাগিল। গাড়ী বাড়ীর কাছাকাছি আসিয়াছে। গেটে ঢুকিয়া তপতী নামিতেই দেখিতে পাইল, তপন নামিয়া দারোয়ানকে বলিতেছে,—মা'কে বলে দিও, আমি বরোটা নাগাদ ফিরবো।

তপতী কত কি ভাবিতে ভাবিতে উপরে উঠিয়া আসিল।

বিকালে স্নান সারিয়া তপন যখন থাইতে আসিল, তপতীর বন্ধুরা তখন মহাসমারোহে আহারে বসিয়াছে। তপনকে দেখিয়া দু'একজন একটু নাক সিটকাইল। অধিকাংশই তাহাকে চেনে না।

বন্ধুরা যে বরান্দায় থাইতে বসিয়াছে, তপন তাহা পার হইয়া ওদিকের ঘরে তাহার নিত্যকার খাইবার স্থানে গিয়া বলিল,—কৈ মা, খাবার দিন।

—ওখানে বসবে না বাবা—ওদের সঙ্গে ?

—না মা, আমার অসুবিধা বোধ হয়। ওদের দলের তো আমি নই মা।

তপতী উৎকর্ণ হইয়া ছিল, মা'র সহিত তপনের কি কথা হয় শুনিবার জন্য। যেটুকু সহানুভূতি আজ তপনের উপর জন্মিয়াছিল, মুহূর্ত্তে তাহা উড়িয়া গেল। উনি ওদের দলের নন—কি বাহাদুরী ? উহার জন্য তবে তপতীকেই বুঝি ভঙ্গ-সমাজ ত্যাগ করিতে হইবে। রাগিয়া তপতী চলিয়া যাইতেছিল, কিন্তু আরো কি কথা হয় শুনিবার জন্য দাঁড়াইল ; মা হাসিয়া বলিলেন,—আচ্ছা বাবা, এইখানেই বোস। তিনি একটা চপ ও একটা কাটলেট তপনকে থাইতে দিলেন।

তপন নিতান্ত বিনয়ের সহিত বলিল,—ওসব আমি ভালবাসিনে মা, মাছ মাংস তো আমি খুব কম খাই, আমার কুটি-মাখন, আর জেলি দিন।

তপতী আর শুনিল না। ঐ দারুণ বর্বরকে লইয়া তাহাকে ঘর করিতে হইবে, ইহা অপেক্ষা তপতী যেন মরিয়া যায়। মা জামুক সব কথা, তপতী ঐ হতভাগ্যকে যেমন করিয়াই হউক বাড়ী হইতে তাড়াইয়া দিবে।

মনের ভিতরটা যেন আগুনের পুড়িয়া যাইতেছে। ইহার প্রতিক্রিয়া দেখা দিতেছে বন্ধুগণের প্রতি তাহার স্নেহাধিক্যে। সকলেই পরিতুষ্ট হইয়া ভোজ সমাধা করিল, তপতীর জয়গান করিল এবং নূতন তৈরী লন্টাতে খেলিবার জন্য গিয়া জমায়েত হইল।

তপনকে আর একচোট অপমান করিবার জন্য চোঁচাইয়া তপতী বলিল,—আমি খেলতে যাচ্ছি মা, বারান্দা থেকে দেখো কেমন খেলা শিখেছি।

মা বলিলেন, তুমি টেনিশ খেলবে না বাবা ?

—ও খেলা আমি খেলিনে মা, ওটা বড়লোকদের খেলা, আমাদের পোষায় না।

—হলোই বা যাও, একটু খেলা কর গিয়ে।

—না মা, আমি একটু বেড়াতে যাচ্ছি।

তপন বাহির হইয়া গেল।

মার মন সন্তানের কলাগকামনায় সর্বদাই ব্যস্ত থাকে। খুকীর কাণ্ডকারখানা দেখিয়া মিসেস চাটার্জি অত্যন্ত চিন্তিতা হইয়া পড়িয়াছেন। স্বামীকে সব কথা খুলিয়া বলিতেও তাহার ভয় হয়—কারণ তিনি জানেন, স্বামীই এই ব্যাপারের মূল। খুকী তপনকে দেখিতে পারে না, শুনিলেই তিনি অত্যন্ত ব্যথা পাইবেন। আর খুকী ঠিক কি ভাবে তপনকে দেখিতেছে, তাহা মা'ও সঠিক জানিতে পারিতেছেন না। এ যুগের তরুণ-তরুণীকে লইয়া ফাসাদ বড় কম নয়। যাহা হউক, আজ তিনি উহাদের ফুলশয্যার আয়োজন করিয়াছেন। খুকীর স্ববে তপনকেই আজ তিনি পাঠাইয়া দিবেন।

রাত্রে খাওয়া শেষ হইলে স্নেহকোমল কণ্ঠে মা বলিলেন—খুকীর এখন আর পড়াশুনার চাপ নেই, এবার গুর সঙ্গে একটু মেলামেশা কর বাবা।

তপন একটু চকিত হইল, তৎক্ষণাৎ সামলাইয়া লইয়া বলিল,—গুর মনের উপর চাপ দিচ্ছেন কেন মা? এ যুগের মেয়েরা মনের উপর চাপ সহ্য করে না।

—কিন্তু বাবা...

বাধা দিয়া তপন বলিল,—আপনি সব কথা বুঝবেন না মা, আর আমি বলতেও পারবো না। তবে আমার হাতে আপনার খুকীকে সম্প্রদান করেছেন,—এ কথা যদি ঠিক হয় তাহলে তার সঙ্গে কি রকম ব্যবহার করতে হবে সে ভার আমার হাতেই ছেড়ে দিন। আপনাদের উদ্বেগ অনাবশ্যক। আরো কিছু দিন থাক।

মা তপনের কথা শুনিয়া কয়েক মিনিট নীরব হইয়া রহিলেন। তারপর করুণকণ্ঠে কহিলেন,—খুকীর ঐ বন্ধুগুলোকে আমার ভয় করে বাবা—

—কিছু ভয় নেই মা, মেয়ে আপনার যথেষ্ট বুদ্ধিমতী! ওরা তার কোন ক্ষতি করতে পারবে না। আর ক্ষতি যদি হয়ে থাকে, তাহলে অনেক আগেই তা হয়েছে।

—সে কি কথা বাবা! মাতা শিহরিয়া উঠিলেন।

—না মা বিচলিত হবেন না। আপনার মেয়েকে বুঝতে সময় লাগে! তবে যতদূর মনে হয়, সে আত্মরক্ষায় সক্ষম। আমার ঘুম পাচ্ছে মা, শুইগে।

মা আর কিছুই বলিলেন না, বলিতে তাঁহার বাধিতেছিল। আপন কন্ঠ্যর সম্বন্ধে আপনার জামাই-এর সহিত কতক্ষণই বা আলোচনা করা যায় এইরকম একটি বিষয় লইয়া! তপন চলিয়া গেলে তিনি তপতীর কক্ষে আসিয়া দেখিলেন, তপতী অনেকক্ষণ ঘুমাইয়া গিয়াছে। একটা নিঃশ্বাস ফেলিয়া তিনি শয়নকক্ষে

ফিরিয়া গেলেন।

কিন্তু ফিরিয়া গিয়াও নিশ্চিত হইতে পারিলেন না। আধুনিক আলোকপ্রাপ্তা শিক্ষিত মেয়েকে তিনি অধিক আর কি বলিতে পারেন। যতদূর বলিয়াছেন, তাহাই যথেষ্ট। এ সমাজে এতখানিও কেহ বলে না। কিন্তু তাঁহার আশ্চর্য বোধ হইতেছে যে, খুকী জানে, তপন ও-ধরে আজ যাইবে, অথচ খুকী নিশ্চিন্তে ঘুমাইয়া পড়িল! তপনের জন্ম এতটুকু উদ্বেগ, একটুখানি উৎকণ্ঠাও কি তাহার মনে জাগে না? সমস্ত ব্যাপারটা মিসেস চ্যাটার্জির অত্যন্ত দুজ্জের্য বোধ হইতেছে।

তপনই-বা কেন ওভাবে জবাব দিল? তপন যাহা বলিল, হয়ত সেই কথাই সত্য; জোর করিলে খুকীর জেদ বাড়িয়া যাইবে, কিন্তু জোর করিতে হয় কিসের জন্ম! আজ দুই আড়াই মাস তিনি তপনকে দেখিতেছেন, তাহার মত চোখ জুড়ানো ছেলে তিনি কমই দেখিয়াছেন। খুকী যদি তাহাকে অভদ্র বা ইডিয়ট মনে করিয়া থাকে তবে অত্যন্ত ভুল করিয়াছে—খুকীর এ ভুল ভাদ্রিয়া দিতে হইবে। মিসেস চ্যাটার্জি কণ্ঠার ভবিষ্যৎ ভাবিয়া ব্যাকুল হইয়া উঠিতে লাগিলেন ক্রমশঃ।

ওদিকে পদশব্দটা ফিরিয়া যাইবা মাত্র তপতী চোখ মেলিয়া চাহিল, দেখিল, তপন নহে, মা; তপন আসিতেছে ভাবিয়াই সে ঘুমের ভান করিয়াছিল, কিন্তু তৎপরিবর্তে মা'কে আসিয়া ফিরিয়া যাইতে দেখিয়া একটু নিশ্চিন্ত হইল। হয়ত তপন আসিবে না, কিম্বা পরে আসিবে! রাত্রি তো এগারটা বাজিয়া গেল।

তপতী দরজা খোলা রাখিয়া অনেকক্ষণ জাগিয়া রহিল। তপন তাহা হইলে আজ আসিবে না। তপতী যেন বাঁচিয়া গেল। তপন আসিলে তাহাকে একটা নির্ঘম আঘাত করিবার জন্ম তপতী প্রস্তুত হইতেছিল,—আসিল না, ভালই হইল। কিন্তু সত্যিই কি আসিবে না।

তপতী পা-টিপিয়া-টিপিয়া এদিকের বারান্দা পার হইয়া তপনের রুদ্ধদ্বার শয়ন-কক্ষের কাছে আসিয়া দাঁড়াইল। ভিতর হইতে নিদ্রিত ব্যক্তির ভারী নিঃশ্বাসের শব্দ আসিতেছে। তপন তাহা হইলে ঘুমাইয়া গিয়াছে! কিন্তু কেন? তপতী মা'র কথায় সম্মতি দেয় নাই, কিন্তু প্রতীবাদও করে নাই। যাক, না আসিয়া ভালই করিয়াছে। তপন তাহা হইলে বুঝিয়াছে তপতী তাহাকে চায় না। তপতী নিশ্চিন্ত হইতে গিয়া ঠিক বুঝিল না, আধুনিক যুগের বিকৃত শিক্ষা তাহার নৈরাশ্রকে নিশ্চিন্ততার রূপে দেখাইতেছে কি না। তপতী ফিরিয়া আসিয়া শয়ন করিল। ঘুম তাহার ভালই হইবার কথা, কিন্তু অনেক—অনেকক্ষণ তপতী জাগিয়া রহিল সেদিন....

পরদিন সকালে তপতীর ক্লান্ত-বিষম মুখশ্রী দেখিয়া মা সম্মুখে কহিলেন,—  
বরের সঙ্গে ভাব-সাব করগে খুকী, দেখবি, ছেলেটা খুব ভালো।

ঝঙ্কার দিয়া তপতী কহিল—তুমি বড্ড বাড়াবাড়ি করছো মা, থামো এবার!

মা গুরুত্রে শুরু হইয়া গেলেন। একটা ভয়ানক কিছু উহাদের হইয়াছে, কিন্তু  
কী হইয়াছে? প্রশ্নের উত্তর মা খুঁজিয়া পাইলেন না তপতীর মুখের কোনো  
রেখায়। মায়ের চিন্তাকুল মুখ দেখিয়া তপতী নিজের কথাটা সম্বন্ধে সচকিত  
হইল, মুহূর্ত্ত হাসিয়া কহিল,—এত বড়ো মেয়েকে কিছু শেখাতে হয় না, তোমার  
অত ভাবনা কেন? ভাব-সাব হয়েছে আমাদের। এক ঘরে না গুলেই বুঝি  
আর ভাব হয় না!

তপতীর মুখের হাসি দেখিয়া মা অত্যন্ত তৃপ্তি বোধ করিলেন। আজকালকার  
চালাক ছেলেমেয়ে, হয়ত মা'কে ফাঁকি দিয়া বিদায় করিয়া উহার দৃষ্টিতে মিলিত  
হইয়াছে। তাই তপতীর জাগরণ-ক্লান্ত মুখশ্রী মা'কে অত্যন্ত আনন্দ দিল। স্নেহ-  
বিগলিত স্বরে তিনি কহিলেন,—বেশ মা আমার মনটা খুব চঞ্চল হয়েছিল কিনা,  
তাই বলছিলাম। এবার আমি নিশ্চিত হতে পারবো তাহলে!

মধুর হাসিয়া তপতী কহিল,—হ্যাঁ একদম নিশ্চিত হয়ে যাও, কিছু ভাবনার  
দরকার নেই তোমার।

তপন আসিয়াই ঘরের মধ্যে তপতীকে দেখিয়া দরজার কাছে থামিয়া গেল।  
মা ডাকিলেন,—এসো বাবা, খাবে। তপতীর পাশ কাটাইয়া তপন ও-দিকের  
একটা চেয়ারে মুখ ফিরাইয়া বসিল। তপতী সন্ধানী দৃষ্টিতে তাহার আপাদ-মস্তক  
দেখিতে চাহিল কিছুই দেখা যায় না। কোট-প্যাণ্টগুলো সমস্ত দেহটা ঢাকা।  
উর্ধ্বাংশে তিলক এবং চোখে সবুজ ঠুলি। মুখখানা অমন ভাবে ফিরাইয়া রাখিবার  
হেতু কি! তপতীর আশ্চর্য বোধ হইতে লাগিল। ভাবিল, মুখের ডোলুটা  
বোধ হয় ভাল নয় হয়ত দাঁতগুলো উঁচু কিম্বা ঠোঁট দুইটা পুরু, তাই তপতীকে  
দেখাতেই চাহে না। কিম্বা লজ্জাও হইতে পারে। তপতী মাথার চুলগুলি শুধু  
দেখিতে পাইতেছে! ভ্রমরকৃষ্ণ কুঞ্চিত চুলগুলি পিছনদিকে উন্টাইয়া দিয়াছে,  
সমস্ত চুল-করা একটা জলধারা-ঘাড়ের পাশে গড়াইয়া আসিতেছে, ঘাড় এবং  
কাঁধের সংযোগস্থলে একটা ভাগুর কালো তিল! পিছনটা তো খুবই সুন্দর মনে  
হইতেছে, আর ফিগারটাও বেশ,—লম্বা, দোহার, বলিষ্ঠ!

সবই হয়ত ভাল, কিন্তু অসভ্য যে। আবার ঐ দাক্ষণ গৌড়ামী, তিলক-  
ফোঁটা, নিরামিষ খাওয়া, পাচালী পড়া—নাঃ, উহাকে লইয়া তপতীর চলিবে না।  
খাওয়া শেষ করিয়া তপতী উঠিয়া গেল, কিন্তু একেবারে চলিয়া গেল না, বারান্দায়  
দাঁড়াইয়া রহিল তপনের সহিত মা'র কথা শুনিবার জন্য। মা বলিতেছেন,

—কাল তোমার কথাটা আমি ভেবে দেখলাম বাবা, ঐ ঠিক। তবে তোমরা তুটি আমাদের সর্বস্ব-ধন। তোমাদের ভালর জন্য মন বড় ব্যস্ত হয়ে ওঠে।

তপন সহাস্ত্রে কহিল,—আচ্ছা মা আমার দ্বারা আপনার খুকীর কিছু মন্দ হবে ব'লে কেন আপনি মনে ক'রছেন ?

শুনিতে শুনিতে তপতী বিরক্ত হইয়া উঠিল। উনি তপতীর ভাল করিয়া দিবেন। কী আশ্পর্ষা! মা বলিলেন,—তোমাদের তুটিকে স্থখী দেখবার জন্যই বেঁচে আছি বাবা।

মা'র কণ্ঠে কল্যাণাশীষ বরিয়া পড়িতেছে! এই অপার্থিব মাতৃমূর্তির সম্মুখে বসিয়া প্রতারণার কথা বলিতে তপনের বিবেক পীড়িত হইতেছে! সে চুপ করিয়া থাইতে লাগিল। তপতী পুনরায় ঘরে ঢুকিয়া বলিল,—আমায় আর এক কাপ চা দাও মা, কড়া করে!

মা অত্যন্ত খুসী হইয়া উঠিলেন! নিশ্চয়ই উহারা কাল মিলিত হইয়াছিল, রাত জাগার জন্য খুকীর কড়া চা থাইতে ইচ্ছা হইতেছে। বলিলেন—আর একটু ঘুমোগে, শরীরটা ঝরঝরে হয়ে যাবে।

তপনের খাওয়া হইয়া গিয়াছে। সে ধীরে ধীরে চলিয়া গেল, অল্পভব করিল, খুকীর অভিনয় চমৎকার জমিতেছে। মা একেবারে মুগ্ধ হইয়া গিয়াছেন। মাতৃত্বের এই ব্যাকুল আবেদন তপনের মনকে আর্ত করিয়া তুলিতেছে। কিন্তু কিছুই সে করিতে পারে না। মা'র কণ্ঠাই যখন অভিনয় করিতেছে, তখন সে আর কি করিবে ?

বিষাদক্ষিন্ন তপন বাহিরে চলিয়া গেল। তপতীও কড়া চা খাইয়া আপনার কক্ষে আসিল, হাসিল থানিক আপন মনে এবং কবিতার খাতাটা টানিয়া লইয়া “বক্ষিতের বেদনা” লিখিতে বসিল।

শিখা কয়েকটি মেয়েকে কারখানার প্রাঙ্গণে আনিয়া জড় করিয়াছে। উহাদের নিকট তাহার কি একটা প্রস্তাব আছে। বিনায়ক একধারে চুপচাপ দাঁড়াইয়াছিল, তপন এখনো আসিয়া পৌঁছে নাই। শিখা কহিল,—আচ্ছা মিতা, দাদার যদি দেৱী থাকে তো আমরা আরম্ভ করি।

—বেশ তো; করুন আরম্ভ। বিনায়ক মুহূ হাসিয়া উত্তর দিল। শিখা আরম্ভ করিল,—ভগ্নিগণ আমাদের অভাব এত বেশী, যে মোটাবার চেষ্টা করতেও ভয় হয়। কিন্তু ভয় করলে চলবে না। অভাব আমাদের যত অভাব-বোধ তার চেয়ে তীব্র হ'য়ে উঠছে। অতএব এই ঠিক স্বেযোগ, যখন আমরা অভাবের প্রতিকার করতে কায়মনে লাগতে পারবো।

আমার প্রস্তাব এই যে, আপনারা দিনকয়েক এই কারখানায় খেলনাগুলো রং করতে শিখুন, ছোট ছোট পাটসগুলোকে জোড়া দিতে শিখুন যার হাত নিপুণ তিনি আরো কিছু বেশী শিখুন তারপর মাজসরঞ্জাম নিয়ে আপনারা যাবেন অভাবগ্রস্তদের অন্তঃপুরে। সেখানে মেয়েদের এই কাজ শিখিয়ে দেবেন, তাঁদের কাঁচামাল সরবরাহ করবেন, তৈরী করাবেন এই সব খেলনা। তৈরী মাল বিক্রী করবার ভার আমাদের। মজুরী তাঁরাও পাবেন, আপনারাও পাবেন। অবসর সময়ে একাজ করে বেশ দু'পয়সা রোজগার করা যাবে বাড়ীতে বসে।

খেলনার সঙ্গে আমরা কার্ডবোর্ড বাক্স তৈরী শেখাবো আর শেখাবো আয়ুর্বেদীয় নানা রকম ঔষধ আর টয়লেট তৈরী করতে, যার গুণ আপনারদের বিলিতি ঔষধ, এসেন্স-সাবান-স্নো পাউডার থেকে অনেক বেশী। অথচ দাম হবে বিলাতীর অর্ধেক। এসব কাজের জন্ম যা কিছু দরকার সবই এখান থেকে দেওয়া হবে। আপনারা শুধু কাজ করবেন। ছয়মাস করে দেখুন, না-পোষায় ছেড়ে দেবেন।

শুধু সৌখীন শিল্প, ঘর মাজাবার উপকরণ দিয়ে দেশের কিছু হবে না। ওগুলোর দরকার আছে তরকারী হিসাবে, কিন্তু ভালভাতের দরকার আগে। অবশ্য প্রয়োজনীয় জিনিষ উৎপাদন না করলে কিছুতেই সুসার হয় না।

এ কাজ যদি আমাদের সফল হয় ; তাহলে পরের কাজ হবে আমাদের আরো বড়—আরো ব্যাপক। সে কাজ দেশের মানুষ তৈরী করার কাজ। আমরা প্রত্যেকে শুধু ছুটি-চারটি করে মানুষ গড়ে যাবো যারা নেতার আস্থানে মাড়া দেবে, অকম্পিত হৃদয়ে মৃত্যুবরণ করবে শ্রেয়ঃ লাভের জন্ম। আমি আপনারদের নেত্রীত্ব চাইনে, আমিও আপনারদের মতন একজন কর্মী থাকতে চাই এবং সমান কাজ করতে চাই।

তখন আসিয়া পৌঁছিল এবং হাসিমুখে আসিয়া অভিবাদন করিল। শিখা বলিয়া চলিল—এই আমার দাদা, অন্তরাল থেকে উনি এবং গুঁর বন্ধু বিনায়কবাবু আমাদের সাহায্য করবেন—দেখবেন, ক্ষতি যাতে আমাদের না হয়। গুঁরা দু'জনে এই কারবারটা গড়ে তুলেছেন ; অতএব মাড়োয়ারীজনোচিত অভিজ্ঞতা যে গুঁদের আছে তা আমরা বিশ্বাস করিতে পারি। আর গুঁরা বলেছেন, ক্ষতি যদি হয় গুঁদের হবে, লাভ যদি হয় তো আমাদের ; আর ক্ষতিই বা হবে কেন ? আহ্নন, আজ থেকেই কাজ আরম্ভ করবো।

মেয়েগুলি মতাই অভাবগ্রস্ত পরিবারের। কাজের প্রাণ শুনিয়া ও সমস্ত দেখিয়া তাহাদের প্রত্যয় জন্মিল। অবসর সময়ে এ কাজ করিয়া কিছু উপার্জন করিতে পারে—তাহারা লাগিয়া গেল।



তপন শিখাকে ডাকিয়া বলিল,—বিয়ে-থা করতে হবে না বুড়ি? এই সব করবি না'ক তুই?

—বিয়ের হয়তো দরকার আছে দাদা, দিও যখন ইচ্ছে কিন্তু এ সবেৰও দরকার আছে। তোমার বোন তোমার মৰ্খাদা রাখতে চায়।

হাসিমুখে তপন বলিল,—বেশ কথা, তবে বিয়েটাও দেব, আর এই মাসেই।

—কেন? বুড়িয়ে গেলুম নাকি দাদা?

—সেটা দেখবার ভার আমাদের উপর—তুই এখনও যা করছিস্ কর!

তপন অকস্মে ঘরে চলিয়া যাইবার কিছুক্ষণ পর বিনায়ক আসিয়া বিপন্ন মুখে কহিল,—শুনছেন মিতা আপনার দাদা বড্ড জ্বালাতন করছে।

আমার দাদা কাউকে জ্বালায় না—শিখা জবাব দিল।

বিনায়ক মাথা চুলকাইয়া বলিল,—কিন্তু আমায় করছে জ্বালাতন।

—কেন?

—আমি আর সব কাজ করতে পারি, লাউ-কুমড়ো কুটেতে পারিনি। শিখা কলহাশ্রে বাক্যরিয়া উঠিল,—দাদা পারে কিন্তু....

আমি পারিনে যে—বিনায়কের মুখে অসহায়তার ছবি ফুটিয়া উঠিল।

শিখার নারী স্বদয় স্নেহে উদ্বেল হইয়া উঠিতেছে। বলিল,—তা আমায় বুঝি আপনার কাজটা করে দিতে হবে? চলুন, যাচ্ছি।

শিখা আসিয়া একটা ইঁচড় কুটিতে বসিতেই তপন গম্ভীর মুখে বলিল,—ভাল হচ্ছে না ভাই শিখা, ওর কাজ কেন তুই করবি? তোর সঙ্গে ওর সম্পর্ক—?

—“মিতা”—বলিয়া শিখা হাসিয়া উঠিল।

—ও, তা হলে কিন্তু—তপন হাসিমুখেই থামিয়া গেল!

—কিন্তু কি দাদা?—শিখার চোখে প্রশ্নের আকৃতি।

কাঁঠালের আঠায় কুলবে না। ফুলের কিতে দিয়ে বাঁধনটা পোক্ত করে দিতে হবে।

—যাও তুমি বড্ড ইয়ে—!

শিখা মুখ ফিরাইয়া তরকারি কুটিতে বসিল। তাহার লজ্জারক্ত মুখের পানে তাকাইয়া বিনায়ক বসিয়া ভাবিতে লাগিল, তপনের ইচ্ছা শিখার অন্তরে সঞ্চারিত হইয়াছে। শিখা বিনায়ককে গ্রহণ করিয়াছে কিন্তু শিখাকে পাইবার যোগ্যতা কি বিনায়কের আছে! তপনের ইচ্ছায় চিরদিনই আত্মসমর্পণ করিয়াছে, বিনায়ক আজও কিছুই বলিল না।

সেদিন বৌদ্ধ-পূর্ণিমা।

একটা দুঃস্বপ্ন দেখিয়া তপন জাগিয়া উঠিল! দক্ষিণ দিকের চওড়া বারান্দা-সংলগ্ন পূর্বদিকের ঘরটায় তপন আর ঐ বারান্দারই পশ্চিমদিকের ঘরটায় থাকে তপতী। মাঝখানে বারান্দাটা যেন একটা দূরন্ত নদী—কোন দিন পার হওয়া যাইবে না। প্রভাতের সূর্য আসিয়া তপনের কক্ষে সূর্য-কিরণ ছড়াইয়া দেয়—অন্তগামী সূর্য তপতীর ঘরের পশ্চিমের জানালাপথে ঊকি মারিয়া যায়। ইহারও মধ্যে হয়ত বিধাতার কোন সূক্ষ্ম ইঙ্গিত নিহিত রহিয়াছে।

মা বেশ শান্ত এবং নিশ্চিন্ত হইয়া গিয়াছেন। উহাদের এই কয়দিনের সংবাদ তিনি বেশী রাখেন না। বেশ বুঝিয়াছেন, বারান্দা পার হইয়া উহাদের মিলন-গুঞ্জন ভালরূপেই চলিতেছে—ভাবিবার কিছু আবশ্যক নাই।

তপন বলিল,—কি ভাবছেন মা?

—কিছু না বাবা, থাক। তোমার মত ছেলে পেয়েছি, ভাববার কি আছে?

তপনের অন্তর মুচড়াইয়া উঠিল। এই পরম স্নেহময়ী জননীকে সে প্রতারিত করিতেছে সজ্ঞানে। একবার তার ইচ্ছা হইল মাকে সব কথা বলিয়া জানায় যে তাঁহারা ভুল করিয়াছেন। ডিগ্রীহীন আর্থার্সভক্ত তপনকে তাঁহার কণ্ঠা গ্রহণ করিবে না। কিন্তু তাহাতে ফল কি হইবে। অনর্থক একটা উৎপাত, তপতীর উপর শাসন এবং আরো কিছু কেলেকারী। না, থাক, তপন কোশলে জানিয়া লইবে তপতী কাহাকে চায়, তাহারই হাতে তপতীকে ফিরাইয়া দিবার ব্যবস্থা করিয়া সে নীরবে চলিয়া যাইবে। এই যে এখানে ইহাদের প্রচুর স্নেহমমতা সে পাইতেছে, ইহারও ঋণ তপন শেষ করিয়া যাইতে চায়—তাহা সময়মাপেক্ষ। তাহারও একটা উপায় তপন ভাবিয়া রাখিয়াছে।

অস্নাতা তপতী বাসি কাপড়েই আসিয়া ঘরের চোকাঠ হইতে বলিল,—মা আমার লেক-ক্লাবে স্নাইমিং কম্পিটিশন্ আছে। এখুনি যেতে হবে। নিজে গাড়ী চালিয়ে গেলে হাতের পরিশ্রম হবে মা, ড্রাইভারটা আসে নি—কি করি বলতো!

মা হাসিমুখে বলিলেন—তপন যাক না গাড়ী চালিয়ে! যাওতো বাবা।  
—আয় খুকী, খেয়ে নে!

—আচ্ছা মা, যাচ্ছি—বলিয়া তপন উঠিয়া চলিয়া গেল।

কিছুক্ষণ পরে তপতী আসিয়া গাড়ীর ভিতরের সীটে আসন গ্রহণ করিল। তপনের পাশে বসিল না। তপন নিরুদ্বেগে নির্বিকার চিত্তে গাড়ী চালাইয়া দিল। ক্লাবের জুনিয়ার ও সিনিয়ার মেম্বারগণ একযোগে আসিয়া দাঁড়াইল গাড়ীর কাছে তপতীকে অভ্যর্থনা করিতে। স্নন্দরী, সুবেশা, তরুণী তপতী! তাহাকে দেখিবার আকাঙ্ক্ষা কার না হয়!

—আহ্নন, আহ্নন, আপনার জন্তই অপেক্ষা, সময় হয়ে গেছে।—

তপতী নামিয়া গেল। গাড়ীটা ঘুরাইয়া ষ্ট্রাণ্ডে লইয়া রাখিতে হইবে, তপন ঘুরাইতেছে, একজন ডাকিয়া কহিল ; সুইমিং কণ্ট্রিউমটা দিয়ে যাও তো হে !

তপতী উহা লইতে ভুলিয়া গিয়াছে, না ইচ্ছা করিয়াই ফেলিয়া গিয়াছে কে জানে ! তপন নির্বিকার চিত্তে নামিয়া কণ্ট্রিউমটা ভদ্রলোকের হাতে দিয়া আসিল।

প্রায় দুই ঘণ্টা তপন গাড়ীতে বসিয়া আছে। অকস্মাৎ দেখিল, অসংখ্য নারীপুরুষ তপতীকে ঘিরিয়া ক্লাবঘরের বারান্দায় আসিয়া দাঁড়াইয়াছে। তপতীর জলদিক্ত স্বদীর্ঘ বেণী সর্পের মত ছলিতেছে। ভিজা কণ্ট্রিউমটার উপরেই সে তাহার পাতলা শাড়িটা জড়াইতেছে, হাতে একটা রূপার কাপ, প্রাইজ পাইয়াছে বোধ হয়। তপন কোন দিন তপতীকে ভাল করিয়া দেখে নাই, আজ তাহাকে দেখিবার ইচ্ছা তাহার হইল না। মুখ নামাইয়া সে গাড়ীটা চালাইয়া দিল।

তপতী ভিতরে বসিয়া ভাবিতেছে, ঐ নির্ঝোঁধটা দেখুক, তপতীর সম্মান প্রতিপত্তি। তপতীকে লাভ করিবার যোগ্যতা যে উহার কিছুমাত্র নাই ইহা যেন সে অচিরে বুঝিতে পারে। কিন্তু তপন ফিরিয়াও তাকাইল না। তপতী ভাবিল, এসব ব্যাপারে মর্যাদা ঐ গ্রাম্য বর্কর কি বুঝিবে। তিলক কাটিতে যাহার দিন ফুরাইয়া যায় তাহাকে কান ধরিয়া বুকাইয়া দিতে হইবে, তপতীর মূল্য কতখানি !

বাড়ি ফিরিয়া তপতী তাহার বিজয়ের নিদর্শন ‘কাপ’টা অল্গা অল্গা প্রাপ্ত পুরস্কারগুলির সহিত সাজাইয়া রাখিল।

সারাদিন তপতীর মনটা আত্মপ্রসাদের আনন্দে ভরপুর রহিয়াছে। সাঁতারে সে আজ প্রথম পুরস্কার লাভ করিয়াছে। কত উচ্ছ্বাসিত প্রশংসা, কত উত্তেজক কথা তাহার স্নায়ু-কেন্দ্রগুলিকে দুর্দান্ত আবেগে যেন ঝঙ্কত করিতেছিল ! সন্ধ্যা হইতে বন্ধুদের লইয়া সে গানের মজলিশ বসাইয়াছে।

অন্যদিন তপন রাত্রি সাড়ে দশটার পূর্বে ঘিরে না, আজ কিন্তু নয়টার সময় ফিরিয়া আসিল। তপতীদের সঙ্গীত-চর্চার ঘরটার পাশ দিয়াই দোতলায় উঠবার সিঁড়ি। তপন নিঃশব্দে উঠিয়া যাইতেছিল, ঘরের কয়েকজন তাহাকে দেখিতে পাইয়া বলিল,—এই যে মিস্টার গোসাই, কোথায় গিয়েছিলেন ?

তপন সিঁড়ির প্রথম ধাপে দাঁড়াইয়া রহিল। প্রশ্নটা তাহাকেই করা হইতেছে বুঝিয়া শাস্তস্বরে বলিল,—বৌদ্ধ বিহারে গিয়েছিলাম।

—ওরে বাপ্—বৌদ্ধ বিহারের কি বোঝেন আপনি ! সেখানে যান কেন ?  
—বিজ্ঞপটা স্পষ্ট।

তপন এক মিনিট স্তব্ধ হইয়া রহিল, তারপর শাস্ত স্বরেই জবাব দিল—

মেয়েদের কাছে এক কণা প্রসাদ ভিক্ষা করার চাইতে সেটা ভালো, কিছু না বুরুলেও ভালো !

তপন চলিয়া গেল । একটি মেয়ে তপনের কথাটা শুনিয়াছিল, বলিল,—  
ঠিক বলেছেন উনি, আপনারা তো মেয়েদের প্রসাদ ভিক্ষাই করেন !

মিঃ বানার্জি কহিলেন,—করি, ভিক্ষা পাবার যোগ্যতা আছে বলে । ওকে  
কে ভিক্ষা দেবে শুনি ?

মেয়েটি বলিল,—ভিক্ষা উনি করেন না, কোন দিন আসেন নি এখানে ।

—আসেন নি কেন ? আসবার কোন্ যোগ্যতাটা আছে ? বৌদ্ধ-বিহারে  
যাওয়ার কথাটা একটা চাল । ভাবলো, ঐ শুনে আগরা ওকে বৌদ্ধধর্ম সম্বন্ধে  
অভিজ্ঞ ভাবে নেব । ওসব আমরা ঢের বুঝি ।

মিঃ অধিকারী কহিলেন,—ঐ ঐ, করবে কি আর, এখানে তো এসে মিশতে  
পারে না, তাই ঐ সব ভণ্ডামী দেখাইয়া পণ্ডিতি জাহির করতে চায় ।

তপতী উঠিল ; ভাল লাগিতেছে না তাহার । কি যেন কোথায় কাঁটার মত  
বিস্তিতেছে । তপন কি সত্যিই কোন নারীর কাছে প্রসাদ ভিক্ষা করে না ?  
সত্যিই কি বৌদ্ধ-বিহারে যায় সে ?

শিখার কথাটা মনে পড়িয়া গেল—“আর্য্যনারী হয়ে তুই স্বামীকে গ্রহণ  
করিলি না”—তপতী উঠিয়া উপরে আসিল !

তপন তখনো খাইতে আসে নাই । রাত্রি মাত্র দশটা বাজিতেছে । অগুদিন  
সে সাড়ে দশটার পূর্বে ফিরে না । তপতী চাহিয়া দেখিল, মা খাবার ঘরে টেবিলের  
উপর রাখিয়া কি একটা শেলাই করিতেছে । ঘরে না ঢুকিয়া তপতী বাহিরের  
একটা সোফায় শুইয়া অপেক্ষা করিতে লাগিল, কোটপ্যান্ট ছাড়িয়া ধুতিফতুয়া  
পরিত্ত তপন খড়ম পায়ে দিয়া আসিয়া ঢুকিল খাবার ঘরে, হাতে একটা  
খেতপদ্ম । তপতী চাহিয়া দেখিল, মুখ তাহার পূর্ববৎ ফিরানো রহিয়াছে । মুখ না  
দেখিয়া তপতী পায়ের দিকে চাহিল । স্বন্দর হৃগঠিত পা দুখানি । খড়মের কালোর  
উপর কান্দনবর্ণ বিকীর্ণ হইতেছে । বংটা এত স্বন্দর নাকি !

—এসো বাবা, হাতে ও ফুলটি কিসের ?—মা সাদর আত্মান জানাইলেন ।  
তপতী কান পাতিয়া রহিল তপনের উত্তর শুনিবার জন্ত ।

তপন বলিল, আজ বুদ্ধদেবের জন্মতিথি মা, গিয়েছিলাম দেখতে, ফুলটি  
নির্মাল্য সেখানকার !

মা হাসিয়া বলিলেন,—তোমাকে দেখলেই আমার বুদ্ধদেবের মুখ মনে পড়ে  
বাবা, তুমিই আমার বুদ্ধদেব !

তপন ত্বরিতকণ্ঠে বলিল,—না মা, ওকথা বলবেন না । তিনি মানব-দেবতা.

আমি তাঁর দাসামুদাস হইবার যোগ্য নই !

মা চকিত হইয়া বলিলেন,—বুদ্ধদেবকে তুমি তো খুব বেশী শ্রদ্ধা করো তপন !

—করা কি উচিত নয় মা ? শ্রদ্ধেকে শ্রদ্ধা করার মধ্যে তো আমরা নিজেদেরকেই শ্রদ্ধাভাজন করে তুলি—শ্রদ্ধা না করলে বুদ্ধদেবের কিছু ক্ষতি হবে না মা, আমাদেরই মনুষ্যত্বের অপমান হবে ।

মাতা মুগ্ধ হইয়া গেলেন, তপতী বিস্মিত বিহ্বল হইয়া গেল । এই লোকটা ইডিয়ট ! ইহার অপেক্ষা মানবতার অধিকতর গৌরব-বহনকারী মানুষ তপতী তাহার জীবনে দেখে নাই । চঞ্চল পদে সে ঘরে আসিয়া ঢুকিল ।

—আয়, খেয়ে নে থুকী—মা ডাকিলেন ।

তপনের আনিত পদটা লইয়া খোঁপায় গুঁজিতে গুঁজিতে তপতী কহিল,—আমি এখনো কাপড় ছাড়িনি মা ।

—যা, ছেড়ে আয় চট করে ।

তপতী তথাপি দাঁড়াইয়া রহিল । তাহার আজ ইচ্ছা করিতেছে, তাহার সন্ধ্যাবেশ-পরিহিত সূচাক্র তনিমার দিকে তপন একবার চাহিয়া দেখুক । তপন কিন্তু মুখ তুলিল না । পাঁচ সাত মিনিট অপেক্ষার পর নিরাশ হইয়া তপতী চলিয়া গেল ।

গভীর রাত্রে একাকী শুইয়া তপতী ভাবিতেছে, ঐ তো ওপাশের ঘরটায় সে ঘুমাইতেছে । ঐ নিরহঙ্কার মানুষটি, কম খায়, কম কথা বলে, নিজেকে জাহির করে অত্যন্ত কম । খুঁজিয়া ফিরিলেও উহার সাড়া প্রায় পাওয়া যায় না ! যাকিছু কথা উহার মা'র সঙ্গে । তপতী তো এতদিন উহার খবর লয় নাই, বরং নির্মমভাবে উহাকে নির্ধ্যাতিত করিয়াছে, উহার প্রাপ্য সম্মান হইতে উহাকে সে অত্যাচারে বঞ্চিত করিয়াছে । তথাপি সে রহিয়া গেল, নিঃশব্দে নির্বিকারে । ভাবিতে ভাবিতে তপতী কখন ঘুমাইয়া পড়িয়াছিল, ঘুম-ভাঙিতেই দেখিল—বেলা হইয়া গিয়াছে ; উঠিতে গিয়া শরীরটা অত্যন্ত অসুস্থ বোধ হইল, কিন্তু শরীরের গ্লানিকে মনের জোরে ঝাড়িয়া ফেলিয়া সে স্নানের ঘরে ঢুকিল । পরিপাটি করিয়া স্নান সারিয়া ফিকে নীল শাড়ী পরিয়া সে বাইরে আসিয়া দাঁড়াইল এক পিঠ খোলা চুল মেলিয়া আশা জাগিতেছিল অন্তরে, তপনের সহিত যদি একবার দেখা হইয়া যায় । তপনের রুদ্ধদ্বার কক্ষের পানে চাহিয়া দেখিল সে বাহির হইয়া গিয়াছে । ধীরে ধীরে থাবার ঘরের দরজায় আসিয়া শুনিল, মা বলিতেছে,—  
দু'লাথ—টাকা ! অত টাকা করবে কি ও ?

—কি জানি । যা খুশী করুকগে ! টাকার তো আমার অভাব নাই নীলা ।

বাবা উঠিয়া যাইতেছিলেন, মা বলিলেন, ভালই হয়েছে, ছেলেটার যা নিষ্পৃহ

মন ? টাকাকড়ি নিলে বাঁচি ।

পিতা হাসিয়া বলিলেন,—নেবে, নেবে, ভাবছো কেন । শিলং-এ তাহলে পাঠাচ্ছ না ।

—থাক্ । ছেলে মানুষ ছু'জনেই ! কোথায় একলা পাঠাবো বাপু, তার চেয়ে আমার চোখের উপর ছু'টিতে থাক্ ; পূজার সময় সবাই যাব শিলং ।

কথাটা তপনের সম্বন্ধে । মুহূর্তে তপতীর অন্তর স্তব্ধ হইয়া গেল । দুই লক্ষ টাকা সে বাবার কাছ হইতে লইয়াছে । এত টাকা দিয়া কি করিবে সে ! তবে কি টাকার জন্ত সে তপতীর অত্যাচার নীরবে সহিয়া যায় । লোকটা তো আচ্ছা ধড়িবাজ । এইজন্তই বুঝি তপতীর ব্যবহারের কথা বাবা মাকে একদিনও বলে নাই । দিব্যি অভিনয় করিয়া চলিয়াছে তো !—আচ্ছা, দেখা যাইবে ।

তপতী আসিয়া চা খাইতে বসিল ! মা নম্নেহে বলিলেন,—রান্না-বান্না যে ছেড়ে দিলি খুকি, ভাল লাগে না ?—মাতার ইঙ্গিত অত্যন্ত স্পষ্ট ।

তপতী ক্রোধ দমন করিয়া কহিল,—নিরামিষ বাঁধবার জন্তে আমার হাত কামড়াচ্ছে না ।

মা একটু বিষন্ন হইলেন, বলিলেন—কি করবো বাছা, মাছ-মাংস খেতে ও ভালবাসে না—তবে একেবারে যে খায় না, তা তো নয় । তুই বলিস না কেন খেতে ?

—আমার দায় পড়েনি—যার যা খুশী থাকে আমার কি ?

তপতী চলিয়া গেল । মা বুঝিলেন, ইহা জামাতার উপর কণ্ঠার অভিমান । মধুর হাসিতে তাঁহার মুখ ভরিয়া গেল । ভাবিলেন তপনকে মাংস খাইবার জন্ত তিনি নিজেই অতুরোধ করিবেন । তপন তাঁহার কথা নিশ্চয় রাখিবে ।

তপতী আপন ঘরে গিয়া অনেকক্ষণ বসিয়া কত কি ভাবিল । বাবার কাছে টাকা আদায় করিবার বেশ চমৎকার ফন্দি আবিষ্কার করিয়াছে লোকটা তো বেশ, নিক্ সে, টাকা লইয়া যেন সরিয়া পড়ে । তপতী উহার মুখ দেখে নাই—দেখবে না ।

তপতীর অন্তরে বিক্রোহের বহিঃ প্রকাশিত হইল ! মাত্র পঞ্চাশ হাজার টাকার জন্ত মিঃ ঘোষালের মত সুপাত্রের সহিত তপতীর বিবাহ হয় নাই, আজ তাহারই স্থান অধিকার করিয়া ঐ বর্বর লোকটা দুই লক্ষ টাকা আদায় করিয়া লইল ! টাকার উপর তপতীর কিছুমাত্র মায়ামমতা নাই । কিন্তু লোকটার ধূর্তমী তপতীর অসহ্য বোধ হইতেছে । সে নিঃসংশয়ে বাবা আর মা'কে বুঝাইয়াছে যে তপতীর সহিত আমার প্রেম নিবিড় হইয়া উঠিয়াছে, অতএব লক্ষ টাকা সে এখন পাইতে পারে । তপতীর নির্বোধ স্বেহময় বাবা-মা নিশ্চয় মনে উহার খোশ-খোয়াল

মিটাইবার জন্ত নগদ দুই লক্ষ টাকা উহার হাতে তুলিয়া দিলেন। আচ্ছা, তপতীও দেখিয়া লইবে সে কত বড় ধুঁড়।

কিন্তু লোকটা মোটেই মূর্থ নয়। লেখাপড়া ভালো না জানিলেও সে নিশ্চয় বুদ্ধিমান। যাত্রাদলে অভিনয় করিয়া কতগুলি পাকাপাকা কথা শিখিয়া রাখিয়াছে, যথাস্থানে, যথোপযুক্ত ক্ষেত্রে তাহা সে প্রয়োগ করে। মা নিতান্তই মা, তাই উহার মা-ডাক শুনিয়া গলিয়া গিয়াছে। মা আবার বলে, বুদ্ধদেবের মত স্তম্ভর। স্তম্ভর নয় বলিয়াই হয়ত বাড়াবাড়ি করিয়া বলে ঐ সব। যাক—স্তম্ভর হোক আর কুৎসিত হোক, তপতীর কিছুই আসে যায় না।

তপতী গিয়া গস্তীরমুখে থাইতে বসিল।

শিখা কারুণ্য-কোমলকণ্ঠে ঘরে ঢুকিল—জানো মা, অমন দাদা কারুর হয় না মা! দাদা আশ্চর্য্য, দাদা অদ্ভুত। মানুষকে অমন করে ভালোবাসতে আর কাউকে দেখি নি! কিন্তু মা আমায় এখুনি হাসপাতালে যেতে হবে।

—কেন? কার অস্থখ?—মা উদ্বিগ্নকণ্ঠে প্রশ্ন করিলেন।

অস্থখ একটা কেরাণীর, তার গায়ে রক্ত নাই, দাদা তাই তাকে নিজের রক্ত দিয়ে বাঁচাবে। কারুর কথা শুনলো না মা, আমরা এতো বারণ করলাম,—বললাম, অণ্ড একটা লোককে তো কিছু টাকা দিলেই সে রক্ত দিতে পারে। তা বল্লে, তার রক্তটাও তার বোনদের কাছে এমনি দামী বুঝেছিল! কি বলবো আর!

মা শুনিয়া শিহরিয়া উঠিলেন। তপন কোন একটা অজ্ঞাত কেরাণীর জন্ত নিজের দেহের রক্ত দান করবে। ব্যগ্রভাবে বলিলেন,—না-না শিখা, ওকে বারণ কর তোরা।

ও শুনবে না মা, কারুর কথা শুনবে না! আর যুক্তি দিয়ে ওকে হারাতে পারবে না কেউ। ওর বন্ধু বিহুবাবু সকাল থেকে সে চেষ্টা করছেন! আমায় খানিকটা দুধ আর কিছু লেবুর রস করে দাও শীগ্গীর।

নিরুপায় মাতা লেবুর রস তৈরী করিতে করিতে বলিলেন,—ওর খন্তুরবাড়ীর কেউ জানে না?

—না গুঁদের জানাবে না—তুমি জানিয়ে দিও না যেন।

বেলা এগারটার সময় শিখা ও বিনায়ক তপনকে লইয়া ফিরিল। শিখা তাহার নিজের শয়নকক্ষে তপনকে শোয়াইয়া দিল; বিনায়ক তপতীর মাকে ‘ফোন’ করিয়া জানাইয়া দিল, তপনবাবু আজ দুপুরে অত্র থাইবেন—তাহারা যেন অপেক্ষা না করেন।

শিখার মা আসিয়া অহুযোগ করিলেন—একি বাবা, নিজের রক্ত কেন তুমি দিতে গেলে ?

—দিলাম তো কি হোল মা, আমি তো আপনার স্বস্থ সবল ছেলে ।

কিন্তু বাবা, তোমার জীবন আমাদের কাছে অত্যন্ত মূল্যবান ।

—সে লোকটির জীবন কিছু কম মূল্যবান নয় মা । তারও মা, তাই বোন, স্ত্রী, সব ছোট ছোট ছেলেমেয়ে, সেই একমাত্র উপার্জনকারী তাদেব ।

মা চুপ করিয়াই রহিলেন ! তপন আর একটু দূর থাইয়া বলিল,—কিছু ভয় নেই বোনটি, গুবেলাই সেরে উঠবে ; ঘুমুই একটু ! শিখা বসিয়া বসিয়া হাওয়া করিতেছে । চোখ দু'টি জলে ছলছল করিতেছে, তাহার মুখের দিকে চাহিয়া তপন বলিল,—কি হোলরে ? কাঁদছিস ?

—ভালো লাগছে না দাদা, তুমি রক্ত দিয়ে বেড়াবে নাকি ?

—একা আমার রক্তে কি হবে শিখা, তবে এই আত্মস্থতসর্বস্ব, ক্লীব, পশুর জাতটাকে রক্ত দিয়ে বাঁচাতে হবে নইলে আর্থগোরব বুঝি বা ডুবলো ।

তপন পাশ ফিরিয়া গুইল । বিনায়ক ইসারায় শিখাকে নিষেধ করিল আর কথা না বলিতে ।

স্নেহের যে সামান্য সূত্রটুকু ধরিয়া তপনের অন্তরে তপতী প্রবেশ করিতে পারিত, তপতীর মনস্তত্ত্ব-বিশ্লেষক মনের উষ্ণ চিন্তাধারায় তাহা পুড়িয়া গেল । তপনকে সে একটা অর্থশোষণকারী পরভূতিক ছাড়া আর কিছু ভাবিতে পারিতেছে না । এক একবার মনে হইতেছে, হয়ত উহার মধ্যে এমন কোন গুণ আছে যাহাতে তার মা-বাবা এতটা মুগ্ধ হইতেছেন, আবার মনে হইতেছে, ইহা ঐ স্বচর লোকটির স্বে-অভিনয়ের গুণ । তপতী উহাকে কঠোর পরীক্ষা করিতে মনস্থ করিল ।

সেদিন টকটকে লাল শাড়ীখানা পরিয়া তপতী বাহির হইয়া আসিল, যেন অগ্নিশিখা । মা তাহার দিকে চাহিয়া হাসিয়া বলিলেন,—বেড়াতে যা'বি নাকি !

—না, মিঃ অভিনব বোস ব্যারিষ্টার হয়ে এসেছেন তাঁকে নিমন্ত্রণ করেছি চা'য়ে । কিন্তু মা, ফুল আনা হয় নি । দাঁড় না ফোন করে তোমার জামাইকে, ফুল কিনে আনবে ।

মা, তাঁহার খুকীর ছরভিসন্ধি কিছুমাত্র অবগত নহেন । হাসিয়া বলিলেন,—নিজে বলতে পার না ? লাজুক মেয়ে ।

—নিজের জন্ম তো নয় মা, একজন অতিথির জন্ম তাই লজ্জা করছে ।



মা বিশেষ কিছু বুঝিলেন না, ফোন করিয়া দিলেন তপনকে। বিজয়িনীর আনন্দে তপতী ভাবিতে লাগিল, বোকা মা কিছুই বুঝিলেন না যে তাঁহাকে দিয়াই তাঁহার স্নেহপাত্রকে কেমন করিয়া তপতী অপমান করিল। ফুলগুলি লইয়া যখন সে আসিবে, তখন তাহার সম্মুখেই মিঃ বোসকে তপতী তাহারই আনা ফুল উপহার দিবে। তপতী সাজিয়া-গুজিয়া অপেক্ষা করিতে লাগিল।

মিঃ বোস আসিয়া পৌঁছিলেন অথচ ফুল এখনো আসিল না, তপতী অত্যন্ত চটিয়া বিরক্ত মুখে মিঃ বোসকে চা পরিবেশন করিতেছে দোতলার বারান্দায়। ঠিক মাড়ে পাঁচটার সময় তপন কাগজে মোড়া একগোছা ফুল লইয়া সিঁড়ি দিয়া উঠিতেছে, দেখিয়া তপতী স্বরিতে নিকটবর্তী হইয়া বলিল,—বড্ড দেবী হোল,—দিন,—সে হাত বাড়াইল ফুলগুলি লইবার জন্য। কাছেই একটা ছোট টিপয় ছিল, তপন নীরবে ফুলের গোছাটা সেই টিপয়ের উপর রাখিয়া দিয়া চলিয়া যাইতেছে, রাগে তপতীর আপাদ-মস্তক জলিয়া উঠিল, সরোষে গর্জন করিয়া সে কহিল—হাতে দিতে পারেন না!—একে তো আনলেন দেবী করে!

তপন ফিরেও তাকাইল না, ধীরে ধীরে চলিয়া যাইতেছে, মিঃ বোস জিজ্ঞাসা করিলেন,—কে লোকটি?

—আমার মা'র পুষ্টি—তপতী সক্রোধে জবাব দিল। তপন কথাটা শুনিল তথাপি মুখ ফিরাইল না, চলিয়া গেল। তপতীর সর্বাঙ্গ ক্রোধে জলিয়া উঠিতেছে। ফুলের তোড়াটা খুলিয়া লইয়া সে কাগজটা ছিঁড়িয়া ফেলিয়া সববেগে আসিয়া চুকিল খাইবার ঘরে, যেখানে মা তপনকে খাবার দিতেছেন। তোমার জামাই ফুল কিনে এনেছে দেখো, কতকগুলো খুঁচরো ফুল, বাসি পচা—একটা বোকে বাধিয়ে আনতে পারে নি!

মা তাকাইয়া দেখিলেন, সুন্দর ফুলগুলি তপতীর হাতের আছাড় খাইয়া ম্লান হইয়া যাইতেছে। রাগিয়া বলিলেন, বোকে আনতে তো তুই বলিস নি খুকী, আর ফুল তো খুবই চাঁটকা।

—তোমার মাথা—এই ফুল নাকি বিলেত ফেরত লোককে দেওয়া যায়! বলিয়া তপতী সরোষে প্রস্থান করিল।

মা বিহ্বল দৃষ্টিতে চাহিয়া বহিলেন, তারপর বলিলেন—মেয়েটা বড্ড রাগী বাবা, তুমি হুঃখ করো না কিছু! ফুলগুলো তোমার ঘরেই দিয়ে আসছি।

জলতরঙ্গের মত স্রমিষ্ট হাসিতে ঘর ভরাইয়া দিয়া তপন বলিল—ঐ ফুলগুলো আপনার পায়ে দিই মা, আমার বয়ে আনা সার্থক হবে।

মা কি বলে শুনিবার জন্য তপতী বাহিরে অপেক্ষা করিতেছিল, তপনের কাণ্ড দেখিয়া সে শুধু বিস্মিত নয়, বিমূঢ় হইয়া গেল। এতবড় অপমানটা ও

গায়েই মাখিল না। উহারই সামনে অন্য একজন পুরুষকে অন্ত্র বসাইয়া তপতী পরম যত্নে খাওয়াইতেছে, মা যার জন্ম কত বকিলেন। বিলাত ফেরত লোকের টেবিলে তপন বসিবে না বলিয়া তপতী রক্ষা পাইয়াছে। সেই অন্য পুরুষের জন্ম নির্বিকার চিন্তে তপন ফুল আনিয়া দেয়, সে-ফুল না লইয়া অপমান করিলে সেই ফুল দিয়াই অপমানকারীর মা'র পূজা করে! এতবড় বিষয় তপতীর জীবনে আর ঘটে নাই। লোকটা হয় সাংঘাতিক ধুষ্ট নয়তো সবসহিষ্ণু সন্ন্যাসী।

ঠাকুরদার কথাটা তপতীর অকস্মাৎ মনে পড়িয়া গেল, “তো'র যে বর হবে দিদি তার আর জোড়া মিলবে না” সত্যই, উহার জোড়া মিলবে না। কিন্তু টাকা তাহা হইলে সে লইয়াছে কেন? দুই লক্ষ টাকা লইয়া সে কি করিবে? গরীবের ছেলে, দু'লাখ টাকা কৌশলে আদায় করিয়া লইল আরো কিছু আদায়ের ফন্দীতে আছে, তাই এমন করিয়া অপমান সহ্য করে। ইহার পর আমরা তাড়াইয়া দিলেও যাহাতে ও স্তখে থাকিতে পারে তাহারই জোগাড়ে ফিরিতেছে।

তপতীর ক্রোধ কমিতে গিয়া পরবর্তী চিন্তায় অত্যন্ত বাড়িয়া উঠিল। কত অপমানও সহ্য করিতে পারে তপতী তাহা দেখিয়া লইবে, শেষ অবধি ‘প্রহারেণ ধনঞ্জয়’ করিয়া ঐ বেহায়া ইতর লোকটাকে তপতী তাড়াইয়া দিবে—স্থির করিল।

মিঃ বোসের সহিত চা খাইয়া তপতী বেড়াইতে চলিয়া গেল মিঃ বোসের মোটরেই। তপন কোনদিনই তপতীর সহিত বেড়াইতে যায় না, বৈকালিক জলযোগের পর সে আবার বাড়ী তৈরীর কাজ দেখিতে যায় বা একাই বেড়াইতে যায়। তপতী নিতাই তাহার বন্ধুদের সহিত টেনিস খেলে কিম্বা বেড়াইতে যায়। কিন্তু মিঃ বোসের সহিত আজ একা বেড়াইতে যাওয়াটা মা পছন্দ করিলেন না। মিঃ বোস বা তপনের সাক্ষাতে তিনি কিছু না বলিলেও ঠিক করিয়া রাখিলেন, ফিরিলে তপতীকে তিনি ভৎসনা করিবেন এবং যাহাতে আর না যায় তাহার ব্যবস্থা করিবেন।

মিঃ বোসের পাশে বসিয়া গাড়ীতে বায়ু সেবন করিতে করিতে তপতী ওদিকে ভাবিতেছে, ঐ লোকটাকে অপমান করিবার কত রকম ফন্দি বাহির করা যাইতে পারে!

মিঃ বোস বলিলেন,—কি ভাবছেন মিস্ চ্যাটার্জি?

তপতী বলিল—হুঁ।

—হুঁ কি? এতো বেশী ভাবছেন যে কথাই শুনতে পাচ্ছেন না!

লজ্জিত হইয়া তপতী বলিল,—হাঁ ভাবছিলাম একটা কথা। চলুন, সিনেমা যাওয়া যাক!

তৎক্ষণাৎ গাড়ী আসিয়া একটা বড় রকম সিনেমা হাউসের গেটে ঢুকিল।

উভয়ে নামিয়া টিকিট কিনিয়া ঢুকিল ভিতরে। অন্ধকার ঘরে বসিয়া ফন্দি আটিতে বেশ সুবিধা হইবে। তপতী নিঃশব্দে চেয়ারে বসিয়া আছে। মিঃ বোস কিন্তু সিনেমা দেখার চেয়ে তপতীর নয়নানন্দকর রূপ দেখার ও শ্রবনানন্দকর কথা শোনার বেশী পক্ষপাতী, কহিলেন,—সিনেমা বিস্তর দেখে এলাম। ছায়া, কায়, দুই-ই, ছায়া আর দেখতে ইচ্ছা করে না।

কায়্যো তো বিস্তর দেখেছেন—সাদা, তুষার শুভ্র, তার প্রতি অরুচি জন্মালো না যে ?

—জন্মেছে। তাই কাঞ্চনকান্তি দেখতে এলাম।

—এখানে তো সব তথ্যশাখা : কাঞ্চনকান্তি চান তো কাণ্ডকুঞ্জে যান।

—সে আবার কোন্ দেশ ? মিঃ বোস প্রশ্নের সঙ্গে হাসিয়া উঠিলেন।

—জিওগ্রাফি দেখতে হবে, কারণ আমিও জানিনে।

—জেনে দরকার নেই—এখানেই—পেয়েছি কাঞ্চনকান্তি।

—পাশেই বুঝি ?

তপতী নিজের দিকেই ইঙ্গিত করিল। মিঃ বোসের স্বপ্ন কি তবে সত্য হইবে ! তপতী, তপস্তার ধন তপতী ! মিঃ বোস তপতীর একথানা হাত নিজের হাতে ধরিয়া বলিলেন,—রিয়েলি আই হ্যাভ নো হোয়ার সিন সাচ্ এ বিউটিফুল গার্ল লাইক ইউ।

তপতী আপন ঠোঁটের সহিত ঠোঁট মিলাইয়া একটা মিষ্টি শব্দ করিয়া বলিল,—ও কথা অনেকের কাছেই শুনেছি !

—চির পুরাতনটাই চিরদিন সুন্দর মিস্ চ্যাটার্জি !

—তা নয়, চিরসুন্দরটাই চিরদিন পুরাতন। কারণ পুরাতন হলেও তা সুন্দর না হতে পারে কিন্তু সুন্দর হলেই তা আর পুরানো হয় না। যেমন এই পৃথিবী, ঐ আকাশ, ঐ সব গ্রহ-নক্ষত্র ! ওরা পুরানো বলেই সুন্দর নয়, সুন্দর বলেই চির নূতন।

মিঃ বোস তাঁহার বিলাতি বিড়ায় সুবিধা করিয়া উঠিতে পারিতেছেন না। কিছুক্ষণ ভাবিয়া বলিলেন,—প্রেমের বাণী কি পুরানো নয় ?

—প্রেমের বাণী সুন্দর বলেই পুরানো নয়—পুরানো হয় না।

—তাহলে আমার কথাটাকে আপনি পুরানো বলবেন কেন ?

—ওটা আপনার প্রেমের বাণী নাকি ? ওতো রূপমুগ্ধ পুরুষচিত্তের একটা স্তাবকতা ! প্রেমের বাণী অমন হয় না।

—কি রকম হয় তাহলে ?

—তা জানিনে, আজো শুনি নি কারো কাছে।

—সিনেমা শেষ হইয়া গিয়াছে। তপতী পুনরায় বলিল—সময়টা গল্লেই  
কাটলো, কিছুই দেখলাম না।

—কাল আবার আসবেন ?

—দেখা যাবে বলিয়া তপতী আসিয়া গাড়িতে উঠিল।

বাড়ী ফিরিতেই মা তাঁহার পূর্ব সঙ্কল্পমত তপতীকে বকিতে গিয়া দেখিলেন,  
—কাপড় না ছাড়িয়া তপতী বিছানায় বসিয়া আছে, চুটি চোখে তাহার জল  
চলমল করিতেছে।

মা ব্যাকুলভাবে জিজ্ঞাসা করিলেন,—কি হোল মা, খুকু ?

—“জানিনে—যাও”—বলিয়া তপতী শয্যায় লুটাইয়া পড়িয়া ফুলিয়া ফুলিয়া  
কাঁদিতে লাগিল।

বিস্মিত বেদনাহতা মা অনেকক্ষণ তপতীর মাথায় হাত বুলাইয়া আবার  
ডাকিলেন,—কি হয়েছে খুকী—আমায় বলতে তোর লজ্জা কি-রে ?

—কিছু না মা, ঠাকুরদার কথা মনে পড়ছিল। বুড়ো আমায় বডেডা ঠকিয়ে  
গেছে !

ছিঃ মনি স্বর্গগত মহাপুরুষের নামে ও কথা বলতে নেই। কি হোল কি ?

তপতী খানিকটা সামলাইয়া লইয়াছে। উঠিতে উঠিতে বলিল—তোমার  
খন্ডর তোমার কাছে মহাপুরুষ, আমার ঠাকুরদা, যা খুশী বলবো ওকে।

উঠিয়া তপতী কাপড় ছাড়িতে চলিয়া গেল। মা বলিয়া আসিলেন—কাপড়  
ছেড়েই খেতে আয় রাত হয়ে গেছে মা !

তপতী কাপড় ছাড়িতে ছাড়িতে ভাবিতে লাগিল—ঠাকুরদা বলিতেন  
তপতীর স্বামী হইবে অদ্বিতীয় প্রেমিক, অদ্বিতীয় মাহুষ, যাহার জন্ম তপতী সহস্র  
প্রলোভনের মধ্যেও আজও নিজেকে অনাজ্ঞাত রাখিয়াছে। সে কি এ দূর্ত  
অর্থলোভীটার জন্ম ! জ্যোতিষ কোনদিন সত্য হয় না !

মাহুষের মন এমনভাবে গঠিত যে নিজের সম্বন্ধে সমালোচনা করিতে সে ভয়  
পায় ! মনের অজ্ঞাতসারে সে এড়াইয়া যায় তাহার দুর্কর্মগুলির অপরাধ অথবা  
আপনার দুর্বলতা দিয়া সে সমর্থন করে তার কৃতকর্মকে। তপতী যদি তপনের  
প্রতি তাহার কৃত ব্যবহারের কথা একবারও ভাবিত তাহা হইলেই হয়ত বুঝিতে  
পারিত, দোষটা সবই তপনের নয়। অত্যাধুনিক হইতে গিয়া সে তাহার পূর্ব  
সংস্কৃতি তাহার চেতনা হইতে হারাইয়া ফেলিয়াছে ; আর তাহার অবচেতন মনে  
জাগিয়া রহিয়াছে বংশপরম্পরায় লব্ধ সংস্কার। এই দুই পরস্পরবিরোধী সংস্কারের

সংঘাতে তপতী নিজের অজ্ঞাতসারেই হইয়া উঠিল উদ্দাম, উচ্ছৃঙ্খল। তপনের মধ্যেও যে কিছুমাত্র ভাল থাকিতে পারে, ইহা যেন সে ভাবিতেই চাহে না। ভাল কিছু না থাকিলেও সে যেন খুশী হয়। মা-বাবা উহাকে এত ভালবাসেন, তপতী যেন ঈর্ষায় জ্বলিয়া যায়। উহাকে ভালবাসিবার কোন কারণ নাই। বার কতক মা-মা বলিয়া ডাকিলে আর যাত্রাদলের মার্কা দেওয়া বাহবা পাওয়া বুলি আওড়াইলেই কাহারও ভালবাসা পাইবার যোগ্যতা জন্মে না। উহার আলাপ করিবার দঙ্গী একমাত্র মা—তা, মার সহিত কিই বা কথা ও কয়? কথা কহিবার আছেই বা কি? যদি বা থাকে বাড়ীতে তো সে সব মিলাইয়া আধ ঘণ্টার বেশী থাকে না, এমন কি রবিবারেও না। তার মধ্যে ছয় ঘণ্টা ঘুম।

টাকাটা লইয়া কি যে করিল, কেহ জানিতে পর্যন্ত পারিল না। ব্যাঙ্কে জমা রাখিয়াছে, আর কি! কাল বাবা মা'কে বলিলেন—‘টাকা নিয়ে কি করছে জানতে চেও না, মদ ভাং ও খায় না’। মদভাঙ না-খাওয়া ছাড়া টাকা খরচ করিবার যেন আর পন্থা নাই? আর খরচই বা করিবে কেন? ভবিষ্যতের জগ্ন করিতেছে। ও তো নিঃসন্দেহে বুঝিয়াছে, তপতী উহাকে তাড়াইয়া দিবে। তাই যতদূর সম্ভব সাবধানে কাজ গুছাইতেছে।

তপতী ক্লান্তি অনুভব করিতেছে। এই বিরক্তিকর পরিস্থিতি সে আর কতদিন ভোগ করিবে। উহাকে তাড়াইয়া দিলেই তো সব লেঠা চুকিয়া যায় কিন্তু তাড়াইবার উপায় বাহির করা সহজ নহে।

তপন খাইতে বসিয়াছে। কি কথা কহিতেছে, শুনিবার জগ্ন তপতীও গিয়া খাইতে বসিল। তপন মুখ নত করিয়া বসিয়াছে। মা জানেন, এখনো তপনের লজ্জা ভাঙে নাই, বলিলেন,—তুই একটু পরে খাবি খুকী!

—কেন! আমি তোমার ছেলের কেড়ে খেতে যাব না। যিদে পেয়েছে আমার।

সন্তান ক্ষুধা পাইতেছে বলিলে কোন মাতা আর স্থির থাকিতে পারেন না, তথাপি মা ইতস্ততঃ করিতেছিলেন। তপতী চাপিয়া বসিল—না খাইয়া যাবে না। অগত্যা তাহাকে খাবার দিলেন।

তপন খাইতে খাইতে বলিল—ও বেলা জল খেতে আসবো না মা!

কেন বাবা? কোথায় যাবে?—মা প্রশ্ন করিলেন।

—আমার সেই ছোট বোনটির বাড়ী—তাকে নিয়ে আজ সিনেমা যেতে হবে।

মা এক মিনিট চুপ করিয়া থাকিয়া বলিলেন,—খুকীকেও নিয়ে যাবে বাবা;

—খুকী প্রতিবাদ না করিয়া বসিয়া রহিল।

তপন বলিল,—তা কি করে হবে মা? আমার বোনের বাড়ী আপনার খুকী

কি করে যাবে ! কুটুন্সের বাড়ী তো বিনা নিমন্ত্রণে যায় না কেউ !

মাতা আপনার ভুল বুঝিতে পারিয়া বলিলেন,—হ্যাঁ বাবা, ও কথা আমার মনে হয়নি। কোন সিনেমায় যাবে ? যাবার পথে হলে তুলে নিও ওকে !

—আমি ট্রামে যাবো মা, আর যাবো ও পাড়ার দিকে ; এ পথে মোটেই পড়বে না।

তপন চলিয়া গেল। তপতী খাইয়া উঠিয়া খবরের কাগজ খুলিয়া দেখিল জ্যোতি গোস্বামী নামক জনৈক লেখকের লেখা একখানা বই ওখানে আজই প্রথম আরম্ভ হইবে। সেও স্থির করিল, ঐ সিনেমায় যাইবে।

বিকালে তিন চারজন বন্ধু-বান্ধবী লইয়া তপতী আসিয়া দেখিল ‘হাউসফুল’ টিকিট না পাইয়া তাহারা ফিরিয়া যাইতেছে, এমন সময় মিঃ ব্যানার্জি চ্যাচাইয়া উঠিলেন,—তপনবাবু।

তপন মুখ তুলিয়া তাকাইল,—কিছু বলছেন ?

তপতী সবিস্ময়ে চাহিয়া দেখিল, তপনের পাশে একটি সুন্দরী মেয়ে ! তপতীর সর্বাঙ্গ জলিয়া উঠিল, ঈর্ষায় বা ইতরতায় !

মিঃ ব্যানার্জি কহিলেন,—আমার টিকিট পাচ্ছি না ; আপনার কেনা হয়েছে ?

তপন জিজ্ঞাসা করিল,—ক’জন আছেন আপনারা ?

—পাঁচজন—বলিয়া মিঃ ব্যানার্জি ফিরিয়া যাইতেছিলেন, তপন বলিল—এক মিনিট দাঁড়ান, দেখছি।

সকলেই উহারা অবাক হইয়া দাঁড়াইয়া আছে, তপন সেই মেয়েটির হাত ধরিয়া চলিয়া গেল। মিনিট দুই পরে একজন সুদর্শন যুবক আসিয়া বলিল—আমুন আপনারা।

—টিকিট পেয়েছেন ?

—হ্যাঁ।

তাহাদের সকলকে লইয়া গিয়া বক্সে বসাইয়া দিল বিনায়ক।

তপতীদের আশ্চর্য্যবোধ হইতেছে। তপন কেমন করিয়া টিকিট কিনিতে পারিল ? বোধ হয় ঘুর দিয়া তপতীর সম্মান রক্ষা করিয়া থাকিবে। টাকা তো তাহারই বাবার ; কিন্তু সে নিজে বসিল কোথায় ? নিজেদের টিকিটগুলিই উহাদিগকে দিয়াছে নাকি চতুর্দিকে চাহিয়া অব্বেষণ করিয়াও তপন কিংবা সেই মেয়েটির কোন সম্মান মিলল না। তপতীর ভয়ে মেয়েটাকে লইয়া পলাইয়া গেল নাকি।

মিঃ ব্যানার্জি তপতীকে বলিলেন,—তপনবাবুকে দেখছি না। পালিয়েছে নিশ্চয়।

তপতী শুধু বলিল হুঁ !

সিনেমা আরম্ভ হইল। একটি নারী-জীবনের বেদনার ইতিহাস। স্বামী বক্ষিতা ঐ দুর্ভাগিনী নারী স্বামী আসিবে ভাবিয়া নিত্য ফুলশয্যা রচনা করে অঙ্গনে আলপনা দেয়, পথের দুর্কীকে চুখন করিয়া বলে,—আমার প্রিয়তম যেদিন আসিবে তোমার কোমল বুকে চরণ ফেলিয়া, সেদিন হে শ্যামল দুর্বাদল, তোমায় আমি শত চুখন দান করিব। তথাপি তাহার প্রিয় আসিল না, আসিল তাহার বাণী :—  
“প্রিয়া, তোমার আমার মাঝখানে চোখের জলের নদীটি যুক্ত হল। তোমার আমার মাথায় একই আকাশ সেই জলে প্রতিবিম্বিত হচ্ছে। মনে হচ্ছে তুমি এনেছো, শুধু চোখের জলটুকুর ব্যবধান। ঐটুকু থাক—তোমায় পরিপূর্ণ করে পেয়ে ফুরাতে চাইনে—তুমি থাকো না পাওয়ার আলোকে অফুরন্ত আশা হয়ে আমার মনের গহন গভীরে।”

তপতী বিমুগ্ধ চিত্তে দেখিল। তাহার রসগ্রাহী মন স্তব্ধ বিষয়ে প্রশ্ন করিল কে এই রূপদক্ষ কবি ?

প্রশ্নটার কেহই উত্তর দিতে পারিল না, কারণ চিত্রলিপিতে লেখকের কোন পরিচয় নাই। কেন যে এই অদ্ভুত নাট্যকার নিজেকে এমনভাবে প্রচ্ছন্ন করিলেন ; তপতী ভাবিয়া পাইল না।

বাড়ী ফিরিয়াই সে তপনের ঘরের দিকে চাছিল, তপন তখনো ফেরে নাই। কোথায় গিয়েছে সেই মেয়েটাকে লইয়া ? থাইতে থাইতে সে ভাবিতে লাগিল সিনেমার কথা।

তপন আসিয়া বাহির হইতে বলিল—থেয়ে এসেছি মা, আর কিছু খাব না।

তপতীর রাগ আরও বাড়িয়া গেল। ওখানে রাত্রির থাওয়া পর্য্যন্ত থাওয়া হয়! তপন চলিয়া গেলে তপতী জিজ্ঞাসা করিল—ওর কি রকম বোন মা, মা'র পেটের না পাতানো!

—না রে খুড়তুতো! মেয়েটা নাকি ছেলেবেলা থেকে ওর খুব নেওটা।

ওঃ! তপতী চৌচৌর আগায় একটা বিজ্ঞপ্তি তুলিয়া চলিয়া গেল আপনার ঘরে।

তপতীর জীবন যেরূপভাবে গড়িয়া উঠিয়াছে, তাহাতে আধুনিক সমাজের কোন ছেলের পক্ষে তাহার মন জয় করা সহজ নয়, আবার প্রাচীন সমাজের পক্ষপাতী কাহারো পক্ষে তপতীকে মুগ্ধ করা অত্যন্ত কঠিন। প্রাচীন এবং আধুনিক সংস্কারের সংঘর্ষন হইয়াছে তাহার জীবনে কিন্তু সমন্বয় হয় নাই।

তাহার ঠাকুরদার শিক্ষাপদ্ধতি ছিল একদেশদর্শী, প্রাচীন—আবার তাহার পিতার শিক্ষাপদ্ধতি একান্তভাবে আধুনিক। দুইটি শিক্ষাকে একত্র মিলাইবার ক্ষীণ চেষ্টা করিতেছেন তপতীর মাতা কিন্তু প্রগতিবাদের উচ্ছ্বল শ্রোতে তাঁহার বাঁধ বাঁধাইবার চর্ঘল প্রচেষ্টা ভাসিয়া গিয়াছে। যেটুকু তিনি করিয়াছেন, তাহার ফল হইয়াছে বাধাপ্রাপ্ত জলশ্রোতের মতো আরো উদ্দাম। চিন্তার সমুদ্রে তপতী আছাড় খাইয়াছে এ কয়দিন। তপনকে নানাভাবে অপমান করিয়া তাড়াইয়া দেবার কল্পনা করিয়াছে, আবার ভাবিয়াছে; তাড়াইয়া কাজ নাই তপন তো তপতীর কোন ক্ষতি করে না।

কিন্তু সেদিন সিনেমায় একজন সুন্দরী নারীর সহিত তপনকে দেখার পর হইতে তপতীর মনে আগুনের জালা ধরিয়া গিয়াছে। ঐ মেয়েটা উহার আপন বোন নয়, হয়তো কেহই নয়, মিথ্যা করিয়া বোন বলিয়া পরিচয় দিয়াছে। না হোক, তপতী তার জন্ত ঈর্ষা করিবে না, ঈর্ষা করিবার কারণও নাই। তপন যে-চলোয় খুশী যাইতে পারে কিন্তু তপতী তাহার নিজের বাড়ীতে বসিয়া তাহার পিতার জর্নৈক অন্নদাসের নিকট এ অপমান সহ্য করিবে না। ইহার প্রতিকার করিবার জন্ত সে তপনকে সাংঘাতিক অপমান করিবার সঙ্কল্প করিল।

কি মতলবে যে সে এখনো এখানে বাস করিতেছে তাহা বোঝা তপতীর বুদ্ধির বাহিরে, কিন্তু মতলব তাহার যে একটা কিছু রহিয়াছে তাহা তপতী বুঝিতে পারিতেছে। টাকা সে লইয়াছে, এবার তো অনায়াসে সরিয়া পড়িতে পারে। কিন্তু আরো টাকা আদায় করিবার জন্তই সে আছে নিশ্চয়, অথবা ধীরে ধীরে তপতীর মনকে জয় করিতে চায় সে। সে মতলব যদি উহার থাকে তবে তপতী যেমন করিয়াই হোক উহার উদ্দেশ্য ব্যর্থ করিয়া দিবে। তপতীর সঙ্কল্প স্থির হইয়া গেল। সে আসিয়া ফোন করিল মিঃ বোসকে। তাহার সহিত তপতী বেড়াইতে যাইবে আজ। মিঃ বোস কয়েক মিনিটের মধ্যেই আসিলেন, সুসজ্জিত তপতী তাঁহাকে নৌচের তলায় অভ্যর্থনা করিল, ইচ্ছাটা, তপন এখনি জলযোগের জন্ত বাড়ী ফিরিয়া তপতীকে মিঃ বোসের সহিত একাসনে বসিয়া থাকিতে দেখিয়া আর একবার অপমানিত হইবে। কিন্তু অনেকক্ষণ বসিয়া থাকিবার পরও তপন আসিল না দেখিয়া তপতী ও মিঃ বোস বাহিরে চলিয়া গেল মিঃ বোসেরই গাড়ীতে।

রাত্রি প্রায় দশটায় তপতী স্বয়ং মিঃ বোসের গাড়ী চালাইয়া বাড়ী ফিরিতেছে, মিঃ বোসও পাশে বসিয়া আছেন—তপতী দেখিল গেটের নিকট দারোয়ানগুলোর সঙ্গে তপন কি কথা বলিতেছে। গাড়ীর হর্ণ না দিয়াই তপতী চলিয়া যাইবে কিন্তু তপন ফিরিয়া দাঁড়াইয়াছিল, দেখিতে পাইল না। মিঃ বোস তপনকে উদ্দেশ্য করিয়া ধমক দিলেন, —রাস্তায় দাঁড়ান কেন? ‘ইডিয়ট’।



তপন বিশ্বয়-বিহ্বল দৃষ্টিতে চাহিল এবং তৎক্ষণাৎ পাশে সরিয়া দাঁড়াইল। তাহাকে এভাবে অপমানিত হইতে দেখিয়া দারোয়ানগুলো পর্যন্ত বিচলিত হইয়া উঠিল, কিন্তু তপতী গাড়ীটা চালাইয়া যাইতে যাইতে বলিয়া গেল,—ইজিট মানেই ও জানে না মিঃ বোস—অনর্থক গলা ফাটাচ্ছেন।

তপন নীরবে, নতমুখে প্রায় সাত মিনিট দাঁড়াইয়া রহিল সেইখানেই স্থাগুবৎ। চলংশক্তি তাহার যেন থামিয়া গিয়াছে। তপতী মিঃ বোসকে এক কাপ কোকো পান করিয়া যাইবার জন্য অহরোধ করিয়া ভিতরে লইয়া গেল, তপন তাহাও দেখিল, তারপর ধীরে ধীরে আসিয়া উপরে উঠিল, ক্লান্ত, শ্রান্ত দেহভার বহন করিয়া।

তপতী মিঃ বোসকে কোকো খাওয়াইয়া বিদায় করিল। মার কাছে যাইতেই তিনি বলিলেন,—তপন এখনো এলো না কেন রে, জানিস ?

—এসেছে তো !—বলিয়া তপতী মার পানে চাহিল হাসিমুখে।

মা ভাবিলেন, হয়তো উহার একসঙ্গেই বেড়াইতে গিয়াছিল। তিনি তপনের দরজায় আসিয়া ভাকিলেন,—এসো বাবা, খাবে এসো !

—আজ কিছু খাব না মা—লক্ষ্মী মা, আপনি জেদ করবেন না, বড্ড ক্লান্তি লাগছে—শুয়ে পড়েছি।—তপন উত্তর দিল।

—সে কি বাবা ! একটু দুধ মিষ্টি ?—মা অত্যন্ত ব্যাকুলভাবে কহিলেন।

—না মা, না—আজ কিছু না—আমায় শুতে দিন একটু ! তপনের স্বর এত করুণ যে মা আশ্চর্যান্বিত হইয়া তপতীকে আসিয়া জিজ্ঞাসা করিলেন, ঝগড়া টগড়া কিছু করেছিস খুকী ?

—আমার অত দায় পড়েনি ! আমি খেয়ে এসেছি ‘ফারপো’তে। আজ আর খাব না কিছু—বলিয়া তপতী চলিয়া গেল।

মা কিছুই বুঝিতে না পারিয়া নানা-সন্দেহ দোলায় দুলিতে লাগিলেন। শেষে তিনি নিজের মনকে বুঝাইলেন, হয়তো তপনও কিছু খাইয়া থাকিবে। আজ তাহার ‘সাবিত্রী ব্রত’ বলিয়া সারাদিন তপন উপবাসী আছে, রাত্রে ফল মিষ্টি খাইবে ভাবিয়া মা সব ঠিক করিয়া রাখিয়াছিলেন, কিন্তু খুকী হয়তো দোকানেই কিছু ফল মিষ্টি খাওয়াইয়াছে—না হইলে খুকী আর চুপ করিয়া থাকিতে পারিত।

তপতী এতক্ষণ ভাবিতেছিল—আজ সে তপনকে চরম অপমান করাইয়াছে। ইহার পরও যদি সে এ বাড়ি না ছাড়ে তবে তপতী আর কি করিতে পারে ! মিঃ বোস অবশ্য জানেন না তপনের সঙ্গে এ বাড়ীর সম্পর্ক কি ? তিনি উহাকে একজন পোষা মনে করিয়া এবং তপতী উহাকে ছুই চক্ষে দেখিতে পারে না

জানিয়া তপতীর প্রীত্যর্থেই উহাকে 'ইডিয়ট', বলিয়াছেন। তপতী বেশ কৌশলেই মিঃ বোসকে দিয়া তপনকে অপমানটা করাইয়া নইল। অতঃপর, যাহারা তপনের সহিত এ বাড়ীর সম্বন্ধে অবগত আছে, তাহারা সাহস করিত না। তপন নিশ্চয়ই ইহার পর চলিয়া যাইবে।

কিন্তু তপনের সহিত মা'র কথাগুলি তপতী শুনিয়াছে। লোকটা খাইল না কেন! তপতীর এবং মিঃ বোসের কৃত অপমানের প্রতিকারের জন্য সে অনশন আরম্ভ করিল নাকি! আশ্চর্য্য নয়! তপন যে আজ সমস্ত দিনই খায় নাই, তপতী সে সংবাদ অবগত নয়! তপন অনশন আরম্ভ করিয়াছে, অন্ততঃ আজ রাত্রে কিছু না খাইয়া তপতীকে বুঝাইয়া দিতে চায় যে, সে অপমানিত হইয়াছে। ঐ ভণ্ড প্রবঞ্চক মনে করিয়াছে, তপতী ইহাতে ভয় পাইয়া যাইবে। না, তপতী ভয় পাইবে না। কাল সকালে যদি সে মা-বাবার নিকট সব কথা প্রকাশ করে তাহাতেও তপতীর ভয় পাইবার কোন কারণ নাই। বরং সে ভালই হইবে! মা ও বাবাকে তপতী উহার স্বরূপ চিনাইয়া দিবে।

অনেকক্ষণ ভাবিয়া তপতীর মনে হইল,—মিঃ বোস যখন জানিবেন, তপতীর সহিত ঐ লোকটির সম্বন্ধ কি, তখন তপতীকে তিনি কি মনে করিবেন? ভালই মনে করিবেন। একান্ত অল্পযুক্ত ভাবিয়া তপতী উহাকে অপমান করিয়াছে। কিন্তু মা-বাবা যদি খুব বেশী চটিয়া যান! মা তো নিশ্চয়ই চটিয়া যাইবেন। আজই যদি তপন বলিয়া দিত, কি কারণে সে খাইল না, তাহা হইলে মা হয়ত এমনি একটা অনর্থ ঘটাইতেন। কিন্তু কেন সে কিছুই বলিল না? এখনো কি ঐ বাড়ীতে থাকিবার ইচ্ছা পোষণ করে! নানা দুশ্চিন্তার মধ্যে তপতীর ভাল নিদ্রা হইল না।

সমস্ত রাত্রি আপনার দুর্ভাগ্যের কথা ভাবিয়া তপন সকালে স্নান করিয়া পূজায় বসিল। দারুণ অপমানে মনটা তাহার বিকল হইয়া গিয়াছে, ধ্যানে মনঃসংযোগ হইতেছিল না। অনেক—অনেকক্ষণ পরে পূজা শেষ করিয়া সে উঠিল এবং বাহিরে যাইবার বেশ না পরিয়াই দরজা খুলিয়া বিস্ময়ের সহিত দেখিল, তপতী বারান্দায় দাঁড়াইয়া আছে স্নানসিক্ত চুলগুলি পিঠে ছড়াইয়া। তপনের ঘরের এত কাছে তপতী কোনদিন আসে নাই। তপন অত্যন্ত আশ্চর্য্যান্বিত হইয়া অপেক্ষা করিতে লাগিল, যদি তপতী কিছু বলে। আশা এবং উদ্বেগে তাহার অন্তর আন্দোলিত হইতেছে।

—দেখুন মশাই—তপতী সরোষে কহিল,—এ বাড়ীতে থেকে ওসব 'হাঙ্গার

ষ্টাইক ফাইক' করা চলবে না। ওসব করতে হলে যেখানকার মানুষ সেখানে যান—

তপন দুই মুহূর্ত বিমূঢ় হইয়া রহিল, তারপর কিছু না বলিয়াই খাইবার জন্ত মা'র কাছে চলিয়া গেল। তাহার কথাটাকে এভাবে অগ্রাহ্য করার জন্ত তপতীর মন উত্তপ্ত লৌহের মত অগ্নিময় হইয়া উঠিতেছিল, কিন্তু তপনকে খাইবার ঘরের দিকে যাইতে দেখিয়া সে ভাবিল, হয় সে সেখানে গিয়া মা'কে সব কথা বলিবে, না হয় নির্বিবাদে খাইবে। কি করে দেখিবার জন্ত তপতীও তৎক্ষণাৎ খাইবার ঘরে আসিল। তপন মুখ নামাইয়া একটা চেয়ারে বসিতেই মা বলিলেন,—এসো বাবা, কাল সারা দিনরাত উপোস আছে।

—দিন মা, এবার খেতে দিন কিছু ফল মিষ্টি—নির্লিপ্তের মত জবাব দিল।

মা তাঁহাকে ফল মিষ্টি আগাইয়া দিয়ে মহাশ্রেয় প্রশ্ন করিলেন,—সাবিত্রী ব্রত তো মেয়েরা করে বাবা, তুমি কেন করেছ?

—ব্রতটা আমার মা করতেন, উদযাপনের আগেই তিনি স্বর্গে যান মা, তাই আমি শেষ করে দিচ্ছি। শাস্ত্রে এ বকম বিধান আছে!

—ও! আজো ভাত খাবে না বাবা?

—না মা—ফল জল খাবো—ভাত খাবো কাল।

তপতী বসিয়া চা খাইতেছিল। তপনের কথা শুনিয়া অবাক হইয়া গেল। অপমানিত হইয়া সে তবে অনশন করে নাই, তাহার ব্রত পালনের জন্তই করিয়াছে! কিন্তু গত রাত্রে নিশ্চয়ই কিছু খাইবে বলিয়াছিল, না হইলে মা তাহাকে ডাকিতে যাইবে কেন? রাত্রে নাকি খাওয়াটা নিশ্চয় তপতী ও মিঃ বোসের উপর রাগ করিয়া। কিন্তু মা'কে তো কথাটা সে বলিয়া দিতে পারিত। না-বলার মধ্যে নিহিত রহিয়াছে যে গভীরতম উদ্বেগ—টাকা আদায় করিবার মতলব, তাহা হাসিল করিতে হইলে তপতীকে চটানো চলে না, এ বাড়ী ছাড়া চলে না, মা বাবাকে বলা চলে না যে তপতী তাহাকে গ্রহণ করিবে না! ভাল, তপতী নিজেই মা ও বাবাকে জানাইবে—এ অর্থলোভী মতলববাজ গওমূর্খটাকে তপতী কোন দিন স্বামী বলিয়া গ্রহণ করিবে না।

এখনি তপতী সে-কাজটা করিতে পারিত, কিন্তু লোকটা কাল থেকে উপবাসী আছে এখনি একটা হাদ্যমা করিবার ইচ্ছা সে কষ্টেই দমন করিয়া নিজের ঘরে চলিয়া গেল।

—আচ্ছা দাদা, তুমি তো এবার নেতৃত্ব গ্রহণ করতে পারো।

—না; শিখা, নেতার কাজ অতো সোজা নয়। মনে করলেই নেতা হওয়া যায় না।

—তা হলে নেতার লক্ষণ কি দাদা, কি দেখে চিনবো?

—নেতার ডাক হবে দুর্বার—ইরেজিস্ট্রবিল্। শ্রীকৃষ্ণের বাঁশী শুনে ব্রজগোপীরা যেমন কুল-মান বিসর্জন দিয়ে ছুটে যেতো, নেতার ডাক হবে তেমনি।

—কোথায় সে নেতা পাবো দাদা ?

—সেজন্ম চিন্তা নেই বোনটি—যেদিন তোরা মানুষ হবি, সেদিন নেতাও আসবেন। মানুষের নীতিকে আজ যারা পদদলিত করছে, মেচ্ছাচারিতায় আজ যারা বনের পশুকে হারিয়ে দিচ্ছে, তাদের জন্তু পাশব-শক্তির আবির্ভাব পৃথিবীতে বিরল নয়। কিন্তু বহু যুগ পূর্বে জন্মগ্রহণ করেও পশুত্বের প্রাণী এই মানব আজো পশুধর্ম ছাড়তে পারলো না। এই পশুধর্মকে যিনি জয় করতে পারবেন, তিনি হবেন সেই নেতা !

পশুধর্ম একেবারে কি করে ছাড়া যায় দাদা—মানুষ তো পশুও !

—না শিখা, “প্রাণীও” বলতে পারিস। প্রাণধর্ম তো তাকে বিসর্জন দিতে বলা হচ্ছে না। প্রাণকে মহান করতে, বিশাল করতে বলা হচ্ছে। শিখা ! আমি কতকগুলো কর্তোর নিয়ম পালন করি ; দেখে হয়তো তোরা ভাবিস—দাদা তোদের গোঁড়া। কিন্তু ভেবে দেখেছিস কি—পশুর কোন বাঁধা-ধরা নীতি নেই। উদর পালনের প্রয়োজনই তার নীতি। তাছাড়া অণু নীতি যদি কেউ পালন করতে পারে তো সে মানুষ। “সত্য কথা নিশ্চয় বলবো” এই প্রতিজ্ঞা মানুষই করতে পারে। “হিংসা করবো না”—এ নীতি মানুষেরই পালনীয়। ঈশ্বর বলে কেউ থাকুন আর নাই-থাকুন—প্রকৃতি মানুষের মধ্যে যে ভাল-মন্দ বোঝবার শক্তি দিয়েছেন,—যে কলাগকরী বুজিটুকু দিয়েছেন, মানুষ কেন তাকে ব্যবহার করবে না, বলতে পারিস ?

শিখা অনেকক্ষণ স্তব্ধ হইয়া রহিল। বিনায়ক আসিয়া বলিল,—তোমাদের ভাইবোনের গল্প তো আর শেষ হবে না, এদিকে রান্নাকরা খাচ্ছ সব ঠাণ্ডা মেরে যাচ্ছে, আর পেটের খিদে গরম হয়ে উঠেছে।

শিখার দুটি চোখ দরদে ভরিয়া উঠিল, বলিল,—ওঃ ! এত খিতে পেয়েছে আপনার ? তা ডাকলেই পারতেন আমাদের ! চলুন চলুন !

তপন হাসিয়া বলিল,—না কহিতে ব্যথাটুকু পারে না বুঝিতে ?

—যাও বলিয়া শিখা প্রায় ছুটিয়াই পলাইতেছে, তপন তাহার বেগীটা ধরিয়া আটকাইয়া ফেলিল, তারপর বলিল,—মিতা পাতিয়েছিস যে,—কি রকম মিতা, তাহলে। খিদের সময় বুঝতে পারিস নে ?

—আমি দাদারই খিদের কথা ভুলে গিয়েছিলাম, তা মিতা।

—তা হলে ওকে আর এক ডিগ্রি প্রমোশন দে ভাই শিখা। ও খিদে মোটেই সহিতে পারে না !

—মানে ? কোন ক্লাসে প্রমোশন ?

—মিতার উপরের ক্লাসে ?

শিখা হাসিতে গিয়া লজ্জায় লাল হইয়া উঠিল, বিনায়ক হাসি চাপিতে গিয়া অত্যধিক গম্ভীর হইয়া গেল এবং তখন ভাতের হাঁড়িটা লইয়া পাতায় ভাত পরিবেশন করিতে লাগিল ।

খাওয়া শেষ হইলে শিখা বলিল—তুমি দিষ্ট্রী কি জন্তে যাবে দাদা ? কদিন জ্বরী করবে সেখানে ?

—দিন দশ মাত্র । কি জন্তে যাবো সেটা এখন নাই গুনলি, ভাই ?

—তুমি বড্ড কথা লুকিয়ে রাখ দাদা ! গুনলাম তো কি হোল ক্ষতিটা ।

—প্রকাশ করে ফেলতে পারিস সেটা আমি চাইনে ! কাজে সিদ্ধিলাভ করে অল্পের মুখে স্বয়ং শোনা আমার শিক্ষা বোনটি ! তবে মনে রাখ—মিঃ আর মিসেস চ্যাটার্জির স্নেহবৎ শোধ করবার জন্তই যাচ্ছি ।

শিখা আর অহুরোধ করিল না, কিন্তু মনটি তাহার অত্যন্ত বিষন্ন হইয়া রহিল । দেখিয়া তখন তাহাকে কাছে ডাকিয়া সম্মুখে কহিল,—আমি নাই বা রইলাম রে, যার হাতে তাকে দিচ্ছি সে তোর অযোগ্য হবে না ।

—কিন্তু সেদিনটিতে আমি তোমার আশীর্বাদ পাবো না দাদা । আর কারো আশীর্বাদে তৃপ্তি হবে না আমার ।

—আশীর্বাদ আজও করছি আবার ফিরে এসেও করব । আর যতকাল বাঁচবো করবো । তোদের কল্যাণ কামনাই যে আমার জীবনের ব্রত শিখা । এই বিশাল পৃথিবীতে তুই, মীরা আর বিনায়ক ছাড়া আত্মীয় বলতে তো আমার আর কেউ...

তখন থামিয়া গেল । অসহনীয় ব্যথায় তাহার কণ্ঠস্বর কাঁপিয়া উঠিতেছিল । সংযমী তখন আত্মসংবরণ করিল কিন্তু শিখার নারীহৃদয় এ বেদনা সহিতে পারিল না, দরদর ধারায় তরল মুক্তাবিন্দু তাহার দুই গাণ্ডে ঝরিয়া উঠিল । বিনায়ক নীরবেই এই শোকাবহ দৃশ্য অন্তরিন দেখিয়াছে, আজো দেখিল নীরবেই ।

আত্মসম্বরণ করিয়া শিখা বলিল,—তপতীর আশা কি তুমি তবে ছেড়েই দিয়েছে, দাদা ?

—প্রায় ; কারণ সে অল্প কাউকে ভালবাসে কি না আমি জানিনে, তবে আমায় সে গ্রহণ করবে না, এটা বহু প্রকারে জানিয়ে দিয়েছে !

—কিন্তু দাদা, তুমি সেখানে যে ভাবে থাকো, যে ছদ্মবেশে সে তোমায় দেখেছে, তাতে তার মত একজন শিক্ষিতা তরুণীর পক্ষে তোমাকে স্বামী স্বীকার করা কঠিন তো ?

—আমি তো বলছিলাম, শিখা, যে সহজ। কঠিন নিশ্চয়ই। তবে সেটাও সম্ভব, যদি সে আজো অনন্তপরায়ণ থাকে। আছে কি না জানবার জন্য আমি এত ধৈর্য ধরে অপেক্ষা করছি। এত অপমান সহ্য করছি। আমি যদি আজ আত্মপ্রকাশ করি, তাহলে তো নিশ্চয়ই সে আমায় গ্রহণ করবে কিন্তু তাতে সে পূর্বে আর কাউকে ভালবেসেছে কি না, তা আর আমার জানা হবে না।

—তা যদি বেসেই থাকে দাদা, তাহলে কি তুমি ওকে গ্রহণ করবে না?

—নিশ্চয় না। আমার জীবনে অত্যাশঙ্কনীর নারীর ঠাই নেই! শিখা, আমি কোনো মানবীকে আমার সহধর্মিণীর আসন দিতে চাই, যে মানবী শুধু দেহধর্মিণী নয়। এর জন্য যদি শত জন্মও আমার একক জীবন কাটাতে হয়, সেও ভালো!

শিখা নীরবে তপনের মুখের দিকে চাহিয়া রহিল; তারপর ধীরে ধীরে বলিল, —মিঃ বোসকে দিয়ে তোমার অপমান করালো এর পর তোমার আর কিসের সম্ভেদ দাদা—ছেড়ে দাও ও-বাড়ী।

—দেবী আছে ভাই। মিঃ বোসকে দিয়ে আমার অপমান করানোর জন্য কারণও থাকতে পারে, এমন কি, সে আজো নির্মল আছে এটাই তার একটা বড় প্রমাণ!

—তা হলে আরও পরীক্ষা তাকে করবে?

—আমি কিছুই করবো না শিখা, যা-কিছু করবার সেই করবে! আমি শুধু জানতে চাইছি, কাকে সে চায়। তা যদি না জানতে পারি তাহলে ওর মা-বাপের কাছে পাওয়া স্নেহের যৎকিঞ্চিৎ রূপ আমি শোধ করে যাবো—তারই জন্য দিল্লী যাচ্ছি!

তপন অনেকক্ষণ চুপ করিয়া থাকিয়া কহিল,—শিখা, এই দেশের মেয়েরাই স্বামীর নিন্দা শুনে মৃত্যু বরণ করেছে, মৃত স্বামীর কঙ্কাল নিয়ে দেশে দেশে ফিরেছে, গলিত-কুষ্ঠ স্বামী কাঁধে করে বয়ে বেড়িয়েছে,—আধুনিক তোরা; অতটা বাড়াবাড়ি না-হয় নাই করলি! কিন্তু দুর্ভাগ্যক্রমে কারো ভাগ্যে যদি মৃত্যু স্বামীই জোটে তো, তাকে কি স্নেহের স্বরে একটা কথাও বলবি নে? বন্ধু দিয়ে অপমান করে তাড়াবি? তার চেয়ে নিজেই কি বলা উচিত নয়, ‘তুমি চলে যাও, আমি তোমায় চাইনে।’ তপতী যদি বলতো, সে অল্প কাউকে ভালোবাসে, তাহলে আমি সানন্দে তাকে তার প্রিয়তমের হাতে তুলে দিতাম। আজো তার জন্তে প্রস্তুত হয়ে আছি আমি, শিখা—কিন্তু তপতীর মনের খবর জানবার সুযোগ আমার খুবই কম। ওর মা-বাবাকে কথাটা জানালে তাঁরা অত্যন্ত আহত হবেন, তাই নিজেই সহ্য করছি। দুঃখ আমি বিস্তর সহ্য করছি। এটাও সহ্যে পারবো—তোরা সুখে থাক...

তপন চলিয়া গেল—শিখা নির্ণিমেষ দৃষ্টিতে তার গমন পথের দিকে চাহিয়া রহিল।

তপতী নির্বাক হইয়া চাহিয়াছিল কাউথানার দিকে, শিখার বিবাহের নিমন্ত্রণপত্র। তপতী এবং তপন দুজনকেই এক পত্রে নিমন্ত্রণ করা হইয়াছে। তপতীর গাত্রদাহ হইতেছিল ঐ ইতর লোকটার সহিত তাহার নাম যুক্ত হইতে দেখিয়া। কিন্তু নিরুপায় নিষ্ফল গর্জন ছাড়া তপতী আর কি করবে। সৌভাগ্য এই যে তপতী সেদিন এখানে থাকিবে না, দিল্লীতে নিখিল ভারত সঙ্গীত প্রতিযোগিতায় যোগদানের জন্ত কালই তারা যাত্রা করিবে।

তপতী নীচে আসিয়া বসিল বন্ধুদের অপেক্ষায়,—অনেক কিছু আয়োজন করিবার আছে তাহাদের। মিঃ ব্যানার্জি, মিঃ অধিকারী, মিঃ সান্তাল, রেবা সিকতা, শৈলজা ইত্যাদি আসিয়া পৌঁছিল।

রেবা বলিল,—বন্ধুর বেঁতে থাকবি নে তুই ? কেমন ছেলে রে ? তুই জানিস ?

তপতী অত্যন্ত তাচ্ছিল্যের সহিত বলিল—জানার দরকার ? সে যখন আমায় ছাড়তে পেরেছে তখন আমিই-বা না পারবো কেন।

—ঠিক কথা। তবে বিয়েটা কার সঙ্গে হচ্ছে, জানতে ইচ্ছে করে।

—জেনে আয় গিয়ে ! নাম তো দেখলাম বিনায়ক বন্দ্যোপাধ্যায়। তপতী একটা দীর্ঘশ্বাস নিজের অজ্ঞাতেই মোচন করিল।

মিঃ ব্যানার্জি তাহার কথাটা ধরিয়া বলিলেন,—বিলেংফেরত নাকি ; করে কি ?

—জানিনে—বলিয়া তপতী অহৃদিকে চাহিয়া রহিল। তাহার নিজের দুর্ভাগ্য আজ তাহাকে অপরের সৌভাগ্য ঈর্ষান্বিত করিতেছে ! তপতী বুঝিতেছে, ইহা অশ্রুয় ; কিন্তু তাহার আয়ত্তের বাহিরে। নিজের মনের এই শোচনীয় অধোগতি আজ তপতীকে ব্যথা দিল না, বিধাক্ত করিয়া দিল। তাহার যত কিছু জালা তপনের সর্বান্ধে ঢালিয়া দিতে পারিলে—তপতী যেন কতকটা জুড়াইতে পারে।

মিঃ অধিকারী বলিলেন—লোকটা ব্রাহ্ম, না হিন্দু, না খৃষ্টান ? জানেন ? —হিন্দুই হবে বোধ হয়—শিখা কি আর অন্য ধর্মের কাউকে বিয়ে করবে ! ওর যা হিন্দুয়ানী স্বভাব ! ওর বাবা তার উপর যান। আর মা যান তারো উপরে !

রেবার কথাকটি শুনিয়া সকলেই হাসিল, হাসিল না শুধু তপতী ; গম্ভীর মুখে খানিক বসিয়া থাকিয়া কহিল,—ভালই ! শিখা হচ্ছে আর্থনারী।

—কেন ? আমরাও তো আর্থনারী—আমরাই বা সতীর কম কি ? রেবা কহিল।

—বেফাঁস কথা কেন বলিস রেবা—সতীত্বের গানে বুঝিস ?

তপতীর উষ্ণ কথায় সবাই চুপ হইয়া গেল। মিঃ ব্যানার্জি কহিলেন—  
আমরাও জানিনে সতীত্বের মানে ; আপনি যদি বলেন দয়া করে ? শুনে ধন্য হই।

—জানেন—কোন কালে কেউ সতী ছিল বলে আমি বিশ্বাস করি না।

—কেন ? সীতা, সাবিত্রী, বেহলা,—রেবা স্বরিতে কথাটা বলিয়া তপতীর  
মুখের দিকে চাহিল।

কলহাস্ত্রে তপতী ঘর ভরাইয়া দিয়া বলিল,—থাম্ থাম্—সীতার মতন বোকা  
মেয়ে পৃথিবীতে আর জন্মায় নি। আর সাবিত্রী তো এক নম্বর পলিটিসিয়ান,  
আর নির্লজ্জ বেহলার কথা বলতেও ইচ্ছে করে না, একটা ফাষ্ট ক্লাস ককেট।  
নাচনী সেজে নিজের কাজ গুছিয়ে নিয়ে ফিরে এল।

সবাই উচ্চহাস্ত করিয়া উঠিল। মিঃ ব্যানার্জি প্রশ্ন করিলেন,—সীতা বোকা,  
কিসে প্রমাণ হয় ?

—বরাবর। প্রথম, রাবণের মত একটা পশুপ্রকৃতির লোককে অত রূপগুণ  
থাকা সত্ত্বেও সীতা খেলাতে পারেনি ; অশোক বনে পড়ে পড়ে মার খেলো।  
তারপর আগুনে পুড়ে পরীক্ষা দিয়ে নিজের আত্মার করলো অপমান। রাণী তুই  
না-হয় নাই হতিন্স বাপু, তাবলে পরীক্ষা দিবি কিসের জ্ঞান ! তিন নম্বর বোকামী  
তার পরের কথায় তার নিষ্ঠুর স্বামী তাকে দিল বনবাস, আর সে দিবি বনে চলে  
গেল ! কেন ? সেও তো একজন প্রজা, বিনা অপরাধে তার শাস্তি সে কেন মেনে  
নিলো ?—কেন বিচার চাইল না ? তাতে সে স্বামীকেও স্বধর্মের পথে চালনা  
করতে পারতো ! সতী হবার কাড়ালপনায় ঐ মেয়েটা নারীত্বের চরম অপমান  
ঘটিয়েছে। চতুর্থ দফায় সে করলো পাঠাল প্রবেশ ! আত্মহত্যার আর ভালো  
উপায় তখনকার দিনে ছিল কিনা আমার জানা নেই—পটাসিয়াম সাইনাইড  
তখনো বার হয়নি, কিন্তু আত্মহত্যা ও করলো কেন ? এই কাপুরুষ আই মিন  
কা-নারীত্ব—সবাই উচ্চৈঃস্বরে হাসিয়া উঠিল, তপতী ধমক দিয়া কহিল,—থাম্  
হাসি কেন অত ? এই কা-নারীত্ব আমি কিছুতেই সমর্থন করিনে। সীতার যদি  
এতটুকু বুদ্ধি থাকতো তাহলে রামের গড়া সোনার সীতাকে ভেঙ্গে চুরমার করে  
বলতে পারতো, আমি পরীক্ষাও দেব না আত্মহত্যাও করবো না। তুমি আমায়  
বিয়ে করেছ বনে যদি যেতে হয়, চল হুঁজনেই। তোমার বোকামীর জ্ঞান আমার  
একা কেন শাস্তি হবে ? তুমি গিয়েছিলে কেন সোনার হরিণ ধরতে ? কেন তুমি  
রাবণের বাড়ী থাকার সময়েই আমায় আত্মহত্যা করতে বল নি ? কেন তুমি অগ্নি  
পরীক্ষাটা এখানেই এনে করলে না ? কেনই বা-তুমি বিনাবিচারে আমায় বনে  
পাঠালে ? নিজে যেমন তুমি নিবুদ্ধিতা করে একটা বুড়ো জৈগ লোকের কথা



স্বাধীনতার জন্য বনে গিয়েছিলে তেমনি কি সবাই বোকা নাকি ? কিন্তু সীতা এত বোকা ছিল আর ছিল সত্যীত্বের নামে কাঙাল যে এ-সব কথা ওর মাথায় একদম ঢোকেনি ।

আলোচনাটা অত্যন্ত সরল এবং উপভোগ্য হইতেছে ভাবিয়া মিঃ অধিকারী কহিলেন,—আচ্ছা,—সাবিত্রী সম্বন্ধে কি আপনার বক্তব্য ?

—সি ওয়াজ এ গ্রেট পলিটিসিয়ান্ । সাবিত্রী সত্যী কিনা বলতে পারি না, তবে সীতার চেয়ে সে হাজারগুণ বুদ্ধিমতী । যম রাজার মত ষড়িয়াল লোককে সে সাতঘাটের জল খাইয়ে দিল । নারীত্বের সম্মান সে কিছুটা রেখেছে, এই জন্য ওকে আমি শ্রদ্ধা করি । দেখুন না রাজার মেয়ে তো, চেহারা নিশ্চয় ভাল ছিল, যম রাজাও এসে গেছে, আর সাবিত্রী আরম্ভ করেছে নানারকম কথার প্যাঁচ । পুরুষমাহুষের মাথা ঘুলিয়ে দিতে কতক্ষণ ! শেষ যখন বললো, তার একশ' ছেলে চাই, তখন যম ভাবলো আঁহা বেচারী, এই বয়সে সেক্স-আকাজ্জলটা মিটোবার বায়না ধরেছে, অস্বাভাবিক তো কিছু নয় ! দিয়ে দিলো বর । সাবিত্রী যে পলিশি করে ওর প্রার্থনার মধ্যে “সত্যবানের দ্বারা” কথাটা ঢুকিয়ে দিয়েছে, রূপমুগ্ধ যমের তখন আর সেদিকে খেয়াল নেই ! কেমন কৌশলে বর নিল বলুন তো ? একশ' ছেলে, বছরে একটা হলেও স্বামী তার অন্ততঃ একশ' বছর বাঁচবে । ছেলের আর কিছু দরকার ছিল বলে তো মনে হয় না, দরকার যা' ছিল তা সে ঠিক আদায় করে নিয়েছে । এমনি তীক্ষ্ণ বুদ্ধি থাকলে যদি সত্যী বলা চলে, তাহলে অবশ্য সাবিত্রী সত্যী'ই !

মিঃ সাংঘাল পুনরায় প্রশ্ন করিলেন,—বেহুলা কথাকাটাও বলুন একটু—

—ও আর বলে কাজ নেই । ও যখন দেখলো যে দেবতারার তার স্বামীকে বাঁচিয়ে দিতে পারে তখন সেখানে গিয়ে নাচ গান যা কিছু করা দরকার, করে স্বামীর জীবনটাকে ফিরিয়ে নিল, আধুনিক যেসব মেয়েকে চাঁদা আদায় করতে পাঠানো হয়, বেহুলা তাদের চেয়ে অনেক উঁচুদরের ককেট ।

তপতীর প্রত্যেক কথা হাস্তোদ্বেগ করিলেও তাহার চিন্তাশীলতার গভীরতা অগ্ন্যান্ত সকলকে অভিভূত করিতেছিল, হাসিতে গিয়াও তাহারা ভাবিতেছিল, তপতীর চিন্তাধারা ভিন্ন থাত বহিয়া চলে । আর তপতী ভাবিতেছিল, ভারতের চিরবরণ্যা কয়জন মহামানবীর চরিত্রের যে সমালোচনা সে আজ করিতেছে, তাহা শুনিলে তাহার ঠাকুরদা হয়তো মুচ্ছা যাইতেন । তপতীর মনে বেশ একটা তীব্র স্বরার আনন্দ অহুভূত হইতেছে । ঠাকুরদার মৃত আত্মা যদি কোথাও থাকেন তো শুনুন, তাঁহার নাতনী ঠাকুরদার চিন্তাকে অতিক্রম করিয়া গিয়াছে !

মিঃ সাংঘাল এবার বেশ জোরে হাসিয়া কহিলেন,—আপনার অভিধানে

তাহলে সত্যী কথাটা নেই, কেমন ?

—থাকবে না কেন ? ‘সৎ’ কথাটার জীলিঙ্গ ‘সত্যী’ ! কিন্তু সৎ কাকে বলে তা বুঝতে হলে অভিধান দরকার। ঠাকুরদা বলতেন সৎ চিরস্থায়ী আর অপরিবর্তনীয়, কিন্তু এরকম কোন কিছু আমি তো খুঁজে পাইনে। ভগবান যদি বা থাকেন তো তিনি দেশ-কাল-পাত্র হিসেবে পরিবর্তিত হন, অর্থাৎ তিনি নেই, আছে মানুষের কল্পনা যার পরিবর্তন অবশ্যস্বাবী !

—ভগবান না থাকাই ভালো, অনেক হাদ্দামা চুকে যায়। আর থেকেই বা উনি কি করছেন আমাদের ?—কথাটা বলিয়াই মিঃ ব্যানার্জী টানিয়া টানিয়া হাসিতে লাগিলেন।

—তঁার থাকার ভয়ানক দরকার, নইলে মানুষ তার হৃদয়ের শ্রদ্ধাভক্তিগুলো দেবে কাকে ? চৈতন্যের মতন খোল বাজিয়ে দিনরাত কান্নাকাটি কেবল ঐ নির্বিকার ভগবান সহিতে পারেন। ঐ তাওব কোন মানুষের উপর চালালে সেও যে নির্বিকার পাথর বনে যাবে। তপতীর কথায় আবার সকলে হাসিয়া উঠিল।

অকস্মাৎ তপতীর ঠাকুরদার হাতে-গড়া মন চীৎকার করিয়া উঠিল : এ সত্য নয়, তপতী আত্মবঞ্চনা করিতেছে ! নিজেকে সংশোধন করিবার জগুই যেন সে বলিয়া উঠিল, —ঐ নির্বিকার ভগবান আছে, ও থাক্—ওকে মানুষের বড় দরকার। যে কথা নিজের কাছেও বলতে মানুষ কুণ্ঠিত হয়, সে-কথাও ওর কাছে বলে খানিকটা হাল্কা হওয়া যায়। জীবনে এমন দুঃসময় আসে, যখন একটা অচেতন কিছুকে চেতন ভেবে নিজের স্থখ দুঃখের কথা বলতে ভাল লাগে, ভালো লাগে নিজের আরোপিত স্নেহকেই তার কাছ থেকে ফিরে পেতে। নিজের ক্ষুদ্রতাকে মানুষ নিজের কল্পনার বিশালতার মধ্যে অনুভব করতে চায়।—তপতী কথাগুলো বলিয়া যেন দম লইতেছে।

—তা হলে ভগবানকে যেনে নিলেন আপনি ?—মিঃ ব্যানার্জী পুনঃ প্রশ্ন করিলেন।

—মানা না-মানায় ওঁর কিছু এসে যায় না, ওঁকে দরকার হলে ডাকবো, না-হলে ডাকবার দরকার নেই, এমন সুবিধার জিনিস না ত্যাগ করাই বুদ্ধির কাজ। চলুন, এখন সব গোছগাছ করে নিতে হবে।

তপতী উঠিল এবং বাধ্য হইয়া অন্য সকলেও উঠিল !

পরদিন বিকালের ট্রেনে তপতীদের দল মিঃ ব্যানার্জী ও মিঃ সান্যাল কর্তৃক পরিচালিত হইয়া যথাসময়ে হাওড়ায় পৌঁছিয়া রিজার্ভ কাষ্ট ক্লাসের দুইটি কক্ষে স্থান গ্রহণ করিল। ট্রেন প্রায় ছাড়ে ছাড়ে এমন সময় তপন একজন কুলির মাধ্যম স্টকেস ও বেডিং লইয়া তপতীদের কামরার সামনে দিয়া চলিয়া গেল।

মিঃ ব্যানার্জি কহিলেন,—তপনবাবুও যাচ্ছে নাকি ?

তপতী লক্ষ্য করে নাই ; মিঃ ব্যানার্জির কথায় চাহিয়া দেখিল, তপন যে গাড়িতে উঠিতেছে, তাহার দরজাটায় একটা বড় অক্ষরের ‘তিন’ নম্বর।

মিঃ ব্যানার্জি কহিলেন,—কি রকম ! থার্ড ক্লাশে যাচ্ছে যে ?

তপতী চুপ করিয়া রহিল। বিষ্ময় ও লজ্জায় তাহার মাথা নীচু হইয়া গিয়াছে। কিছুক্ষণ চুপ থাকিয়া সে মিঃ ব্যানার্জি ও মিঃ সান্যালকে কহিল,—ও যে আমাদের কেউ, একথা যেন এখানে আর কেউ না শোনে, বুঝলেন ! লজ্জায় আমার মাথা কাটা যাচ্ছে।

মিঃ ব্যানার্জি বলিলেন,—আমরা এত নির্বোধ নই, মিস্ চ্যাটার্জি ? কিন্তু লোকটা কী খড়িবাজ ! আপনার বাবার কাছে নিশ্চয় ফার্স্ট ক্লাসের ভাড়া ও আদায় করেছে,—টাকাটা জমিয়ে নিল !

ইহা ছাড়া আর কি কারণ থাকতে পারে। বাবা নিশ্চয় জামাইকে থার্ড ক্লাসে পাঠাইবেন না। কোটিপতি লোকের জামাই তপন থার্ড ক্লাসে যাইতেছে, শুনিলে লোকে কী ভাববে ! রাগে দুঃখে তপতীর কান্না পাইতে লাগিল। স্থির করিল ফিরিয়া আসিয়া বাবাকে বলিয়া ইহার প্রতিকার সে করিবেই। তখনকার মত তপতী বিষয়াস্তরে মনঃসংযোগের চেষ্টা করিল, কিন্তু মনের ভিতর যেন একটা আগ্নেয়গিরি ফাটিয়া গিয়াছে। তাহার ধূমায়িত শিখায় তপতীর চক্ষু অন্ধ হইয়া যাইবে। ঐ লোকটার সীমাহীন অর্থলোলুপতা তপতীর পিতাকে পর্যন্ত অপদস্থ করিতেছে। ধনীর জ্বালী আভিজাত্য গোঁরবে গরবিনী তপতী ভাবিতেই পারে না, থার্ড ক্লাসে যাইতেছে তাহার স্বামী—তাহারই পিতার যাবতীয় বিষয় সম্পত্তির মালিক !

নির্বাক তপতীর মনের ভাব বুঝিয়া মিঃ ব্যানার্জি কহিলেন,

—আর দেরী করায় লাভ কি মিস্ চ্যাটার্জি ? আপনার বাবাকে বলে ওকে তাড়িয়ে দিন বাড়ী থেকে !

—হঁ—

—আপনার মত মেয়েকে পাওয়া যে-কোন উচ্চ শিক্ষিত যুবকের অহঙ্কারের বিষয়।

—হঁ—

—অবশ্য বিবাহ বিচ্ছেদের দলিলটা রেজিষ্টারী করিয়ে নিতে হবে তার আগে ! তপতী এবারও একটা হঁ দিয়া অন্য দিকে সরিয়া জানালায় মুখ বাড়াইল।

নিখিল-ভারত-সঙ্গীত প্রতিযোগিতায় খেয়াল গানে প্রথম পুরস্কার পাওয়ার

আনন্দ লাভ করিতে গিয়া তপতীর মন বিষাদে পূর্ণ হইয়া গেল। এই গান তাহার শুনিলে কে? কার জন্ত তপতীর এই সাধনা! সে কি ঐ নিতান্ত অপদার্থ একটা গণ্ডমূর্খের জন্ত? তপতীর বিষবাস্প যেন তপনকে এই মুহূর্তে দখল করিয়া দিতে চায়!

মিঃ ব্যানার্জি এবং মিঃ সান্যাল তপতীর মনের গতি সর্কদা লক্ষ্য করিতেছেন।

তাহাদের কাজ হাসিল করিবার ইহাই উৎকৃষ্ট স্বযোগ। তপতীর নিকট আসিয়া কহিলেন,

—চলুন একটু বেড়িয়ে আসা যাক—হুমাযুনের কবর দেখে আসি গে!

তপতী আপত্তি করিল না। একটু বাহিরে গিয়া আপনার চিত্তবেগ প্রশমিত করিতে তাহারও ইচ্ছা জাগিতেছিল। ট্যাক্সি চড়িয়া সকলে যাত্রা করিল। পৃথ্বীরাজ রোডের উপর দিয়া গাড়ি চলিয়াছে। দুইপাশে ঘন সবুজ ঘাসে ঢাকা জমি তাহার উপর বাবুলা বন,—যেন স্রুদূর অতীতের পথ ধরিয়া চলিয়াছে তাহারা পৃথ্বীরাজেরই রাজত্বে!

তপতী হঠাৎ কহিল,—সংযুক্তার কথা মনে পড়ছে। যোগ্য স্বামীকে পাবার জন্ত বাপ-মাকে ছাড়তে সে দ্বিধা করেনি—অদ্ভুত মেয়ে।

মিঃ ব্যানার্জি তাহাকে উল্কাইবার জন্ত কহিলেন,—আপনার মনের শক্তিও কিছু কম নয়। আজ দীর্ঘ সাতমাস আপনি মার বিরুদ্ধে যুদ্ধ ঘোষণা করেছেন।

তপতী একটা নিঃশ্বাস ছাড়িল তারপর ধীরে ধীরে কহিল,—যুদ্ধ এখনো করিনি মিঃ ব্যানার্জি এ কেবল সমরায়োজন চলেছে। কিন্তু সংযুক্তার মতো ভাগ্য তো আমার নয়, আমার পৃথ্বীরাজ এখনো আসেন নি!

মিঃ ব্যানার্জি ও মিঃ সান্যাল চকিত হইয়া উঠিলেন। তপতীর মনটাকে তাহারা আজো আকর্ষণ করিতে পারেন নাই তবে! কে তবে উহাকে লাভ করিবে। এখনি সেটা জানিয়া লওয়া দরকার, বলিলেন,—আপনার পৃথ্বীরাজ কি-ভাবে আসবেন, বলতে পারেন মিস্ চ্যাটার্জি?

না! যেদিন আসবেন সেদিন বলতে পারবো! আজ শুধু জানি যারা এতদিন আসছেন তাঁরা কেউই পৃথ্বীরাজ নন! তাঁদের মধ্যে অনেক ঘোঁরী আছেন, কিন্তু পৃথ্বীরাজ নেই।

তপতীর ইঙ্গিত ব্যঙ্গের কাছ ঘেঁষিয়া মিঃ ব্যানার্জিদের পীড়িতে করিতেছে। মিঃ ব্যানার্জি আজ মরিয়া হইয়া উঠিয়াছেন; কহিলেন,

—ঘোঁরীর হাতে পৃথ্বীরাজের পরাজয় ঘটেছিল, বীরত্ব তার কম ছিল না মিস্ চ্যাটার্জি?

হুভাগ্য সংযুক্তার—বাবা তার জয়চন্দ্র আর সৌভাগ্য সংযুক্তার স্বামী তার

মৃত্যুঞ্জয়ী। ঘোরীর বীরত্ব দেশজয় করতে সক্ষম, নারী হৃদয় নয়, কারণ নারী নিজে ছলনাময়ী বলে ছলনা কপটতাকে অত্যন্ত ঘৃণা করে। নারী নিশ্চিত নির্ভরতায় তাকে আত্মদান করবে—যে তাকে ছলনা দিয়ে ভুলায় না। অত্যন্ত সহজে এসে সেই তার বুকের পত্রটিতে গন্ধ হয়ে ফোটে যে-পুরুষ আপন পৌরুষ মহিমায় মৃত্যুপথকে উজ্জ্বল করে তুলবে; চালাকিতে নয়, ছলনায় নয়, কপটতায় নয়। নারী নিজে সাংঘাতিক কপট তাই অগ্নের কপটতা সহজে বুঝতে পারে।

—আপনি কি বলতে চান যে আমরা আপনার সঙ্গে কপটতা করি ?

—হ্যাঁ, তাই। তার প্রমাণ আপনার এই প্রশ্নটি। আপনি যদি অকপট হতেন তাহলে এ প্রশ্ন আপনার মনে আসতো না। আমি তো কোন ব্যক্তিগত কথাই আলোচনা করিনি। আপনি নিজেই ধরা পড়লেন! তপতী হাসির বিদ্রোহ হানিল!

মিঃ ব্যানার্জি ও মিঃ সান্ধ্যাল মুবড়াইয়া পড়িতেছেন। কিন্তু মিঃ সান্ধ্যাল কানে কানে মিঃ ব্যানার্জিকে বললেন,—আধুনিক সাইকোলজি বলে : “মেয়েরা যাকে ভালবাসে তাকেই ঐ রকম আক্রমণ করে; অতএব ভাবনার কিছু নাই।”

কথাটা শুনিয়া মিঃ ব্যানার্জি খ্রীত হইয়া কহিলেন, কপটকে কপটতা দিয়েই তো জয় করা যায়।

তপতী মধুর হাসিল, একটু খামিয়া বলিল,—জয়ীর লক্ষণ হচ্ছে বিজিতের আকাঙ্ক্ষা পূর্ণ করা—পারবেন তো ?

—নিশ্চয়। বলুন কি আকাঙ্ক্ষা। মিঃ ব্যানার্জি সাগ্রহে চাহিলেন তপতীরদিকে।

—উপস্থিত যৎসামান্য। ঐ-যে লোকটা বসে আছে, পিছনের চুলগুলো ঠিক তপনবাবুর মতো, দেখে আসুন তো, ও সেই কি না? আপনাকে আশা করি চিনতে পারবে না।

—সম্ভব নয়—বলিয়া মিঃ ব্যানার্জি গাড়ী হইতে নামিয়া গেলেন। হুমায়ূনের কবরের নিকট এক টুকরা ঘাসে-ভরা জমির উপর তপন-নিশ্চল-ভাবে বসিয়া ছিল। মিঃ ব্যানার্জি গিয়া দেখিলেন, এবং নমস্কার করিয়া জিজ্ঞাসা করিলেন,—আপনি বাঙালী দেখছি—

—হ্যাঁ—বলিয়া তপন তাহার মুখের পানে তাকাইল। মিঃ ব্যানার্জিদের সহিত তাহার পরিচয় নাই। ব্যানার্জি জিজ্ঞাসা করিলেন,—বেড়াতে এসেছেন বুঝি? ক’দিন থাকবেন? উত্তরে তপন জানাইল, তাহার কাজ শেষ হইয়াছে, কাল সে আগ্রা যাইবে পরন্তু বৃন্দাবনধাম দর্শন করিয়া পরদিন কলিকাতা ফরিবে। মিঃ ব্যানার্জি হয়তো আরো কিছু জিজ্ঞাসা করিতেন, কিন্তু তপন উঠিয়া নমস্কার করিয়া অদূরে দণ্ডায়মান টাক্সি চড়িয়া প্রস্থান করিল।

মিঃ ব্যানার্জি ফিরিয়া তপতীকে সব কথা জানাইয়া শেষে कहিলেন,—ভঙ্গলোক দেখলেই ও ভয় পায়।

—পায় হয়তো। চলুন ; কাল আমরাও আগ্রা যাই।

এভাবে কেন তপনের পিছনে ঘুরিয়া মরিবে, জিজ্ঞাসার উত্তরে তপতী জানাইল, উহার পিছনে একটু গোয়েন্দাগিরি করা দরকার, নতুবা বাবা-মাকে কি বলিয়া সে বুকাইবে যে তপনকে বাড়ীতে রাখা যায় না। আগ্রায় এবং বৃন্দাবনে সে কি করে জানিতে হইবে। ঐ সঙ্গে আগ্রা সহরটাও দেখা হইয়া যাইবে আর একবার।

পরদিন নিউ-দিল্লী স্টেশনে একটি প্রথম শ্রেণীর কামরায় আসিয়া উঠিল তপতীদের দল। তপনকে তাহারা অনেক খুঁজিয়াও দেখিতে পাইল না। তপতী সেই দীর্ঘ পথ বসিয়া বসিয়া ভাবিতে লাগিল—হয়তো তপন এ-গাড়ীতে আসে নাই, কিম্বা কোন থার্ড-ক্লাসের ভিড়ে লুকাইয়া গিয়াছে। যদি না আসে তবে তপতীদের পরিশ্রম বৃথা হইবে। তপতী জানিতে চায়, এতদূরে আসিয়া ঐ অদ্ভুত লোকটা কী করিতেছে।

বেলা বারটায় গাড়ী আসিয়া আগ্রায় থামিল। জিনিসপত্র গুছাইয়া সিসিল-হোটেলের লোকদের সহিত গাড়ীতে উঠিতে গিয়া মিঃ ব্যানার্জি দেখাইলেন, একটা টাক্সায় স্ট্রকেশ ও বেডিং হাতে তপন উঠিয়া চলিয়া গেল। হয়তো কম দামের কোন হোটেলে উঠিবে। এইভাবে পয়সা বাঁচাইতে গিয়া তপন যে তাহার সম্মানিত পিতার কতখানি অপমান করিতেছে তাহা ঐ ইন্ডিয়ান বোঝে না! তপতীর মর্কাজ জ্বলিতে লাগিল।

হোটেলে আসিয়া আনাহার মারিয়া সকলেই বলিল,—ফতেপুর সিন্ধী, আগ্রা ফোর্ট, ইংমাং-উর্দোলা ইত্যাদি দেখিতে যাইবে। তপতীর মন অত্যন্ত ক্লান্ত হইয়া পড়িয়াছে, সে অস্থিততার ছুতা করিয়া হোটেলেই পড়িয়া রহিল। আগ্রা সে পূর্বে দুইবার দেখিয়াছে। অত্যাগত সকলে চলিয়া যাইবার পর তপতী ভাবিতে বসিল তাহার জীবনের অপরিমীম ব্যর্থতার ইতিহাস। তপনকে ভালবাসিবার আকাঙ্ক্ষা সে তাহার মনের অলিগলিতে ঘুরিয়াও কুড়াইয়া পাইল না। ঐ লোকটার উপর বিতৃষ্ণাই কেবল জাগিয়া উঠে এবং বিতৃষ্ণার কথা ভাবিতে গিয়া ক্রোধে সর্বাঙ্গ জ্বলিয়া যায়। উহার হাত হইতে উদ্ধার লাভের কি কোন উপায় নাই। সারাদিন চিন্তার পর ক্লান্ত তপতীর মনে হইল, প্রেমের শ্রেষ্ঠ তীর্থ তাজমহলটা একবার দেখিয়া আসিবে! হোটেলের গাড়ী আনাইয়া তপতী উঠিয়া বসিল।

আশ্চর্য! তাজমহলের সম্মুখে ঝাউবীণি-বেষ্টিত প্রকাণ্ড চত্বরে বসিয়া আছে তপন—দৃষ্টি সম্মুখে প্রসারিত। তাজের শুভ্র মন্দিরমূর্তিকে যেন সে ধ্যান করিতেছে। তপনের পিছন দিকটা তপতী ভালভাবেই চিনিত—বাড়ের পাশেই সেই কালো তিলটি, লম্বা গভীর কালো কৌকড়ানো চুল লতাইয়া পড়িয়াছে যেখানে। সামনে গেলে পাছে তপতীকে দেখিয়া তপন চলিয়া যায়, এই ভয়ে তপতী পশ্চাতেই অপেক্ষা করিতে লাগিল। ....সন্ধ্যা হইতেছে। আষাঢ় পূর্ণিমার স্নিগ্ধ জ্যোৎস্নায় বিরহী সম্রাটের প্রেমদ্রুতি যেন ভাষা লাভ করিতেছে!

তপন উঠিয়া তাজমহলের মধ্যে আসিল। তপতী তাহার অনুসরণ করিয়া চলিয়াছে। জনতার মধ্যে কে কোথায় কি উদ্দেশ্যে চলিতেছে তপন লক্ষ্যমাত্র করিল না। সম্রাট সম্রাজ্ঞীর সমাধিপার্শ্বে আসিয়া সে হাতের ফুলগুলি অঞ্জলি-বদ্ধ করিয়া আবৃত্তি করিল :

“হে সম্রাট কবি, এই তব জীবনের ছবি—

এই তব নব মেঘদূত, অপূর্ব—অদ্ভুত,

চলিয়াছে বাক্যহারা এই বার্ষা নিয়া—

‘ভুলি নাই—ভুলি নাই—ভুলি নাই প্রিয়া’।...”

তপতীর বিশ্বয় সীমাতিক্রম করিয়া গিয়াছে। এই তপন! সত্যই এ তপন তো? কিম্বা তপতী অলু কাহাকেও তপন ভাবিয়াছে। না, তপতীর ভুল হয় নাই। ও-যে তপন, তাহার পরিচয় রহিয়াছে উহার পোষাকে। ঐ পোষাক সে দিল্লীতেও পরিয়াছিল—ঐ রং—ঐরকম কোট।

তপন প্রণাম করিয়া চলিয়া আসিল। তপতী পিছনে পিছনে আসিতেছে বরাবর। তাজমহলের হৃদবিস্তৃত আঙ্গিনা পার হইয়া তপন বাহিরের গাড়ী থামিবার জায়গায় আসিল। তাহার টাঙ্গাওয়ালা কহিল,—আইয়ে!

তপতী ছরিতে তপনের নিকট আসিয়া বলিল,

—আমায় একটু পৌছে দেবেন?

তপন এক মুহূর্ত ইতস্ততঃ করিয়া বলিল,

—একা এসেছেন? চপুন, কোথায় যাবেন?

—সিমিল হোটেল—বলিয়া তপতী চাহিল জ্যোৎস্নালোক-দীপ্ত তপনের মুখের পানে। ভাল দেখা যায় না, তথাপি তপতীর মনে হইল—এমন সুন্দর সে আর দেখে নাই! টাঙ্গার সামনের আসনে তপতী উঠিয়া বসিল, তপন বসিল পিছনে!

—এদিকে আসুন!—তপতী অনুরোধ করিল তপনকে তাহার পাশে বসিতে।

—থাক—আমি বেশ আছি—বলিয়া তপন আদেশ করিল গাড়ী চালাইতে।

—কেন ? এখানে আসবেন না ?—তপতীর কণ্ঠে অজস্র বিষয় !

—মাফ করবেন, আমি অনাখীয়া মেয়েদের পাশে বসি নে—তপনের কণ্ঠস্বর দৃঢ় ।

—অনাখীয়া ! আমি আপনার অনাখীয়া নাকি ? এই, রোখো !—তপতী কঠোর আদেশ করিল চালককে ।

রাগে তপতীর আপাদমস্তক কিম্বিষ্ণু করিয়া উঠিয়াছে । লাক দিয়া গাড়ী হইতে নামিয়া পড়িয়া সক্রোধে কহিল—, আমিও অনাখীয়া পুরুষের গাড়ীতে চড়ি না—বলিয়াই অপেক্ষামাত্র না করিয়া তপতী হোটেলের গাড়ীতে চড়িয়া প্রস্থান করিল ।

ব্যাপারটা কি ঘটিল, কেন উনি এভাবে চলিয়া গেলেন—তপন কিছুমাত্র বুঝিতে না পারিয়া বিব্রতভাবে চাহিল । কোন নারীর মুখের পানে সে পারতপক্ষে তাকায় না । ইহাকেও চাহিয়া দেখে নাই । একক কোনো মহিলা পৌঁছাইয়া দিতে বলিতেছেন, তপনের অন্তরের কাছে ইহাই যথেষ্ট আবেদন । সমস্ত ব্যাপারটা তপনের দুজ্জের্য বোধ হইতেছে ।

গাড়ীতে উঠিয়া উত্তেজনার আতিশয্যে তপতী কয়েক মুহূর্ত্ত প্রায় কোন চিন্তাই করিতে পারিল না । তাহার মনে হইতেছিল, তপন তাহাকে এত বেশী অসম্মান করিয়াছে যাহা পৃথিবীর কোন মেয়েকে কোন পুরুষ কখনও করে নাই । কিন্তু সন্ধ্যার শীতল বায়ুর স্পর্শে এবং তপনের সুন্দর মুখের মোহমদিরার যাছ-মহিমায় তপতী যেন কিছুটা কোমল হইয়া গেল । তাহার মনে পড়িল—তপতী যে এখানে আসিয়াছে ইহা তপন তো জানে না ! অনাখীয়া মনে করা তাহার পক্ষে অস্বাভাবিক নয় । কিন্তু আজ দীর্ঘ সাত মাস তপন একই বাড়ীতে তপতীর সহিত বাস করিতেছে, এতকালেও কি সে তাহাকে চেনে নাই ? নিজে তপন মুখ ফিরাইয়া থাকে, চোখে ঠুলি পরে, তথাপি তপতীর তাহাকে চিনিতে ভুল হইল না ; আর তপন তাহাকে অত কাছে দেখিয়াও চিনিলা না ! তপন নিশ্চয়ই তাহাকে ঠকাইয়াছে । এইভাবে তপতীকে অপমানিত করিয়া সে তপতীর অপমানের শোধ লইল । কিন্তু তাহার ব্যবহারে তো সেরূপ মনে হইল না !

এই মুহূর্ত্তে তপতীর মনে প্রশ্ন জাগিল, তপন তাহাকে ‘অনাখীয়া’ বলায় সে ক্ষুণ্ণ হইয়াছে কিম্বা অপমানিত বোধ করিতেছে । তপতীর পিতার অন্নদাস একটা দরিদ্র ভিক্ষুক—তপতীর আখীয়াতাকে অস্বীকার করিবার শক্তি তপন পাইবে কোথায় ? কোন্ সাহসে ? বিবাহের বন্ধনগ্রন্থী আধুনিক কালে এমন কিছুই জটিল নয়, যাহা খুলিতে তপতীর খুব বেশী আটকাইতে পারে । কিন্তু কেন তবে লোকটা তপতীকে অপমান করিল ? সে কি সত্যি তবে তপতীকে চেনে নাই ?



না চেনাই সম্ভব। এমন অস্থিরভাবে গাড়ী হইতে না নামিয়া আসিলেই ভাল হইত। বলিল যে, অনাস্থীয়া মেয়ের পাশে সে বসে না। আচ্ছা পরীক্ষা করিতে হইবে। অনাস্থীয়া মেয়ে বসিতে আস্থান করিলেও বসিবে না, এমন স্বতঃসহ পৌড়ামির মূল কোথায় তপতী তাহা দেখিয়া লইবে।

হোটেলে আসিয়াই তপতী আবদার ধরিল, কাল বৃন্দাবন যাইবে। তপতীর অল্পরোধ আদেশেরই নামান্তর। সকালে হোটেলের দুইখানা ‘কার’ লইয়া সকলে বৃন্দাবন যাত্রা করিল। সেই বৃন্দাবন, যেখানে বংশীরবে যমুনা বহিত উজান; বাধনহারা ব্রহ্মগোপিগণ ছুটিয়া আসিত কোন অন্তর প্রেমমাগরে আত্মবিসর্জন করিতে—কালো কৃষ্ণ যেখানে কালাতীত হইয়াছেন, প্রেমের আলোয়। সারাদিন, শ্রামকুঞ্জ, রাধাকুঞ্জ দর্শনে কাটিল। গৌরাঙ্গ কোনো পুরুষ দেখলেই তপতীর মনে হয়, ঐ বুঝি তপন! কিন্তু পরক্ষণেই ভুল ভাদিয়া যায়। তপনকে কোথাও দেখা যাইতেছে না। তবে কি সে আসে নাই! তপতীকে অপমান করিয়া ফিরিয়া গেল নাকি? তপতী চতুর্দিকে অন্বেষণ করে। মিঃ ব্যানার্জি এবং মিঃ সান্নালও তপনকে খুঁজিতেছেন। তাঁহাদের মনে একটা আশা জাগিতেছে, তপনকে কোনো একটা বিশী পরিস্থিতির মধ্যে দেখাইয়া দিতে পারিলেই তপতীর অন্তর হইতে তাহাকে চিরনির্বাসিত করা যাইবে। কোন একটা ব্রজাঙ্গনার সঙ্গে যদি তপনকে দেখা যায় তবে এখনই প্রমাণ হইয়া যায় যে তপন শুধু অর্থলোভীই নয়, অসচ্চরিত্রও। তপনকে না তাড়াইতে পারিলে তাহার স্বেচছা করিয়া উঠিতে পারিতেছে না।

বহুস্থান ঘুরিয়া সকলেই প্রায় ক্লান্ত হইয়া বাসায় ফিরিতেছে,—একটা স্থানে কতকগুলি লোক জটলা করিতেছে দেখিয়া তপতীর দল গাড়ী থামাইল। এক বাঙালী ভদ্রলোক একটি পাখী কিনিতে চান; তিনি কহিলেন,—‘আমি দুটাকা দেবো’। তৎক্ষণাৎ অস্ত্রদিকে যে উত্তর দিল সবিস্ময়ে চাহিয়া তপতীর দল দেখিল, সে তপন;—বলিল, ‘আমি চার টাকা দিচ্ছি’। তপনের পরিহিত পোষাক ধূলিমলিন, গায়ে এত ধূলা লাগিয়াছে যে প্রায় চেনা যায় না। সারাদিন বোদে ঘুরিয়া তাহার মুখকান্তি মলিন এবং অসুন্দর হইয়া উঠিয়াছে, তথাপি তপতীর আজ মনে হইল সারাটা দিন খোরার পরিশ্রম যেন তাহার মার্কক হইয়া উঠিয়াছে। ঐ ক্লান্ত বিষন্ন মুখটিকে তাহার অঞ্চল দিয়ামুছাইয়া দিতে ইচ্ছা করিতেছিল। তপন বলিল,—‘দাও পাখীটা’। সে চারটা টাকা দিয়া পাখীওয়ালার নিকট হইতে পাখীটা লইল। একটু বয়স্ক হইলেও ভারী সুন্দর রং পাখীটার। ধরা পড়িয়া মুক্তির জন্য পাখীটা করুণভাবে কাঁদিতেছে আর ডানা ঝাপটাইতেছে। তপতীর ইচ্ছা করিতেছিল, তপনের হাত হইতে সে এখনি উহা লইয়া আসে, কিন্তু সঙ্গীদের মধ্যে

মিঃ ব্যানার্জি ও মিঃ সাহাল ছাড়া কেহই তপনকে চেনে না। তাহারা কি ভাবিবে! তারপর ঐ নিতান্ত কদর্যা-পোষাক-পরিহিত দরিদ্রমূর্তিকে তপতী স্বামী বলিয়া পরিচয় দিতে পারিবে না। সে থামিয়া গেল।

প্রথমে যে ভল্ললোক পাখীটি কিনিতে চাহিয়াছিলেন, তিনি গুঞ্চমুখে কহিলেন,  
—অতবড় বুড়ো পাখী, পোষ মানবে না মনে হচ্ছে—

—ঠিক মানবে। এই দেখুন না—বলিয়া তপন পাখীটাকে মুক্ত আকাশে উড়াইয়া দিয়া হাসিয়া কহিল,—মুক্তির মধ্যেই প্রেমের বন্ধন দৃঢ়তর হয়।

—করলেন কি মশাই! বলিয়া একজন চীৎকার করিয়া উঠিলেন।

—ওকে ভালবাসি কিনা, তাই মুক্তি দিলাম—বলিয়াই তপন চলিয়া গেল।

চোখের জল লুকাইবার জন্য তপতী তখন ঘাড় হেঁট করিয়া বসিয়াছে।  
মিঃ ব্যানার্জি কহিলেন,—আমাদের দেখে কি-রকম অভিনয়টা করলো।

জলভরা চোখে তপতীর রোষবহির্গজিয়া উঠিল,—থামুন! যথায়োগ্য স্থানে যথাযোগ্য কথার ব্যবহারের যোগ্যতা পৃথিবীতে কম অভিনেতারই থাকে! ও যদি অভিনেতা হয় তো, আমি নিশ্চয়ই বলতে পারি—ও পৃথিবীর শ্রেষ্ঠ অভিনেতা।

গাড়ীস্থ সকলেই একমুহূর্তে স্তব্ধ হইয়া গেল তপতীর কথা শুনিয়া।

তপতীর সারা অন্তরখানি শিথিল প্রশান্তিতে ছাইয়া গেছে। গাড়ীতে সারা পথ সে বিশেষ কিছু কথা বলে নাই, সর্বক্ষণ তপনের কথা ভাবিয়াছে আর বিস্মিত হইয়াছে। যে মানব অর্থ বাঁচাইবার জন্য খার্ড-ক্লাসে দূর পথের যাত্রী হয়, মুটে খরচের ভয়ে স্বয়ং বাস্ত-বিছানা বহন করে; পোষাকের কদর্যাতায় পর্যন্ত যাহার রূপণতা পরিষ্কৃত—সেই কিনা দুই টাকার পাখী চার টাকা দিয়া কিনিয়া আকাশে উড়াইয়া দেয়, আবার বলে ‘ওকে ভালবাসি, তাই উড়াইয়া দিলাম’। ইহা অপেক্ষা মানবতার প্রকৃষ্টতম পরিচয় আর কি হইতে পারে? মিঃ ব্যানার্জি বলেন, উহা তপনের অভিনয়। হউক উহা অভিনয়, তথাপি আজ প্রেমের শ্রেষ্ঠতম তীর্থ স্মৃদ্ধাবনে প্রেমের যে নবীনতম বাণী তপনের মুখে শুনিয়াছে, তাহা তপতীর জীবনকে পরিপূর্ণ করিয়া দিতে পারিবে। আর অভিনয়ইবা হইবে কেন? তপন তো জানিত না তাহারা ওখানে দাঁড়াইয়া আছে। তপতী স্থির করিল, তপনকে লইয়া সে একবার অভিনয় করিবে। প্রেমের অভিনয়।

পরদিন বিকালে হাওড়ায় গাড়ী থামিলে তপতী নিজের গাড়ীতে চড়িয়া বাড়ী ফিরিল। মা তাহাকে দেখিয়া প্রশ্ন করিলেন,—তপন নামেনি থুকা? ওরও তো নামবার কথা এই ট্রেনে।

—নেমেছে, আমি দেখা না করে চলে এসেছি। ও আসছে ঘোড়ার গাড়ীতে আমার যাওয়ার কথা ওকে বলোনা মা—তুমি বরং ওকে জিজ্ঞাসা করো খার্ড-ক্লাসে

কেন ও যায় ?

তপতী স্নান করিতে চলিয়া গেল। স্নানাদি শেষে সে আবার আসিয়া বসিল এমন স্থানে যেখান হইতে মার সহিত তপনের কথা শুনা যাইতে পারে।

তপন ফিরিয়া আসিল একটা ফিটনে। ‘মা’ বলিয়া ডাকিতেই মা ছুটিয়া বাহির হইয়া আসিলেন। তপনের মূর্তি দেখিয়া দুঃখে তাঁহার অন্তর ফাটিয়া যাইতেছে। আত্মসংবরণ করিয়া বলিলেন,—কী চেহারাই করেছে বাবা! মাথায় এত ধুলো যে ধান চাষ করা চলে—

স্মৃষ্টি হাসিতে ঘরখানা পূর্ণ হইয়া গেল। তপনের হাসির আওয়াজ যে এত মিষ্টি তপতী তাহা কোনদিন জানে না। তপন কহিল,—মাথাটা তাহলে ধান চাষের যোগ্য হয়েছে মা! ধানের জমি সব থেকে দামী।

মা আরো ব্যথিত হইয়া কহিলেন,—রাখো বাবা, তোমার হাসি দেখে আমার রাগ বাড়ছে। খার্ড-ক্লাসে কেন তুমি যাবে, বলো তো?

কোটটা খুলিয়া কামিজের বোতাম খুলিতে খুলিতে তপন জবাব দিল,—কেন মা খার্ড-ক্লাসে তো মানুষই যায়—গরু-ছাগল তো যায় না!

মা এবার হাসিয়া ফেলিলেন; বলিলেন,—কিন্তু ফার্স্ট-ক্লাসেও যায় মানুষ—

—সে বড়মানুষ। আপনার ছেলে তো বড়মানুষ নয়, মা! গরীব ছেলে আপনার—

—না বাবা, না। ওরকম করো না তুমি। মা’র মনে দুঃখ দিতে নাই, জান তো?

—দুঃখ কেন পাবেন, মা? আপনার সক্ষম ছেলে যে-কোনো অবস্থায় নিজেই চালিয়ে নিতে পারে—এ তো আপনার স্বথেরই কারণ হওয়া উচিত?

কিন্তু আমাদের ক্ষমতা যখন আছে, বাবা—তখন ফার্স্ট-ক্লাসেই—

বাধা দিয়া তপন বলিল,—ক্ষমতার সংঘত ব্যবহারটাই মানুষের শিক্ষণীয় বিষয় মা; এতেই তার মহিমা বাড়ে! মানুষের অক্ষমতাকে ভেংচিয়ে ক্ষমতার জাহির নাই-বা করলাম?

তপন স্নানাগারে ঢুকিল। মা তপনের কথা কয়টি আপনার মনে পুনরাবৃত্তি করিয়া বাহিরে আসিলেন। তপতী বিশ্বল দৃষ্টিতে মাঠের পানে তাকাইয়া আছে। সম্মুখে মা ডাকিলেন,—আয় খুকী, খেয়ে নে কিছু।

—আমছি—বলিয়া তপতী আপনার ঘরে চলিয়া গেল। তপনের কথা বলার আশ্চর্য ভঙ্গিটি আজ তপতীকে যেন ভাঙিয়া গড়িতেছে। এই স্কুমার-দর্শন যুবকটি মূর্খ, উহাকে তপতী উৎপীড়িত করিয়াছে, অপমানিত করিয়াছে,—অতিষ্ঠ করিয়াছে,—তথাপি সে যায় নাই। কিন্তু কেন যায় নাই, সে-কথা ভাবিতে

গিয়াই তপতী আর একবার শিহরিয়া উঠিল। মতাই কি তপন অর্থলোভী? মতাই কি সে তপতীর জ্ঞাত এত অত্যাচার সহ্য করে নাই, তুচ্ছ অর্থের জ্ঞানই করিয়াছে? ভাবিতে ভাবিতে তপতীর অন্তর বাথায় টনটন করিয়া উঠিল। হে ঈশ্বর! যদি তপতী কখনও তোমায় ডাকিয়া থাকে, তবে বলিয়া দাও তপতীর জ্ঞানই তপন এত অপমান নীরবে সহ্য করিয়াছে। এইটাই যেন মতা হয় তপতী তাহার জীবনে আর কিছুই তোমার নিকট চাহিবে না।

মায়ের দ্বিতীয় ডাকে ক্লান্ত তপতী যখন থাইতে আসিল, তখনও তাহার চোখের পাতা ভিজিয়া রহিয়াছে। মা ব্যাকুল হইয়া বলিলেন,—কি হল রে, মা! কাঁদছিল?

অনেক তীর্থ ঘুরে এলাম মা, ঠাকুরদার সঙ্গে সেই গিয়েছিলাম। আজ তিনি নাই—বলিতে বলিতে তপতী অজস্র ধারায় কাঁদিয়া ভাসাইয়া দিল। বি. এ. পড়া শিক্ষিত মেয়ের একরূপ অসাধারণ দুর্বলতা দেখিয়া মা বিস্মিত হইলেন, কিন্তু আনন্দিত হইলেন ততোধিক। তপতী আবার তাঁহার পূর্বের তপতীর মতোই হইয়া উঠিতেছে? চোখের জলে মাহুষের মনের ময়লা ধুইয়া যায়—তপতী আবার হৃন্দর হইয়া উঠুক, তাহার তপতী নাম সার্থক হোক।

মায়ের কল্যাণাশীষের স্পর্শে তপতীর অন্তর সেদিন জুড়াইয়া গেল।

পরদিন সকালেই তপতী আয়োজন করিল বন্ধুদিগকে ভোজ দিবার। বি. এ. পরীক্ষায় সে পাশ করিয়াছে, সঙ্গীত-প্রতিযোগিতায় পুরস্কার পাইয়াছে, এবং নবোপরি যাহা সে লাভ করিয়াছে—তাহা তপনের সঠিক পরিচয়। এমন দিনে সে থাওয়াইবে না তো কবে থাওয়াইবে? তপতী টেলিফোনে সকলকে নিমন্ত্রণ করিল এবং মাকে বলিল,—ওকে বলে দিয়ো মা, সুবার সঙ্গে বসে যেন আজ থায়—

মা হাসিয়া কহিলেন,—নিজে বলতে পারিস্ নে খুকী? কি লাজুক মেয়ে তুই!

—না মা, ও ছুতো করে এড়িয়ে যায়—জানো তো, কি বকম ছুটু!

তপতী চলিয়া গেল। মার কাছে তপনের সম্বন্ধে ছুটুগির আরোপ তাহাকে লজ্জিতই করিয়াছে। তাহার নারী-হৃদয় ঐ কথাটুকু বলিয়াই যে এত ভগ্নিলাভ করিতে পারে, তপতী তাহা কখনও ভাবে নাই। হউক লজ্জা, তথাপি তপতীর আনন্দ যেন মাত্রা ছাড়াইয়া গেল।

নির্দিষ্ট সময়ে সকলেই আসিল—আসিল না শুধু তপন। তপতীর প্রশ্নের উত্তরে

মা বলিলেন,—সাড়ে পাঁচটার আগে সে তো ফেরে না—ঠিক সময়েই ফিরবে।

নিরুপায় তপতী অত্যাঁচ সকলকে খাইতে দিল। সাড়ে পাঁচটায় তপন আসিতেই মা তাহাকে সকলের সঙ্গে বসাইয়া দিলেন। তপতী স্বহস্তে পরিবেশন করিল চপ-কাটলেট ইত্যাদি।

নিরুপায়ভাবে কিছুক্ষণ খাতগুলির দিকে চাহিয়া থাকিয়া তপন কহিল মাংস খেতে আমি ভালবাসিনে—আমায় একটু রুটি-মাখন দিলে ভাল হয়—

মা বলিলেন,—একটু খাও বাবা, রুটি মাখন আজ নাই-বা খেলে? তুমি তো বৌদ্ধ নও যে অহিংস হচ্ছ।

তপন হাসিয়া বলিল,—মাংস না খেলেই অহিংস হয় না, মাংস তো খাচ্ছই। ও খাওয়ায় হিংসাও হয় না। তবে আমার প্রয়োজনাভাব।

মিঃ ব্যানার্জী তপনকে আক্রমণের জন্তে যেন ওং পাতিয়া ছিলেন, কহিলেন,—চপ-কাটলেট-ডিম খাওয়া কাঁটা-চমাচেতে খাওয়া আধুনিক সভ্যতার অঙ্গ একটা—তপন চুপ করিয়া রহিল। উত্তর না পাইলে মিঃ ব্যানার্জী অপমান বোধ করিবেন ভাবিয়া মা বলিলেন,—ওর কথাটির জবাব দাও তো বাবা!

হাসিয়া তপন বলিল,—‘সভ্যতা’ কথাটা আপেক্ষিক, মা। বিলাতের লোক আমাদের অসভ্য বলে, আমরা আবার আমাদের থেকে অসভ্য বাছাই করে নিজের সভ্যতা প্রমাণ করতে চাই। দেশ আর পাত্র এবং রুচি ভেদে ওর পরিবর্তন হয়।

তপতী এতক্ষণ পরে হঠাৎ বলিয়া ফেলিল, মানুষকে যুগোপযোগী হতে হবে—

তপন নির্লিপ্তের মত বলিল—এটাও আপেক্ষিক শব্দ। আমার সমাজে এই যুগেই আমি বেশ উপযোগী আছি, আবার সাঁওতালরা তাদের সমাজে এই বিংশ-শতাব্দীতেই বেশ উপযোগী রয়েছে।

কিন্তু আপনি তো এসে পড়েছেন আমাদের সমাজে? মিঃ অধিকারী ব্যঙ্গের স্বরে কহিলেন।

—আপনাদের সঙ্গে আমার পরিচয় আজই প্রথম, এর মধ্যে আপনাদের সমাজে এসে পড়লুম কেমন করে, বুঝলুম না তো?—তপন প্রশ্নসূচক ভঙ্গীতে চাহিল।

তপতীকে বিয়ে করে!—যেবা উত্তর দিল হাসির মাধুর্য্য দিয়া।

তপন কয়েক সেকেন্ড নীরব থাকিয়া কহিল,—আমার ধারণা ছিল—বিয়ে করে মানুষ তার নিজের সমাজেই জীকে নিয়ে যায়। আপনাদের বুঝি উল্টা হয় জানতুম না তো!

এই তীক্ষ্ণ ব্যঙ্গোক্তি তপতীকে স্পর্শ করিল গভীরভাবে। জেলিমাথা রুটিটা তপনের দিকে আগাইয়া দিতে দিতে সে কহিল,—সব জী যদি সে সমাজে না

মিশতে পারে ? না সইতে পারে সে সমাজকে ?

তপন নিঃশব্দে কাপের চা-টুকু পান করিয়া উঠিতে উঠিতে বলিল,—সে তাকে জ্বী নয়, সহধর্মিণী নয়—সে শুধু বিলাস সঙ্গিনী। সব স্বামীরও তাকে সহবার ক্ষমতা না থাকতে পারে।

তপন চলিয়া গেল সকলকে নমস্কার জানাইয়া। চির অসহিষ্ণু তপতী শাস্ত-শিক্ষা উদ্যোগে চাহিয়া রহিল তপনের গমন পথের পানে—দৃষ্টিতে তাহার কোন সন্দেহ অতীত যুগের উজ্জলতা ছড়ানো।

অতিথিদের সকলেই চলিয়া যাইবার পরেও রহিল রেবা, মিঃ ব্যানার্জী, মিঃ অধিকারী, মিঃ সান্যাল। তপতী উঠি উঠি করিতেছে, ভক্ততার খাতিরে পারিতেছে না। মিঃ ব্যানার্জী এবং অন্নায়া যাহারা এতদিন তপনকে পাড়ারগেয়ে গও-মূর্খ বর্বর ভাবিয়া আত্মপ্রসাদ লাভ করিতেছিল, তাহারা আজ নিঃসংশয়ে বুঝিল, তপন মূর্খ তো নহেই, উপরন্তু উহার কথা বলার কায়দা অসাধারণ। উহার বেশ বুঝিল—তপতী মুগ্ধ হইয়া গিয়াছে। ‘কর্ণের’ শেষ অস্ত্র ত্যাগের মত মিঃ ব্যানার্জী বলিয়া উঠিল,—পাঁচালি ছড়া পড়লেও অনেক কিছু শেখা যায়, দেখছি !

মিঃ অধিকারী তাহাকে সমর্থন করিয়া বলিল,—গোঁড়ামি দিয়েও আধুনিকদের বশ করা যায় দেখা যাচ্ছে !

রেবা এতক্ষণ চুপ করিয়াই ছিল—হৃষ্যোগ বুঝিয়া খিল খিল করিয়া হাসিতে হাসিতে বলিল,—বশ কাকে হতে দেখলেন আপনারা ? কথাটার নূতনত্ব আমাদিগকে একটু চমকে দিয়েছে মাত্র। ভেবে দেখতে গেলে, তপনবাবু সেই প্রাচীন কুসংস্কারের জগদল পাথরটাই তপতীর ঘাড়ে বসাতে চান, বোঝা যাচ্ছে। অর্থাৎ উনি চান, তপতী তার সমাজ-সংস্কার, শিক্ষা-দীক্ষা সব বিসর্জন দিয়ে ওর সঙ্গে সেই ধোমটা-টানা বোঁ হয়ে থাকুক। যত অনাশুষ্টি কাণ্ড লোকটার

মিঃ সান্যাল কহিল,—নিশ্চয়ই তাই, নইলে ঐ সহধর্মিণী হওয়ার কথাটা তুলবে কেন ? সহধর্মিণীর যুগ আর নেই বাপু সখীত্বের যুগ চলছে—

উহার যাইবার জন্ত উঠিয়া দাঁড়াইল। তপতী কোন কথাই বলিল না, যদিও রেবার কথাগুলি তাহার বুকে গভীর আলোড়ন তুলিয়াছে। সকলে চলিয়া যাওয়ার পরেও তপতী বসিয়া বসিয়া ভাবিতে লাগিল—সমাজ-সংস্কার ছাড়িলে তো তাহার চলিবে না, তপনকে লইয়া কি সে বনে গিয়া বাস করিবে ? তপন যদি আমাদের সমাজে না মিশতে পারে তবে তো তপতীর পক্ষে ভয়ঙ্কর বিপদের কথা। তপতী প্ল্যান আঁটিয়া রাখিল আগামী পরশ তাহার সহপাঠিনী টুকুর বিবাহে তপনকে সঙ্গে লইয়া সে বরাহনগর যাইবে। তপনকে তাহাদের সমাজের যোগ্য করিয়া লইতেই হইবে, নতুবা তপতীর উপায় নাই।

নির্দিষ্ট দিনে ছুপুর বেলা তপন খাইতে আসিতেই মা বলিলেন,—আজ খুকীর এক বন্ধুর বিয়ে, বাবা, ওর সঙ্গে তোমায় যেতে হবে সন্ধ্যাবেলা, বুঝলে ?

তপন ভাতের গ্রাসটা গিলিয়া কহিল,—আমি নাই-বা গোলাম মা ! আমার যে অল্পত্ব কাজ রয়েছে । আগে বললে সময় করে রাখতাম আমি ।

—সে কাজ পরে করো, বাবা । মা স্নেহে আদেশ করিলেন—

—তা হয় না, মা আমি কথা দিয়েছি—আমার কথা আমি রাখবোই । একটা উপহার আমি এনে দেবো, আপনার খুকীর সেটা নিয়ে গেলেই হবে । আমার না যাওয়ার ক্ষতি হবে না ।

তপতী আড়ালেই ছিল ।—তপন যাওয়াটা এড়াইয়া যাইতেছে দেখিয়া সন্মুখে আসিয়া বলিল,—‘যেতে ভয় করে’ বললেই সত্যি বলা হয় । না-যাবার হেতু ?

তপনের খাওয়া হইয়া গিয়াছিল, তপতীর কথাটার জবাবমাত্র না দিয়া সে আঁচাইবার জন্য বাহিরে চলিয়া গেল । রুদ্ধ অপমানে তপতীর সর্বাঙ্গ কণ্টকিত হইয়া গেল । একে তো আজ যাচিয়া তপনের সহিত যাইতে চাহিয়াছে,—তার উপর মাকে দিয়া সে-ই অহরোধ করাইয়াছে, আবার নিজেকে আসিয়া প্রস্তাব করিল, আর ঐ ইতর কিনা ভদ্রভাবে একটা জবাব পর্যাণ্ত দিল না ! তপতীর প্রশ্নটাও যে ভদ্রজনোচিত হয় নাই, ইহা তাহার উষ্ণ মস্তিষ্কে প্রবেশ করিল না । তপনের পিছনে গিয়া সে আদেশের স্বরে কহিল,—যেতেই হবে বুঝেছেন ?

মুখ ধুইয়া মশলা কয়টা মুখে ফেলিবার পূর্বে তপন অতি ধীর শাস্তকণ্ঠে উত্তর দিল,—যেতে পারবো না—মাফ চাইছি—

উত্তর দিয়াই তপন চলিয়া গিয়াছে, তপতী যখন বুঝিল, তখন যুগপৎ ক্রোধ এবং অপমান তাহাকে দগ্ধ করিয়া দিতেছে ।

সন্ধ্যার পূর্বেই তপন একটি ভেলভেটের কেসে একটি মূল্যবান ব্রোচ কিনিয়া মার হাতে দিয়া বলিল,—এইটা নিয়ে গেলেই আমার না যাওয়ার অসৌজন্য হবে না, মা । মুখ্য-স্থখ্য মানুষ, আমার না যাওয়াই ভালো ।

—হ্যাঁ, ভালোই—তপতীও তাহা সমর্থন করিল এবং তপনের বদলে তাহার প্রদত্ত উপহারটা লইয়া বিবাহবাড়ী চলিয়া গেল । সেখানে বহু লোকের উপহৃত সন্ধ্যার মধ্যে তপনের দেওয়া ব্রোচটা তুলিয়া দেখা গেল লেখা আছে : ‘আপনাদের জীবন বসন্তের বনফুলের মত বিকশিত হোক, বর্ষার জলোচ্ছ্বাসের মতো পরিপূর্ণ হোক—শরতের শস্যের মতো সুন্দর আর সার্থক হোক ।....’

তপনের আশীর্বাদী । যিনি পড়িলেন, তিনি পণ্ডিত ব্যক্তি । কহিলেন—বেশ আশীর্বাদটি, বৎসরের শ্রেষ্ঠ তিনটি ঋতুর আশিস যেন ঐ কথা ক’টিতে ভরে

দিয়েছে! চমৎকার লাগলো।

তপনের না-আসার জন্ম অনেকেই ক্ষুণ্ণ হওয়া সত্ত্বেও তাহার আশীর্বাদের প্রশংসা করিল সকলেই। দু'চারজন কিন্তু বলিতে ছাড়িল না—‘জামাই মূর্থ’, তাই তপতী সঙ্গে আনে না। ও আশিস কাউকে দিয়ে লিখিয়ে নিয়েছে।’

কথাটা তপতী শুনিল; লজ্জায় সে রাঙা হইয়া উঠিতেছে, কিন্তু বলিবার মতো কথা আজ তার জুটিতেছে না। যত শীঘ্র সম্ভব সে পলাইয়া আসিল।

সমস্ত রাত্রি তপতীর ভালো নিদ্রা হইল না। গত সন্ধ্যায় বিবাহ বাড়ীতে সে রীতিমতো অপমানিত হইয়াছে। তপন কেন তাহার সঙ্গে গেল না? ভালো ইংরাজি জানে না সে, নাই বা জানিল। তপতী সামলাইয়া লইত। মাছ-মাংস খায় না বলিলেই কাঁটা-চামচের হাঙ্গামা ঘটিল না। তপনের না যাইবার কী কারণ থাকিতে পারে? কোনদিনই সে কোথাও যায় নাই—অবশ্য তপতীও ডাকে নাই। কিন্তু ডাকিলেও যাইবে না, এমন কি গুরুতর কাজ তাহার থাকিতে পারে? বিত্তা তো অতি সামান্য। সারা দিন-রাত্রি কী এতো তাহার কাজ? না যাইবার অছিলায় সে এভাবে ঘুরিয়া বেড়ায়—কাহারও সহিত দেখা করিতে চাহে না। তপতী আজ নিঃসংশয়ে বুঝিল—কতকগুলি পাকাপাকা কথা তপন বলিতে পারে, ভদ্রতা বা অভদ্রতা, অপমান বা সম্মান সম্বন্ধে তার কোন ধারণা নেই। তাহাকে এই বাড়ীতে থাকিতে হইতেছে তাহার উদ্দেশ্য সিদ্ধির জন্মই। সে বুঝিয়াছে তপতীকে সে পাইবে না, এখন টাকাই তাহার লক্ষ্য। কিন্তু কাল তো তপতী তাহাকে আত্মদান করিতে প্রস্তুতই ছিল, তথাপি তপন কেন গেল না? তপতীর আন্তরিকতার অভাব সে কোথায় দেখিল?

ভোরে উঠিয়াই তপতী স্নান করিয়া এলোচুল ছড়াইয়া বসিল খাইবার ধরে। তাহার অঙ্গের স্নিগ্ধ হ্রস্ব ঘরের বাতাসকে মন্থর করিয়া তুলিয়াছে। পূজা করিয়া তপন চা খাইতে আসিল। মা দুজনকে খাবার দিয়া বসিয়া আছেন। তপতী যেন আপন মনেই বলিল,—আজ বিকেলে আমি সিনেমায় যাবো, নিয়ে যেতে হবে আমায়।

মা হাসিয়া কহিলেন,—শুনেছো বাবা, ওকে আজ যেন নিয়ে যোগে—

তপন যদুস্বরে কহিল, আজ থাক, মা, আমার ছোট বোনটিকে আজ একটু দেখতে যাব—যদি বলেন তো কাল সিনেমায় যেতে পারি।

রাগে তপতীর সর্কাস কীপিতেছিল। তাহার অসংযত মন বিদ্রোহের স্বরে ঝঙ্কার দিয়া উঠিল,—থাক, কাল আর যেতে হবে না! বোনকে নিয়েই থাকুন গে! বোনের বাড়ী থাকলেই পারতেন!



মা ধমক দিয়া উঠলেন,—কী সব বলছিস, খুকী ? চুপ কর ।

—থামো তুমি, মা—কাজিন-এর উপর অত দরদের অর্থ তুমি বুঝবে না ।  
তুমি থামো ।

তপন চায়ের কাপটা চুমুক দিতে যাইতেছিল—নামাইয়া রাখিয়া উঠিয়া  
দাঁড়াইল । মা, ব্যস্ত হইয়া কহিলেন, উঠলে যে বাবা, খাও, বসো !

তপন বাহিরে যাইতে যাইতে শুধু বলিল,—আপনার খুকীকে বলে দেবেন মা,  
আমি আধুনিক যুগের তরুণ নই—আমার বোন ‘বোন’ই !—তপন সিঁড়ি  
দিয়া নীচে নামিবার পথ ধরিল । মা বিপন্না বোধ করিয়া কি করিবেন ভাবিয়া  
পাইতেছেন না ।

তপতী ঋথিয়া নীচে নামিতে নামিতে পিছন হইতে তপনকে বলিল,—যান  
চলে যান, আসবেন না আর ।

তপন ফিরিয়া দাঁড়াইয়া বলিল,—আমি চলে যাই এই কি চান আপনি ?

—হ্যাঁ, চাই—চাই—চাই, আজই চলে যান, এক্ষুণি চলে যান ।

তপনের দুই চোখে সীমাহারা বেদনা ঘনাইয়া উঠিল, নির্বাক স্তব্ধভাবে  
দাঁড়াইয়া আছে । ব্যঙ্গ করিয়া তপতী বলিল,—হুঁলাখ তো নিয়েছেন, আরো  
কিছু যদি পারেন তো দেখছেন—কেমন ?

বিস্মিত তপনের কথা ফুটিল ; কহিল,—শ্রামশ্রমের চাটুজোর নাতনী সামান্ত  
হুঁলাখ টাকার সন্ধানও রাখেন দেখছি ?

ক্রোধে আত্মহারা তপতীর আভিজাত্যে আঘাত লাগিল । সক্রোধে সে জবাব  
দিল—শ্রামশ্রমের নাতনীর বাবাকে কোনো জোচ্ছোর ঠকিয়ে হুঁলাখ টাকা নিয়ে  
যাবে, এ সে সহিবে না মনে রাখবেন । যাবার আগে টাকাটার হিসেব দিয়ে  
যাবেন যেন ।

উত্তরের অপেক্ষা না রাখিয়া তপতী চলিয়া আসিল । মা ভাবিয়াছিলেন তপতী  
তপনকে ডাকিতে যাইতেছে, কিন্তু তাহাকে একা ফিরিতে দেখিয়া ব্যগ্র ব্যাকুল  
ভাবে প্রশ্ন করিলেন,—তপন কই খুকী ?

—‘জানিনে—চুলোয় গ্যাছে ।’ বলিয়া তপতী আপন ঘরে চলিয়া গেল ।

বিপন্না মাতা উহাদের কলহের কারণ খুঁজিয়া পাইতেছেন না । খুকীর ঘরে  
আসিয়া তিনি পুনরায় প্রশ্ন করিলেন,—কি বলে গেলো রে, না খেয়েই গেল যে !

তপতীর রাগ তখনও পড়ে নাই, তথাপি সংযত কণ্ঠেই উত্তর দিল,—আসবে  
এক্সুণি—ভাবছো কেন তুমি ।

—কি সব বলিস বাপু, তুই—রাগের মাথায় ওরকম বিশ্রী কথা কেন তুই  
বলিস খুকী ?

তপতী এবার আর রাগ দমন করিতে না পারিয়া কহিল,—বেশ করেছি বলেছি! কী এমন বললাম যে, না খেয়ে গেলেন—ভারী তো....!

মা ভাবিলেন দম্পতীর কলহ, চিরশান্ত তপন নিশ্চয়ই রাগ করিয়া যায় নাই। কিন্তু ভয় তাঁহার জাগিয়াই রহিল মনের মধ্যে।

বেলা প্রায় বারোটোর সময় টেলিফোনের ঘণ্টা বাজিয়া উঠিতেই উৎকণ্ঠিত তপতী ছুটিয়া গিয়া ফোন ধরিল। মা-ও তখন আসিয়া পাশে দাঁড়াইলেন। তপতী শুনিল পুরুষকণ্ঠে কে বলিতেছেন—তপনবাবু আজ বাড়ী ফিরবেন না, কাল সকালে ফিরবেন।

—‘কেন? কোথায় থাকবেন?’ তপতী প্রশ্ন করিল।

কিন্তু উত্তরদাতা কোন ছাড়িয়া দিয়াছে।

মা ব্যাকুলকণ্ঠে কহিলেন,—কে ফোন করছে রে? তপন?

—হ্যাঁ, আজ আসবে না, বোনের বাড়ী থাকবে বলিয়া তপতী চলিয়া যাইতেছিল, পুনরায় ফিরিয়া কহিল,—রাগ করেনি মা, কাল ঠিক আসবে আমায় বললে; ভেবো না তুমি।

মা নিশ্চিন্ত হইলেন কিনা বোঝা গেল না, কিন্তু তপতী ধরা পড়িবার ভয়ে পলায়ন করিয়া ভাবিতে লাগিল—কোথায় আর যাইবে, যাইবার জায়গা তো ঐ ফুটপাথ, আর তপতীরই বাপের দুই লক্ষ টাকা—টাকার হিসাব দিতে হইলেই চক্ষু চড়কগাছ হইয়া যাইবে। ও ভাবিয়াছে, ‘যাইবে’ বলিলেই তপতী ভয়ে কাঁদিয়া পড়িবে পায়ে! তপতীর অদৃষ্টে তাহা কখনও লেখে নাই, কিছুতেই না। তপতীর হাসি পাইল! তাহার পিতামহের গোঁড়ামী কম ছিল না, কিন্তু তাহার পিছনে ছিল যুক্তি—তিনি ছিলেন অসাধারণ পণ্ডিত! আর তপন কতকগুলি বাছা বাছা বুলি কপচাইয়া ভাবিয়াছে তপতীর অন্তর জিনিয়া লইল! অত সহজ নয়—তাহা হইলে আর ভাবনা ছিল না।

বিকালে বস্ত্রাদি পরিবর্তন করিয়া তপতী মিঃ ব্যানার্জী ও মিঃ সাহায়েবের সহিত বেড়াইতে বাহির হইল যথারীতি।

পরদিন সকালেই তপন ফিরিয়া আসিল ক্লান্ত বিষণ্ণ মুখশ্রী লইয়া।

তপতীর সহিত তাহার কি কথা হইয়াছিল, মা কিছুই জানিতেন না; তিনি তপনকে স্বাগত সম্ভাষণে সম্মেহে বলিলেন,—শরীর ভালো তো বাবা! বড্ড শুকুনো দেখাচ্ছে?

হ্যাঁ, মা, শরীর ভালোই আছে—খেতে দিন কিছু—বলিয়া তপন খাইতে বসিল।

তপতী আপন ঘরে বসিয়া দেখিল, তপন ফিরিয়াছে এবং নির্লজ্জের মতো খাইতেছে। অদ্ভুত এই লোকটা। এতবড় অপমান করার পরেও সে নির্বিকার।

কোন মহান উদ্দেশ্য সাধনের জন্ত সে এইরূপ অপমান সহিতেছে, তপতীর আর তাহা অজানা নাই। ভালো, উহার ভগ্নমীর শেষ কোথায় দেখা যাক।

দিন দুই তপনের আর কোন খোঁজ না-লইবার ভান করিল তপতী। সে দেখিতে চাহিতেছে, তপনের দিক হইতে কোনো আবেদন আসে কিনা। কিন্তু তপন পূর্বের মতোই নির্বিকার; আসে, যায়, চলিয় যায়! তৃতীয় দিনে তপতী ভীষণ উত্তপ্ত হইয়া উঠিল। এমন করিয়া সে আর পারে না! তপন আসে, যায়, মার সহিত পূর্বের ন্যায় দুই-একটা কথা যাহা কহিত তাহাও বন্ধ করিয়া দিয়াছে। দুইদিন তপতী স্বেযোগ খুঁজিয়া ফিরিয়াছে, সুবিধা হয় নাই। তপন যেন আপনাকে একেবারে অবলুপ্ত করিয়া দিয়াছে—অথচ নির্লজ্জের মতো থাওয়া আর থাকাটা তো তেমনই রহিল। এতই যদি উহার সম্মান-জ্ঞান, তবে চলিয়া গেল না কেন? তপতী নিশ্চয় জানে যে-কোন লোক নিতান্ত অপদার্থও, এই অপমানের পর চলিয়া যাইত। তপনের না-যাওয়ার কারণটা এতদিনে বেশ ধরা পড়িয়া গিয়াছে। তপতী সেদিন আগুনের খেলা খেলিয়া বসিল।

মিঃ ব্যানার্জীকে লইয়া সিঁড়ির পাশের ঘরে একটা সোফায় তপতী বসিয়া বেহালা বাজাইতেছে—তপন এখনি আসিবে, তাহাকে দেখানো দরকার যে, তপনের থাকা-না থাকায় বা রাগ-অভিमानে তপতীর কিছুই আসে যায় না।

টিক সাড়ে পাঁচটায় তপন প্রবেশ করিল। মিঃ ব্যানার্জী কহিলেন,—ভালো আছেন? টিকি-ই দেখা যায় না যে!

—টিকি নেই, ধন্যবাদ—বলিয়াই তপন পাশ কাটাইয়া চলিয়া যাইতেছিল, তপতী বেহালার ছড়িটা দিয়া তপনকে খোঁচাইয়া কহিল,—ভদ্রভাবে জবাব দিতে পার না উল্লুক!

—আঃ করেন কি মিস চ্যাটার্জি!—বলিয়া মিঃ ব্যানার্জী তাহার হাতটা ধরিলেন।

তপন চোখের কোণে দৃষ্টিপাতও করিল না, ধীরে ধীরে সিঁড়ি বাহিয়া উপরে উঠিতেছে—শুনিতে পাইল তপতী বলিতেছে,—ওকে লাথি মারলে যাবে না, জুতো মারলেও যাবে না—সত্যি কি না ঘেরে দেখুন।

তপনের হৃৎপিণ্ড কে যেন একসঙ্গে লক্ষ লক্ষ ছল ছুটাইয়া দিয়াছে। ধীরে ধীরে সিঁড়ির কয়েকটা ধাপ নামিয়া আসিয়া তপন পূর্ণদৃষ্টিতে তপতীর মুখের দিকে চাহিয়া প্রশ্ন করিল—আপনি কি আমার কাছে মুক্তিই চাইছেন?

তপতী নিজের মাথাটা মিঃ ব্যানার্জীর কাঁধে রাখিয়া মুগ্ধহাস্তে বলিল,—চাইছি

দাও তো ? দেখি তোমার কত ঐদার্য্য !

সত্যি চাইছেন ?—তপন পুনরায় প্রশ্ন করিল ।

মিঃ ব্যানার্জির একথানা হাত নিজের মস্তললাটে ঘষিতে ঘষিতে তপতী  
বঙ্কর দিয়া কহিল,—হাঁ—হাঁ—হাঁ, চাইছি ! দাও আমায় মুক্তি । পারবে দিতে ?

—দিলাম । আজ থেকে আপনি মুক্ত, আপনি স্বতন্ত্র, আপনি স্বাধীন—

তপন মিঃ ডি বাহিয়া উপরে উঠিয়া গেল ।—তপতীর তৎক্ষণাৎ মনে পড়িল—  
ঐ অজুত লোক, যে দুই টাকার পাখী চার টাকায় কিনিয়া আকাশে উড়াইয়া দেয়,  
তাহাকে বিবাহ-বন্ধন হইতে মুক্তি দিয়া গেল ! তপতীর সহিত তাহার আর  
কোনো সম্বন্ধ রহিল না । না—না—না, তাহা কি হইতে পারে ? তপতীকে সে  
বিবাহ করিয়াছে । এত সহজে মুক্তিতে সম্ভব নয় । ওটা একটা কথার কথা ।  
ও তো এখনি আবার বাইরে যাইবে, তখন জিজ্ঞাসা করিবে তপতী ‘দুই লক্ষের  
উপর আরো কত টাকা সে গুছাইয়াছে’ ।

মিঃ ব্যানার্জি কহিলেন,—লোকটার ধাধা দেবার শক্তি আসাধারণ !

তপতী এতক্ষণে আবিষ্কার করিল, সে এখনও মিঃ ব্যানার্জির কোলে পড়িয়া  
আছে । এখনি কেহ দেখিয়া ফেলিবে তাড়াতাড়ি উঠিয়া বাজনাটা লইয়া বসিল ।

অনেকক্ষণ অতীত হইল, তপন নামিতেছে না কেন ? আজ আর বাহিরে  
যাইবে না নাকি ? আগ্রহান্বিতা তপতী একটি ছুতা করিয়া উপরে গিয়া দাঁড়াইল  
তপনের রুদ্ধদ্বার কক্ষের জানালা-পার্শ্বে । দেখিল পরম বিশ্বস্তের সহিত, তপন,—  
ভণ্ড, অর্থলোভী তপন উপুড় হইয়া ফুলিয়া ফুলিয়া কাদিতেছে তাহার পূজার  
বেদীমূলে । উহার হইল কি ? ও কি এমন ভাবেই কাদিয়াই তপতীকে হার  
মানাইবে ? এখনি মা দেখিবেন, বাবা জানিতে পারিবেন, একটা কেলঙ্কারী  
বাধিয়া যাইবে । তপতীর ভয় করিতে লাগিল । এত অপमानেও যাহার এতটুকু  
বিমর্ষতা তপতী দেখে নাই, আজ অতি সামান্য কারণেই সে কেন কাদিতেছে !  
ও, তপতী মিঃ ব্যানার্জির কোলে গুইয়াছিল বলিয়া উহার ‘জেলসি’ জাগিয়াছে ।  
নিশ্চয়ই । হাসিতে তপতীর দম আটকাইয়া যাইবার জো হইল । মিঃ ব্যানার্জি—  
যাহাকে তপতী জুতার ডগায় মাড়াইয়া চলে । নীচে না গিয়া আপন ঘরে আসিয়া  
তপতী খুব খানিক হাসিল—ঐ লোকটাও তবে ‘জেলসি’ হইতে পারে ! আশ্চর্য্য,  
উহারও এ বোধ আছে নাকি ! থাকিবে না কেন ? ও তো নির্বোধ নয় । আপন  
স্বার্থসিদ্ধির জন্ত অপমান সহ করিতেছে । তপতীকে ও নাকি স্বেচ্ছায় মুক্তি  
দিবে ! তাহা হইলে আর ভাবনা ছিল না । ভালোই হইয়াছে, ঈর্ষায় উহার  
অস্তরটাকে তপতী ক্ষত-বিক্ষত করিয়া দিবে । দেখিবে তপতী—কত সহনশক্তি  
উহার আছে ।

তপতী মার কাছে গিয়া দাঁড়াইল। মা জিজ্ঞাসা করিলেন—তপন এখনও ফিরছে না কেনরে—জানিস কিছু ?

মা জানেন না তপন ফিরিয়াছে। নিঃশব্দে আসিয়া তপনের দরজায় তপতী একটা জোর ধাক্কা দিল। তপন সহিত লাভ করিয়া যখন চোখ-মুখ মুছিয়া বাহিরে আসিল তখন তপতী সরিয়া গিয়াছে। মার সহিত কি কথা হয় শুনিতে হইবে, তপতী আড়ালে দাঁড়াইল। মা তপনের মুখ দেখিয়া বলিলেন—কী হল বাবা। মুখ তোমার—

—বিশেষ কিছু না, মা, খেতে দিন।

থাবার দিতে দিতে মা আবার জিজ্ঞাসা করিলেন,—সত্যি বলা, বাবা, কি তোমার হয়েছে—বড্ড ক্লান্ত দেখাচ্ছে তোমায়।

—এক জায়গায় একটু আঘাত পেয়েছি, মা—তা প্রায় সামলে নিলাম।

—কী আঘাত বাবা, কোথায় আঘাত লাগলো ?—মা ব্যাকুল কণ্ঠে প্রশ্ন করিতে লাগিলেন।

—শারীরিক না মা—মানসিক ; শারীরিক আঘাত আমি সবই প্রায় সহিতে পারি মা, মানসিক সব আঘাত এখনও সহিতে পারি না, তবু ময়ে যাবো, মা। আমার অন্তর—“নহে তা পাষণ-মতো, তাহলে ফাটিয়া যেতো।”

বুকের গভীর দীর্ঘশ্বাসটা তপন কিছুতেই চাপিতে পারিল না।

এত কি হইয়াছে ! তপতী আশ্চর্য হইয়া গেল। মা প্রায় কান্নাভরা কোমল কণ্ঠে কহিলেন,—হ্যাঁ বাবা, খুকী কিছু বলেছে ?

—থাক মা—সব কথা মা'দের বলা যায় না—দিন চা আর-একটু।

মা নিশ্চিত বুঝিলেন, খুকী তাহার কিছু বলিয়াছে। নতুবা তপন তো কোন দিন এমন বিহ্বল হয় নাই। আশ্চর্য চরিত্র ঐ ছেলেটির। তপন চলিয়া গেলে মা তপতীকে ডাকিয়া জিজ্ঞাসা করিলেন,—কী তুই বলেছিস—বল খুকী আমার বড্ড ভাবনা হচ্ছে—

—ভাবনার কিছু নেই। তোমার অপদার্থ জোচোর জামাইকে ঠেড়ালেও তোমার বাড়ী ছেড়ে যাবে না—ভয় নেই তোমার—!

—খুকী !—মা ধমকাইয়া উঠিলেন।

একটা সামান্য ব্যাপারকে এতখানা বাড়াইয়া তোলার জন্য তপনের উপর তপতী তিক্তই হইয়াছিল। মার ধমক খাইয়া অত্যন্ত বিরক্তির সহিত উত্তর দিল,—ওকে বাড়ি থেকে বেরিয়ে যেতে বলেছি—শুনলে—!

তপতী চলিয়া গেল। নিঃসহায় মাতা বি. এ. পাস মেয়ের কথা শুনিয়া বিষ্ময়ে বসিয়া রহিলেন।

শরাহত বিহঙ্গীর ছায় ব্যথিত-হৃদয়ে শিখা ও মীরা শুনিল তপনের মুখে তাহার ভাগ্য-বিপর্যয়ের কাহিনী। মীরা উদাস দৃষ্টিতে দাদার মুখের পানে চাহিয়া আছে, আর শিখার ছই গণ্ড বহিয়া নামিয়াছে অশ্রুর বন্যা! শিখাই কথা কহিল,

—তাহলে তোমার জীবনটা একেবারে পলু হয়ে গেল, দাদা?

—না ভাই এই-ই ভালো হয়েছে। আজ ঈশ্বরকে বলতে ইচ্ছে করছে :

“এই করেছো ভালো....”

এমনি ক’রে হৃদয়ে মোর তীব্র দহন আলো!

আমার এ ধূপ না পোড়ালে....”

শিখা তপনের ব্যথা-করণ গান সহিতে পারিল না, মুখে হাত চাপা দিয়া বলিল,—থামো দাদা, তোমার পায়ে পড়ি, থামো! তোমার ঈশ্বর তোমার থাক—আমাদের তাঁকে দরকার নেই। যে নিষ্ঠুর বিধাতা পবিত্র জীবনকে এমন করে নষ্ট—শিখা আর বলিতে পারিল না, ফোঁপাইয়া কাঁদিয়া উঠিল।

মীরা কহিল,—চুপ কর, শিখা—মামুষের কান্নায় ভগবান অবচল! তাঁর কাজ তিনি করবেনই।

বিনায়ক দূরে বসিয়া উহাদের কথোপকথন শুনিতেছিল; আগাইয়া আসিয়া বলিল—তাহলে কবে যাচ্ছিস? একুশেই যাবি তো?

—হ্যাঁ ভাই। আমি না-ফেরা পর্যন্ত তোদের কাজ যেন ঠিক চলতে থাকে।

মীরা জিজ্ঞাসা করিল,—সেখানে তোমার কত দেরী হবে, দাদা!—থুব বেশী।

—তা জানিনে বোনটি! এখন আমার কাজ সহজ হয়ে গেছে। আর তো কোন বন্ধন নেই। মুক্তি সে স্বেচ্ছায় চেয়ে নিল।—তোরা হুখে আছিস—আমি এবার সেখানে যতদিন থাকি না—থবর দেবো তোদের—ভাবনা কেন?

মীরা চুপ করিয়া রহিল। শিখা পুনরায় প্রশ্ন করিল ক্রন্দন জড়িত কণ্ঠে,—তুমি কি তবে দেশান্তরী হয়ে যাবে, দাদা?

—না, বোনটি! আমার মাতৃভূমি-বাংলা ছেড়ে যাবো কোথায়? আমি একনিষ্ঠা পত্নী চেয়েছিলাম—নিজে হয়তো একনিষ্ঠ হতে পারিনি তাই বঞ্চিত ছলাম। এবার যোগ্য হতে হবে।

—তুমি কি তাহলে তপতীকে এখনও ভালোবাসো দাদা?

—বাসি। আত্মবঞ্চনায় কোনো লাভ নেই। ভালবাসি বলেই তাকে অত সহজে মুক্তি দিতে পারলুম। তার বৃকের বোঝা হয়ে থাকতে ইচ্ছে করলো না। আমার মনের আসনে ওর স্থিতি আমি বহন করবো, শিখা, আমার চোখের জলে

নিত্য ধুইয়ে দেবো সেই আসন ।

—ও যদি আবার তোমায় ফিরে চায়, দাদা ?—মীরা প্রশ্ন করিল তপনকে ।

—সে আর হয় না, বোনটি ! আমার সত্য চিরদিন অবিচল । কিছুর জন্ম সে ভাঙে না । কিন্তু তোরা এমনি বসে থাকলে কি করে চলবে রে ? চল সব, কাগজপত্রগুলো ঠিক করে ফেলি । বিনায়ক । তুই তোর কারখানা চালা ভাই, আমি আমার কাজের মধ্যে আত্মবিসর্জন করবো এবার ।

বিনায়ক নতমুখেই দাঁড়াইয়া রহিল ।

শিখা বলিল,—তোমার কাজটা কি দাদা ?

—মানুষ গড়ার কাজ, বোনটি—তোদেরও সাহায্য চাই । পৃথিবী থেকে মানবতার সাধারণ স্মৃতি লোপ পেতে বসেছে । আমি শুধু দেখিয়ে দিতে চাই, পশু থেকে মানুষ কোথায় ভিন্ন । পাশবিক আর মানবত্বের মাঝখানে যে সূক্ষ্ম ব্যবধান—রেখা রয়েছে, তাকেই স্পষ্টতর করা হবে আমার কাজ ।

—তোমার ‘জ্যোতির্গম্য’ বইখানা হিন্দুস্থানী ভাষায় অনুবাদিত হয়ে পুরস্কার পেল, আর বাংলাদেশে মোটে বুঝলোই না, এদেশের মানুষকে কি দিয়ে তুমি গড়বে, দাদা ?

বিদেশ থেকে গড়া আরম্ভ করবো । যে-কোন বিষয়কে অশ্রদ্ধার চোখে দেখা বাঙালীর স্বভাবে দাঁড়িয়ে গেছে । এ স্বভাব সহজে যাবার নয় । কিন্তু আয় তোরা—তপন সকলকে লইয়া অগ্রসর হইল ।

বিনায়ক মৃদুস্বরে কহিল, আমিও সঙ্গে গেলে হোত-না তপু ? একা যাবি অতদূর ?

—হাঁ একাই যাবো—সঙ্গী যার হবার কথা ছিল সে যখন সরে গেল……

শিখা আবার কাঁদিয়া ফেলিল । তাহার নারীচিত্ত তপনের বেদনার গভীরতাকে মাপিতেছে না । শান্ত শুদ্ধ তপন বারংবার বিচলিত হইয়া উঠিতেছে কৌন অসহনীয় যন্ত্রণায়, শিখা যেন তাহা নিজের বুকেই অনুভব করিতেছে ।

অত্যন্ত করুণ কণ্ঠে সে কহিল,—লক্ষ্মী দাদা আমার, আজন্ম ব্রহ্মচারী তুমি—আমাদের ভগ্নী স্নেহ নিয়েই কি তুমি চালাতে পারবে না ?

—ঠিক চলে যাবে, দিদি, কিছু না থাকলেও চলতো—নিরবধি কাল কোথাও আটকায় না ।

—কিন্তু তুমি বড্ড ব্যথা পেয়েছ, দাদা !

—নিজের জন্ম নয়, বোনটি—ওর জন্য । ও কেমন করে এতবড় জীবনটা কাটাবে !

—ও আবার বিয়ে করবে ।

—আহা, তাই করুক—ও বিয়ে করে হুথী হোক, শিখা, আমি কায়মনে আশীর্বাদ করছি।

—কিন্তু দাদা তুমি এবার আত্মপ্রকাশ করো—ও বুঝুক, কী ধন হারালো।

—ছিঃ বোনটি! ওর উপর কি আমার প্রতিহিংসা নেবার কথা? ও-যে আমার—এ কথা আর কেউ না জানলেও আমি জানি।

—তাহলে তুমি মুক্তি দিলে কেন, দাদা? তোমাকেই-বা ও চিনলো না কেন?

—ওর শিক্ষা শুকে বিকৃত করেছে, শিখা, মুক্তি না দিলে ও কোনদিন আমার চিনবে না। অনেকদিন তো অপেক্ষা করে দেখলাম। শুকে ওর মা-বাবা যেভাবে ঘড়েছেন, তেমনিই তো সে চলবে। তবে সে যদি আমার হয় তাহলে আমি তাকে পাবোই। একটা জন্ম কেন তার জন্য লক্ষ-জন্ম আমি অপেক্ষা করতে পারবো।

—তুমি তাহলে আত্মপ্রকাশ করবে না?

—না। তাহলে তো এখনি ও আমার চাইবে। আর সে চাওয়া হবে—আমাকে নয়, আমার মর্যাদাকে। তেমন করে শুকে পেতে আমি চাইনে। আমি দ্বিধা তপন, মূর্থ তপন, ভণ্ড এবং অর্থলোভী তপন—এই তার ধারণা। এ ধারণাটা বদলাবার চেষ্টাও সে করলো না; কারণ, সে সর্বাস্তঃকরণে আমাকে অমনি ভেবে আগ করতে চায়।

—বিয়ে যদি না করে? শ্রীমহম্মদের চাটুজ্যের নাতনীর দ্বিতীয় বিবাহ সহজ হবে না।

—আমি তার কি করবো, শিখা! আর, কঠিনই-বা কেন হবে? ওর বাবার একমাত্র মেয়ের হুথের জন্য নিশ্চয় করবে। তবে তপতী যদি নিজেই বিয়ে না করে তো অন্য কথা।

—তাহলে কি করবে তুমি?

—কিছু না, শিখা—আমার সঙ্গে তার এ-জন্মের সম্পর্কে চুকে গেছে। আমি “কায়েন-মনসা” কথা বলি ছলনা করি মুক্তি দেবার ভণ্ডামি আমি করি না। প্রয়োজন হলেই বেজিঠারী করে দেব।

সকলে অফিস-ঘরে আসিল।

স্নেহাম্পদ জামাতাকে বাড়ী হইতে চলিয়া যাইতে বলায় মা যে অত্যন্ত ক্ষুব্ধ হইয়াছেন, তপতীর তাহা বুঝিতে বিলম্ব হয় নাই। কিন্তু তপন তো সতাই চলিয়া যাইতেছে না? আশ্চর্য, এতবড় অপমানটা সে সহিয়া গেল। যাইলেই বরং



তপতী বাঁচিয়া যাইত। বিদেশে থাকিলে লোকের কাছে তবু বলা যায়, বাড়ীতে নেই। ঘরে থাকিয়াও পার্টিতে যোগ না দিলে লোকের যে কথা বলে! পার্টিতে যোগ দিবার যোগ্যতা যে উহার নাই, লোকে তো তাহা বোঝে না।

তপতী স্থির করিল, তপনকে অপমান সে আর করিবে না, যাহা খুসী করুক, তপতীর অদৃষ্টে স্বামীস্থ নাই—কি আর করা যাইবে! তপনকে লইয়া ঘর করা তাহার অসাধ্য।

তপতী তিন-চারদিন একবারও এদিকে আসে নাই। তপন নিয়মিত সময়ে আসে খায়—এবং চলিয়া যায়—ইহার সংবাদ তপতী রাখিয়াছে। ঐ নির্লজ্জ লোকটা আবার মুক্তি দিবার ছলে তাহাকে শাসাইতে আসে,—বলে, ‘তুমি মুক্ত স্বাধীন স্বতন্ত্র।’ লজ্জা বলিয়া কোন বস্তু কি উহার অভিধানে একেবারে লেখে না! কিন্তু সেদিন অত কাঁদিল কেন? তপতী উহার কোনোই কিনারা করিতে পারিল না ভাবিয়া।

পঞ্চম দিন সকালে সে আসিয়া মাকে বলিল,—আমি তাহলে আজই ভক্তি হচ্ছি গিয়ে, মা, এম. এ. ক্লাসে।

তপন খাইতেছিল! মা তাহাকে প্রশ্ন করিলেন,—তুমি কি বলো বাবা, তপন?

তপন উত্তর দিল—আমার মতের কি মূল্য, মা। ওঁর যা ইচ্ছে করবেন। তবে অর্থাভাবে আমি পড়তে পারি নি, অর্থ থাকতেও কেউ না পড়লে আমার দুঃখ হয়।

—না বাবা, পড়ুক—বলিয়া মা তপতীকেও খাইতে দিলেন।

তপতী ভাবিতে লাগিল, সে পড়িবে শুনিয়া তপন খুসীই তো হইল। পড়াশুনার দিকে উহার আগ্রহ বেশীই আছে। মাকে বলিল,—আমার ক'খানা বই কিনতে হবে, মা—দোকানে একা যেতে চাইনে।

—বেশ তো তপন সঙ্গে যাক। যাও তো বাবা, ওর সঙ্গে একটু। গাড়ী বার করো।

—আচ্ছা মা যাচ্ছি—বলিয়া তপন উঠিল। গ্যারেজ হইতে গাড়ী আনিয়া দাঁড় করাইল। বেশ-বাস করিয়া তপতী আসিয়া উঠিল তপনের পাশেই। তপন নীরবে গাড়ী চালাইতেছে। মুখে তো কথা নাই-ই; এমন কি মুখথানা যথাসম্ভব নীচু করিয়া এবং ঘাড় ফিরাইয়া রহিয়াছে। তপতী নির্নিমেধ নেত্রে তাহার লতানো চুলগুলোর পানে চাহিয়া রহিল! নাঃ, তপন মুখ তুলিল না। গাড়ী গিয়া দাঁড়াইল পুস্তকের দোকানের সামনে। তপতী নামিয়া দোকানে ঢুকিল, তপন বসিয়া রহিল গাড়ীতেই। বই কিনিয়া তপতী ফিরিয়া আসিল।

গাড়ীতে বসিয়াই বলিল,

—একটু মার্কেটে দরকার ছিল—কথাটা বাতাসকে বলা হইলেও তপন মার্কেটের সম্মুখে গাড়ী থামাইল। নামিয়া তপতী পিছন দিকে চাহিল, ইচ্ছা—তপনও আসুক। কিন্তু ডাকিতে তাহার লজ্জা করিতেছে। এত কাণ্ডের পর তপনকে ডাকা সম্ভব হয় কেমন করিয়া। দোকানে ঢুকিয়া সে একটি কর্মচারীকে বলিল তপনকে ডাকিয়া আনিতে। তপন গাড়ী ছাড়িয়া আসিয়া দাঁড়াইল। তপতী সাহস করিয়া কহিল একটি কর্মচারীকে, কোন সেন্ট্‌টা নেবো ওঁকে দেখান তো?

তপন নিম্নকণ্ঠে উত্তর দিল,—ও সম্বন্ধে আমার কোনো অভিজ্ঞতা নাই।

আচ্ছা লোককেই তপতী সেন্ট্‌ বাছাই করিতে বলিতেছে। তপতীরই বোকামী। একটা ‘লিলি’ লইয়া সে ফুলের দোকানে আসিল, পিছনে তপন। বিক্রেতা তপতীকে চেনে, বলিল—আসুন আসুন, কী ফুল দেবো? একটা ভালো গোড়ে দিই ‘যুঁই’ এর?

—দিন। ভালো ফুল তো? বাসি হবে না নিশ্চয়ই?

আপনাকে দেবো বাসী ফুল! সেদিনকার মালাটা কি বাসী ছিল?

তপতী লজ্জায় রাঙা হইয়া গেল। অতি অল্পদিন পূর্বেই যে সে এখানে মালা কিনিয়াছে, তপন তাহা বুঝিতে পারিল। বেশী কথা না বাড়াইয়া সে মালা চাহিল এবং আড়চোখে তপনের দিকেই চাহিল। তপন নির্বিকার নিশ্চল দাঁড়াইয়া.....মুখের ভাব তেমনি, চোখে ঠুলি। মালাটা তপনের হাতে দিতে বলিয়া তপতী আগাইয়া গেল, গাড়ীর দিকে। কাগজ দিয়া মালাখানি জড়াইয়া দিলে তপন তাহা আনিয়া তপতী ও তাহার মধ্যকার স্থানে রাখিয়া গাড়ী চালাইল। তাহার মুখের ভাবের কিছুমাত্র ব্যতিক্রম হয় নাই—কপালে এতটুকু কুঞ্জন-রেখা পড়ে নাই। গতিশীল গাড়ীটাকে নিরাপদে লইয়া যাইবার জগুই যেন তাহার সব মনটাই সংযুক্ত। তপতী আশ্চর্যস্থিত হইল। এতক্ষণ তপতী পাশে বসিয়া আছে, তপন একবার চাহিল না পর্য্যন্ত! এতটা ঔদাসিন্যের হেতু কি? কিম্বা উহার স্বভাবই এমনি। তপতীকে একবার দেখিলে ফিরিয়া দেখিতে ইচ্ছা করে, এ খবর তপতীর অজানা নাই। কিন্তু এই লোকটার কি তপতীকে দেখিতেও কিছুমাত্র আগ্রহ জাগে না! কিম্বা সেদিনকার ব্যাপারটায় এখনও সে রাগ করিয়া আছে।

গাড়ী আসিয়া পৌঁছিল। তপতী নামিয়া যাইতেই তপন দারোয়ানকে কহিল,—‘আমি একটা নাগাদ ফিরবো, মাকে বলো।’ সে আবার বাহিরে চলিয়া গেল পায়ে হাঁটিয়া; ট্রামে চড়িবে হয়ত। তপতীর হাতের মালাটা তাহাকে

স্পীড়িত করিতেছিল। কি করিবে সে উহা লইয়া আর? তপনকে দিবার জন্ত সে উহা কেনে নাই! কিন্তু গাড়ীতে আসিবার সময় ইচ্ছা হইয়াছিল মালাটা উহাকেই দিবে এবং ফেরৎ পাইবে; কিন্তু সাহসে কুলাইল না। মালা লইয়া আজ আর করিবে কি সে? এখনি কলেজে যাইতে হইবে!

‘ওবেলা দেখা যাইবে’ ভাবিয়া তপতী মালাটা রাখিয়া আহা রাস্তে—কলেজে চলিয়া গেল। তপন তাহার দেওয়া মালার কদর কি বুঝিবে ভাবিয়া মনকে সামান্য দিতে চেষ্টা করিল, কিন্তু বারম্বার মনে হইতেছে—না-বুঝিবার কারণ নাই। তপন অশিক্ষিত নয়—বরং অনেকের চেয়ে বেশী শিক্ষিত।

এই কয়েক মাসের ঘটনাগুলো আলোচনা করিতে গিয়া তপতীর ভয় করিতে লাগিল। কী দুঃসহ অপমানই না তপতী করিয়াছে তপনকে! ও যদি একটু রাগিয়াই থাকে, তাহাতে অন্তায় কিছুই হইবে না। কিন্তু রাগিয়াছে কিনা তাহারই-বা প্রমাণ কই।

বৈকালবেলা তপতী মার কাছে আসিয়া খাবার তৈরী করিতে বসিল। বহুদিন আসে নাই—মা যেন কৃতার্থ হইয়া গেলেন। ভাবিলেন তপনকে খাওয়াইবার জন্ত খুকী তাহার রান্নাঘরে আসিয়াছে। মা তাহাকে নিরামিষ চপ-কাট্‌লেট তৈরীর মশলা যোগাইয়া দিলেন। তপনের জন্ত রান্না করিতে তপতীর লজ্জা করিতেছিল, তাই বলিল,—মিঃ বোসকে আসিতে বলেছি, মা একটু আমিষও রাখবো।

মা বিস্ময়িত হইয়া উঠিলেন। খুকী আজও তপনের জন্ত কিছু করে না। কিন্তু তাহার কিই-বা বলিবার আছে? তপতী রান্না চড়াইয়া লুকাইয়া মিঃ বোসকে ফোন করিল চা খাইতে আসিবার জন্ত।

মিঃ বোস আসিবার পূর্বেই আসিল তপন। মা বলিলেন,—বোস সাহেব তো এখনও এল না খুকী, তপনকে খেতে দে—

—এখনি এসে পড়বে, মা—একটু বসতে বলো, তপতী আবদার ধরিল। তপন কিছুই বলিল না। নিঃশব্দে বসিয়া রহিল। মিঃ বোস আসিতেই হৃসজ্জিত সকালের মালাটা বা হাতে জড়াইয়া বাহিরে আসিল নমস্কার করিতে। মিঃ বোস নমস্কার করিয়া বলিলেন হাসিমুখে,—হৃন্দর! আপনাকে এমন চমৎকার মানিয়েছে আজ!

—বহু বহু! ওসব বাজে কথা কইতে হবে না—বলিয়া তপতী একটা কৃত্রিম ধমক দিয়া খাবারের প্লেট আগাইয়া দিল হৃজনকেই। তপন নীরবে নতমুখে একটুকরা ভাঙ্গিয়া যেন চুবিতে লাগিল। মা চলিয়া গিয়াছিলেন—তপতী নিজেই যখন খাওয়াইতেছে, তখন তাহার আর থাকার কী দরকার। তপতী

লক্ষ্য করিল তপনের না-খাওয়া। মিঃ বোস নানা কথা বলিতেছেন—হঠাৎ যেন তাঁর চমক ভাঙিল, এমন ভাবে বলিয়া উঠিলেন,—ওঃ নমস্কার, সেদিনকার ব্যবহারটার জন্য আমি লজ্জিত। মাফ করুন!

বিস্মিত তপন বলিল,—মাফ চাওয়ার কী কারণ ঘটলো বুঝলাম না তো।

—সেদিন না-জেনে আপনাকে একটা অন্যায় কথা বলে ফেলেছিলাম।

—ওঃ, সেই ‘ইন্ডিয়েট’! তাতে কি হয়েছে? আমি কিছু মনে করি নি! নমস্কার।

তপন উঠিয়া পড়িল। তপতী ভাবিতে লাগিল, তপনের জন্য খাবার করিতে আসিয়া সে তপনের অসম্মানকারীকেই তাহার পাশে থাইতে বসাইয়াছে, কথাটা তপতীর আদৌ মনে ছিল না। মিঃ বোসকে না ডাকিলেই হইত। তপন হয়তো সেজন্যই খাইল না।

মা আসিয়া দেখিলেন তপন চলিয়া গিয়াছে। বলিলেন—কিছুই সে খায়নি রে! ওসব ভালবাসে না তপন। রুটি-জেলি দিলিনে কেন?

তপতী উত্তর দিবার পূর্বেই মিঃ বোস বলিলেন,—থেতে শেখান, মাসিমা—মেয়েকে যে জলে ফেলে দিয়েছেন।

রাগে মার সর্বাঙ্গ জলিয়া যাইতেছিল, নিতান্ত ভদ্রতার খাতিরে তিনি শুধু চুপ করিয়া রহিলেন।

তপতী কিন্তু কহিল,—থাক—আপনাদের তুলতে ডাকা হবে না।

নিজে তপতী ভাবিতেছে, তাহাকে জলেই ফেলিয়া দেওয়া হইয়াছে; কিন্তু অন্যের মুখে সে-কথা তপতী আর শুনিতে চাহে না।

মিঃ বোস শোধরাইয়া লইবার জন্য বলিলেন,—কথাটা আমি খাপ খায়ে বলিনি—আহার-বিহার, আচার-আচরণ না শিখলে সমাজে মিশবেন কি করে। তার জন্যই বলছিলাম।

মিঃ বোস অতিথি, তাই তপতী চুপ করিয়াই রহিল; কিন্তু আজ তাহার মনে হইতেছে, পরের মুখে তপনের নিন্দা শুনিতে তাহার আর ভালো লাগে না।

অসম্মতার ছুতা করিয়া তপতী মিঃ বোসের সহিত সোদা আর বেড়াইতে গেল না।

তপনের মনের গঠন হয়তো কিছু অদ্ভুত। সে কোনদিন কাহাকেও আঘাত করে না—এমন কি আঘাতের প্রতিবাদও করে না। ইচ্ছা করিলে তপতীকে সে আঘাত করিয়া চূর্ণ করিয়া দিতে পারিত, কিন্তু কাহাকেও আঘাত দিয়া

কিন্তু জোর করিয়া ভালবাসা আদায় করিবার লোক তখন নহে। সে আপনাকে পরিপূর্ণ মনুষ্যত্বের মধ্যে বিকশিত করিতে চায়—ইহাই তাহার সাধনা। তাহার বিষয়-বৈরাগী মন শুধু চাহিয়াছিল একজন সাথী, যাহাকে সে জীবনের পথে দোসর ভাবিতে পারে। কিন্তু অদৃষ্ট তাহার অন্যরূপ। দুঃখ সে পাইয়াছে, কিন্তু সে-দুঃখ সহিবার শক্তিও তাহার আছে।

আজ রিক্ত সর্বস্ব হইয়া মন প্রসারিত হইয়া পড়িল জন-কল্যাণের বিপুলায়তনে। মুক্তির মধ্যে সে খুঁজিয়া পাইল বন্ধনের ইঙ্গিত। সকালে খাইতে বসিয়া তখন কহিল,—আমি একুশে শ্রাবণ একটু মাদ্রাজের ওদিকে যাব, মা, কন্যাকুমারিকা তীর্থের দিকেও যেতে হবে।

—মাদ্রাজ ? অতদূরে তোমার কি কাজ, বাবা ? মা স্নানমুখে প্রশ্ন করিলেন।

তখন হাসিয়া বলিল,—দূর আর কোথায় মা ? তারপর একটু থামিয়াই বলিল,—

“সাত কোটি সন্তানের হে মুগ্ধা জননী  
রেখেছো বাঙালী ক’রে মানুষ করোনি !”

তপতীও চা খাইতেছিল। কথাটা সে শুনিয়া কিছু উন্মনা হইয়া পড়িল।

—কতদিন দেবী করবে, বাবা ? মা সাগ্রহে প্রশ্ন করিলেন।

—দেবী একটু হবে বইকি, মা—কাজটা শেষ করবো তবে তো ?

আর কোনো কথা না বলিয়া তখন চা-পান শেষ করিল—এবং উঠিয়া বাহিরে চলিয়া গেল।

তপতী একটু ইতস্ততঃ করিয়া মাকে জিজ্ঞাসা করিল,—ও মুখ্য মানুষ, মাদ্রাজে গিয়ে কি করবে, মা ? আমাদের অফিসের কাজ কিছু ?

—কি করে জানবো, বাছা, তুই তো জিজ্ঞেস করলেই পারিস। আর মুখ্য ও মোটেই নয়, এটা এতদিনেও বুঝতে পারলিনে তুই। তোর বাবা ওর কাজের প্রশংসায় পঞ্চমুখ।

তপতী চুপ করিয়া রইল। মা বিরক্ত হইয়াছেন। আর কোনো কথা না বলাই উচিত। তখন যে মূর্খ নয় ইহা তপতীও জানে, আর জানে, মাদ্রাজ যাওয়ার অছিলায় আরো কিছু টাকা তখন বাগাইবে। তা নিক, টাকা তাহার বাবার যথেষ্ট আছে, তখন তো সকলেরই মালিক হইবে একদিন, কিন্তা হয়তো সত্যই কোনো কাজ আছে। কিছুক্ষণ চিন্তা করিয়া তপতী কহিল—আমায় আজ একটু বেড়াতে নিয়ে যেতে বোলো, মা ! আমি বললে ও এড়িয়ে যায়।

মা হাসিয়া বলিলেন,—আচ্ছা বলে দেবো। কিন্তু এড়িয়ে যেতে দিস কেন তুই ?

উত্তর না দিয়া তপতী আসিল আপন ঘরে। বিকালে সে আজ তখনকে

লইয়া বেড়াইতে যাইবে—দেখিবে তাহার অন্তরে তপতীর স্থান কোথায়। বৈকালিক জলযোগের জন্য তপন আসিবার পূর্বেই তপতী রক্তাশ্রয়া হইয়া অপেক্ষা করিতেছিল। তপন আসিতেই মা তাহাকে বেড়াইতে যাইবার জন্য বলিলেন,—খুকী বললে ভুমি নাকি এড়িয়ে যাও বাবা—তাই আমাকে দিয়ে বলাচ্ছে।

—আচ্ছা মা যাচ্ছি। আমার কাজ থাকে, হু'একদিন আগে বললে সময় করে রাখি।

তপন গিয়া গাড়ীতে বসিল—তপতী আসিয়া বসিল পাশে। গাড়ী চলিতেছে। নির্বাক তপন চোখের তুলিটার মধ্য দিয়া সোজা সামনের রাস্তায় দৃষ্টি প্রসারিত করিয়া দিয়াছে—বামে যে একটা স্তম্ভজিতা নারী অপেক্ষা করিতেছে, তাহার অন্তিমুখে যেন তপন ভুলিয়া গিয়াছে। তপতী উসখুস করিতে লাগিল। সোজা কোনো কথা জিজ্ঞাসা করিতেও তাহার বাধিতেছে, কথাই-বা কহিবে কিরূপে। যাহাকে সে অপমানে, আঘাতে বিদলিত করিয়া দিয়াছে, তাহার সহিত এভাবে বেড়াইতে আসাই তো চরম নির্লজ্জতা! কিন্তু তপন তো আসিল, এতটুকু অসম্মতি জানাইল না? অতদিনও সে আসিবে তাহার স্বীকৃতি ছিল—অথচ কোনো কথা বলে না কেন! বাঁ দিকে একটা রাস্তা চলিয়া গিয়াছে। তপতী আপনার ডান হাতটা তপনের দুই হাতের ফাঁকে চালাইয়া দিয়া ষ্টিয়ারিংটা ঘুরাইয়া দিতে দিতে বলিল,—এই দিকে যাবো—

অকস্মাৎ বাধাপ্রাপ্ত গাড়ীটার ধৌক সামলাইয়া লইয়া তপতীর নির্দেশমতো পথেই তপন গাড়ী চালাইল। একটু দূরে কয়েকজন কলেজের মেয়ে বেড়াইতেছে, স্থানটা বেশ ফাঁকা।

তপতী বলিল,—এখানেই নামা যাক একটু—কেমন?

তপন গাড়ী থামাইল। নিজে নামিয়া তপতী ভাবিল, তপনও নিশ্চয় নামিবে; কিন্তু তপন গাড়ীতেই বসিয়া আছে মাথা নিচু করিয়া। তপতীর কেমন লজ্জা করিতে লাগিল তপনকে সঙ্গে আসিতে বলিতে। সে থানিকটা চলিয়া গেল, কিন্তু কি ভাবিয়া ফিরিয়া আসিয়া বলিল,—একা যাবো নাকি?

তপন নিঃশব্দে নামিয়া তাহার অনুগমন করিতেছে। তপতী যা-হোক একটা কিছু বলিবার জন্যই যেন বলিয়া উঠিল,—ঐগুলো বুঝি গাংচিল? নয়?

—হ্যাঁ—বলিয়াই তপন নীরব হইল।

এই নিষ্ঠুর ওদাসীঘা তপতীর অসহ্য বোধ হইতেছে। তাহার কলকাকলির শ্রোত রুদ্ধ হইয়া গিয়াছে যেন। তপনকে কথা কহিবার অধিকার দেওয়ার পরও তাহার এতটা নীরবতার হেতু কী! তপতী আবার বলিল,—ঐ নৌকোটা কোথায় যাচ্ছে?

—তা তো জানিনে।

তপন কি প্রয়োজনের অতিরিক্ত কথা একটিও বলিবে না? নৌকোটা কোথায় কোন্ চুলোয় যাইতেছে, কে তাহা জানিতে চায়! তপন কেন বোঝে না?—‘মানুষের যাত্রাপথও এমন—কোথায় যাবে জানে না’—তপতী পুনর্বীর হাসিমুখেই বলিল।

তপন কোনোই উত্তর দিল না। নিঃশব্দে হাঁটিতে লাগিল। তপতী ক্রমশঃ উত্তপ্ত হইয়া উঠিতেছে। কথাই যদি না বলে তো সঙ্গে বেড়াইবে কিরূপে! কিন্তু হয়তো তপন এখনও রাগিয়া আছে। অপমানটা তো কম হয় নাই! তপতী কথার মোড় ঘুরাইবার জন্ত সোজা প্রশ্ন করিল,—মাস্ত্রাজে ক’দিন দেবী হবে?

ঠিক বলতে পারিনে—মাস দুই তো নিশ্চয়ই।

হ’মাস। এতদিন কি করিবে সে? কিন্তু প্রশ্ন করিলে যদি তপন ভাবে তাহার কর্মের অযোগ্যতা লইয়া তপতী ব্যঙ্গ করিতেছে। তপতী আর প্রশ্ন করিল না। কিন্তু তপনের রাগ করার প্রমাণ সে পাইতেছে না। কী কথা আরম্ভ করিবে তপতী? কিছুক্ষণ ভাবিয়া প্রশ্ন করিল,—জামা-কাপড়গুলো তো আর একটু—তালো করলেই হয়?

তপন মুহূর্তেরই উত্তর দিল,—জীবনে অনেক-কিছু না পেয়ে প্রাপ্ত বস্তুর উপরও আর শ্রদ্ধা নেই!

তপতী রাগিয়া উঠিল, ভণ্ডামীর আর জায়গা নেই যেন! কিন্তু রাগ চাপিয়াই হাসিয়া বলিল,—‘ওঃ বুদ্ধদেব! তাগ শেখা হচ্ছে?’—তপতীর কণ্ঠে হুস্পষ্ট ব্যঙ্গের স্বর ধ্বনিয়া উঠিল।

বিশ্বয়ের স্বরে তপন কহিল,—বুদ্ধদেব তো কিছু তাগ করেন নি! তিনি তাঁর পিতার ক্ষুদ্র রাজ্য ছেড়ে অগণ্য মানবের হৃদয়-সিংহাসনে রাজ্য বিস্তার করেছেন! তাগ কোথায়?

বিমূঢ়া তপতী কিছুক্ষণ স্তব্ধ হইয়া রহিল তপনের দিকে, তারপর বলিল—তাগ তবে কাকে বলে?

—তাগ বলে কোনো বস্তু তো নেই। আমরা যাকে তাগ বলি, সেটার মানে এড়িয়ে যাওয়া। আর সত্যকার তাগ মানে বন্দীত্ব থেকে মুক্তি অর্থাৎ বিস্তার, ক্ষুদ্র থেকে বৃহত্তে, লঘিষ্ঠ থেকে গরীবানো।

তপতীর বিশ্বাস বাড়িয়া উঠিতেছে। প্রতি কথায় তপনের মুখ হইতে একি বাণী ঝঙ্কারিয়া উঠে! তপতী এতটা পড়িয়াছে—এমন করিয়া তো! ভাবে নাই। এই লোক কি মূর্খ হইতে পারে? অশিক্ষিত হইতে পারে? তপতী আরো কি কথা বলিবে ভাবিতেছে।

কয়েকটি কলেজের মেয়ে আসিয়া তপতীকে নমস্কার জানাইয়া বলিল,—ভাল তো মিস চ্যাটার্জি ।

তপনের সম্মুখে যে তাহাকে ‘মিস’ বলিয়া সম্বোধন করায় তপতীর লজ্জা করিতে লাগিল, কিন্তু আরো কিছু অঘটন ঘটিবার আশঙ্কায় সে তাড়াতাড়ি—‘ভালোই আছি’ বলিয়া দূরে চলিয়া যাইতে চায় ।

একটি মেয়ে তপনকে লক্ষ্য করিয়া, হাসিয়া প্রশ্ন করিল,—আপনার সঙ্গীর পরিচয়টা ।

তপতীকে কিছু বলিবার জন্য ইতস্ততঃ করিতে দেখিয়া তপন কহিল—আমি সামান্য ব্যক্তি, নাম তপনজ্যোতি ।

মেয়েটি হাসিয়া বলিল,—তপন মানে সূর্য্য—উনি কিন্তু বরাবর বড়লোক ; কখনও সামান্য নন ।

—আমি বড়লোক ? কিসে বুঝলেন ?

—ঠিক বুঝেছি । যে প্রকাণ্ড গাড়ীখানা !

—গাড়ী দেখেই বুঝি আপনারা বড়লোক ঠাওরান ? আমরা, ছেলেরাও তাই শাড়ী দেখে বড়লোক ভাবি ?

—ছেলেরা কিন্তু ভুল করে । কারণ, বাড়ী আর গাড়ীতে পয়সা লাগে—শাড়ীর দাম আর কত ?

—ছেলেরা মেয়েদের সম্বন্ধে বরাবর ভুলই করে থাকে—কথাটা বলিয়া তপন নিশ্চিন্দে হাসিল ।

—কেন ? আপনি কিছু ভুল করেছেন নাকি—মেয়েটি প্রচ্ছন্ন ইঙ্গিতে কথাটা বলিল ।

—না—আমি মেয়েদের এড়িয়ে চলি যথাসম্ভব ।

—ভয় করে বুঝি ?

—আগে করতো । এখন টিকা নিয়ে ফেলেছি—বসন্ত আর হবে না ।

—মেয়েরা বুঝি আপনার কাছে বসন্ত ।

—মারীভয় ! তাকে কে ভয় না করে বলুন ? প্রমাণ তো ইতিহাসে যথেষ্ট রয়েছে ট্রয়ের ধ্বংস, লঙ্কার দহন ।

—কিন্তু ভালোও তো বাসেন দেখছি ।

—বাসি । মানুষ যাকে ভয় করে, তাকে ভালোও বাসে । প্রমাণ ভূত । ভূতকে ভয় করি বলেই তার গল্প অবধি শুনে ভালবাসি আমরা । কিন্তু ভূতকে এড়িয়ে যেতে চাই ।

আপনার যুক্তি কাটাতে না পারলেও কথাটা ঠিক মেনে নিতে পারছিলেন ।



—আমি নিক্রপায়—বলিয়া তপন নমস্কার জানাইল।

অতি সাধারণ কথাতেও তপন যথেষ্ট দক্ষতা দেখাইতে পারে, তপতী আজই প্রথম তপনকে লইয়া বেড়াইতে আসিয়াছে; দেখিল, সুশিক্ষিতা কলেজের মেয়েদের সহিত আলাপে তপনের কোথাও জড়তা নাই। কেন তপতী এতদিন উহাকে লইয়া বেড়াইতে আসে নাই? তপনকে লইয়া তো তাহাকে অপদস্থ হইতে হইত না।

মোটরে গিয়া তপতী চালকের আসনে বসিল। সন্ধ্যায় ক্রান্ত পাখীদল কুলায় ফিরিতেছে। তপন সেই দিকে চাহিয়া আপন জীবনের কথা ভাবিতেছে—আর তপতী ভাবিতেছে উহার সহিত ভাব করিবার কী কৌশল আবিস্কার করা যায়। হঠাৎ তপতী ব্রেক কষিয়া গাড়ী থামাইয়া দিল। নির্জন নিস্তরূপ পথের হৃদ্যে ফুটিয়া আছে অঙ্গুর বন্য কুসুম—তপতী নামিয়া তাহাই কতকগুলি তুলিয়া লইল আঁচলে। একটা পুষ্পিত শাখা ছিঁড়িয়া তপনের গায়ে মৃদু আঘাত করিয়া বলিল,—আপনি চালান, আমি ফুল পরবো—তপতী উঠিতেই তপন নিঃশব্দে চালকের আসনে সরিয়া গিয়া গাড়ী ছাড়িয়া দিল।

এই নিতান্ত নির্লিপ্ততা তপতীর অন্তরকে জাগ্রত করিতেছে। তাহার আধুনিক মন ভাবিতেছিল ফুলগুলি তপন স্বহস্তে তাহাকে পরাইয়া দিবে, কিন্তু ও তপতীর সহিত অসহযোগ আরম্ভ করিল নাকি? তপতী বার বার চাহিয়া দেখিল—তপন অনড়—দৃষ্টি সম্মুখের দিক হইতে একচুল নড়ে নাই। আপনার স্বদীর্ঘ বেগীতে পুষ্পগুচ্ছ গুঁজিয়া তপতী বেগীটাকে এমনভাবে ফেলিয়া দিল যাহাতে তপনের বাম বাহুতে উহা পড়িতে পারে। তপন নির্বিকার। তপতী অসহিষ্ণু হইয়া উঠিতেছে। এই কঠিন পাষণ-মূর্তিকে লইয়া সে করিবে কি? রাগই যদি তপনের হইয়া থাকে, তবে না-হয় হুঁচার কথা শুনাইয়া দিক্—তপতী মহা করিবে। কিন্তু এই নীরবতা একান্ত অসহ্য। তপতী ঝাঁজিয়া বলিয়া উঠিল,—কথা তো ভালোই বলতে পারেন চুপ করে কেন আছেন এখন।

—কথা না বলেও তো অনেক কথা বলা যায়—যেমন কথা বলে ঐ পুষ্পিত শাখা—

কিন্তু আমি শাখা নই, আমি মানুষ—কথা বলবার জন্ত আমার ভাষা আছে। আর ভাষাকে সুন্দর করবার জন্ত আমি অনেক তপস্যা করেছি—

—আমার মৌনতাকে আমি সুন্দর করতে চাই—তাই হোক আমার তপস্যা।

—অর্থাৎ আমি যা চাই তার উটোটা, কেমন? চমৎকার।

তপন চুপ করিয়া রহিল। দিকে দিকে সন্ধ্যার স্নিগ্ধ স্তব্ধতা গান গাহিয়া উঠিতেছে মৌন মহিমায়। মৌনতার এই স্বগভীর সৌন্দর্য্য একান্ত প্রিয়জনের

সান্নিধ্যেই যেন অমুভব করা যায়। তপতী অনেকক্ষণ ভাবিয়া বলিল,—কাল আসতে হবে বেড়াতে, বুঝলেন? পালাবেন না যেন?

—কাল আমার খোনের বাড়ী যাবো, আসতে পারবো না।

তপতী বাকুদের মতো জলিয়া উঠিল। ঐ বোনটাই তপতীর সর্বনাশ করিতেছে। কোনরূপে ক্রোধ দমন করিয়া সে কহিল—আমিও যাবো—নিয়ে যাবেন আমায়? আমি দেখতে চাই, তার সঙ্গে আপনার সত্যিকার সম্পর্কটা কী।

তপন সঙ্গেই গাড়ীটার ব্রেক কষিয়া থামাইয়া দিল। তপতী লাফাইয়া উঠিল স্থির-এর গদিতে। তপন ধীরে শাস্ত স্বরে কহিল,—তার সঙ্গে আমার সম্পর্কটা যাই হোক, মিস্ চ্যাটার্জি, আপনার তাতে কিছুই যাবে আসবে না। অনর্থক আঘাত করায় কি আপনার লাভ হচ্ছে? আমার সঙ্গে সব সম্পর্কই তো আপনি ছিন্ন করেছেন! আজ আবার বলছি—‘আপনি মুক্ত, আপনি স্বতন্ত্র, আপনি স্বাধীন। আপনার উপর কোন দাবী আর রাখিনি। আশা করি, আপনিও আমার উপর রাখবেন না।’

তপন তীব্রবেগে গাড়ীটা চালাইয়া দিল। তপতী বসিয়া রহিল বাক্যহার্য ব্রততীর মতো।

বাড়ীর প্রায় কাছাকাছি আসিয়া তপতী হঠাৎ বলিল, সত্যি তাহলে আপনি আমাকে মুক্তি দিয়াছেন?

—হাঁ। আমি আপনার জীবন থেকে অন্ত গিয়েছি।

—অন্ত-স্বর্ঘ্যটি কিন্তু প্রতি সকালে উদিত হন—তপতীর ব্যঙ্গ তীক্ষ্ণ হইয়া উঠিল।

—তার জগৎ থাকে রাজ্রির সুদীর্ঘ সাধনা—ধীরে উত্তর দিল তপন।

—ভালো! রাজ্রি সাধনাই করবে!—তপতী আবার বিজ্রপ করিল।

—আমি কিন্তু সূর্য নই। আমি দূর নীহারিকাপুঞ্জের এক নগণ্য নক্ষত্র, অন্ত গেলে বহু শতাব্দীর পরেও পুনরুদয়ের সম্ভাবনা কম থাকে।

গাড়ী বাড়ী পৌঁছিল। তপন দরজা খুলিয়া তপতীর নামিবার পথ করিয়া দিল এবং সে নামিয়া গেলে নিজেও ধীরে ধীরে আপনার ঘরে প্রবেশ করিল।

সমস্ত রাজ্রিটাই হুশিয়ার্য কাটিয়া গেল তপতীর। চিন্তার পর চিন্তার তরঙ্গ যেন আছড়াইয়া পড়িতেছে তাহার মনের উপকূলে। তপনের সহিত তাহার এই কয়মাসের ব্যবহার স্মৃতিসাগর মথিত করিয়া তপতী কুড়াইয়া ফিরিতেছে—কিন্তু যতদূর দৃষ্টি যায়, বাহা কিছু দেখে, সর্বত্রই তপন নির্বিকার, নির্দোষ সে না হইতে পারে কিন্তু নির্গিপ্ততা সে অক্ষুণ্ণ রাখিয়াছে! তপতীর বারম্বার অসম্মানের আঘাতেও তপন অবিচল রহিয়া গিয়াছে—আর আজ সেই আঘাতগুলিই তপতীর

অপরিসীম লজ্জার কারণ হইয়া দাঁড়াইল।

তপন তাহাকে মুক্তি দিয়াছে? সত্যিই কি সে আজ তপনের সহিত বিবাহ বন্ধন হইতে মুক্ত? বেশ—ভালো কথাই তো। কিন্তু কেন যেন আনন্দ আনিতেন না। এতদিন যে লোকটিকে কেন্দ্র করিয়া তপতী তাহার দুঃখের বিলাস-কুঞ্জ রচনা করিতেছিল, আজ যেন সে কুঞ্জ সমূলে ধ্বসিয়া গিয়াছে। অবাধ অসীম বিস্তারের মধ্যে আজ তপতী যাহাকে ইচ্ছা গ্রহণ করিতে পারে—তপন আর কিছুই বলিবে না। সে বলিয়াছে—‘তপতীর উপর তাহার আর কোনো দাবী নাই। নিতান্ত নিস্পৃহের গ্রায় সহজ স্তরেই তপন আজ কথা কয়টা বলিয়াছে। সত্যিই কি তাহাকে মুক্তি দিয়াছে তপন? হাঁ দিয়াছে। তপতী মুক্তি চাহিয়াছিল—ওধু চাহিয়াছিলই নয়, যিঃ ব্যানার্জির কাঁধে মাথা রাখিয়া তপনকে নিঃসংশয়ে বুঝাইয়া দিয়াছিল, তাহাকে সে চাহে না—তাহাকে সে গ্রাহ করে না। এতদিনের এত আঘাতেও যে তপন এতটুকু বিচলিত হয় নাই, সেদিন সেই তপন শরাহত মৃগশিশুর মতো কাঁদিয়াছে, —অজস্র উদ্বেলিত অশ্রুধারায় প্রক্ষালিত করিয়া দিয়াছে তাহার পূজার বেদীমূল, আর তপতী নির্লিপ্ত নির্ভুরতায় সে কান্না দেখিয়াছে—বিজ্রপ করিয়াছে, বিরক্ত হইয়াছে।

তপনকে আজ বলিবার মতো তপতীর আর কি থাকিতে পারে? হয়তো ক্ষমা চাহিবার অধিকারটুকুও তাহার লুপ্ত হইয়া গেছে। হাঁ, তপতী আজ সত্যি মুক্ত, স্বাধীন, স্বতন্ত্র। কিন্তু তপন আজও রহিয়াছে কেন? সুদীর্ঘকাল বারম্বার অপমান সহ করিয়াও যে-লোক এ গৃহ ত্যাগ করে নাই, সে নিশ্চয়ই এত সহজে তপতীকে ত্যাগ করিবে না। না—না—না—তপতী বুঝাই ভাবিয়া মরিতেছে।

আশ্বস্ত হইয়া তপতী থানিকটা বিমোহিতা লইল। তপনের চলিয়া যাওয়াটা তাহার পক্ষে কত বড় ক্ষতি ইহা সে ঠিক বুঝিতে পারিতেছে না; কিন্তু তাহার থাকায় যে কিছু লাভ আছে; ইহা যেন তপতীর আজ বার বার মনে হইতেছে। মা-বাবা উহাকে স্নেহ করেন সে নিশ্চয়ই এই বাড়ীতেই থাকিবে। আপাততঃ তপতীকে ভয় দেখাইবার জন্য বলিয়াছে—‘মুক্তি দিলাম’। মুক্তি অত সহজ কিনা? এ-তো আর চার টাকায়-কেনা পাশী নয়! আর যদিই-বা মুক্তি দেয় তো ক্ষতিটা কি? তপতী উহার জন্য কাঁদিয়া মরিয়া যাইবে না। বাড়ীতে আছে, থাক—আরো কিছু টাকা লইতে চায়, লউক! তপতী উহাকে আর বিরক্ত করিবে না। দুজনেই তাহারা আজ হইতে স্বাধীনভাবে চলিবে।

তপতী হাসিয়া ফেলিল। তপন তো তাহার স্বাধীনতায় কোনদিন হস্তক্ষেপ করে নাই। তপতী চিরদিনই স্বাধীনা আছে, এবং থাকিবে।

ভোর হইয়া গিয়াছে। বীতবর্ষণ আকাশের কোমল আলোক তপতীর চোখে

বড় হৃন্দর লাগিতেছিল। উঠিয়া সে স্নান করিয়া কেলিল। তারপর ধীরে ধীরে আসিয়া দাঁড়াইল বারান্দায়; তপনের ঘরের দিকে চাহিয়া দেখিল দরজা খোলা। ত্রস্ত তপতী হরিতে আসিয়া দেখিল তপন পূজায় বসিয়াছে। তপনের পিছন-দিকটা তপতী বহবার দেখিয়াছে কিন্তু মুখ ভালো করিয়া দেখে নাই। আত্মবিশ্বাস্তা তপতী ঘরে ঢুকিয়া পড়িল, জীবনের এই প্রথম। প্রেমান্ভাসারের এই ক্ষুদ্র আয়োজনটুকুতেই হয়তো তার অনেক সময় ব্যয় হইয়া যাইত, কিন্তু আজ একান্ত অকস্মাৎ তাহা ঘটয়া গেল।

তপনের হৃই আঁখি ধ্যানস্তিমিত। শূশ্র-গুপ্ত মুণ্ডিত হৃন্দর মুখমণ্ডল ব্যাপিয়া রছিয়াছে যে শাস্ত সৌম্য শ্রী, তাহাতে তপতী বুদ্ধদেব ছাড়া আর কিছুই বলিতে পারে না। তপতী দাঁড়াইয়া রহিল। তপনের স্নানসিক্ত চুল হইতে তখনও জল ঝরিতেছে। তপতীর ইচ্ছা করিতেছে আপনার বুকের অঞ্চল দিয়া তপনের মাথাটি মুছিয়া দেয়।

তপন চক্ষু মেলিয়াই বিস্মিত হইল। অত্যন্তই সহজ স্বরেই প্রশ্ন করিল, কিছু বলতে চান?

—না—কিছু না বলিয়া বিমূঢ় তপতী দাঁড়াইয়া রহিল; প্রশ্নাম শেষ করিয়া তপন চলিয়া গেল থাইবার জন্য মার কাছে, এবং থাইয়া বাহিরে।

সমস্ত দিনই তপন ঘরে কিরিল না! সেই সকালে গিয়াছে—তপতী অত্যন্ত উসখুস করিতেছে মাকে জিজ্ঞাসা করিতে তাহার লজ্জা করিতেছিল বিকালে নিশ্চয় জল থাইতে আসিবে। কিন্তু বিকাল হইয়া গেল, ছয়টা বাজিল, তপন আসিল না। হঠাৎ তাহার মনে পড়িল কাল তপন বলিয়াছিল বোনের বাড়ী যাইবে। তবে কি আজ আর মোটেই আসিবে না? মিঃ ব্যানার্জি প্রভৃতি বন্ধুগণ তপতীকে বহুক্ষণ হইতে ডাকিতেছেন—নিরাশ হইয়া তপতী নীচে নামিল।

মিঃ ব্যানার্জি কহিলেন,—কী ব্যাপার? যক্ষবধুর মতো চেহারা যে মিস চ্যাটার্জি?

—আমি মিসেস্ গোস্বামী—আজ থেকে মনে রাখবেন—বলিয়া তপতী ওধারে ফুলবাথিকায় চলে গেল।

মিঃ অধিকারী ডাকিয়া কহিলেন,—খেলবেন না একটু?

না—তপতীর কণ্ঠস্বর এত দৃঢ় শুনাইল যে সকলেই থামিয়া গেল।

রাত্রি সাড়ে নয়টায় কিরিয়া আসিল তপন। মা প্রশ্ন করিলেন,—কি কি খেলে, বাবা বোনের বাড়ীতে?

—এই—পাটিশাপটা, সর্কচাকলী, পানিফলের কি সব—আরো কত-কি খেলায়, মা—

তপতী আড়ালে দাঁড়াইয়া শুনিতেছে। মা কহিলেন,—বেশ বাবা বোনের বাড়ী তো বেশ খাও—আর এখানে খেতে দিলেই বলবে, ‘ভালবাসিনে, মা!’—

বিশ্বয়ের স্বরে তপন বলিল, কেন মা, আপনি যেদিন যা দিয়েছেন খেয়েছি তো? তবে আমি পরিমাণে কম খাই।

মা পুনরায় কহিলেন,—কিন্তু বাবা, খুকী সেদিন যা-কিছু রান্না করলে, তুমি খেলে না।

তপন অকস্মাৎ গম্ভীর হইয়া গেল। বাহিরে তপতী সাগ্রহে কান খাড়া করিয়া আছে, তপন কি বলে শুনিবার জ্ঞ। তপন ধীরে ধীরে বলিল, কথাটার জবাব দিতে চাইনে মা, ব্যথা পাবেন আপনি।

বিস্মিতা মাতা ব্যাকুল হইয়া কহিলেন,—তা হোক বাবা, তুমি বলো,—বলো কিজন্তে তুমি খাওনি? বলো, শুনেতে চাই আমি—

—মার মনে ব্যথা দেওয়া উচিত নয়, মা—তাই বলতে চাইছি নে।

—‘না বাবা, তোমায় বলতেই হবে।’—মার নির্বন্ধাতিশয্য বাড়িয়া গেল।

নিরুপায় তপন কোমল কণ্ঠে কহিল,—আপনার খুকী তো আমার জ্ঞ। কিছু কোনদিন রান্না করেনি,—মা—যেদিন যা-কিছু কবেছে, সবই তার বন্ধুদের জ্ঞ। আর আমার বোন আমার জ্ঞ। পাটিসাপ্টা তৈরী করে আঁচল ঢেকে বসে থাকে—যেতে দু’মিনিট দেরী হলে চোখের জলে তার বুক ভেসে যায়।—তার সঙ্গে আপনার খুকীর তুলনা করবেন না, মা—সে তো প্রগতিশীলা তরুণী নয়, তাইএর বোন সে—

মা একেবারে মুক হইয়া গেলেন। বাহিরে তপতীর অন্তর বিপুল বিশ্বয়ে স্তম্ভিত হইয়া গিয়াছে! এতবেশী ‘সেন্টিমেন্টাল’ ও! এতো তীক্ষ্ণ লক্ষ্য উহার!

কিছুক্ষণ সামলাইয়া মা কহিলেন,—খুকী বড় ছেলেমানুষ, বাবা—বোঝে না।

কলহাস্তে ঘরের বিধাত্ত হাওয়াটা উড়াইয়া দিয়া তপন অতি সহজকণ্ঠে কহিল,—আমি কি বলেছি, মা, সে বড়ো মানুষ। আপনি তো বেশ উল্টো চার্জে ফেলেন! খাওয়া হইয়া গিয়াছে, তপন উহিয়া আপনার ঘরে চলিয়া গেল।

পরদিন সকালে আসিয়াই তপন করুণ কণ্ঠে কহিল,—কাল আপনাকে কথাগুলো বলে মনে বড় কষ্ট পেয়েছি মা—সত্যি বলুন, আপনি দুঃখ পাননি?

—তুমি আমার বড় উপকার করেছ, তপন, দুঃখ পাবার আমার দরকার ছিল!

—খুব বড় কথা বললেন, মা—দুঃখ পাবার মানুষের দরকার থাকে। এই পৃথিবীতে দুঃখের চাকায় আমাদের মন-মাটি মানুষের মূর্তিতে গড়ে ওঠে। তাই রবীন্দ্রনাথ বলেছেন :

“বজ্রে তোলো আগুন ক’রে আমার যত কালো”

তপন খাইতে আরম্ভ করিল। মা দেখিতে লাগিলেন, দরজার আড়ালে তপতীর অঞ্চলপ্রাপ্ত হুলিতেছে। ডাকিলেন, আর খুকী—খাবি আয়।

তপতী আসিতে আজ সঙ্কুচিত হইতেছে। মা বলিলেন,—লজ্জা দেখো মেয়ের! আয়। ও কাল কি বললো জানো বাবা, তপন? বললো, তোমার জামাইএর জন্ত খাবার করবো বলতে আমার লজ্জা করে—জামাই তোমার বোঝে না কেন?

বিস্ময়ে হতবাক তপন দুই মুহূর্ত পরে উত্তর দিল,—লজ্জার একটা স্মিট্টমোর্ত আছে, মা, আপনার খুকীর আচরণে এয়াবৎ সেটা পাই নি। কিন্তু মা ও কথা এবার বন্ধ করুন! অপ্রিয় আলোচনা না করাই ভালো, মা।

—ঠা বাবা, থাক—পাছে কেঁচো খুঁড়তে কেউটে উঠিয়া পড়ে, ভয়ে মা আর কোন কথাই তুলিলেন না। তপন চলিয়া গেলে তপতীকে কহিলেন,—ভোর কিন্তু এতোটুকু বুদ্ধি নেই খুকী, মিছেই লেথাপড়া শিখছিস।

তপতী আজ এই ভৎসনা মাথা পাতিয়া গ্রহণ করিল। তাহার জ্ঞানার্জিত সংস্কার আজ যেন তাহাকে চাবুক মারিয়া বুঝাইতেছে, আপনার স্বামীকে চিনিয়া লইবার ক্ষমতাটুকু পর্য্যন্ত সে এত বিচ্যুতেও অর্জন করে নাই। মার কথার বিন্দুমাত্র প্রতিবাদ না করিয়া তপতী হাসিল—এবং আপন ঘরে গিয়া সারাদিন ভাবিয়া ভাবিয়া একটা প্রান খাড়া করিয়া ফেলিল।

বিকালে জলযোগের জন্ত তপন আসিতেই মা কহিলেন—খুকীর বড় মাথা ধরেছে, বাবা, ভীষণ কাতরাচ্ছে। ওকে একটু বেড়িয়ে আনো—

—মাথা ধরেছে? কিন্তু আমার সঙ্গে বেড়িয়ে ও বিশেষ কিছু আনন্দ পাবে না, মা—ওর বন্ধুদের সঙ্গে যেতে বলুন না? গল্প করলে মাথা ধরা সেরে যাবে শীঘ্রি।

তপতী সোফায় শুইয়া সব শুনিতেছিল। নিতান্ত করুণ কণ্ঠে কহিল—থাক মা যেতে হবে না—ওর হয়তো কাজ আছে। না হোক বেড়ানো আমার—

তপন অত্যন্ত বিস্মিত হইয়া কহিল,—আমি না গেলে বেড়ানো হবে না কেন, বুঝতে পারছি না, মা—রোজই তো বেড়াতে যায়।

তপতীর আর বলিবার মতো কথা ফুটিতেছে না। মা ব্যাপারটা বুঝিলেন; কহিলেন,—এতকাল ছেলেমানুষ ছিল, বাবা, চিরকাল কি আর বন্ধুদের সঙ্গে যায়?

তপন হো হো করিয়া হাসিয়া উঠিল। স্মিট্ট হাশ্বে সারা বাড়ীটা মুখরিত হইয়া উঠিল। বলিল—বেশ যা-হোক, মা, গতকালই বলেছেন, আপনার খুকী ছেলেমানুষ—আর আজই বড় হয়ে গেল! আপনার বাপের বাড়ীতে তাই হয়

বুঝি ? ঝিঙে, বেগুন, করলা দুইবেলা কিন্তু বাড়ে, মা—আপনার খুকী কি তাহলে ...

তপনের বলার ভঙ্গীতে খুকী অবশি হাসিয়া ফেলিল ।

মা বলিলেন, তুইমি কোরো না, বাবা—যাও দুজনে বেড়িয়ে এসো গে—  
—আচ্ছা, মা—যথাদেশ—বলিয়া তপন গাড়ীতে আসিয়া উঠিল ।

চল্লিশ, পঞ্চাশ, ষাট মাইল বেগে গাড়ী চলিতেছে । কাহারও মুখে কথা নাই । তপতী বা হাতে রূপাল টিপিয়া বসিয়া আছে । তপনের দৃষ্টি দূর দিক্‌চক্রে সমাহিত । হুড্-শূন্স গাড়ীর উপর দিয়া যেন ঝড় বহিয়া যাইতেছে । তপতী মাথাটা টিপিয়া বার দুই ‘উঃ-আঃ’ করিল । তপন নির্বিকারে গাড়ী চালাইতেছে । তপতী মাথার চুলগুলো এলাইয়া দিল । তপনের চোখে-মুখে লাগিতেছে—তপন মুখটা সরাইয়া লইল । ঘাড়টা কাত করিয়া তপতী পিছনের ঠেসায় রাখিল, তপনের বাম বাহতে তাহার মাথা ঠেকিতেছে—তপন নির্বিকারে গাড়ীর গতিটা বাড়াইয়া দিল । তপতী ‘ওগো, মাগো’ !’ বলিয়া মাথাটা তপনের বুকের অভ্যন্তর নিকটে আনিয়া ফেলিয়াছে—তপনের নিঃশ্বাস তাহার ললাট স্পর্শ করিবে—তপন অকস্মাৎ গাড়ীর গতি অভ্যন্তর মন্দ করিয়া দিল, এবং একটু পরেই থামাইয়া ফেলিল । ঘাড় তুলিয়া তপতী চাহিয়া দেখিল, গঙ্গার কূলেই তাহারা আসিয়াছে ।

গাড়ীর দরজা খুলিয়া তপন নামিয়া পড়িল । তপতী বিস্মিতা, ব্যথিতা, বিপ্লবী বোধ করিতে লাগিল । আপনাকে এতখানি অসহায় তাহার কোনোদিন মনে হয় নাই । চাহিয়া দেখিল, তপন গঙ্গার জলের ধারে গিয়া দাঁড়াইয়াছে । তপতীও নামিল এবং একটা আকন্দগাছ হইতে ফুলগুচ্ছ ছিঁড়িয়া তপনের গায়ে ছুঁড়িয়া দিতে দিতে কহিল—‘ফুলের ঘায়ে মুচ্ছা যায় তার নামটি কি ! বলুন তো ?’

তপন পিছন ফিরিয়াই দাঁড়াইয়া রহিল । তপতীর এই নিলজ্জ্বল তাকান্না তাহার চির-সহিষ্ণু অন্তরকেও অসহিষ্ণু করিয়া তুলিতেছে । যে নারী দিনের পর দিন বিবাহিত স্বামীর অন্তরকে অপমানে বিদীর্ণ করিয়া দিয়াছে—একবার ফিরিয়া দেখে নাই কতখানি শোণিত ক্ষরণ হইল, যে স্বেচ্ছায় অল্প পুরুষের অঙ্গে শয়ন করিয়া স্বামীর কাছে মুক্তি মাগিয়া লয়—আজ আবার কোন্ সাহসে সে স্বামীর সাথে রঙ্গ করিতে আসে ।

ইহাই কি আধুনিকার প্রগতি ! কিন্তু তপন কাহাকেও আঘাত করে না—তপতীকেও কিছু বলিল না ।

তপতী আশা করিয়াছিল, তাহার কবিতার উত্তরে তপন বলিয়া উঠিবে—তার

নাম ‘তপতী’। কিছুই তপন বলিল না, এমন কি মুখও ফিরাইল না দেখিয়া তপতী অত্যন্ত মুগ্ধাইয়া পড়িল। তাহার এতক্ষণকার ব্যবহার মনে করিয়া লজ্জায় তাহার মরিয়া যাইতে ইচ্ছা হইতে লাগিল। নিকৃপায়ের শেষ অবলম্বনের মতো সে শুধু বলিল,—বসবেন না একটু ?

তপন নীরবে আসিয়া একটু দূরেই বসিল। সবুজ ভূগমণ্ডিত মাঠে একান্ত আত্মীয় দুইটি মানবের একান্ত নীরবতা বুঝি প্রকৃতিকেও পীড়িত করিতেছে—কোথায় একটা পাপিয়া ডাকিয়া উঠিল—‘পিউ কাঁহা?’ তপতী নিভুলভাবেই বুঝিয়াছে, তপন আর কথা কহিবে না। উপায়হীন তপতী ‘উঃ’ বলিয়া সেই ঘাসের উপরই তপনের হাঁটুর কাছে মাথা রাখিয়া শুইয়া পড়িল।

হয়তো সতিহি উহার কষ্ট হইতেছে। কারুণ্য কোমল তপন স্নেহে হাত দিল তপতীর ললাটে। মাথা ধরার কিছুমাত্র লক্ষণ নাই, দিব্য শীতল স্নিগ্ধস্পর্শ কপাল, রগ-ত্ব’টি যথাসম্ভব স্বাভাবিক ভাবেই টিপটিপ করিতেছে। এই মিথ্যাবাদিনী ছলনাময়ী নারীকে তপন বিবাহ করিয়াছে। যুগায় তাহার সর্বাঙ্গ শিহরিয়া উঠিল! কিন্তু কিছুই সে বলিল না, তপতীর শীতল মসৃণ কপালে তাহার নিপুণ অঙ্গুলি চালনা করিতে লাগিল। আরামে তপতীর চক্ষু বুজিয়া আসিতেছে। এক এক বার সে ভাবিতেছে তপনের হাঁটুর উপর মাথাটা তুলিয়া দিলে কেমন হয়—কিন্তু থাক, অতটা বাড়াবাড়ি দরকার নাই—যদি নিজেই তুলিয়া লয় তো আরো ভালো হইবে।

—নমস্কার—

তপতী সন্ধ্যায় চাহিয়া দেখিল মিঃ বোস তপনকে নমস্কার করিতেছে। তপতীকে চোখ খুলিতে দেখিয়াই কহিল,—মাসিমার কাছে গুনলাম আপনার মাথাব্যথা, তাই এলাম সন্ধান করে করে। কেমন বোধ করছেন এখন? অ্যাসপিরিন খাবেন?

মিঃ বোসের এত কথার জবাবে তপতী কিছু না বলিয়া পুনরায় চোখ বুজিল। তাহার অত্যন্ত রাগ হইতেছে—কি জ্ঞাত্য আমে সেই মিষ্টার বোস? সে স্বামীর সহিত বেড়াইতে আসিয়াছে, মাথা ধরুক আর মরিয়া যাক—তিনি দেখিয়া লইবেন; মিঃ বোসের অ্যাসপিরিন লইয়া দরদ দেখাইতে আসিবার কী প্রয়োজন! কিন্তু তপতীর সঙ্গে সঙ্গে মনে হইল—কাঁটার যে জাল সে এককাল ধরিয়া নিজের চারিদিকে বয়ন করিয়াছে, তাহা হইতে মুক্তি পাইতে হইলে হাত-পা এক-আধটু ছড়িয়া যাইবেই। অত কোনো অঘটন ঘটবার আশঙ্কায় তপতী কথাই কহিল না। চতুর মিঃ বোস তপতীর মনের ভাব বুঝিয়া ফেলিলেন। হাঁ, মাঝে মাঝে স্বামীর সহিত বেড়াইতে না আসিলে লোকে মন্দ বলিবে! তপতীর



আজিকার অভিনয় একটা বিশেষ ধাপ্পা। কহিলেন,

—ওয়েল, মিঃ গোস্বামী, আমি আবার মার্জনা চাইছি আপনার কাছে।

—কি হেতু?—তপন পরম ঔদাসীন্দের সহিত প্রশ্ন করিল।

—সেইদিনকার ব্যাপারটার জন্ত সত্যিই আমি লজ্জিত।

তপনের মনটা একেই তো তপতীর লজ্জাকর অভিনয়ে তিক্ততায় ভরিয়া ছিল, তার উপর মিঃ বোসের আগমনের সঙ্গে এবং দ্বিতীয়বার ক্ষমা চাওয়ার সঙ্গে চতুরা তপতীর কোনো উদ্বেগ যুক্ত আছে কিনা সে বুঝিতে পারিতেছে না—যথাসম্ভব সংযত হইয়াই উত্তর দিল, সে কথা আর নাই-বা বললেন, মিঃ বোস। আর অপরাধ তো আপনার কিছু নয়—ওর পিছনে ছিল যাঁর সমর্থন, অপরাধ যদি কিছু ঘটে থাকে তো, সে তাঁর। কিন্তু যারই হোক—আমি সর্বাস্তঃকরণে ক্ষমা করেছি। বার বার এক কথা বলার চুঃখ থেকে আমায় রেহাই দিন—এই মিনতি করছি আমি।

তপতীর মাথাটা ভূমি হইতে উর্ধ্বে উঠিয়া পড়িল। তপন এমনি করিয়া ভাবিতে পারে। মিঃ বোসের কৃত আচরণের অন্তরালে রহিয়াছে তপতীর সমর্থন! তপনের মননশীলতাকে তপতী আজ কি বলিয়া মিথ্যা প্রমাণ করিবে? আর, মিথ্যা তো নয়! তপতীর সমর্থন না পাইলে মিঃ বোসের সাধ্য কি যে তপনের অসম্মান করে। তপতী চাহিল তপনের মুখের দিকে। মুখ অগৃহ্যে ফিরানো রহিয়াছে—তপতী বুঝিল, সে মুখে রাগ বা ঘেঘের কোনো চিহ্ন নাই।

মিঃ বোস বড় খতমত খাইয়া গিয়াছিলেন। একটু সামলাইয়া কহিলেন, আপনাকে আমরা ভুল বুঝেছিলাম, মিঃ গোস্বামী। আজ কিন্তু সত্যিই আপনাকে আমরা বন্ধুভাবে পেতে চাই—নাও উই মাষ্ট বি ফ্রেণ্ডস।

তপন চুপ করিয়া রহিল। তপতীর মাথায় হাত তাহার সমানে চলিতেছে।

—চুপ করে আছেন যে মিঃ গোস্বামী? আমার বন্ধুত্ব আপনি স্বীকার করলেন তো?

—আমি অত্যন্ত চুঃখিত, মিঃ বোস—আপনার সঙ্গে আমার বন্ধুত্ব কি করে সম্ভব হতে পারে! আমি দীন, দরিদ্র, নগন্য, অশিক্ষিত মানুষ—আপনার অভিজ্ঞাত; আপনার সঙ্গে বন্ধুত্বের কথা বলা আমার পক্ষে অপ্রাসঙ্গিক নয় শুধু, অসম্ভব—

—কিন্তু আমি সেটা প্রার্থনা করছি। আমি চাইছি আপনার বন্ধুত্ব।

—ক্ষমা করবেন মিঃ বোস—আমি জীবনে অসত্য কথা উচ্চারণ করি নি; আমার অভিধানের ‘অত্যাগ সহনো বন্ধু’ কথাটার সঠিক অর্থে আপনাকে পাচ্ছি—আপনাকে ‘বন্ধু’ ভাবা আমার পক্ষে সম্ভব হবে না।

মিঃ বোস নীরব হইয়া গেলেন। অপমানিত বোধ করলেন তিনি। মুখখানি তাঁহার কালো হইয়া গেল। তপন পুনরায় কহিল,—হয়তো আপনি দুঃখ পাচ্ছেন, কিন্তু উপায় কি বলুন? আমার নীতি জগতের কিছু জনাই বদলায় না। আপনার সঙ্গে আমার আলাপ মাত্র দু'দিনে পড়লো আজই। এর মধ্যে এমন কিছু হয়নি যে, আমার বিরহে আপনি বুক ফাটাবেন বা আপনার জন্য আমি বুক ফাটাবো। অবশ্য, বন্ধু না বলে আলাপী বলা যেতে পারে।

মিঃ বোস যেন বিজ্রপ করিবার জন্য বলিলেন—এরকম বুক ফাটা বন্ধু আপনার ক'জন আছেন, মিঃ গোস্বামী?

বিজ্রপটাকে গ্রাহ্যমাত্র না করিয়া তপন উত্তর দিল,—বেশী তো পাওয়া যায় না, মাত্র একজন আছে।

—আশা করি তিনিও আপনার মতো সংস্কৃত সূত্র মিলিয়ে বন্ধুত্ব করেন?

—তিনি কী করেন, আমার তো জানার দরকার নেই, মিঃ বোস। আমি যা করি তাই আপনাকে বললাম—তপন উঠিয়া গিয়া তপতীর ললাট-আহুত-ক্ৰীমটার তৈলাক্ত পদার্থটা গঙ্গার জলে ধুইতে বসিল।

মিঃ বোস চাহিলেন তপতীর দিকে সহাস্তে। স্মিতমুখে বলিলেন এমন অদ্ভুত গোঁড়ামী আর দেখেছেন, মিস চ্যাটার্জি? ধন্য আপনার ধৈর্য্য, ওর সঙ্গে এতক্ষণ বসে রয়েছেন।

—আপনার অধৈর্য্য বোধ হয়ে থাকে তো চলে যান—বলিয়া তপতী উঠিয়া বসিল এবং তপনের অত্যন্ত নিকটে গিয়া বলিল,—চলুন, বাড়ী যাই—ভালো লাগছে না এখানে।

নিম্পৃহের মতো তপন গাড়ীতে আসিয়া বসিল, তপতী পাশে বসিয়াই বলিল,—চলুন, খুব জোরে চালাবেন না লক্ষ্মীটি। ভয় করে।

মিঃ বোস যে ওখানে তখনও বসিয়া আছেন তপতী লক্ষ্যমাত্র করিল না। সারা পথ সে তপনের বাম বাহুতে মাথা রাখিয়া চুপচাপ বসিয়া রহিল—তপন একটা কথাও কহিল না, একবারও জিজ্ঞাসা করিল না তপতীর ব্যাখ্যাটা শারিয়াছে কিনা।

গাড়ী গেটে চুকিতে দেখিয়া তপতী মাথা তুলিল। বৃকের আটকানো নিঃশ্বাসটা যেন তাহাকে রিক্ত-সর্বস্ব করিয়াই বাহির হইয়া যাইতেছে।

পরদিন কলেজ হইতে ফিরিতেই মা বলিলেন,—আয় খুকী, কিছু রান্না কর দেখি?

তপতী কুণ্ঠিতপদে আসিয়া কহিল,—আজ থাক মা—ও ভাববে, তুমি আমায় প্ররোচিত করেছ, নিজের ইচ্ছায় আমি রান্না করি নি—দু'দিন থাক তারপর রাঁধবো।

মা কথাটার মূল্য উপলব্ধি করিলেন।

তপতী কহিল,—ও তো রবিবারে যাবে, মা, শনিবার একটা পার্টি আছে, ও না-গেলে কিন্তু আমি যাবো না—লোকে বড্ড কথা বলে।

—তা তুই বলিসনে কেন? অত লাজুক তো তুই নোস্ থুকী?

—লজ্জা নয়, মা, ও এড়িয়ে যায় নানা ছুতোয়—তুমি তো জানো না—বড্ড চালাক ও! আর দেখো মা, এবার যেন ও থার্ড-ক্লাসে না যায়, বলে দিয়ো তুমি—  
তপতী একটা বালিশের ওয়াড়ে ফুল তুলিতেছিল। মাকে বলিল,—এটা ওর বিছানার সঙ্গে দিতে হবে, মা, কী লিখবো বলো তো?

মা হাসিয়া বলিলেন—আচ্ছা মেয়ে তুই, কী লিখবি আমি তার কি জানি? নিজে না জানিস, ওকেই জিজ্ঞাসা করিস।

—ও কথাই বলতে চায় না—গস্তীর মেজাজ! ভয় করে আমার।

—মোটো গস্তীর নয়, খুকী তবে এই ক’দিন বোধ হয় একটু ব্যস্ত আছে, তাই তপন আসিয়া ঢুকিল খাইবার জন্য। মা হাসিয়া বলিলেন,—তুমি কেন এত গস্তীর হচ্ছে বাবা, তপন? এর মধ্যে এমন বুড়ো তুমি কিছু হওনি! বড্ড কাজের মানুষ হয়েছে, না? কথা বলো না কেন?

উচ্চহাস্য করিয়া তপন বলিল,—আমাদের বয়সের কাঁটাটা আপনার ঘড়িতে ঠিক আপনার প্রয়োজন মতোই চলে—না মা? কিন্তু কী কথা শুনতে চান—বলুন?

—যে-কোন কথা বলো, বাবা—গস্তীর-হওয়া তোমার শানায় না।

আচ্ছা—“মা যদি তুই আকাশ হতিস, আমি চাঁপার গাছ—

তোর সাথে মোর বিনি-কথায় হোত কথার নাচ।”

শুনলেন কথা: আপনি আকাশ তো আছেনই, আমি চাঁপা গাছ হতে পারবো বলে মনে হচ্ছে—বোশেখের খররোদে ফুটেবে আমার ফুল, যখন আর সব ফুলের মেলা শেষ হয়ে যাবে, সাদ্দ হয়ে যাবে বাসন্তী-উৎসব।

মা তপনের বেদনাহত চিত্তের সন্ধান জানেন না; কিন্তু তপতীর অন্তর আলোড়িত করিয়া আজ অশ্রুসাগর উদ্বেলিত হইয়া উঠিতেছে—কষ্টে আত্মসংবরণ করিয়া সে দাঁড়াইয়া রহিল। তপন স্থিতমুখেই থাইতে বসিয়াছে।

মা বলিলেন,—মাদ্রাজে যাবে, বাবা, তোমার বিছানাপত্র সব ঠিক করতে হবে। খুকী একটা ওয়াড় তৈরী করছে—কী লিখবে, ওকে বলে দাও তো।

—কিছু তো দরকার নেই। বিছানা আমার ঠিক আছে। কিছু লাগবে না, মা।

—কোথায় ঠিক আছে, বাবা! তোমার বোনের বাড়ী? তাহলে ওয়াড়টাই নিয়ো শুধু।

ঘরের জিনিস বাইরে কেন নিয়ে যাব, মা—বাইরের জিনিস ঘরে আনাই তো দরকার।

তপতী অত্যন্ত বিষন্ন হইয়া উঠিল! তাহার পাণ্ডুর মুখশ্রী দেখিয়া মা অত্যন্ত কষ্টবোধ করিলেন, কিন্তু তপনের সহিত বেশী কথা বলিতে তাঁহার ভয় করে। আজন্ম সত্যনিষ্ঠ এই ছেলেটি একবার ‘না’ বলিয়া বসিলে সহস্র চেষ্টাতেও আর ‘হাঁ’ হইবে না। অতঃপর জ্ঞাত মা বলিলেন,—এবার কিন্তু তোমায় রিজার্ভ-গাড়ীতে যেতে হবে, বাবা, কথা শুনো মায়ের।

—ওরে বাপরে! রিজার্ভ-গাড়ীতে তো রোগী আর ভোগীরা যায়, মা! আমি ভোগী তো-নই-ই, আপনার আশীর্বাদে রোগও নেই কিছু আমার।

—তুই কোরো না, বাবা, আজই গাড়ী রিজার্ভ করো গিয়ে; টাকা নিয়ে যাও।

—আমি তো অফিসের কাজে যাচ্ছি না, মা। নিজের কাজে যাচ্ছি।

—হোলই বা তোমার নিজের কাজ। টাকা নাও—নইলে আমি বড্ড দুঃখ পাবো।

তপন বড়ই বিপন্ন বোধ করিতে লাগিল। সত্য বলিলে মা বেশী দুঃখ পাইবেন। এই স্নেহশীলা নারীর ব্যথা চোখের সম্মুখে তপন দেখিতে পারে না,—কী জবাব দিবে? ঋণেক ভাবিয়া বলিল,—নিজের কাজটা নিজের টাকায় করা কি বেশী পৌরুষের কথা নয়, মা? সন্তানগর্ব তাতে তো মায়ের বাড়াই উচিত—তপন হাসিয়া উঠিল।

মা নিরন্তর রহিলেন। এ কথার পর কিছু বলতে যাওয়া চলে না। একটু ভাবিয়া কহিলেন,—কিন্তু তুমি খার্ড-ক্লাসে গেলে আমাদের যে অসম্মান হয়, বাবা! তোমার শ্বশুরের দিকটাও তো তোমার দেখা উচিত?

—আচ্ছা মা সেকেন্ড ক্লাসে যাবো—কেমন, খুশী হয়েছেন?

মা চুপ করিয়া রহিলেন। তপতী বুঝিতে পারিল না, মা কেন টাকা লইবার জ্ঞাত তপনকে এত ব্যাকুল হয়ে সাধছেন। মার কোলের কাছ বেসিয়া সে কহিল,—পার্টিটার কথাও তুমি বলো মা।

—তুই কেন বলতে পারিসনে, খুকী? শুনছো বাবা, শনিবার তোমাদের একটা পার্টি আছে—যেতে হবে তোমায়, বুঝলে?

—আমার না-গেলে হয় না, মা? আমি তো কোনদিন যাইনি।

না বাবা, যাও না বলে আমাদের কথা শুনতে হয়। লোকে বলে জামাইকে আমরা লুকিয়ে রেখেছি। তুমি তো লুকোবার মতো জামাই নও, বাবা—আমাদের সম্মান তোমায় রক্ষা করতে হবে তো—

তপন নীরবে খাইতে লাগিল। মা আবার বলিতে লাগিলেন,—এখানে না-খাকলেও অবশ্য কথা ছিল না, কিন্তু বাড়িতে থেকেও তুমি সমাজে মুখ দেখাবে না, এ আমাদের বড় লজ্জার কথা। খুকী হুঃখ করে।

আচ্ছা মা, যাবো—বলিয়া তপন উঠিল।

তপন বাহিরে যাওয়ার পর তপতী মাকে প্রশ্ন করিল,—কিছুই কি নিতে চায় না, মা? টাকা নেবার জ্ঞ তুমি এত সাধাসাধি কেন করছো?

—না খুকী, কিছুই নেয় না। ওর হুঁশ টাকা মাসোহারার সব টাকাই আমার কাছে জমা রয়েছে, একটি পয়সা কোনদিন নেয়নি।

—তাহলে হুঁশ টাকা নিয়েছে, শুনলাম যে? সে কথা মিথ্যে?

—না। হুঁশ টাকা ও নিয়েছে, কিন্তু কি যে করলো সে-টাকা নিয়ে তার কোন খবর পাচ্ছি না আমরা। জিজ্ঞাসা করতেও ভয় হয়, বাছা—ও অদ্ভুত ছেলে। যদি অপমান বোধ করে বলে বসে—‘চল্লয় আপনার বাড়ী থেকে’, তাহলে নিশ্চয় তপুনি চলে যাবে।

—কি করে বুঝলে তুমি? টাকা হুঁশ নিশ্চয় নিয়েছে মা, নইলে ওর এইসব হিল্লি দিল্লী যাওয়ার খরচ জুটছে কোথা থেকে?

—ও টাকা সে নিজের জ্ঞ নেয়নি, খুকী। আমায় কতবার বলেছে, ‘আপনার স্নেহবর্ণ কি করে শুধবো তাই ভাবছি, মা, টাকা নিয়ে আর ঋণভার বাড়িতে চাইনে’। কারও দান গ্রহণ করে না, কখনও মিথ্যা বলে না ও। একদিন এসে বলল—‘দিন মা, ভাত।’ ভাত রান্না হয়নি, বললাম, ‘ভাত তো, রাধিনি বাবা’। তাতে বললে কি জানিস,—বললে ‘রান্না তবে করুন, মা—নাহলে চাকরদের ভাত আনিয়ে দিন। ভাত খাব বলেছি, ভাতই খেতে হবে, নইলে মিথ্যা কথা বলা হবে।’ নেই রাত্রে চাকরদের ভাত ওকে দিতে হল। খেয়ে আবার বললে, ‘আপনার বাড়ীতে চাকররা কেমন খায়, মা, সেটা দেখে নিলুম কেমন কৌশলে—আপনি বুঝতেই পারলেন না।

তপতী বিমূঢ়ের মতো কিছুক্ষণ দাঁড়াইয়া রহিল; তারপর কক্কণ কণ্ঠে কহিল,—এসব কথা তুমি আমায় একদিনও তো বল নি, মা!

—তুই-যে কিছু খবর রাখিস না, তা আমি কেমন করে জানবো, বাছা?

তপতী আর কথা না বাড়াইয়া নিজের ঘরে চলিয়া গেল। ভুল তাহার হইয়া গিয়াছে, অত্যন্ত সাংঘাতিক ভুল, সংশোধনের উপায় আছে কিনা কে জানে!

তপতী সারারাত্রি বসিয়াই কাটাইয়া দিল।

জীবনের ধারাই যেন বদলাইয়া যাইতেছে তপতীর। স্নান সারিয়াই সে আসিয়া দাঁড়াইল তপনের কক্ষের সম্মুখে। পূজারত তপন স্তোত্র পাঠ করিতেছে,—শরণাগত দীনাস্ত-পরিত্রাণপরায়ণে, সর্বস্বার্থহরে দেবী নারায়ণি নমোহস্ততে তপতীও সঙ্গে সঙ্গে আবৃত্তি করিয়া গেল মনে মনে। এমনি কত-কিছুই সে তাহার ঠাকুরদার কাছে শিখিয়াছিল, সবাই প্রায় ভুলিয়া গিয়াছে। অথচ এই মহাধর্ম রত্নগুলি রহিয়াছে তাহারই স্বামীর কণ্ঠে। হাঁ, স্বামী! তপতীর যে আজ তপনকে স্বামী ভাবিতে অত্যন্ত তৃপ্তি বোধ হইতেছে। কেন সে এতদিন দেখে নাই তপনকে? কেন এতবড় ভুল করিল। ঐ-যে স্মৃষ্টি কণ্ঠের প্রণতি করিতেছে—

‘অস্তোধ্যরশ্চামলকুন্তলায়ৈ, বিভূতিভূষাঙ্গ-জটাধরায়,

হোমান্দদায়ৈ চ ফণাঙ্গদায়, নমঃ শিবায়ৈ চ নমঃ শিবায় ॥’

কী অপরূপ স্নন্দর ঐ শ্লোকমালা! শেলী, কীটস, বায়রণ, টেনিসন স্নন্দর সন্দেহ নাই, কিন্তু ঐ যে—অরণ্যে শরণ্যে সদা মাং প্রপাদি, গতিস্তং গতিস্তং স্বমেকা ভবানি’—উহাই কি কিছু কম স্নন্দর, কম আন্তরিকতাপূর্ণ!

তপতীর মনে হইল, ঠাকুরদা বাঁচিয়া থাকিলে তাহার আজ এই দুর্গতি হইত না। কিন্তু ঠাকুরদা তাহার কাজ যথাসম্ভব করিয়া গিয়াছেন, ষোল বৎসর পর্য্যন্ত তিনি তপতীকে শিখাইয়া গিয়াছেন আধ্যনারীর কর্তব্য—স্বামীর প্রতি, সংসারের প্রতি, সমাজের প্রতি। আধুনিক সমাজের সহিত সে পদ্ধতি হয়তো মিলে না কিন্তু তপতী সম্বয় করিতে পারিল না কেন? কেন সে ঠাকুরদার এতদিনের শিক্ষা একেবারে ভুলিয়া গেল!

তপতীর মনে হইল তাহার পিতামাতাই ইহার জন্য দায়ী। একদিন তপতীর অন্তর ছিল শুষ্ক হোমশিখার মতো পবিত্র, আজ তাহা বাড়বাগ্নি হইয়া উঠিয়াছে। হুটাই অগ্নি, কিন্তু তফাৎ আছে; কত বেশী তফাত তাহা হোমশিখা যিনি না দেখিয়াছেন, তিনি বুঝিবেন না। তপতীর মনে পড়িল—জন্মদিনে তপন তাহাকে আশীর্বাদ করিয়াছিল—‘জীবনে তোমার হোমশিখা জ্বলে উঠুক’—হয়তো আজ তাই হোমশিখা জ্বলিয়া উঠিয়াছে, কিন্তু ধাত্বিক তো আসিতেছে না! আসিবে, আসিবে, তপতীর জীবনে তাহার পিতামহের আশীর্বাণী ব্যর্থ হইবে না।

তপন উঠিয়া কখন থাইতে গিয়াছে। তপতীও বুঝিতে পারিয়াই খাবাব-ঘরে আসিয়া দাঁড়াইল। মা তাহার মুখের পানে চাহিয়া কহিলেন,—থেয়ে একটু ঘুমো গিয়ে, মা—মা, মজু হাসিলেন।—লজ্জায় তপতী লাল হইয়া উঠিল। মা হয়তো ভাবিয়াছেন, তপনের সহিত তপতী রাত্রি-জাগরণ করিয়াছে। মাথা নিচু করিয়া দাঁড়াইয়া রহিল তপতী। কথাটা সত্য হইলে আজিকাল লজ্জাটা তপতীর

আনন্দেরই গ্লোতক হইতে পারিত ; কিন্তু সত্য নয় । কবে যে সত্য হইবে তাহাও তপতী জানে না । তাহার শ্বাস ভারী হইয়া উঠিল । তপতীর দিকে না চাহিয়াই তপন কহিল,—অধ্যয়ন একটা তপস্কা, মা, ভালো করে ওকে পড়তে বলুন—

—হাঁ বাবা, পড়ছে তো, আর তুমি কি করবে, বাবা ?—মাতা হাসিয়া প্রশ্ন করিলেন ।

তপনও হাসিয়াই জবাব দিল,—‘অজরামরবৎ প্রাজ্ঞবিদ্যামর্থঞ্চ চিন্তয়েৎ’ । ও বিদ্যার চিন্তা করুক, মা, আমি অর্থ চিন্তা করছি । ওর তো অর্থের অভাব নেই ।

—তোমার বুঝি বড্ড অভাব ? মা প্রশ্নটা করিলেন অভিমানাহত স্বরে ।

—অর্থের অর্থটা অত্যন্ত ব্যাপক, মা, তার অভাব আমারও আছে বৈকী । ধন—পুরুষার্থ, পৌরুষার্থ, পরমার্থ—অর্থের মানে তো শুধু টাকা নয় ।

মা চুপ করিয়া রহিলেন ; তপতী মাকে লক্ষ্য করিয়াই যেন অত্যন্ত নিম্নস্বরে কহিল,—অনর্থের মূল হয় অর্থটা সময় সময়—

ব্যবহার না জানলেই হয় । ব্যবহারের গুণে বিষণ্ড অমৃত হয়ে ওঠে—উত্তরটা তপনই দিল ।

তপতী চুপচাপ বসিয়া ভাবিতেছে—তপন তাহার কথায় উত্তর দিয়াছে । আরো কিছু কথা বলিয়া দেখিবে কি, তপতীর উপর উহার মনের ভাব কিরূপ ? বলিল,—অনেক সময় বিষকেও আবার অমৃত বলে ভ্রম হয় ।

—বিষকে বিষ বলে চিনবার শক্তিটা মানুষ লাভ করে জন্মার্জিত সংস্কার থেকে, আর শিক্ষা দ্বারা অর্জন করে তাকে অমৃতরূপে ব্যবহার করার শক্তি ।

মা উহাদের কথোপকথন শুনিতেছিলেন ; আনন্দিত স্বরে প্রশ্ন করিলেন,—বিষ আর অমৃতে তাহলে তফাৎ কোথায় বাবা ?

—শুধু ব্যবহারে, মা, আর কোন তফাত নেই । সব-ভালো আর সব-মন্দর অতীত এই বিশ্বের প্রত্যেকটি অণু । দেশ ভেদে, কাল ভেদে, পাত্র ভেদে সে বিষ হয়, আবার অমৃতও হয় ; যেমন—নারী, কোথাও বিলাসের ধ্বংসমূর্তি কোথাও কল্যাণী মাতৃমূর্তি ।

তপনের খাওয়া হইয়া গিয়াছে, উঠিয়া যাইতেছিল, তপতী কহিল ধ্বংসমূর্তি-কে কল্যাণী-মূর্তি করে গড়ে তোলায় ভার থাকে শিল্পীর হাতে ।

—হাঁ । কিন্তু শিল্পীর নিষ্ঠুর ছেনীর আঘাত লইবার জন্ত মূর্তিকে প্রস্তুত থাকতে হয়, বলিয়াই তপন চলিয়া গেল । কিন্তু কী সে বলিয়া গেল । তপতীকে কি তাহার নিষ্ঠুর ছেনীর আঘাত সহ্য করিতে হইবে ? হয় হোক,—তপতী সহ্য করিবে । কথায় কথায় যে-লোক বাক্যের এমন ফুলঝুরি ফুটাইতে পারে, অত্যন্ত সহজ ভাষায়, অতিশয় আন্তরিকতা দিয়া যে বলিতে পারে—আমি শিল্পী আমি তোমায়

ভালবাসি বলিয়াই আমার নির্ভর অজ্ঞাঘাতে তোমায় নিখুঁত করিয়া তুলিব, তপতী তাহার হাতে আত্মসমর্পণ করিয়া ধরা হইয়া যাইবে। আত্মক ঐ রূপকার, আঘাতে আঘাতে তপতীর সমস্ত কুশ্রীতা ঝরাইয়া দিক, ফুটাইয়া তুলুক তপতীর সারা দেহ-মনে অপকৃপের মহিমাম্বিত ঐশ্বর্য !

তপতীর চোখে দুইবিন্দু জল টলমল করিয়া উঠিল তাড়াতাড়ি সে চলিয়া গেল মার কাছ হইতে। আশ্চর্য্য ! এমন না হইলে মা-বাবা উহাকে কেন এত ভালবাসিবেন ? তপতী কেন এতকাল দেখে নাই ? কেন সে বন্ধুদের কথা শুনিয়া আপনার সর্বশ্রেষ্ঠ ধনকে এমন করিয়া অবহেলা করিয়াছে !

কালই মাত্রাজ চলিয়া যাইবে। আজ বিকালে উহাকে পাটিতে লইয়া যাইতে হইবে। দেখিবে সকলে, তপতীর স্বামী অপকৃপ, অত্যাশ্চর্য্য !

বিকালে স্বসজ্জিতা তপতী অপেক্ষা করিতেছিল, তপন আসিতেই তাহাকে পাশে বসাইয়া স্বয়ং গাড়ী চালাইয়া চলিল। মুখখানি তাহার হাসিতে দীপ্ত হইয়া উঠিয়াছে, রঞ্জিত হইয়া গিয়াছে তাহার অন্তর আজ প্রেমের রক্তিমায়। যথাযোগ্য সম্বন্ধনার সহিত তপন ও তপতীকে বসানো হইল। তপন ভাবিতেছে, তাহাকে এভাবে এখানে লইয়া আসিবর কী কারণ থাকিতে পারে তপতীর পক্ষে ! তপতী কি আজ এতকাল পরে তাহাকে ভালবাসিতে আরম্ভ করিল নাকি ! না—লোকের কথা বলা বন্ধ করিবার জন্তই তপতী এ-খেলা খেলিতেছে ! আপনার প্রয়োজন সিদ্ধ করিবার জন্ত তপতীর মতো মেয়ে সবই করিতে পারে। কিন্তু তপতীর অত্যাচার আচরণ অত্যন্ত আন্তরিক। তপন নীরবে ভাবিতে লাগিল।

একটি মেয়ে বলিল,—আপনি নিরামিষ খান—এখানে অল্পবিধা হবে না তো ?

—না, কিছু না। মাংস ছুঁলেই আমার জাত যায় না।

—তাহলে খান না কেন ? গোড়া তো আপনি নন দেখছি।

—অনেকগুলো কারণ আছে না-থাবার। তার মধ্যে বৈজ্ঞানিক কারণটা হচ্ছে—বহু যুগ ধরে সিদ্ধকরা খাত্ত থেকে আর শাকশক্তি থেকে মানুষের পাকস্থলী বেশী মাংস খাবার যোগ্যতা হারিয়েছে। যে-কোন মাংসাশী জন্তুর পাকস্থলীর সঙ্গে মানুষের পাকস্থলীর তুলনা করলেই সেটা বোঝা যাবে।

—অল্প কারণটা কি ?

—পৃথিবীতে ফল-মূল-শস্যের তো অভাব নেই—মাংস খাওয়া নিঃপ্রয়োজন অন্তত আমাদের গরম দেশে অলস কর্ম-জীবনে দরকার হয় না মাংস-খাবার।

—মাংস কিন্তু শরীরে শক্তি সঞ্চয় করে।

—ওটা ভুল ধারণা। ঘোড়ার থেকে বেশী শক্তি নেই বাঘের ; থাবা থাকলে ঘোড়ার সঙ্গে যুদ্ধে বাঘ নিশ্চয় হেরে যেতো। ঘোড়া মাংস খায় না।



তপনের যুক্তির উৎকৃষ্টতা সকলকে আকৃষ্ট করিল। মেয়েটি বলিল,—আরো কোনো কারণ আছে কি আপনার মাংস না-খাবার ?

ঐ, মনের সান্নিধ্যতা ওতে ক্ষুধ হয়। মনকে যারা লালন করতে চায় মাহুঘের মতো করে, এই উষ্ণ দেশে তাদের মাংস না-খাওয়াই উচিত। পার্থিব চিন্তার ধারা হয়তো ওতে বিকৃত না হতে পারে কিন্তু পৃথিবীর ওপারের বিষয়ও চিন্তা করে এমন লোকের অভাব নেই।

আলোচনাটা গম্ভীর হইয়া উঠিতেছে, তরল করিবার জন্য একজন কহিল,— আপনি এতকাল আমাদের কাছে আসেননি কেন বলুন তো ? ভয়ে ?

অপরাধটা তপতীরই। সে তপনকে লইয়া আসিবার জন্য কেনদিন আগ্রহ প্রকাশ করে নাই। তপন কি বলে, শুনিবার জন্য সে উৎসুক হইয়া উঠিল। তপন হাসিয়া উত্তর দিল—অত্যন্ত বেমানান ঠেকবে বলে। পলাশফুল বনেই থাকে—মার্কেটের কাচের ঘরে ওকে মানায় না।

কথাটায় তপনের বিনায়াতিশয়ের সহিত তীক্ষ্ণ ব্যঙ্গ মিশিয়া আছে।

—আমরা বুঝি কাচের ঘরে থাকি।—আমাদের এমনি অসম্মান করবেন নাকি আপনি ?—মেয়েটি বলিল।

—ঐ ভয়েই তো আসি নি। আপনাদের সম্মান এবং অসম্মানের দেওয়াল-গুলো এত ঝুঁকো যে ঢুকতে ভয় করে। অতি সাবধানে টেলিফো করে বলতে হয়—চার ডজন গোলাপ, ছ'ডজন ক্রীমস্ট্রীমাম, পাঁচ ডজন কমুস্...

তপনের বলার ভঙ্গীতে অনেকেই হাসিয়া উঠিল। কিন্তু যে মেয়েটি অসম্মানের কথা তুলিয়াছিল, সে বলিল বিক্রপ করিয়া—আর বনে গিয়ে আপনার ঘাড় মটকে আনতে হয়, কেমন ?—তপন নিঃশব্দে হাসিল। মেয়েটি পুনরায় বলিল,—আমরা—যে কাচের ঘরের সাজানো ফুল, সেটা আপনি প্রমাণ করুন, নইলে ছাড়ছি না।

—না-ছাড়লে অজবিধা হবে না, কাচের ঘরে ঢুকতে সাধ হয় মাঝে-মাঝে।

—তা হলে এবার ঢুকে পড়লেন—কেমন—? মেয়েটি তপনকে ঠকাইয়াছে।

আমায় ঢুকবার অহুমতি দিয়ে এবার কিন্তু আপনিই প্রমাণ করলেন যে, এটা কাচের ঘর।—তপন হাসিল।

মেয়েটি আপনার বাক্যজালে জড়িত হইয়া এমন নির্বোধের মতো ঠকিয়া গেল দেখিয়া সকলেই বলিল—যা যা, কথা কহিতে জানিস নে।—লজ্জিত হইয়া মেয়েটিও হাসিতে লাগিল। তপতীর অন্তর আনন্দে শিহরিয়া উঠিতেছে। এই তপন—তাহার স্বামী—যাহার সহিত কথায় পাজা দিতে পারে এমন মেয়ে এখানে একটিও নাই ?

মিঃ অধিকারী এবং মিঃ বোস আসিয়া দর্শন দিলেন তপনের আসনের পার্শ্বে।

মিঃ বোস ব্যঙ্গ করিয়া বলিয়া উঠিলেন,—পূজোর সঙ্গে পার্টির মিল্লাচারের ঋষি-  
শূত্রটা কি তপনবাবু ?

কিছুমাত্র ইতস্ততঃ না করিয়া তপন উত্তর দিল,—মোগলের সঙ্গে থানা-খাওয়া ।

মিঃ বোসকে পরাজিত দেখিয়া মিঃ অধিকারী আরম্ভ করিলেন,—টিকির  
মাহাত্ম্যটা একটু বর্ণনা করবেন, তপনবাবু—আপনার পাঁচালী থেকে ?

সদাশাস্ত্রময় তপন তৎক্ষণাৎ আরম্ভ করিল,—

টিকির মাহাত্ম্য-কথা করিব বর্ণন,  
অবধান করো সব টিকিহীন জন ।  
টিকিটি রাখিবে যেবা জয় হবে তার,  
টিকি না-থাকায় হারে জজ-ব্যারিষ্টার ।  
কহিল টিকির কথা বেচারী তপন,  
টিকিতে বাঁধিয়া নিয়ো রমণীর মন ।

হা-হা করিয়া তরুণীর দল কলহাস্ত্রে সভা মুখরিত করিয়া তুলিল । মিঃ  
অধিকারী । ও মিঃ বোস রোষে ফুলিয়া উঠিতেছিলেন—মিঃ বোস কহিলেন,—অত  
উৎফুল্ল হবেন না । ইংরাজীতে একটি কথা আছে, ‘ফুল্‌স রাশ ইন হোয়্যার  
এঞ্জেল্‌স্...’ মিঃ বোস থামিলেন ।

ক্রোধে তপতীর দুই চক্ষু জ্বলিয়া উঠিতেছে । তাহার স্বামীকে তাহারই  
সম্মুখে ইহার ‘ফুল’ বলিবে এবং তাহা তাহারই জগৎ ? কিন্তু তপন জবাব  
দিল,—দেবদূতরা বেশী সাবধানী, তাদের পথ গোনাগাঁথার গলিতে, আর  
বোকাদের পথ দরাজ বড় রাস্তা—তাই এসব ব্যাপারে বোকারাই জয়ী হয়  
চিরদিন । জয়ী না হলেও তারা মরতে পিছোয় না, চালাক দেবদূতদের মতো  
লাভ আর লোকসান খতিয়ে দেখবার বুদ্ধি তাদের নেই ।

মুখের মতো জবাব হইয়া গিয়াছে । নির্ভীক তপন নিঃসঙ্কোচে নিজেকে  
বোকা মানিয়া লইয়াই যাহা জবাব দিল, তরুণীর দল তাহার প্রশংসা না করিয়াই  
পারে না ।

জৈনকা মহিলা কহিলেন—আপনি বোকা ? চালাক কে তবে ।

—যাদের ‘লাক্’ চা-চকোলেট আর চপ খেয়ে দিনে দিনে ফুলে ওঠে । তপন  
উত্তর দিল ।

কথাটার মধ্যে যে ছিল, তাহার বিষ তপতীকে পর্যন্ত কুণ্ঠিত করিয়া দিল ।  
মিঃ অধিকারী দাঁড়াইয়া উঠিলেন ; বলিলেন,—আপনি আর আমাদের চা-চপ  
খেতে ভাকবেন না, তপতী দেবী, উনি সইতে পারেন না বোকা যাচ্ছে—

তপতী অত্যন্ত লজ্জিত হইয়া বলিল,—আমি বড় লজ্জা পেলাম, মিঃ

অধিকারী, আমিই আপনাদের কাছে মাপ চাইছি এর জন্যে।—তপতী হাতজোড় করিল।

যেন কোনো মহার্ষা বস্তু লাভ করিয়াছে, তপন এমনি ভাবে হাসিয়া উঠিল ; বলিল, আমিও মাপ চাইছি, মিঃ অধিকারী। কিন্তু রসিকতা করে আখ্যাত করতে এলে প্রতিবাতের জন্য প্রস্তুত থাকা উচিত, এই কথা আমাদের বোকার অভিধানে লেখে। আর আমি শুধু প্রমাণ করে দিলাম যে, বোকা অস্বররা মাঝে মাঝে জয়লাভ করলেও স্বর্গরাজ্য পরিণামে দেবতাদেরই, কারণ বোকা অস্বররা সেটা রক্ষা করতে পারে না—এ কথা জেনেও তারা স্বর্গরাজ্য লাভের জন্য হাত বাড়ায়—বোকা কিনা, তাই ! স্বর্গ কিন্তু দেবতাদের পথ তাকিয়েই থাকে।

মিঃ অধিকারী ও মিঃ বোস খুদী হইয়া উঠিয়াছেন তপতীর সহানুভূতি পাইয়া। তপন বলিয়া চলিয়াছে তখনও,—আপনারা আমার এই ইচ্ছাকৃত অপরাধটা ক্ষমা না-করলেও জয়ী আপনাবাই।

তপন কী বলিতে চাহিতেছে ঠিক বুঝিতে না পারিয়া মিঃ অধিকারী ও মিঃ বোস তাকাইয়া রহিলেন। তপতী কিন্তু অত্যন্ত চঞ্চল হইয়া উঠিল। কেন সে মরতে সহানুভূতি দেখাইতে গেল ! মিঃ অধিকারীর চটিলে তাহার কি বহিয়া যাইবে ? কিছু একটা বলা উচিত ভাবিয়া সে বলিল,—থাওয়ার খেঁটা দেওয়া খুব অন্মায়।

তপন কহিল,—চা-চপ-খাদকদের চালাক আর 'লাকী' বলায় কোনো ব্যক্তিকে খেঁটা দেওয়া হয়, আমার ধারণা ছিল না !

—অন্ত ক্ষেত্রে হয়তো কথাটা দোষের নয়, এক্ষেত্রে অত্যন্ত অভদ্র শোনাচ্ছে।

তপন নির্বিকার চিত্তে তপতীর কথার উত্তরে মিঃ অধিকারীকে হাসিয়া কহিল,—ভদ্র তো আমি নই, মিঃ অধিকারী—বুদ্ধিও নেই। আমার কথাটা তো আপনাদের স্ববুদ্ধি হেসেই উড়িয়ে দিতে পারতো !

একটি তরুণী বলিল,—রিয়েলি ! রসিকতা করতে এসে রাগ করা চলে না। আপনারা 'ফুল' বলায় উনি কত হৃদর করে জবাব দিলেন, আর উনি এমন কিছুই বলেননি যাতে আপনাদের চটে যাওয়া চলে।

মিঃ অধিকারী এতক্ষণে বুঝিলেন, চটিয়া যাওয়া তাঁহার অন্মায় হইয়াছে। কহিলেন,—আপনাকে এরকম কথা বললে আপনি কী করতেন ?

তপন বলিল,—আমার বোকা বুদ্ধিতে চা আর চপ বেশী করে খেয়ে 'লাকী' হতাম।

তপনের মুখের ভাব ও কথার ভঙ্গীতে সকলেই হাসিয়া উঠিল। মিঃ বোস কহিলেন,—আচ্ছা, যেতে দিন—আস্থন, চা-ই থাওয়া যাক আর এক কাপ।

একটি মেয়ে বলিল, তা হলে আপনি সত্যিই চালাক হতে চান ?

মিঃ অধিকারী মুখখানা তখনও গম্ভীর ছিল ; বলিলেন,—দিন, খেয়েছি  
কিন্তু—

তপন হাসিয়া কহিল,—কিছু কিন্তু না, : অধিকারী, অধিকন্তুটা অনেক সময়  
আরাম দেয়। যেমন ধরুন—চশমার উপর সান্-শ্রাস, চিবুকের নীচে নেকটাই ;  
পাঞ্জাবীর উপর চাদর, চামড়া উপর উক্কী, চায়ের উপর চাঁদমুখ....

হাসিতেছে সকলেই। মিঃ অধিকারীও আর না হাসিয়া পারিলেন না।

স্মিতমুখে কহিলেন,—রিয়েলি, বাংলা ভাষাটা আপনার আশ্চর্য্য রকম  
আয়ত্তে—

মিঃ বোস কহিলেন,—কিন্তু উনি আমাদের বন্ধু হতে চান না—‘সো স্তরি’।

—সার্টেনলি হি উইল বি। নইলে আমরা গুঁকে ছাড়বো না—মিঃ অধিকারী  
কহিলেন।

তপতী নীরবে চা খাইতেছে। ইচ্ছা করিয়াই যে কঠিন পরিস্থিতির সে সৃষ্টি  
করিয়াছিল, তাহা হইতে সে মুক্তিলাভ করিল এতক্ষণে। তপতীর মনে এখনও  
ইহার যথেষ্ট প্রভাব বিস্তার করিয়া আছে। তপন বুকিল, ইহাদের এতটুকু  
অসম্মান আজও তপতী সহিতে পারে না। আর তপনের বেলায় ?—‘আমাকে  
এবার যেতে হবে, অল্পগ্রহ করে অতুমতি দিন।’ তপন আবেদন করিল।

—না—না—না, ভারী শ্রমের লাগছে আপনার কথা, এখনি কেন যাবেন ?

তরুণীর দল তপনকে ছাড়িতে চাহে না। মিঃ অধিকারী ও মিঃ বোস  
ঈর্ষাপরায়ণ হইয়া উঠিতেছেন। তাঁহাদিগকে অসম্মান করিয়াই লোকটা  
তরুণীমহলে খাতির জগাইয়া ফেলিতেছে ! মিঃ বোস কহিলেন, কারও কথায়  
গুর নীতি বদলায় না শুনেছি। অল্পরোধ বুধা।

মিঃ অধিকারীও কথাটায় সায় দিয়া কহিলেন, কাজের মানুষদের আটকাতে  
নেই।

তরুণীদের একজন চটিয়া বলিল,—আপনারা চান যে, উনি চলে যান, নয় ?  
—বাগটা সামলাইতে গিয়া মিঃ বোস ও মিঃ অধিকারী চূপ হইয়া গেলেন।—  
সমস্ত অবস্থাকে সামলাইবার জন্য তপতী কহিল,—না রে, কাজ আছে—যাই  
আমরা—

—তুই ধাম্ তো তপি ! ওকে এতকাল কিসের জন্য শুকিয়ে রেখেছিলি বল ?

তপতী কোনো উত্তর দিবার পূর্বেই তপন হাসিয়া কহিল,—অচল টাকা বার  
করা বোকামী—শুকিয়ে রাখতে হয় নিতান্ত ফেলে দিতে না পারলে।

তপন উঠিল ; তপতীর মন আচ্ছন্ন করিয়া ধনিয়া উঠিল বেদনার জ্বর।

তপনকে সে অচল টাকাই মনে করিয়াছে। বারম্বার আঘাত করিয়াছে হাতুড়ি দিয়া—নথের কোণায় বাজাইয়া দেখে নাই।

গাড়ী চলিতে চলিতে তপন একটা কথাও বলিতেছে না। তপতীর মন বিবাদ-মাগরে ডুবিয়া যাইতেছে। কেন সে মিঃ অধিকারীদের মহাহুভূতি দেখাইতে গেল ? যে-কোন অবস্থা-বিপর্যয়কে অনায়াসে আয়ত্তে আনিবার শক্তি যে তপনের অসাধারণ, ইহা তপতী আজ ভালো করিয়াই বুঝিয়াছে। তপন নিজেই তো সমস্ত সামলাইয়া লইল। বরং রসিকতা করিতে আসিয়া চটিয়া যাওয়ার জন্য মিঃ অধিকারী লজ্জাই পাইলেন। কিন্তু তপন কী ভাবিতেছে তপতীর সম্বন্ধে ? হয়তো ভাবিতেছে, তপতী আজও উহাদের জন্য তপনকে অভদ্র বলে। এখনও তপতী উহাদের অসম্মান সহিতে পারে না। তপতীর মাথা ঠুকিয়া মরিতে ইচ্ছা করিতে লাগিল। কিন্তু এখন আর উপায় নাই।

গেটে গাড়ীটা ঢুকাইয়া দিয়া তপন পুনরায় বাহির হইয়া গেল।

প্রেম যখন অন্তরে সত্য-সত্যই জাগিয়া উঠে তখন অনেক কথাই বলি-বলি করিয়া বলা হয় না। সমস্ত রাত্রি তপতী জাগিয়া রহিয়াছে, এতটা সময় চলিয়া গেল, অথচ কিছুই তাহার বলা হইল না তপনকে। কতবার তপতী ভাবিল—ঐ তো ও-ঘরে তপন ঘুমাইতেছে, তপতী গিয়া ডাকিলেই পারে ; কিন্তু লজ্জায় পা চলিতেছে না। এত কাণ্ডের পর তপতী আজ কি করিয়া তপনকে ভালবাসার কথা বলিবে। পিঞ্জরবদ্ধ পাখীর ন্যায় তাহার অন্তরাঙ্গা কাঁদিয়া ফিরিতেছে, তপতী আপনাকে নিঃশেষে তপনের কাছে মুক্ত করিয়া দিবার কোনো পথই খুঁজিয়া পাইতেছে না ! তপন যদি তাহাকে তাড়াইয়া দেয় ! যদি বলে—কেন এ ছলনা করিতে আসিয়াছ ? তপতী সে অপমানও সহ্য করিতে পারে ; কিন্তু তপন হয়তো কিছুই বলিবে না, নীরবে শুনিবে এবং নির্লিপ্তের মতো চলিয়া যাইবে। তথাপি তপতী একবার চেষ্টা করিবেই ; রাত্রিতে আর উঠাইবার কাজ নাই, ঘুমাক, সকালে সময় পাওয়া যাইবে নিশ্চয়।

প্রত্যুষে স্নান সারিয়া তপতী গিয়া দাঁড়াইল খাইবার ঘরে ! মাও আসিলেন—তপনের জন্য খাবার প্রস্তুত করিতে হইবে।

—কাল পার্টিতে তপনকে দেখে সবাই কি বললো রে খুকী ?—মাতার প্রশ্নের উত্তরে তপতী হাসিমুখে কিছুক্ষণ দাঁড়াইয়া রইল ; তারপর বলিল,—সবাই খুব ভালো বললো।

মা মধুর হাসিয়া বলিলেন,—আমার কথা ঠিক তো ? দেখ্ এবার—

তপতী কিছু বলিল না ; হাসিমুখে লুচি বেলিতে লাগিল। তপন আসিয়া ঢুকিল। এত সকালে আসিবে, মা তাহা ভাবেন নাই। বলিলেন,—আটটার

ট্রেন, বাবা, এত তাড়া কেন তোমার? ছটা তো বাজলো।

—সাতটায় বেরবো, মা,—থাবো, কাপড় পরবো,—একঘণ্টা তো সময়! দিন!

তপন খাইতে বসিল! তাহার ললাটের ত্রিপুর রেখায় আজ রক্তচন্দনের আভা, পরণে ফোঁম্যবস্ত্র, গলায় উত্তরীয়। তপতী বিমুগ্ধ বিশ্বয়ে চাহিয়া রহিল এই অসাধারণ পবিত্রতার দিকে। তপন কথা বলিতেছে না দেখিয়া মা কহিলেন,—পৌছেই চিঠি দিয়ে বাবা, ভুলো না যেন।

না মা, চিঠি দেবো পৌছেই!

—খুকী তো শেশন যাচ্ছিস ‘সী-অফ’ করতে?

—না মা, ও কিজন্তো কষ্ট করে যাবে? ফিরতে বেলা হয়ে যাবে অনর্থক। তাছাড়া আমি ট্যাক্সিতে যাচ্ছি, বাড়ীর গাড়ী নিলাম না—বলিয়া যাইতে লাগিল। তপতী কিছুই বলিতে পারিল না।

বাকী যাহা বলিবার তপতী বলিবে ভাবিয়া মা আর কিছু বলিলেন না। তপন নীরবে খাইয়া উঠিয়া গেলে মা তপতীকে চা ও থাবার দিয়া বলিলেন,—স্ট্রটেকেশগুলো গুছিয়ে দিয়েছিস?

দারুণ মানসিক উত্তেজনায় তপতীর সে কথা মনেই ছিল না।

—যাচ্ছি—বলিয়া তপতী তাড়াতাড়ি খাইয়া তপনের ঘরে আসিল, স্ট্রটেকেস গুছানো এবং চাবিবন্ধ রহিয়াছে। তপনের কাপড় পরাও হইয়া গিয়াছে, একটা চাকর তাহার জুতার ফিতা বাঁধিয়া দিল। অতঃপর একজন স্ট্রটেকেস-দুইটি গাড়ীতে লইয়া গেল। তপনও বাহিরে যাইতেছে,—সম্মুখে তপতীকে দেখিয়া বলিল আচ্ছা—চল্লাম—নমস্কার। তপন চলিয়া গেল মাকে প্রণাম করিতে; পরে মিঃ চ্যাটার্জিকেও প্রণাম করিল—এবং নীচে নামিয়া গেল।

সম্বিলম্বা তপতী ছুটিয়া নীচে আসিবার পূর্বেই তপনের গাড়ী ছাড়িয়া দিয়াছে।

কিছুই বলা হইল না—না, বলিতেই হইবে। তপতী তৎক্ষণাৎ একখানা গাড়ী আনাইয়া শ্রেনে ছুটিল। ট্রেন ছাড়িতে মাত্র কয়েক মিনিট বিলম্ব আছে। তপতী ছুটিতে ছুটিতে গিয়া প্লাটফর্মে চুকিয়াই দেখিল—বোনটির হাত ধরিয়া তপন দাঁড়াইয়া আছে। মনটা তাহার দ্বিধাগ্রস্ত হইয়া উঠিল স্ববিকের জগৎ, কিন্তু সবলে সমস্ত দৌর্বল্য ঝাড়িয়া ফেলিয়া তপতী নিকটে আসিয়া দাঁড়াইল—মেয়েটা কাদিতেছে—উদ্বেল আকুল হইয়া কাদিতেছে। তপন বলিতেছে তাহাকে,—লক্ষ্মী বোনটি, এমন করে কাদে না—যাও, স্বামীর কাছে যাও, স্বামীর চেয়ে বড়

বস্তু নারীজীবনে আর কিছু নেই, এই কথা তোকে আমি আজন্ম শিখিয়ে এসেছি—ওরে ধর ওকে!—একটি হৃন্দর যুবক আগাইয়া আসিল। মেয়েটা কিছুতেই তপনকে ছাড়িতেছে না, হু হু করিয়া কাঁদিতেছে। তপন তাহার মাথায় হাত রাখিয়া কহিল,—ছি মীরা, এতকালের শিক্ষা আমার সব পণ্ড করে দিবি তুই? চূপ কর—আয়, ওঠ, ধরিত্রির মতো সহিষ্ণু হোস—আকাশের মতো উদার হোস—স্বর্ধালোকের মতো পবিত্র থাকিস্—

গাড়ী ছাড়িতেছে। তপন পা-দানিতে উঠিয়া পড়িল। চোখের জলে কিছুই দেখিতে পাইতেছে না, তথাপি মেয়েটা তাকাইয়া আছে, অপস্রয়মান গাড়ীটার দিকে। তপতী যে এত কাছে দাঁড়াইয়া আছে উহাকে কেহ দেখিলই না তপন এ মুখে ফিরে নাই, আর ইহারা তপতীকে চেনে না! কিন্তু কেন ও এত কাঁদিতেছে? মাদ্রাজ গেল, কয়েকদিন পরেই ফিরিয়া আসিবে, তাহার জন্য এত কান্নার বাড়াবাড়ি কেন। তপতী বিস্মিতা ও ব্যাকুল হইয়া উঠিল। কী গভীর কারণ থাকিতে পারে ঐ কান্নার? ধীরে ধীরে সরিয়া আসিয়া সে মহাহুভূতি জানাইতে মীয়ার হাতটা ধরিতে গেল, চমকাইয়া মীরা কহিল,—কে আপনি? তৎক্ষণাৎ তপতীর মুখের পানে তাকাইয়া বলিল,—ও, লজ্জা করে না আমায় ছুঁতে—হাতখানা মীরা টানিয়া লইল।

তাহার স্বামী বলিল,—ছিঃ ছিঃ, ওরকম করে বলতে আছে?

মীরা সরোষে গর্জিয়া উঠিল,—জুতোর ঠোঁকরে নাক ভেঙে দেবো না। দাদাকে আমার দেশান্তরী করে দিল, আবার ‘লাভার’-এর দেওয়া আংটি হাতে পরে ‘সী-অফ’ করতে এসেছে। চলো, চলো—ওর মুখ দেখলে গঙ্গা-নাহিতে হয়!—মীরা তৎক্ষণাৎ স্বামীর হাত ধরিয়া টানিয়া লইয়া চলিয়া গেল।

যে কথা কেহ কোনদিন বলে নাই, বলিবার কল্পনা পর্যন্ত করিতে পারে না, মীরা তাহাই বলিয়া গিয়াছে। তপতীর সমস্ত আভিজাত্য সমস্ত অহঙ্কার ধরার ধুলায় লুটাইয়া দিয়া গেল। ‘লাভার’-এর দেওয়া আংটি হাতে পরে—তপতী শিহরিয়া আপনার বাম হাতের অনামিকার দিকে চাহিল—মিঃ অধিকারীর প্রদত্ত আংটির হীরকখণ্ডটি জলজল করিতেছে জলন্ত অঙ্গারের মতো। আপনার অজ্ঞাতসারেই তপতী আংটি খুলিয়া ফেলিল।

তপন যাহা কোনদিন বলে নাই, মীরা তাহাই নিতান্ত সহজে বলিয়া দিল। বিরুদ্ধে তপতীর কিছু বলিবার নাই। আজ দীর্ঘ পাঁচমাস সে ঐ আংটি পরিয়া আছে। তপতীর চরিত্রের বিরুদ্ধে ঐ জলন্ত জাগ্রত প্রমাণকে লুপ্ত করিবার শক্তি আজ আর কাহারও নাই।

মৃত্যু-পাণ্ডুর তপতী আসিয়া গাড়ীতে উঠিল।

—ওর বোনের ঠিকানাটা তুমি জানো মা? তপতী মাকে প্রশ্ন করিল।

—না রে—কেন, তুই জানিস নে? দেখিসনি তাকে তুই?—মা প্রতিপ্রশ্ন করিলেন।

—দেখেছি সেদিন ষ্টেশনে! কিন্তু ঠিকানা জানবার আগেই চলে গেল।

—বড় অগ্নায় হয়ে গেছে মা! ওকে একদিন তোর গিয়ে আনা উচিত ছিল।

—তুমিও তো বলো নি মা, আজ বলছো অগ্নায় হয়েছে।—তপতীর কণ্ঠস্বর ব্যথা-করণ শুনাইতেছে।

স্বামী বিরহ-বিধুরা কন্ঠার কথা শুনিয়া মা সম্মুখে বলিলেন,—তপন ফিরে এলেই যাবি একদিন;—আজ বোধ হয় তার চিঠি পাবি তুই।

বিষণ্ণ তপতী বিস্ময় মুখে চলিয়া গেল। সে চিঠি পাইবে। এতবড় ভাগ্য সে অর্জন করে নাই আজও। এই দীর্ঘ সাতদিন প্রতিটি মুহূর্ত তপতীর অন্তর ধ্যান করিয়াছে তপনের মূর্তি—কিন্তু তাহার অত্যন্ত দেবী হইয়া গিয়াছে। শুধু দেবী হইলেই হয়তো ক্ষতি হইত না, তপতীর অন্তঃসারণ্য অহঙ্কার তপনকে বিদীর্ণ করিয়া দিয়াছে, বিচ্ছিন্ন করিয়া দিয়াছে তপতীর অন্তর হইতে তাহার অন্তরতমকে। ভাবিয়া ভাবিয়া তপতী ক্লান্ত হইয়া পড়িতেছে। তাহার পুণ্যশ্লোক ঠাকুরদা যেন তাহাকে চোখ রাঙাইয়া বলেন,—“আতো শেখালাম, খুকী—সব পণ্ড করে দিলি!” কিন্তু কেন সে এত ভাবিতেছে? তপন তো কয়েকদিন পরেই ফিরিয়া আসিবে। মীরা বলিয়াছে তাহাকে অত্যন্ত কুৎসিত কথা, কিন্তু তপন তো কোনদিন কিছু বলে নাই। যেদিন সে মিঃ ব্যানার্জীর কোলে শুইয়া তপনের কাছে মুক্তি-ভিক্ষা চাহিয়াছিল, সেদিন……ই্যা, সেদিন কিন্তু তপন অসহ্য বেদনায় লুটাইয়া পড়িয়াছিল।

সময় আর কাটিতে চাহে না—কতক্ষণে ‘ডাক’ আসিবে। তপতী জানে তপন তাহাকে চিঠি লিখিবে না—কিন্তু মার পত্রে খবরটা জানা যাইবে। অতদূর রাস্তা, ইন্টার-ক্লাসে গিয়াছে, ভালোয় ভালোয় পৌঁছাইলেই ভালো।

মা ডাকিলেন,—আয় খুকী—চিঠি এসেছে, পড়—

তপতী পড়িল,—‘মা’ আপনার শ্রীচরণাশীর্ষাদে নিরাপদে এসে পৌঁছেছি; আছি সমুদ্রের কিনারে। এ নীড় কালই ছাড়তে হবে। গতরাত্রে শুনেছি সাগরের অশান্ত কল্লোল; মনে হচ্ছিল, হুহিতা ভারতের হৃদশায় বিগলিত-হৃদয় মহাসিন্ধুর আর্তনাদ বুঝি আর থামবে না।

আমার কোটি কেটি প্রণাম জানবেন। ‘ইতি—তপন।’

সামান্য কয়েকটি লাইন মাত্র। কিন্তু তপতীর মনে হইল, হুহিতা ভারতের হৃদশায় বুঝি কোনো হৃদয়-সমুদ্র-ক্রন্দনে উদ্বেলিত হইয়া উঠিয়াছে। মাকে



চিঠিখানা ফিরাইয়া দিয়া তপতী আসিয়া বিছানায় লুটাইয়া পড়িল।

বিকালে ঝি আসিয়া সংবাদ দিল—মিঃ ব্যানার্জী, মিঃ বোস, মিঃ অধিকারী ইত্যাদি সব আসিয়াছেন। তপতী যাইতে পারিবে না বলিয়া দিল। মা মেয়েকে একটু অস্থমনা করিবার জন্য বলিলেন,—যা না, মা একটু গল্প কর গিয়ে—না-হয় খেলা করগে একটু—

তপতী অকস্মাৎ উদ্ভূত হইয়া উঠিল। বলিল, যাবো না, যাও।

মা তাহার মনের অবস্থা বুঝিয়া নীরবেই চলিয়া গেলেন। ভাবিতে লাগিলেন—সেই তপতী, যে দিনরাত হাসিখুসি আর গল্প লইয়া মাতিয়া থাকিত, সেই কিনা স্বামী বিরহে একেবারে ভাঙিয়া পড়িয়াছে।

তাঁহার আনন্দ হইল, হাসিও পাইল। ভাবিলেন, তপন খুকীকে আলাদা পত্র না-দেওয়ায় উহার অভিমানটা হয়তো বেশী হইয়াছে। যা রাগী মেয়ে! তপন যে খুব ব্যস্ত রহিয়াছে সেখানে, ইহা খুকী কেন বুঝিতেছে না।

কিন্তু দিনের পর দিন চলিয়া যাইতেছে, প্রায় পনের দিন কাটিল, না-আসিল খুকীর চিঠি, না-বা মার চিঠি। মা-ও এখন ভাবিতেছেন। স্বামীকে তিনি জিজ্ঞাসা করিয়া জানিলেন, তিনিও তপনের কোনো পত্র পান নাই। তপতীকে ডাকিয়া কহিলেন,—তোকে কি বলে গেছে রে খুকী?

—মাস দুই দেৱী হবে, বলেছে, মা। তপতী মৃদুস্বরে উত্তর দিল।

মা তাহার মুখের দিকে চাহিয়া দেখিলেন, তপতী অত্যন্ত বিমনা হইয়া পড়িয়াছে। মেয়ে কষ্ট পাইতেছে ভাবিয়া মা আর কোনো কথা তুলিলেন না।

তপতীর কিন্তু মনে পড়িয়া গিয়াছে মীরার কথাটা—‘দাদাকে আমার দেশান্তরী করে দিল!’ সত্যিই কি তাই? সত্যিই কি তপন আর আসিবে না? তারই জন্য কি মীরা সেদিন অত কামায়া ভাঙিয়া পড়িতেছিল? হয়তো তাই—হয়তো তপতীকে সত্য-সত্যই তপন মুক্তি দিয়া গিয়াছে।

তপতী আর অধিক ভাবিতে ভরসা পাইতেছে না। ভাবনার স্রষ্টা ধরিয়া উঠিয়া আসিতেছে মিঃ ব্যানার্জী, মিঃ বোস, মিঃ সাহা—তপনকে অপমান করিতে তপতী যাহাদিগকে অজ্ঞপ্তে ব্যবহার করিয়াছে। যাহারা বারংবার বলিয়াছে,—তপন নির্লজ্জ, উহার মান-অপমান জ্ঞান নাই—তাহারাই আজ অজস্র অবহেলা সহ্য করিয়া তপতীর দরজায় ধরণা দেয়। আর তপন, প্রত্যেকটি কথায় যাহার অহুভূতির মণি-মাণিক্য ছড়াইয়া পড়ে, যাহার বিনয়ের মধ্যেও জাগিয়া থাকে যুগ-সংস্কৃত সংস্কারের আভিজাত্য, অপমানকে যে নীলকণ্ঠের মতো আত্মসাৎ করিয়া অমৃত বর্ষণ করিয়া যায়—সেই ঋষির মতো স্বামী তপনকে সে অপমান করাইয়াছে ঐসব পথের কুকুর দিয়া!...বেদনায় তপতীর অন্তর অসাড় হইয়া

পড়িতেছে। কিন্তু কী করিবার আছে। ঠিকানা পর্যন্ত দিল না। বোনের ঠিকানাটাও জানিয়া লওয়া হয় নাই। তপতী চারিদিকেই অন্ধকার দেখিতে লাগিল।

মিঃ চ্যাটার্জী আসিয়া কহিলেন,—ওগো শুনছো, তোমার জামাই-এর কাণ্ড ছাথো—

তপতী তৎক্ষণাৎ কান খাড়া করিল। মা বলিলেন,—খবর পেয়েছ ?

—না। খুঁকী চিঠি পায় নি ?—মিঃ চ্যাটার্জী উদ্বিগ্ন হইয়া উঠিলেন।

—না। —বলিয়া তপতীর মাতা একটা নিঃশ্বাস ফেলিলেন। পুনরায় বলিলেন,—কী কাণ্ড তবে ?

—অফিসের একটা কেরানীর অস্থখ ছিল প্রায় তিন-চারমাস। তপন তাকে হাসপাতালে পাঠিয়েছিল। আজ সে ফিরে এসে আমার পায়ে আছড়ে পড়ে বললে—সে অ্যানিমিক্ হয়েছিল, তপন তাকে নিজের শরীরের রক্ত দিয়ে বাঁচিয়েছে।

—রক্ত !—তপতী শিহরিয়া পিতাকে প্রশ্ন করিল।

—হ্যাঁ বে—তুইও জানিস না তাহলে। তারপর হাসপাতালে কত টাকা দিয়েছে, এরকম রোগীদের কিনে রক্ত দেবার জন্তে। সেই দু'লাখ টাকায় এসবই করেছে বোধ হয়। আমার বলেছিল—‘ভালো কাজেই টাকাটা লাগাবো বাবা।’

দু'লাখ কেন, দশ লাখ তপন খরচ করুক সর্বস্ব বিলাইয়া দিক কিন্তু নিজের রক্ত কেন দিল ! কবে সে করিল এ কাজ ! তপতীর সারা মন বাথা-কষ্টকিত হইয়া আসিতেছে। কাকণোর শীতলতম শ্রোতে অবগাহন করিয়া ফিরিতেছে, তাহার হৃদয়টা বুঝি-বা ফাটিয়া চূর্ণ হইয়া যাইবে।

অনেকক্ষণ একা বসিয়া থাকার পর অকস্মাৎ তপতী উঠিয়া মার কাছে গিয়া বলিল,—ওর ঘরের চাবিটা দাও তো, মা ?

মা চাবি বাহির করিয়া দিলেন। তপতী আসিয়া ঘরটা খুলিয়া ফেলিল। একটা ছোট টেবিল রহিয়াছে, উপরে মোটা কাচের আবরণের প্যাড। কাচটার নীচে একখণ্ড কার্ডএ কী লেখা আছে—টানিয়া পড়িল তপতী—‘আমার বিদায়-অশ্রু রাখিলাম, লহো নমস্কার।’

তপতীর শ্বাস্তব্ধী অবশ হইয়া আসিতে লাগিল। সামলাইবার জন্ত সে টেবিলের উপরেই মাথা গুঁজিয়া বসিয়া পড়িল তপনেরই চেয়ারটায়া।

কতক্ষণ কাটিয়াছে খেয়াল নাই তাহার মা স্নেহভরা তিরস্কার করিয়া চুকিলেন—কি তুই করছিস, খুকি ! স্বামী সবারই বিদেশে যায়, অমনি করে কাঁদে নাকি তার জন্তে ? আয়, খেতে আয়।

—কাঁদি নি মা, যাচ্ছি—তুমি যাও—যাচ্ছি আমি—

তপতীর কণ্ঠস্বরে মা অত্যন্ত ভীতা হইয়া পড়িলেন। প্রশ্ন করিলেন,—এমন করে কেন কথা বলছিল? চিঠি না-পেলে কি অত করে কাঁদে?

—ঠাকুরদা আমায় ঠকায় নি, মা—ঠকায় নি গো, ঠকায় নি!—বলিতে বলিতে তপতী ছুটিয়া গিয়া পড়িল পিতামহের প্রকাণ্ড অয়েল পেন্টিংটার পদপ্রান্তে।

বিমূঢ়া মাতা কিছুই বুঝিতে না পারিয়া ব্যথিত মনে দাঁড়াইয়া রহিলেন। স্নেহময় পিতা ছুটিয়া আসিয়া হাজার প্রশ্নে তপতীকে বিভ্রান্ত করিতে চাহিলেন—কিন্তু তপতীর মুখ হইতে শুধু একটিমাত্র কথাই বাহির হইল,—ও আর আসবে না, মা, আসবে না!....

দিনের পর দিন করিয়া দীর্ঘ দুইমাস অতীত হইয়া গেল, না আসিল তপন, না-বা তাহার চিঠি। প্রতীক্ষমানা তপতী স্নান হইতে স্নানতরা হইয়া উঠিয়াছে; বিশুদ্ধা বিবর্ণা হইয়া উঠিয়াছে তাহার রক্তাভ কপোলতল। তপতী আশা ছাড়িয়া দিয়াছে তপনের, মিঃ চ্যাটার্জীও আর আশা করেন না, কিন্তু তপতীর মা এখনও আশায় বুক বাঁধিয়া আছেন—তপন তাঁহার ফিরিয়া আসিবে। এমন ছেলে, হৃদয়ে যাহার অতখানি কোমলতা, সে কি তাহার বিবাহিত পত্নীকে ত্যাগ করিতে পারে! নিশ্চয় ফিরিয়া আসিবে। হয়তো কোনো বিপাকে পড়িয়াছে। হয়তো অসুস্থ হইয়াছে—হয়তো...না, মা আর অধিক ভাবিতে পারেন না।

তপতীকে প্রশ্ন করা বুঝা; সে কাঁদে না পর্যন্ত, উদাসদৃষ্টিতে মাঠের দিকে চাহিয়া থাকে। বাবা একদিন ডাকিয়া বলিলেন,—চল থুকাই, পূজার বন্ধে শিলং যাই, নূতন বাড়ীটা দেখিসনি তুই—

তড়িতাঘতের মতো তপতী চমকিয়া উঠিল। ঐ বাড়িতে তাহাদের মধু-চন্দ্রিমা যাপনের কথা ছিল। নিষ্ঠুর নিয়তির পরিহাস কি!

বুদ্ধিমতী তপতী বুঝিতে পারিয়াছে, পিতামাতার হৃদয়ে সে কী দারুণ শেল বিঁধিয়াইছে। তপন তো যাইত না, তপতী যে তাহাকে তাড়াইয়া দিয়াছে, একথা কেমন করিয়া সে বলিবে! শত অপমান সহ্য করিয়াও তপন যায় নাই, গিয়াছে নিতান্ত নিরুপায় হইয়া। কিন্তু যেদিন সে গেল, সেদিন তো তপতী তাহাকে চাহিয়াছিল। তপনের মতো আশ্চর্য বুদ্ধিমান ছেলে কেন সে কথা বুঝিল না!

চিন্তার কুল-কিনারা নাই। কলেজ হইতে ফিরিয়া সেই-যে তপতী ঘরে ঢোকে, আবার বাহির হয় রাত্রে খাইবার সময়। বেড়াতেই যাওয়া বন্ধ করিয়াছে, কাহারও সহিত কথা পর্যন্ত বলিতে চাহে না। মা সেদিন বহু কষ্টে তাহাকে বাহির করিয়া ‘লেকে’ বেড়াইতে লইয়া গেলেন। তপতী জলের ধারে গিয়া

বসিতে যাইতেছে, হাসির শব্দে চাহিয়া দেখিল, শিখা এবং মীরা বসিয়া আছে অদূরে একটা বেঞ্চে। তপতী ভালো করিয়া চাহিয়া দেখিল মীরাই বটে। মাকে বলিল, ঐ শিখার কাছে বসে রয়েছে, মা ওর বোন।—মাতা সাগ্রহে বলিলেন,—আয় তবে দেখি—আয় শীগ্গীর—মা তপতীকে টানিতেছেন। কিন্তু তপতীর ভয় করিতেছে। যদি মা'র সম্মুখেই মীরা তাহাকে অপমান করে! করিবেই তো। তপতী যাইতে চাহিতেছে না। মা কিন্তু টানিয়া লইয়া গেলেন। তপতী ধীরে ধীরে গিয়ে করুণ কণ্ঠে ডাকিল, শিখা? উভয়েই চকিত চাহিল। শিখা দৃষ্টি নত করিয়া বলিল—আয় বোস।—মীরা কিন্তু উঠিয়া দাঁড়াইল। মা বলিলেন,—তুমি তপনের বোন? তোমার দাদার খবর—

—তার তো আর কিছু দরকার নেই। মেয়ের বিয়ে দিন-গে আবার। দাদা এসে মুক্তিপত্রটা রেজেষ্টারী করে দেবেন, যেদিন বলবেন আপনারা।

মা একেবারে আকাশ হইতে পড়িলেন,—সেকি কথা মা! কী বলছো তুমি?

অত্যন্ত জোরে হাসিয়া উঠিল মীরা, কহিল—আপনার খেলুড়ে মেয়ে বুঝি কিছুই বলেনি আপনাকে। বেশ, বেশ, আমি বলে দিচ্ছি। আপনার মেয়ে আমার দাদার কাছে মুক্তি চেয়ে নিয়েছে—স্থির চিন্তেই—যাকে বলে 'কুল ব্রেন'। দীর্ঘ সাতমাস ধরে দাদা তাকে ভাববার সময় দিয়েছিল আর সেই সাতমাস আপনার গুণবতী কন্যা আমার দেবতার মতো দাদাকে নিজে অপমান করেছে, বন্ধু দিয়ে অপমান করিয়েছে, শেষকালে একজন বন্ধুর কোলে শুয়ে দাদার কাছে চেয়ে নিয়েছে মুক্তি। যান, এখন সেই বন্ধুটিকে কিষা যাকে ইচ্ছে জামাই করুন গিয়ে।—মীরা থানিকটা দূরে চলিয়া গেল। শিখা নির্নিমেধ নেত্রে চাহিয়া আছে তপতীর দিকে। তপতীর দেহের সমস্ত রক্ত যেন স্বেতবর্ণ ধারণ করিতেছে। মা'র কিছুক্ষণ সময় লাগিল সমস্ত ব্যাপারটা বুঝিতে, কিন্তু তপতীর এই দুই মাসের আচরণ তাঁহাকে চকিত করিয়া দিল—ইহা সত্য, অতিরঞ্জন নহে।

—খুকী!—মা ডাকিলেন। তপতী সাড়া দিতে পারিতেছে না।—এমন সর্বনাশ তুই করেছিস, খুকী? বল—উত্তর দে।—তপতী কাঁপিতেছিল, শিখা তাহাকে জড়াইয়া ধরিল। অস্থির হইয়া মা মীরাকে গিয়া ধরিলেন,—তোমার দাদা কি ফিরেছে, মা।

—না, ফিরতে দেবী আছে। কিন্তু তার ফেরায় আপনার আর কী কাজ? আমার দাদা আপনার মেয়ের যোগ্যপাত্র নয়; যোগ্যপাত্র দেখুন গিয়ে—

কী কথা বলিবেন, মা খুঁজিয়া পাইতেছেন না। মীরাকে এতটুকু চটানো তাঁর ইচ্ছা নয়। অত্যন্ত সাবধানে তিনি বলিলেন,—মুক্তি চাইলেই কি হয় মা? আমরা ওকে তপনের হাতে দিয়েছি—ও ছেলেমানুষ—যদিই-বা—

মীরা আবার সজোরে হাসিয় উঠিল,—ছেলেমানুষ ! বেশ মা, আপনার ছেলেমানুষ খুকীকে জিজ্ঞেস করুন তো, রাত বারটার সময় ক্যাসানোভায় ব'সে জর্নেক বন্ধুর সঙ্গে ধর্মাস্ত্রের গ্রহণ করার মতলব আঁটা কোনদেশী ছেলেমানুষী ?

তপতী রুদ্ধশ্বাসে মীরার কথা শুনিতেছিল ; সরোষে কহিল,—মিথ্যা ।

—চুপ কর শয়তানী ! আজন্ম সত্যসিদ্ধ তপনের বোন শ্রীমতী মীরা কোনকালে মিথো বলে না । ভাইরীতে তারিখ অবধি লিখে রেখেছি, তাদের হ'জনের কটো পর্যন্ত তোলা হয়ে গেছে । আর চাস্ প্রমাণ ।

মা বুঝিলেন, তপতী বহুদূর আগাইয়া গিয়াছে । তপতী করুণকণ্ঠে কহিল,  
—প্যানটা আমার নয়, মা' মিঃ ব্যানার্জী বলেছিলেন একদিন—

—বেশ ! রাজী হোন-গে এবার—মীরা আরো খানিকটা চলিয়া গেল ।

মা মীরাকে কোনরূপে একবার তপতীর বাবার নিকট লইয়া যাইবার জন্য হাত ধরিয়া বলিলেন,—তুমি একবার আমার বাড়ী চলো, মা, ওর বাবাকে সব কথা বলো গিয়ে—

—কিছুমাত্র প্রয়োজন নেই, মা, যার সঙ্গে খুসি আপনার খুকীর বিয়ে দিন-গে—

—হিন্দুমেয়ের কি হ'বার বিয়ে হয়, মা ?

—খুব হয় । আপনারদের আবার হিন্দুত্ব । হিন্দু, খ্রীষ্টান, মুসলমান—আপনারা কিছু নন ...

—যাবে না, মা একবার ? চলো—লক্ষ্মী মেয়ে আমার, চলো ।

—যেতে পারবো না—মাপ করবেন । যে বাড়ীতে আমার দাদার অসন্মান হয়, সে বাড়ীর ছায়াও আমি মাড়াইনে ।

—তোমার দাদা তাহলে নিশ্চয় ফিরবে না ?

—আমার দাদা আপনার ধন-দৌলতের প্রত্যাশী নয় । আপনার সঙ্গে আর কী সম্পর্ক তার ?

ক্রোধে অকস্মাৎ তপতী জ্ঞানহার্য হইয়া উঠিল । এই ভগ্নমী তাহার অসহ ; বলিল—তু'লাখ টাকা বুঝি খোলাস-কুচি ? সেটা গ্রহণ করতে তো বাধে নি ?

হাসিতে মীরা ফাটিয়া যাইবে যেন । হাসি ধামিলে—বলিল—ঐ তু'লাখ টাকা আপনার দ্বিতীয়-বিয়েতে যোঁতুক দিয়ে আসবো গিয়ে ।

শিখা স্নানকণ্ঠে কহিল,—ছিঃ তপি, টাকার কথাটা ভুলতে তো'র লজ্জা করলো না ?

মীরা গিয়া গাড়ীতে উঠিয়া ডাকিল—আয় রে শিখা ? শিখাও চলিয়া যাইতেছে ! মা ছুটিয়া আসিয়া তপতীকে কহিলেন,—তুই নিজে একবার ডাক,

খুকী ! যন্ত্র-চালিতের মতো তপতী গিয়া মীরার হাত ধরিল ; বলিল —আস্থন  
—চলুন আমাদের ওখানে—

সরোষে মীরা গর্জন করিয়া উঠিল, ছেড়ে দিন ! আপনাকে ছুঁলে গঙ্গা  
নাইতে হয় । অকস্মাৎ ক্রোধে তপতীর আপাদমস্তক জলিয়া উঠিল । কী এমন  
সে করিয়াছে যাঁহাতে তাঁহাকে ছুঁইলে গঙ্গা-নাইতে হইবে ?

সক্রোধে সে বলিয়া উঠিল,—যান যান, আপনার দাদা না এলেও আমার  
চলবে । গাড়ীটায় ষ্টার্ট দিয়া ষ্টিয়ারিংটা ধরিয়া মীরা অত্যন্ত সহজ স্বরে কহিল,—  
তাই চলুক—

“তোমাং যে দেখিবারে পায় অসীম ক্ষমায়

ভালো-মন্দ মিলায়ে সকলি,

এবার পূজায় তারি আপনারে দিয়ে তুমি বলি !....”

মীরা কি তাঁহাকে আশীর্বাদ করিয়া যাইতেছে ! তাঁহার শান্ত কণ্ঠস্বর  
তপতীকে অভিভূত করিয়া দিল । এই অত্যন্ত কোপন স্বভাবা মেয়েটি এত সহজে  
তাঁহাকে কবিতা বলিয়া আশীর্বাদ করিতে পারে । মীরার হাতটা পুনরায় ধরিতে  
গিয়া তপতী বলিল,—যাবেন না একবার ?

হাতটা সরাইয়া গাড়ীখানা চালাইয়া দিতে দিতে মীরা কহিল,—না, এখনও  
আমার সময় হয়নি । ‘সময় যেদিন আসিবে আপনি যাইব তোমার কুঞ্জে ।’

শিখা ও মীরা এক গাড়ীতেই চলিয়া গেল । মা তপতীর সঙ্গে কথা বলিতেও  
বিরক্তি বোধ করিতেছেন আজ । কী ভয়ানক কাণ্ড তপতী করিয়াছে, অথচ  
কিছুই তাঁহারা জানেন না । তপতী আসিয়া গাড়ীতে উঠিয়া এক কোণে বসিল ।  
মা বুঝিলেন, কথা সে আর কহিবে না । বাড়ী যাইবার জন্ত তিনিও গাড়ীতে  
উঠিলেন ।

গাড়ীতে যাইতে যাইতে শিখা কহিল,—তপতী কিন্তু একেবারে বদলে গেছে,  
মীরা—বড্ড রোগা হয়ে গেছে মেয়েটা ।

একটুও বদলায় নি । তুই জানিস কচা ! ও মেয়ে অত শীগ্গীর বদলাবে !

—কিন্তু যদি সত্যি বদলায়, তাহলে কি দাদা নেবে ওকে আবার ?—না সে  
অসম্ভব । ও অল্প কাউকে বিয়ে করলেই আমাদের ভালো হয় ।

শিখা চুপ করিয়া রহিল । কিছুক্ষণ পরে পুনরায় কহিল, দাদা যে নীল  
গোলাপ ফুটালো—যার জন্ত কৃষি-প্রদর্শনী ওকে প্রথম পুরস্কার দিয়েছে, সে  
গোলাপের নাম ‘নীল গোলাপ’ কেন দিল জানিস ?

—না ভাই, জানি না তো !—মীরা চাছিল শিখার দিকে ।

—তপতীর মার নাম নীলা গুঁর নামটা দাদা অমর করে দিল ।

—ওঃ ! দাদা একদিন বলেছিল,—শাশুড়ীর স্নেহকণ কি দিয়ে শুধবো, মীরা!  
—তাই চাষ করতে আরম্ভ করেছি। তাই বুঝি ‘নীল গোলাপ’।

উভয়েই চুপ করিয়া রহিল কিছুক্ষণ। মীরাই কথা কহিল,—পুরস্কারের  
টাকাটা দাদা বোটারী শিক্ষায় দান করেছে।

—আমাকে লিখেছে চিঠিতে। কিন্তু বিদেশে দাদা আর কতদিন থাকবে রে ?

—কাজ হয়ে গেছে। এবার ফিরবে, এই মাসেই ; দুজনে একসঙ্গে  
দেশে যাবো।

মীরার মুখ আনন্দে উজ্জ্বল হইতে গিয়া করুণ হইয়া গেল। বলিল, ঐ  
হতভাগীটাও যেতে পারতো। শিখা, আজ ঠাট্টা করে উড়াই সখী, নিজের  
কথাটাই !’……কৈদে কি করবো বল ? আমার কতদিনের সাধ, দাদা গল্প  
বলবে, তার ডানদিকে থাকবো আমি বাঁদিকে বৌদিদি—দুজনায় ঝগড়া করবো  
আবার ভাব করবো !……সুদীর্ঘ নিঃশ্বাসটা মীরা আর চাপিতে পারিল না।

শিখার হুই চোখে জল টলমল করিতেছে। মুছিয়া আস্তে কহিল,—বিয়ের  
সময় আমি থাকলে এমনটা হোত না। ওর বন্ধুগুলোই ওকে ভুলপথে চালিয়েছে  
তাদের স্বার্থসিদ্ধির জন্তে। কিন্তু আমার আশা ছিল, ওর মা ওকে সামলে নেবেন।

—ছন্নমতিকে কেউ সামলাতে পারে না, শিখা। ওর পতন বোধহয় বিয়ের  
পূর্বেই হয়েছে—ও আর পবিত্র নেই, মনে হয়।

—আমি কিন্তু তা মনে করিনে, মীরা। ওর বাল্যজীবন বড় সুন্দর। আর  
ও বন্ধুদেব কেবল খেলিয়ে নিয়ে বেড়াতো। কেউ ওর মন কোনদিন এতটুকুও  
টানতে পারে নি। আজও যে ও কাউকে ভালবাসে তা বিশ্বাস হয় না……  
হয়তো সে……

বাধা দিয়ে মীরা বলিল,—তাতে ক্ষতি বেশী আমাদের। ও বিয়ে না করলে  
দাদা শান্তি পাবে না। দাদা ওকে নেবে না, এ স্বর্ষের মতো সত্য—ভালবেসে  
ও মরে গেলেও নয়। দাদার সত্য কিছুই জ্ঞাত ভাঙে না, শিখা, এ-কথা তুই-ও  
তো জেনেছিস।

—হঁ, বলিয়া কিছুক্ষণ চুপ করিয়া রহিল। তারপর ধীর কণ্ঠে কহিল,—দাদা  
মুক্তিটা না দিলেই পারতো। অত শীগগীর কেন দিল তাই ?

—তুই বন্ধুর দিকটা বেশী মমতায় দেখছিস্, শিখা দাদার দিকটা তেমনি  
আখ্ দেখি। মিঃ ব্যানার্জীর কোলে মাথা রেখে সে দাদাকে বুঝিয়ে দিয়েছে  
মুক্তিই সে চায়, দাদাকে চায় না। সেদিনের সে-চাওয়ায় তার কোনো ছলনা  
ছিল না। ছিল সত্য, সহজ চাওয়া।

—কিন্তু আজ সে আবার দাদাকে চাইছে কেন ? ভালবাসছে বলেই তো।

—ও প্রেম অত্যন্ত ক্ষণস্থায়ী, শিখা। দাদা চলে যাওয়ায় ওর নারী-গর্বে আঘাত লেগেছে। দাদাকে ও বশ করতে পারলো না বলেই এই আকুতি ওর। তুই এত পড়াশুনা করেছিস, এসব কিছু বুঝিস নে। উপেক্ষা সহিতে পারে না নারী-হৃদয়। দাদাকে পেলে ও আবার অপমান করবে।

—কিন্তু এবার বিরহের আগুনে খাঁটি হয়ে ও দাদাকে সত্যি ভালবাসতে পারে তো?

—সেদিন যেন না আসে, শিখা, সে-কামনা আর করিস নে। ও যাক!

শিখা চুপ করিয়া গেল। তপতীর অদৃষ্টের নির্মমতা তাহাকে অত্যন্ত বিমনা করিয়া তুলিছে। তপনের জ্ঞাত ও মন কাঁদে,—কিন্তু তপন অসাধারণ শক্তিমান মানুষ, সমস্ত দুঃখ সে সহ্য করিতে পারিবে; কিন্তু তপতী—যদি সত্যিই সে তপনকে আবার ভালবাসে তবে তাহার জীবন দুঃখের অমানিশার চেয়ে কালো।

—বিরূদার খবর কি রে? কত গরু হোল তোর গোয়ালে?—মীরা প্রশ্ন করিল।

—তা হাজারখানেক। আমি রোজই যাই গুঁর সঙ্গে দমদম। আজ তুই আসবি বলে গেলাম না।

—দুজনেই তোরা অত গরুর যত্ন করিস্! দুধটা কি করিস, ভাই?

—যত্ন করবার লোক রয়েছে। দুধটা বিক্রী করা হয়, এক-চতুর্থাংশ বিলি করা হয় শিশু আর রোগীদের। গোবরে হয় দাদার চাষ-বাড়ীর সার। খাঁটি দুধ পাওয়া যায় না বলে দুধের চাষ করা, ভাই! দেশের লোক দুধ খেয়ে বাঁচুক।

আমার গুঁকে দাদা আদেশ করেছেন, বিনে-মাইনের স্থল-কলেজ করতে। খরচ অবশ্য দাদার সমস্ত উপার্জন, আমাদের আয় আর দেশের বড়লোকদের তহবিল থেকে আসবে। কিন্তু পড়ানো হবে খাঁটি বৈদিক প্রথা, আর ছাত্র হবে যাদের এক পয়সা দেবার সামর্থ নেই। আর নারী-বিভাগের কর্মী হবে তুই আর আমি। দাদার মনে কষ্ট আছে, পয়সার অভাবে কলেজে পড়তে পারি নি। তাই গরীবদের জন্মই তার স্থল-কলেজ, কোনো বড়লোকের ছেলেমেয়ে সেখানে গাঁই পাবে না।

শিখাও কথাটার কিছু কিছু জানিত। বলিল, আরন্ত হোক, আমরা তো আছি-ই।

—হয়ে গেছে আরন্ত। শিবপুরে আমাদের যে হাজার বিঘে পতিত জমি ছিল, সেখানে পাঁচশো খোলার কুঁড়ে ঘর তৈরী হয়েছে। গেটে লেখা হয়েছে—

‘সবার উপর মানুষ সত্য,—তাহার উপর নাই।’

মানুষের মাঝে, হে মানুষ—তুমি সত্যেরে দিয়ে গাঁই।



শেষের লাইনটা অবশ্য দাদার রচনা—মীরা আপন মনে হাসিয়া উঠিল।

শিখা মীরার মনের তল পাইতেছে না! তপতী-ভাগ্য-বিপর্যয়ে ব্যথিত শিখা মীরার হাস্য শুনিয়া কহিল,—মীরা, দাদা মহীয়ান, এ কথা তুই জানিস্, আমিও জানি। কিন্তু তপতীর জ্ঞান তোর মন কি এতটুকু বিচলিত হচ্ছে না আজ?

মীরা মিনিটখানেক চুপ করিয়া রহিল; তারপর বলিল,—সে কথা তোকে অনেকক্ষণ বলেছি সখী, ঠাট্টা করেই আজ ওড়াতে চাইছি আমার সেই একান্ত আপনার কথাটা!—তাহার কণ্ঠস্বরে শিখা চকিত হইয়া চাহিয়া দেখিল, মীরার দুই গুণ অশ্রুতে প্রাবিত হইয়া গিয়াছে।

মা'র মনে যে আশাটুকুও ছিল, তাহা একেবারে নিভিয়া গিয়াছে। স্বামীকে সমস্ত জানাইতে তিনিও কিছুক্ষণ নির্বাক থাকিয়া ধীরে ধীরে চলিয়া গেলেন। তপতী মা-বাবার সম্মুখে আসাটা এড়াইয়া যাইতেছে। কিন্তু এমন করিয়া দিন চলা কঠিন! পূজায় কলেজ বন্ধ হইলে পিতা কল্যাকে ডাকিয়া বলিলেন,—যা হবার হয়ে গেছে; তুই ভালো করে পড়াশুনা কর। যদি নিতান্তই সে না ফেরে, তখন অল্প দূর দেখা যাবে....

তপতী চুপ করিয়া রহিল। বাবা তপনকে অত্যন্ত স্নেহ করিতেন, ইহা সে জানে। বাবা আবার বলিলেন,—তুই আমাদের একমাত্র মেয়ে, তোর স্বথের জ্ঞান আমরা সবই করিতে পারি, খুকী—তোর আবার বিয়ে দেব—

কথাটা বলিয়া যেন মিঃ চ্যাটার্জী চমকিয়া উঠিলেন।

তপতঃ এখন কোনো কথা কহিল না দেখিয়া তিনি 'আঙুর ফল টক' এই নীতি অনুসরণ করিবার জ্ঞানই বোধহয়, এবং তপতীর নিকট তপনকে এখন খাটো করিবার জ্ঞানই হয়তো বলিয়া উঠিলেন,—এতো গোঁয়ার সে জানলে কি বিয়ে দিতাম! আমারই বোকামী।

মা কথাটা কিন্তু সমর্থন করিতে পারিলেন না, নীরবেই বসিয়া রহিলেন।

—'কাপড়-চোপড় গুছিয়ে নে—কাল শিলং যাব সবাই'—বলিয়া বাবা চলিয়া গেলেন।

কাপড়-চোপড় গুছাইয়া তপতী শিলং যাইবার জ্ঞান প্রস্তুত হইল। নাই যদি আসে তপন, কী সে করিতে পারে! তপনকে পাইলে হয়তো সে সখীই হইতে পারিত, কিন্তু যদি একান্তই না পাওয়া যায় তো তপতী কি তাহার পিতামাতার বুক শেলাঘাত করিয়া বিধবার মতো বসিয়া রহিবে! এই কয়দিন ধরিয়া তপতী বাবংবার এই চিন্তাই করিয়াছে। যে লোক একটা দিনের জ্ঞান এতটুকু রাগ দেখায় নাই, একটু প্রতিবাদমাত্র করে নাই, সে কিনা একেবারে অকস্মাৎ

সমস্ত ছাড়িয়া চলিয়া গেল। তপতী ইহা বিশ্বাস করিতে পারিতেছে না। তাহার পিতার কোটি মুদ্রা মূল্যের সম্পত্তি, তাহার অতুলনীয় রূপগুণ, তাহার মাতার এত যত্ন আদর—কিছুই কি তপনকে এখানে ফিরিয়া আনতে পারে না! থাক, ফিরিবার দরকার নাই, তপতী তাহার ভাগ্য বিধাতার উপরেই নির্ভর করিয়া চলিবে। এমন কিছুই ভয়ঙ্কর অপরাধ তপতী করে নাই, যাহার জন্য তপন তাহাকে এমনভাবে তাগ করিতে পারে। অকস্মাৎ তপতীর মনে পড়িল তপনের কথাটা—‘তাগ মানে মুক্তি, ক্ষুদ্র থেকে বৃহতে, লম্বিষ্ঠ থেকে গরীয়ানে’। হাঁ, মুক্তিই সে তাহাকে দিয়া গেছে! বেশ, তপতীরও চলিয়া যাইবে।

শিলং-এ আসিয়াই আলাপ হইল মিঃ রায়ের সহিত। রূপবান্ যুবক সঙ্গীতে তাঁহার অসামান্য অনুরাগ; আই-এ-এস্ পাস করিয়া আসিয়াছেন, শীঘ্রই কার্যে যোগদান করিবেন।

মিঃ চ্যাটার্জী সাদরে তাঁহাকে ডাকিয়া আনিয়া কন্ঠার সহিত আলাপ করাইয়া দিলেন। তপতী মাকে বলিয়াছে,—যদি সে একান্তই না আসে শা,—আমাকে বিবাহিতা বলে পরিচয় দেবার কি দরকার এখানে?—মা-বাবা কোনো উত্তর দেন নাই। তপতী মিস চ্যাটার্জী নামেই সম্বোধিতা হইতেছে। মিঃ রায়ও তাহাই জানিয়া রহিলেন।

কয়েকদিনের মধ্যেই মিঃ রায়-এর অসামান্য বাক্পটুতা, অল্পম সঙ্গীত-কুশলতা এবং বিলাতী ধরণধারণের গুণে তপতীর জরাজীর্ণ মনটা শীতলতার দিকে নামিতে লাগিল। রোজই তাহার দল বাঁধিয়া বেড়াইতে যায়—পাহাড়ের গাভীরা, ঝরনার চাপলা, পাইন-বনের শ্রামল স্রবমা চোখ জুড়াইয়া দেয়, মন ভরাইয়া তুলে।

পূজার সময় শিলং-প্রবাসী বাঙালীগণ একটি অভিনয়ের ব্যবস্থা করিয়াছেন; তপতী দুইদিনেই তাহার নেত্রী হইয়া পড়িল। এসব কাজে সে চিরদিন দক্ষ। তাহার পটুতা মিঃ রায় দুই চোখ ভরিয়া দেখেন আর বলেন—‘দি এঞ্জেল অব পাইন-বন-দি ডিভাইন নাইটিংগেল...’

তপতী রুমাল দিয়া তাঁর গায়ে হাল্কা আঘাত করিয়া বলে ‘নটি বয়!’...

অভিনয়ের আয়োজন সমারোহে চলিতেছে; বিজয়্যার দিন অভিনয়। কল্যাণী দেবী কহিল,—মিস চ্যাটার্জীর সঙ্গে মিঃ রায়ের বিয়ের দৃশ্যটা বড় হাসির।

—কেন?—প্রশ্ন করিল তপতী।

—মিঃ রায় বিলেতে কিছু করে এসেছেন কিনা, কে জানে।

—অভিনয়ে তার কি ক্ষতি হবে?—তপতী রুদ্ধস্বরে প্রশ্ন করিল।

—অভিনয়টা মাঝে মাঝে সত্য হয়ে ওঠে কিনা ?—কথাটা বলিয়া কল্যাণী হাসিল।

—আপনার কথাটাকে সত্যের মর্যাদা যদি উনি দেন, কল্যাণী দেবী, তাহলে আমি আপনাকে নিজের খরচে বিলেত পাঠাব এনকোয়ারী করতে—বলিলেন মিঃ রায়।

মিঃ রায়ের এই কথায় সবাই হাসিল।

কল্যাণী কহিল,—আপনি তো বেশ চালাক ! আমার কথাটাকে ঘুরিয়ে ওর কাছে ‘প্রপোজ’ করে বসলেন ? বুদ্ধি আপনার সত্যি হাকিমের মতো।

অতনী কহিল,—হাকিমী আর করার দরকার হবে না, হুকুম তামিল করবেন এবার থেকে।

তপতী এতক্ষণ চুপ করিয়াই ছিল ; হঠাৎ একটু তীক্ষ্ণস্বরেই কহিল,—ঠাকুরদা বলতো—‘যার বিয়ে তার মনে নেই, পাড়াপড়শীর ঘুম নেই ?’ আপনাদের দেখছি সেই অবস্থা ! কিন্তু আমার একটা কথা আছে।

সমস্বরে প্রশ্ন হইল—কি ?

—বিয়ের দৃশ্টি বাদ না দিলে নাটকের মর্যাদা থাকবে না। বিয়ের বন্ধনে ঐ নায়ক—নায়িকাকে বাঁধা যায় না। নাট্যকার বিয়ের কথাটা মোটে লেখেন নি।

—নাটকটা ভালো বলেই আমরা নিয়েছি। কিন্তু পূজোর দিন একটা করুণ নাটক !

তপতী তৎক্ষণাৎ উত্তর দিল,—এই জগতে বহু মানুষের মনে ওর থেকে ঢের বেশী করুণ নাটকের অভিনয় হচ্ছে—

প্রস্তাব পাস হইয়া গেল। অর্থাৎ তপতীর কথার প্রতিবাদ করিতে কেহই উৎসাহ দেখাইল না। তপতীর এরকম কথার উদ্দেশ্য কিন্তু মিঃ রায় বুঝিলেন না। মিলনের দৃশ্টি তিনিই লিখিয়াছেন। তাঁহার লিখিত অংশটুকুকেই তপতী পরিত্যাগ করিল কেন ?

তপতীকে বাড়ী পৌঁছাইবার পথে একথণ্ড শিলাসনে বসিয়া তিনি প্রশ্ন করিলেন,—বিয়ের দৃশ্টি কেন বাদ দিলেন, মিস চ্যাটার্জী ?

তপতী আটের দোহাই দিয়া কহিল,—ও বই কেন ধরলেন ? আর কি বই ছিল না ? জ্যোতি গোস্বামীর বই অভিনয় করা অত্যন্ত কঠিন।

বহুদিনের বিরহের পর প্রিয় মিলনের দৃশ্টি ভালই জমতো।

না, জমতো না। যাদের এতটুকু কলারস-জ্ঞান আছে, তারা বলবে নাটকটাকে খুন করা হয়েছে।

কিছুক্ষণ মিঃ রায় চুপ করিয়া রহিলেন। বহুদিন তিনি বিলাতে থাকায়

বাংলা সাহিত্য সম্বন্ধে বিশেষ কিছু জানেন না ; প্রশ্ন করিলেন, জ্যোতি গোস্বামী পুরুষ না মেয়ে ? খুব ভালো লেখে বুঝি ?

জানি না । কিন্তু লেখে অদ্ভুত । বই এর নামও অদ্ভুত ‘মুক্তির বন্ধন’ ।

মিঃ রায় আশস্ত হইলেন । আর্ট না ফ্লগ করার জন্তই বোধ হয়, তপতী তাহার লিখিত অংশটি ছাঁটিয়া দিল, তপতীর হাতের মালা তিনি সেদিন পাইবেন না । ‘বাট ইফ্ গ্রেসাস গড্ উইল্’....

বাড়ী ফিরিয়া আপন কক্ষে একাকী বসিয়া তপতী ভাবিতে লাগিল, মিঃ রায় বেশ সুন্দর ছেলে । উহাকে বিবাহ করা যাইতে পারে, অবশ্য তার পূর্বে তপনের সহিত বিবাহ-বিচ্ছেদটা আইন-সিদ্ধ করা দরকার । যে আশা সে এতকাল পোষণ করিয়াছে, তপনকে তাড়াইয়া তাহাই ফলবতী হইয়া উঠিল । এ ভালোই হইল । তপনের মতো একজন নিতান্ত গোড়া অদ্ভুত প্রকৃতির লোক লইয়া সে করিবে কি ? তাহার বর্তমানের শিক্ষা-দীক্ষা মোটেই তপনের উপযুক্ত নয় । মিঃ রায়ই তাহার ভালো ।

কিন্তু এত তাড়াতাড়ি করিবার কি আছে ? কলিকাতা গিয়া আগে বিবাহ বিচ্ছেদটা পাকা করিয়া লওয়া যাক্—তারপর মিঃ রায়কে আরো একটু ভালো করিয়া বোঝা যাক্—এম. এ পড়াটাও শেষ হইয়া যাক্—পরে দেখা যাইবে ।

মিঃ রায় কিন্তু বড়ই ব্যস্ত হইয়াছেন । আজই তো তিনি প্রায় বলিয়া ফেলিয়াছেন ! ইহার মূলে শুধুই কী তপতীর রূপগুণ ? না, আরো কিছু আছে, তাহার বাবার টাকা, যে টাকার জন্ত তপনকে তাড়াইয়া দিয়াছে তপতী ! কিন্তু এ ভাবনাও ভাবিয়া লাভ নাই । যে তাহাকে বিবাহ করিবে, সেই তাহার বাবার টাকা পাইবে । মিঃ রায় কৃতবিগ্ন ব্যক্তি, তিনি তো অশিক্ষিত তপন নন ! টাকার তোয়াক্কা তিনি নিশ্চয়ই রাখেন না ! মুখে পাউডারের পাকটা আর-একবার বুলাইয়া লইয়া তপতী মার কাছে আসিল ।

মা কন্ঠার পরিবর্তন লক্ষ্য করিতেছিলেন, কহিলেন,—তোমার গলায় ইংরাজী গানগুলো বেশ মিষ্টি লাগে, খুকী ! ক’টা শিখলি ?

—শিখেছি তিন চারটা । মিঃ রায়ের শেখাবার পদ্ধতিটা বেশ মা । চটপট শেখা যায় ।

মা খুসী হইয়া কহিলেন, বেশ ছেলেটি । কথাবার্তা চালচলন চমৎকার ।

তপতী বিদ্রূপ করিয়া কহিল, তোমার তপনের চেয়ে নাকি !

মা ব্যথিত হইয়া কহিলেন,—তার কথা কেন, খুকী ? সে তো সব ছেড়ে চলে গেছে ।

তপতী বলিল,—এখনও বিচ্ছেদটা কোর্ট থেকে পাকা হয় নি । তুমি তো

বোকা মেয়ে, বোঝো কচু। ছ'লাখ টাকায় ওর পেট ভরে নি, আরো অন্ততঃ লাখ-খানেক চায়—তাই মুক্তিপত্রটা এখনও হাতে রেখে দিয়েছে।

মা কিছুক্ষণ চুপ করিয়া রহিলেন; তারপর বলিলেন,—যাক্‌গে খুকী—যেতে দে।

টাকাটাই ওর লক্ষ্য ছিল, মা। আমি যে ওকে নেবো না, সে-কথা ওকে প্রথম দিনই বুঝিয়ে দিয়েছিলাম ঘর থেকে বার করে দিয়ে। লোকটা এতবেশী চালাক যে, সাত মাস ধরে অভিনয় করে তোমাদের ঠকিয়ে গেল। মাসোহারার টাকাটা তোমার কাছে জমা রেখে ও বোঝালো, কারও দান ও নেয় না,—আর বোকা তোমরা ছ'লাখ টাকা দিয়ে দিলে—একটা হিসাব পৰ্বস্ত চাইলে না।

—কিন্তু অফিসের কেরানীটাকে রক্ত দেওয়া ?

তপতীর একটা খটকা লাগিল। পরমুহূর্তেই তাহার তীক্ষ্ণবুদ্ধি তাহাকে সাহায্য করিল, কহিল,—ও একটা মস্ত চাল! অফিসের টাকায় তাকে হাসপাতালে রেখেছে,—শিথিয়ে দিয়েছে ঐ কথা বলতে, কিম্বা দিয়েছে একটু রক্ত, তাতেই কি! শরীরটায় তো রক্তের তার অভাব নেই—যা খাওয়া তুমি খাওয়াতে ওকে!—তপতী আপনার কথায় আপনি হাসিয়া উঠিল।

মারও মনে হইতেছে, হয়তো ইহাই সত্য হইবে। তথাপি তিনি বলিলেন—না চলে গেলেও তো পারতো ?

—না, ধরা ও পড়তোই; তাই জেলে যাবার ভয়ে পালিয়েছে দেশ ছেড়ে। বিস্তর বাংলা বই ও পড়েছে, বুঝলে মা? বাংলা কথা কহিলে ওকে কিছুতেই ধরা যায় না।

মা সত্যই আজ বিভ্রান্ত হইয়া উঠিলেন। তপন কি তাঁহাদের এমনি ভাবে সত্যই ঠকাইয়াছে।

তপতী আহার সারিয়া শয়নকক্ষে গেল। শয়নের বেশ পরিধান করিতে গিয়া সে আপনাকে বারবার নিরীক্ষণ করিল দর্পণে। নিটোল কপোল আবার রক্তাভ হইয়া উঠিতেছে। কটাক্ষের বিদ্রোহ আবার ফিরিয়া আসিয়াছে পূর্বের মতো! মস্তক বাহ্যতে তরঙ্গায়িত হইতেছে দেহের ছাতি। রক্তরাগী ঠোঁটটা উন্টাইয়া তপতী আপন মনে বলিল—এই ওষ্টে যে প্রথম প্রেমচূষন আঁকিবে সে-তপন নয়...

ওং, কী দারুণ ভুল সে করিতে বসিয়াছিল! শরীরটা তাহার ভাঙিয়া গিয়াছিল আর কি! প্রথম জীবনের প্রণয়োচ্ছাস! বোকামী আর কাহাকে বলে? সেই ভগুটার জ্ঞান প্রাণ দিতে বসিয়াছিল তপতী। গান গাহিতে গাহিতে তপতী শুইয়া পড়িল—‘হোয়েন দাই বিলাভেড্‌ কামস্‌’

অভিনয়ের দিন আর-একবার মিঃ রায় অহরোধ করিলেন শেষ দৃশ্যটা জুড়িয়া

দেবার জন্ম। কিন্তু তপতী দৃঢ়স্বরে কহিল,—না। তাহলে আমি অভিনয় করবো না—বিয়ের বন্ধন আমি সহিতে পারি নে।

সকলেই আশ্চর্যান্বিত হইয়া কহিলেন,—অর্থাৎ! বিয়ে আপনি করবেন না নাকি?

কলহাস্যে সকলকে চমকাইয়া দিয়া তপতী কহিল,—বিয়ের চেয়ে বড় কিছু আমি করতে চাই।

মিঃ রায় কহিলেন,—আইডিয়াটা চমৎকার, কিন্তু কী সেটা?

—যিনি আমায় বিয়ে করবেন, তিনিই সেটা আমায় বলবেন....

মিঃ রায় ব্যাকুল হইয়া ভাবিতে লাগিলেন,—তাহা কি হইতে পারে? বিবাহের চেয়ে বড় তো প্রেম! কহিলেন,—প্রেম!

—আমি পাদরী নই যে, যিশুকে প্রেম নিবেদন করব।

সকলেই হাসিয়া উঠিল। মিঃ রায় আরো খানিক ভাবিয়া বলিলেন,—বুঝেছি। আপনার ইচ্ছে ‘কম্প্যানিয়েট ম্যারেজ’।

হো হো করিয়া হাসিয়া তপতী কহিল,—আপনার বুদ্ধিতে কুলোবে না, মিঃ রায়, চূপ করুন।

চারিদিক অন্ধকার দেখিয়া মিঃ রায় খামিয়া গেলেন।

তপতী কহিল, আমিই বলে দিচ্ছি, শুনুন। বিবাহের চেয়ে বড় হচ্ছে অবিবাহিত ছেলেদের মাথাগুলো চিবিয়ে খাওয়া।

হাসিয়া কলাগাণী কহিল,—ওটা বুঝি এখন আশ্বাদন করছিস?

—চূপ কর, লক্ষীছাড়ি! ওর মাথায় গোবরের গন্ধ!

সকলেই হাসিয়া উঠিল। মিঃ রায়ও হাসিলেন। কিন্তু তপতীকে তাঁহার অত্যন্ত দুর্বোধ্য বোধ হইতেছে। উহার মনের ইচ্ছাটা কী?

অভিনয় হইয়া গেলে তিনি খানিকটা পথ তপতীর সহিত আসিতে আসিতে কহিলেন,—বিয়ে কি আপনি সত্য করবেন না, মিস চ্যাটার্জী?

—আমার বাবার ঠিক করা আছে একটি ছেলে। তাকে যদি বিয়ে না করি তো, আপনার কথাটা তখন ভেবে দেখব।

মিঃ রায় কথা শুনিয়া দমিয়া গেলেন। আরো কিছুটা আসিয়া তিনি বিদায় লইলেন।

তপতী হাসিয়া উঠিল আপন মনে। এক টিলে হুই পাখী সে মারিয়াছে। কোশলে সে মিঃ রায়কে জানাইয়া দিলো, বিবাহিতা না হইলেও, স্বামী তাহার ঠিক করা আছে—তপনের কথাটা প্রকাশ পাইলেও আর বেশী ভয়ের কারণ থাকিবে না; দ্বিতীয়তঃ, মিঃ রায়ের অন্তরে তপতী আরো গভীর ভাবে আসন

গাড়িবে কিম্বা মিঃ রায় তাহাকে ভুলিতে চাহিবেন। তপতী পরীক্ষা করিয়া লইতে চায়। আর সে ঠকিবে না। অবশ্য মিঃ রায়কে বিবাহ করিতে তপতীর কিছুমাত্র আপত্তি হইতে পারে না; তথাপি মিঃ রায়ের দিকটাও সে ভালো করিয়া জানিয়া লইতে চায়। কারণ এ-বিবাহ অন্তরের নয় বাহিরের।

পরদিন সকালে আসিল একখানি চিঠি—মার নামে—

“বিজ্ঞার সংখ্যাতীত প্রণামান্তে, নিবেদন, মা, আপনাদের অপরিশোধ্য স্নেহধ্বণের বিনিময়ে কিছুই আমি দিতে পারি নি। অভাগা ছেলেকে মার্জনা করিবেন।

ইতি—প্রণতঃ তপন”

মা চিঠিখানার দিকে চাহিয়াই রহিলেন। কলকাতার একটা ঠিকানা রহিয়াছে। এখানে হয়তো আছে সে। উঠিয়া তিনি স্বামীকে গিয়া কহিলেন—আসতে টেলিগ্রাম করে দাও, খুকীর সঙ্গে একটা শেষ বোঝাপড়া হয়ে যাক। আর, মুক্তিমাও তো লিখিয়ে নেওয়া চাই একটা?

মিঃ চ্যাটার্জী খানিক ভাবিয়া বলিলেন—খুকীকে জিজ্ঞাসা করেছো? কী বলে সে?

—না, ওকে জিজ্ঞাসা করবার দরকার নেই। ‘টেলি’ করে দাও এক্ষুনি প্রি-পেড।

তৎক্ষণাৎ টেলিগ্রাম করা হইল। উত্তরে তপন জানাইল যে সে এয়োদশীৰ দিন শিলং আসিবে, কিন্তু উঠিবে হোটеле।

মা তপতীকে খবরটা জানাইলেন না। আগে আশ্রক তপন, মা তাহার সহিত কথা বলিবেন, তার পর যাহা হয় করা যাইবে। মত বলিতে কি, এখনও তপনের দিকে মন তাঁহার স্নেহাতুর হইয়া রহিয়াছে।

প্রতিদিন সকালে মিঃ রায় আসেন তপতীর সহিত বেড়াইবার জন্য। সেদিনও তপতী মাজিয়া-গুজিয়া মিঃ রায়ের সহিত বেড়াইতে গেল।

পথের ধারে একটা গাছে অজস্র ফুল ফুটিয়াছে, মিঃ রায় একটা ভাল নোয়াইয়া ধরিলেন—তপতী ফুল তুলিয়া খোঁপায় গুঁজিতে লাগিল আর দুই-চারিটা ফুল ছুড়িয়া মিঃ রায়কে মারিতে লাগিল। মিঃ রায় হাসিয়া বলিলেন,—বড্ড বেশী স্নইট....

তপতী আর একগোছা ফুল ছুড়িয়া দিয়া কহিল,—দেখছি কতখানি আমার ইভিয়েটের উইট?

কে একজন মুঠের মাখায় বাস্ক-বিছানা দিয়া আসিয়া পড়িয়াছে খুব কাছে। তপতী যেন ভূত দেখিয়া চমকিয়া উঠিল—তপন। নীরবে তপন পাশ কাটাইয়া

চলিয়া গেল, কিন্তু তাহার মুখের বিক্রপ-হাসিটা বিজ্ঞাতের মতোই তপতীর চোখে লাগিল। তপতী চাহিয়াই রহিল তপনের দিকে। মিঃ রায় কহিলেন,—  
চেনেন নাকি।

—হাঁ—বলিয়া তপতী একটা উঁচু পাথরের উপর উঠিয়া দেখিতে লাগিল তপন কোন দিকে যায়। কিন্তু পথের বাঁকে তপন অদৃশ্য হইয়াছে। নিশ্চয় তাহাদের বাড়ি যাইতেছে। তপতী ভাবিতে ভাবিতে আরো খানিক বেড়াইল। ও কেন এখানে আসিল? আর আসিয়াই দেখিল, তপতী মিঃ রায়ের সহিত কেমন স্বচ্ছন্দে খেলা করিতেছে! যদি দেখিয়াছে তো ভালো করিয়াই দেখুক। যে বিক্রপের হাসি সে হাসিয়া গেল, তপতী তাহাকে গ্রাহ্যমাত্র করে না। হয়তো সে ভাবিয়াছিল, তাহার বিরহে তপতী বুক ফাটিয়া মরিবে! হায়রে কপাল!

তপতী মিঃ রায়কে লইয়াই গৃহে ফিরিল। ইচ্ছাটা, তপনকে ভালো করিয়াই দেখাইয়া দিবে, তপতী তাহার অপেক্ষায় বসিয়া নাই;—তাহার জীবন সাথীর স্থান অনায়াসে পূরণ করিয়া লইতে পারে।

—কৈ মা, তোমার সেই ভণ্ড ছেলেটিকে স্কুলে কোথায়? বার করো।

মা বিস্মিত হইয়া বলিলেন,—তপন এক নাকি?

—হাঁ। কিন্তু কৈ সে? এখানে আসে নি?

—না, হোটেলের উঠবে বলেছে। এখানে কাল আসবে বিজ্ঞার প্রণাম করতে।  
তপতী অত্যন্ত বিস্মিতা হইল। হোটেলের উঠবে কেন? এখানে আসতে তো কেত বারণ করে নাই। মাকে শুধাইল, তুমি জানতে ও আসবে?

—হাঁ, আমিই তো টেলিগ্রাম করেছিলাম আসতে। তোর সঙ্গে একটা পাকাপাকি কথা হয়ে যাক—আর মুক্তিনামাটাও করিয়ে নি।

—বেশ! কিন্তু বলে রাখছি, কথা যা কইবার আমি বলবো।

মা কিছু বলিলেন না। বিকালে তপতী স্বসজ্জিতা হইয়া মিঃ রায় সমভিব্যাহারে চলিল তপনের সহিত দেখা করিতে হোটেলের। তাহার আর সবুর সহিতেছিল না। মিঃ রায়কে লইয়া গিয়া তপতী এখনি দেখাইয়া দিবে যে কত সহজে তাহার যোগ্য স্বামী সে লাভ করিতে পারে।

তপন একটা জানালার ধারে দাঁড়াইয়া পাইন-বনের দিকে চাহিয়া ছিল।

নমস্কার, তপনবাবু। প্রথমই আপনাকে ধন্যবাদ দিচ্ছি, আমাদের গুথানে না-গুঠার জন্ত। অনর্থক একটা ডিস্টারবেন্স ক্রিয়েট না-করে ভালোই করেছেন।

তপন ফিরিয়া চাহিয়া প্রতিনমস্কার করিয়া বলিল,—আজ্ঞন! মীরার কাছে শুনেছিলাম আপনি অসুস্থ। আশা করি ভালো আছেন এখন?

হাঁ ভালো। আজ্ঞন মিঃ রায়, আলাপ করিয়ে দিই। এর সঙ্গে আমার



হিন্দুগণে বিয়ে হয়েছিল একদিন। আর তপনবাবু, ইনি মিঃ বি সি রায়, আই-সি-এস. বাঙলায় অল্পবাদ হচ্ছে বোকা চন্দ্র রায়—তপতী হাসিতে উজ্জল লইয়া উঠিল, ঠর সঙ্গে আমার ভাবী সম্বন্ধটা আশা করি আপনি অল্পমান করতে পারছেন ?

মৃহহাসির সহিত নমস্কার করিয়া তপন বলিল, বড্ড স্থখী হলাম, মিঃ রায়। প্রার্থনা করি আপনাদের জীবনে যেন নেমে আসে পাইন বনের শীতল শান্তি, আর এই নির্ঝরির নন্দিত কল্লোল। বসুন, চা খান একটু।

তপন বয়সকে চা আনিতে বলিল।

আশ্চর্য! বাংলা ভাষাটা উহার কণ্ঠে কী বিদ্যাতের মতোই খেলিতে থাকে। কী কবিত্বময় ভাষা!

তপন মিঃ রায়কে বলিল, কোথায় কর্মস্থান হল আপনার? বাঙলায় বাহিরে নয় তো?

না, নদীয়ায়। বড্ড ম্যালেরিয়ার দেশ। তাই ভাবছি—

ম্যালেরিয়া বুড়ু ব্যাধি। আপনাদের তো কিছু ভয়ের কারণ নেই?

অল্পপ্রাস না দিয়ে কি আপনি কথা বলেন না, তপনবাবু? তপতী প্রশ্ন করিল।

অল্পপ্রাসটা চাবনপ্রাশের মতো উপাদেয় আর উপকারী। তপন মৃহ হাসিল।

কথা বলার আঁটটি আপনি চমৎকার আয়ত্ত্ব করেছেন। তপতীও মৃহ হাসিল।

চা আসিলে তপন সহস্বে তিন পাত্র প্রস্তুত করিয়া মিঃ রায়কে ও তপতীকে দুই পাত্র দিয়া নিজে এক পাত্র লইল। কি কথা বলিবেন মিঃ রায় বুঝিতে পারিতেছেন না। তপতীও কিছুটা উন্মনা হইয়া রহিয়াছে।

তপন কহিল,—গীরা আপনার কাছে বড্ড অচ্যায় করেছে, আমি ওর হয়ে মাপ চাইছি। আপনি শিক্ষিত, ওর মতো একটা পল্লী-মেয়ের দোষ নেবেন না।

তপতীর বিস্ময় ক্রমাগত বাড়িয়া যাইতেছে। তপনের ইহাও কি ভণ্ডামি? সংযতকণ্ঠে কহিল, না, কিছু মনে করি নি। আপনি আমাদের ওখানে যাবেন না?

আজ একটু খামিয়া-পল্লীতে যাবার কথা আছে, এখনি বেরবো।

সেখানে কী দরকার? চলুন তাহলে আমরাও যাবো এদিকে।

তপন বিস্মিত হইল তপতীর এই আহ্বানে। কিছু না বলিয়া সে বাহির হইল উহাদের সঙ্গে। তিনজনেই নির্বাক চলিতেছে; প্রত্যেকের মনে যেন একটা গভীর চিন্তায় ভারাক্রান্ত।

পথের ধারে একটা উঁচু ডালে গুচ্ছ-গুচ্ছ ফুল-ফুটিয়া আছে। তপতী মিঃ রায়কে বলিল,—দিন না ফুলটা পেড়ে?—মিঃ রায় হুঁ একবার লাফ দিয়াও ডালটা ধরিতে পারিলেন না। আপনার চাদরের খুঁটে একটা একটা ছোট পাথর বাঁধিয়া

তপন ডালের উপর ছুঁড়িল। সরু ডালটা হুইয়া পড়িতেই মিঃ রায়কে ডাকিয়া বলিল,—তুলে নিন ফুলটা—মিঃ রায় ঘাড় উঁচু করিয়া ফুলটি তুলিতে যাইতেই তাঁহার চোখে পড়িল ডালের বরা একটা কুটা। মিঃ রায় ফুল না তুলিয়াই চোখে রুমাল চাপিয়া মাথা নীচু করিলেন। তপনই নিজেই শাখা-সমেত ফুলটি ছিঁড়িয়া আলগোছা তপতীর হাতে ফেলিয়া দিল, তারপর পরম যত্নে মিঃ রায়ের চোখের উপরের পাতাটি নীচের পাতার মধ্যে ঢুকাইয়া চোখ মর্দন করিয়া দিতেই কুটাটা বাহির হইয়া আসিল।

এখনও তপন তাহাদের উপর এতটা সহানুভূতি কেন দেখায়—তপন তাবিয়া পাইতেছে না। মিঃ রায়কে সে লইয়া আসিল তপনকে আঘাত করিতে, আর তপন কিনা পরম যত্নে তাহারই সেবা করিতেছে। একটুকু বিচলিত হইল না, লোকটা আশ্চর্য!

—পাইন-বন আপনার কি রকম লাগছে?—তপতী প্রশ্ন করিল নীরবতাটা অসহ্য বোধ করিয়া।

সহাস্তে তপন উত্তর দিল,—মার মুখের প্রশান্ত-স্নিগ্ধতার মতো স্নেহমাখা।

দূরের একটা আবছা পাহাড়ের দিকে অঙ্গুলি নির্দেশ করিয়া তপতী কহিল—  
এ পাহাড়টা?

তপন নিম্নকণ্ঠে উত্তর দিল,—ছুঃখের দিনে সুখের স্মৃতির মতো বিষাদময়।

কয়েকটা পুষ্পিত বৃক্ষের দিকে তাকাইয়া তপতী বলিল,—এ ফুলবীথিকা?

রূপসী মেয়ের সিঁথির মতোই স্বন্দর স্বকুমার, ওদের সীমান্তের শোভা অক্ষয় হোক।

তপতী হার মানিয়া গেল।

একটা নিরীক্স দিকে আঙ্গুল তুলিয়া তপতী মিঃ রায়কে কহিল,—এবার আপনি বলুন এ ঝরণাটা কেমন লাগছে।

মিঃ রায় কহিলেন,—আপনার দোহল্যমান বেগীর মতন।

হাসিয়া তপতী কহিল,—‘ইউনিভার্সাল’ হল না। আপনি বলুন তো তপনবাবু!

—মৌন গিরিরাজের মুখের বাণী, বিষণ্ণ বনানীর আনন্দ-কলগান, স্থিরা ধ্বনির অস্থির আঁখিজল...

একটা খাসিয়া মেয়ে দূরে বসিয়া আছে, তপতী কহিল,—বলুন মিঃ রায় এ মেয়েটিকে কেমন লাগছে?

মিঃ রায় বলিলেন,—ওঁর সঙ্গে এ-বিষয়ে পাভা দেওয়া অসম্ভব। তবু বলছি—নির্জন পাহাড়ের পটভূমিকায় যেন একখানি জীবন্ত ছবি।

তপতী খুসী হইয়া কহিল,—খুব নতুন না-হলেও সুন্দর। এবং আপনাবাট  
বলুন!—তপতী অত্যাশঙ্কিত করিল তপনকে।

তপন কহিল,—কিন্তু আপনারও একটা বলবার আছে আশা করি, বলুন সেটা।

তপতী কহিল,—অলংকার অলিন্দে বিরহিনী বধু—এবার আপনাবাট বলুন।

তপন প্রশংসমান দৃষ্টিতে তাহার দিকে চাহিয়া কহিল,—চমৎকার! আমারবাট  
আর থাকে।

—না বলুন—বলতেই হবে—তপতী খুকীর মতো আবদার ধরিল।

আমি যদি অদ্ভুত কিছু বলি?—তপন মৃদুমধুর হাসিল।

তাই বলুন—যা আপনার ইচ্ছে বলুন! তপতীর আগ্রহ অদমনীয় হইয়া  
উঠিতেছে।

তপন বলিল,—মরণের বীথিকায় জীবনের উচ্ছ্বাস,

জীবনের যাতনায় মৃত্যুর মাধুরী—

সব রাস্তাটি চলিয়া গিয়াছে খাসিয়া-পল্লীর দিকে। তপন হাসিমুখে নমস্কার  
জানাইয়া চলিয়া গেল। তপতী পরমাশ্চর্যের সহিত কবিতাটির টীকা করিতে  
আরম্ভ করিল মনে মনে। কী বলিয়া গেল তপন ঐ কবিতার মধ্যে? তপতী  
চিন্তা করিতেছে দেখিয়া মিঃ রায় কহিলেন,—ওর কবিতা আপনাকে মুগ্ধ করলো  
নাকি, মিস চ্যাটার্জী?

—জেলাস হবেন না, মিঃ রায়! ওর কবিতায় মুগ্ধ না হয়ে উপায় নেই।  
আর ও জেলাস হয় না।

—না, না, জেলাসি কিসের? ও তো আপনাকে স্বেচ্ছায় মুক্তি দিয়েছে ও  
কি যোগ্য আপনার?

তপতী তড়িতাহত হইয়া উঠিল। স্বেচ্ছায় মুক্তি দিয়াছে! না তপতী মুক্তি  
চাহিয়াছিল। চাহিবার পূর্বে মহাশয় অপমান সহ্য করিয়া ও তপন তাহাকে মুক্তির  
কথা বলে নাই। মুক্তি দিবার সময় ও বারংবার জিজ্ঞাসা করিয়াছিল, এবং মুক্তি  
দিয়া অজস্র উদ্বেলিত ক্রন্দনে পরিণত করিয়া দিয়াছিল তাহার পূজার বেদীমূল।

তপনের অযোগ্যতা কোথায়! ঐ সুন্দর আনন্দশ্রী, ঐ অদৃষ্টপূর্ব সংযম, ঐ  
হীরক-দীপ্ত বাক্যলাপ—তপতীর অন্তর যেন জুড়াইয়া যাইতেছে। একমাত্র অপরাধ  
তপনের, সে ছই লক্ষ টাকার হিসাব দেয় নাই। নাই দিল—টাকা তো সে চুরি  
করিয়া লয় নাই, চাহিয়া লইয়াছে।

তপতী বাড়ী ফিরিতে চাহিল। মিঃ রায় আশঙ্কায় ব্যাকুল হইয়া উঠিতেছেন।  
তপনকে তাহার অত্যন্ত ভয় করিতেছে। লোকটা অদ্ভুত প্রকৃতির—হিমাচলের  
মতন অবিচল, আবার সাগরের মতো সঙ্গীতময়। কহিলেন তিনি,—আর একটু

বেড়ানো যাক্-না—আম্বন এদিকে—তপতীর ভালো লাগিতেছে না। নিতান্ত নিশ্চিন্ততায় সে যে তার শ্রেষ্ঠ সম্পদকে এমন করিয়া নিঃশেষে মুছিয়া দিতে পারে, সে কে ! মাহুষ না পাথর—না দেবতা ?

—আর বেড়ানো না, মিঃ রায়—চলুন ! বাড়ি যেতে হবে আমায়—বলিয়াই তপতী ফেরার পথ ধরিল। অগত্যা মিঃ রায়ও ফিরিলেন। সারা পথ নীরবে তপতী হাঁটিয়া আসিল ; মিঃ রায়ও কোনো কথা বলিতে পারিলেন না।

রাত্রি গভীর।

আপন কক্ষে বসিয়া তপতী চিন্তা করিতে লাগিল তপনের প্রত্যেকটি ব্যবহার, প্রত্যেকটি কথা—যতদূর মনে পড়ে। মনে পড়ল, তাহাকে জন্মদিনে দেওয়া অশোকগুচ্ছের সহিত ঋষিজনোচিত আশীর্বাদ ; মনে পড়িতেছে অঙ্কুর কবিত্ত্বময় আশীর্বাণী ; মনে পড়িয়া গেল—‘জীবনের যাতনায় মৃত্যুর মাধুরী’ কি বলিয়া গেল তপন ঐ কথাটার মধ্যে ? তপতীর বিরহে তপন এতটুকু বাধা পাইয়াছে, তাহা তো তপতীর কোনদিন মনে হয় নাই। কিন্তু আজিকার ঐ কথাটা হাঁ, উহাই তপনের অন্তরবেদনার আত্মপ্রকাশ—মধুরতম, করুণতম কিন্তু বিষাক্ত আলাময়।

তপতীর অন্তর তৃপ্তিলাভ করিতেছে। তপনের মর্মমাঝে তবে আজও আছে তাহার আসন !

ঠাকুরদা যদি একবার আসিয়া তপতীকে বলিয়া যান—প্রেমের নবীনতম বাণী তাহাকে শুনাইবে ঐ তপন, তবে তাঁহার আদরের তপতী আজ ঝাঁটিয়াট যাইবে !—তপতী আচ্ছন্নের মতো শয্যায় পড়িয়া রহিল। চিন্তাশক্তি তাহার বিলুপ্ত হইয়াছে যেন !

সকালে নিয়মিত সময়ে মিঃ রায় আসিবামাত্র তপতী জানাইল, বেড়াইতে যাইবে না।

মিঃ রায় অত্যন্ত ক্ষুণ্ণ হইয়া কহিলেন,—বেড়াইবার জন্তই তো এখানে আসা মিস চ্যাটার্জি !

—সেটা আপনাদের পক্ষে। আমার আসা অপমানের প্রতিশোধ নিতে।

—কে করেছে অপমান আপনাকে ? মিঃ রায় অত্যন্ত বিস্মিত হইলেন।

—ঐ তপন ! ও আমার নারীত্বকে নির্মমভাবে পদদলিত করেছে ; আমার প্রেমধারাকে পাষণ্ডের মতো প্রতিহত করেছে, আমার বন্ধনকে বিদায়ের নমস্কারে বশিত করেছে—বলে গেছে—‘আমার বিদায় অশ্রু রাখিলাম, লহো নমস্কার।’

তপতী হু-হু করে কাঁদিয়া ফেলিল। বিস্ময়-সমুদ্রে নিমজ্জিত মিঃ রায় নির্বাক হইয়া গেলেন। তপতী আত্মনম্রণ করিয়া কহিল,—বিকালে আসবেন, মিঃ রায় ! ও আসবে সেই সময়। আর শুনে রাখুন, ওকে আমি আজও ভালবাসি আমার

শিরার শোণিতের মতো—বুকের স্পন্দনের মতো,—জীবনের যাতনার মতো।

তপতী চলিয়া গেল অতঃপর। মিঃ রায় মিনিটখানেক দাঁড়াইয়া থাকিয়া ধীরে ধীরে চলিয়া গেলেন। বুঝিলেন, তপতী তাঁহার আয়ত্তের বাহিরে চলিয়া গিয়াছে।

বিকালে হুসজ্জিতা তপতী বেণী দোলাইয়া বসিয়া রহিল তপনের অপেক্ষায়। কয়েকটি নারী এবং পুরুষ বন্ধুর সঙ্গে মিঃ রায়ও শেষ চেষ্টা দেখিতে আসিয়াছেন। তপতী বললে,—ওকে যে ঠকাতে পারবে, তাকে পুরস্কার দেবো।

সলিলা বলিল,—ভারি তো। একটা পুরুষকে ভেড়া বানাতে কতক্ষণ লাগে? মাধুরী বলিল,—অত্যন্ত সহজে জব্ব করে দিচ্ছি—দাঁড়া।

মিনতি বলিল,—পদ্মবনে পথভ্রান্ত পথিক করে ছাড়বো ওকে। কাঁটার ঘায়ে মুর্ছা যাবে।

তপতী বলিল,—ও কিন্তু তপন, পদ্মরাই ওর পানে চেয়ে থাকে।

মিঃ রায় ক্রকুটি করিলেন তপতীর শ্রদ্ধাভরা কথা শুনিয়া। বলিলেন,—গোলাপবাগে গুব্বরে পোকাকর মতো করতে পারলে তবে জানি।

তপতী মিঃ রায়ের অন্তরের দীর্ঘা ধরিয়া ফেলিয়া, বলিল গোলাপবাগের ও গোপন মধুকর, গুব্বরে পোকাকর মতো ও ভ্যান্‌ভ্যানায় না। ও থাকে গোপন অন্তঃপুরে।

এমনভাবে কথা বলিতে পারিয়া তপতী যেন অত্যন্ত তৃপ্ত হইয়া গিয়াছে, এমনই দেখাইতেছে তাহার চোখ দুটি। আপনার অজ্ঞাতমারেই তাঁহার কণ্ঠে যেন আজ তপনের ভাষার মাধুরী ঝরিতেছে। ইহাই কি বৈষ্ণব সাহিত্যের “অনুখন মাধব মাধব সোঙরিতে স্তন্দরী ভেলি মাধাই”।

মিঃ রায় বিপদ বুঝিয়া কথা বন্ধ করিয়া দিলেন।

তপন আসিয়া প্রথমই বাড়ী ঢুকিয়া মিঃ চ্যাটার্জী ও মিসেস চ্যাটার্জীর পাদবন্দনা করিল। অতঃপর সকলকে বিনীত নমস্কার জানাইয়া আসনে বসিল।

প্রথমালোপের পর সলিলা বলিল, আপনার কথা অনেক শুনেছি, চোখে দেখে মনে হচ্ছে আপনি যাহুকর।

—আমার ভাগ্যটাকে অতের দীর্ঘায় বস্তু করে তুলবেন না, মিস গুপ্তা, জগতে যাহুকরের আদর এখনও রয়েছে।

কিন্তু আপনিই—বা অনাদৃত কিসে?

—না—তবে, আদরটা আমার সহ্য হয় না—তুষারের পরে যথা রৌদ্রের আদর, উত্তপ্ত বালুতে যথা আদর অশ্রু।

কথাটার কোথায় যেন বেদনার ইঙ্গিত রহিয়াছে। একটা হাসির কিছু আলোচনা হইলেই ভালো হয়। মাধুরী বলিল, ওসব কথা থাক, চায়ের মজলিসে

হাসির গল্পই জমে ভালো।

মিঃ রায়ের পটুতা এ-বিষয়ে সর্বজনবিদিত ; কহিলেন, রাইট, হাসি সব সময়ে কাম্য।

অন্তপ্রাস্ত হইতে তপতী কহিল, সবারই মন সমান নয়। মানুষকে মানুষ করতে কান্নাই সক্ষম। আপনার মতটা কি বলুন তো? তপতী সাগ্রহে চাহিল তপনের পানে।

বিস্মিত তপন ভাবিয়া পাইল না, তপতী তাহাকে লইয়া আজ কী খেলা খেলিবে। তপতী আজ অত্যন্ত দুর্বোধ্য ঠেকিতেছে। মুহূহাস্য সহকারে সে কহিল ওঁর মতটাকেই তো প্রাধান্য দেওয়া উচিত আপনার।

স্মৃষ্টি একটা ধমক দিয়া তপতী কহিল, চুপ। আমার মত কারও মতের অপেক্ষা রাখে না। আমার মত আমার স্বাতন্ত্র্যে প্রতিষ্ঠিত, মুক্ত, স্বাধীন,—বলুন এবার আপনারটা—

আরো বিস্মিত হইয়া তপন ধীরে ধীরে কহিল, আমার মতে, হাসির মধ্যে কান্না আর কান্নার মধ্যে হাসিকে দেখতে শেখাই কাম্য। পৃথিবীর তিনভাগ অশ্রু-সাগর মাত্র একভাগ হাসির দ্বীপপুঞ্জ আপাতদৃষ্টিতে মনোরম কিন্তু কুমীরের মাঝে মাঝে জল থেকে উঠে আসার মতো আনন্দদায়ক হলেও অস্বাভাবিক। হাসির প্রয়োজন অস্বীকার করা যায় না, কিন্তু কান্নার প্রয়োজন ততোধিক, আনন্দ থেকেই হাসির উদ্ভব, কিন্তু গভীরতম আনন্দ কান্নাতেই প্রকাশ পায়। তাই মনে হয়, হাসি-কান্নাতে মূলতঃ কোন তফাত নেই।

মিনতী বলিয়া উঠিল, বড় দার্শনিক প্রবন্ধের মতো শোনাচ্ছে। সহজ হাসি চাইছি আমরা।

তপন বলিল,—সহজ কথাটা পাত্রভেদে বদলায়। যেমন কাঠবিড়ালের গাছে ওঠা আর উদ্‌বিড়ালের জলে নামা।

মিনতী পুনরায় কহিল,—অর্থাৎ আপনি বলতে চান, আমাদের চেয়ে আপনি উৎকৃষ্ট পাত্র?

তপন কহিল, উৎকৃষ্টতার প্রশ্ন অবাস্তব। পৃথিবীর কাঙ্ক্ষনের প্রয়োজন থেকে কাচের প্রয়োজন কম নয়। এমন কি, ক্ষুদ্র কৈঁচেরও প্রয়োজন আছে।

মুখ-টেপা হাসিতে উজ্জ্বল হইয়া উঠিল তপতী। কাচ-ভ্রমে সে তপনকে অগ্রাহ্য করিয়াছে। সে কহিল, আছে, কাগজি লেবু থেকে আরম্ভ করে কাঁচকলার অবধি প্রয়োজন আছে।

সকলেই মুহূষরে হাসিতেছে। তপনের ভাষাটাকে এভাবে অতুলকরণ করিয়া তপনকে সমর্থন করার জন্য মিঃ রায় ক্ষুণ্ণ হইতে গিয়া কথার হল ফুটাইয়া ফেলিলেন।

কহিলেন, কাচপোকাও—কেমন ?

তপতীর ছই চক্ষু দীপ্ত হইয়া উঠিল। আপনার অজ্ঞাতসারেই সে আজ তপনকে অহুসরণ করিতেছে—কিন্তু মিঃ রায় যে ইহা সহিতে পারিতেছেন না, তাহা বুঝিতে তপতীর মুহূর্ত্ত বিলম্ব হইল না। কহিল, হাঁ, কাচপোকাও ভালো যেমন ভালো কাচের কুঁজোর জলের থেকে কৃষ্ণমাংসের কালো জল।

তপতীর এই উচ্ছ্বাসময় বাণী বিহ্বল করিয়া দিয়াছে সকলকেই। তপন সমস্তই বুঝিল। তাহার দৃষ্টি নিবিড় বেদনায় নির্নিমেষ হইয়া উঠিয়াছে। মৃদুস্বরে কহিল,—‘ক’কারে কথা কলঙ্কিত হইয়ে উঠেছে তপতী দেবী।

মৃদু হাসিয়া তপতী উত্তর দিল,—কাপুরুষের গায়ে কাদাই ছিটানো উচিত।

তাঁহাকেই কাপুরুষ বলা হইতেছে ভাবিয়া মিঃ রায় ক্রোধ সম্বরণ করিয়া কহিলেন,—কাপুরুষের উন্টো লোকটি কে এখানে, মিস চ্যাটার্জী ?

তপতী কহিল, নিশ্চিত পরাজয় জেনেও যারা সম্মুখ-যুদ্ধে পিছোয় না, যেমন আপনি।

আমি ! তাহলে কাপুরুষটি কে আবার ?

তপনের দিকে আঙুল তুলিয়া কহিল,—ঐ ইন্ডিয়ট্, ঐ ভণ্ড, ঐ জোচ্চর !

সকলেই বিস্মিত হইয়া উঠিতেছে। মিঃ রায় আনন্দিত হইতে গিয়াও যেন ধোঁকায় পড়িয়া কহিলেন,—ছিঃ ছিঃ, মিস চ্যাটার্জী, কি সব বলছেন আপনি ?

আপনাকে বারণ করেছি না আমায় ‘মিস চ্যাটার্জী’ বলতে ? বলবেন না আর।

কিন্তু আপনি গুঁকে অত্যন্ত অপমান করছেন, মিস চ্যাটার্জীর ...

মিঃ রায় বাধা পাইলেন। তপতী সজোরে ধমক দিল, শাট্ আপ ! ফের মিস চ্যাটার্জী ?

তপতীর উচ্চকণ্ঠ শুনিয়া মা তাড়াতাড়ি বাহিরে আসিলেন, খুকী হয়তো তপনের সহিত কিছু একটা কাণ্ড বাধাইয়াছে। তাঁহাকে দেখিয়া তপন কুণ্ঠিত স্বরে কহিল—ওঁরা অতিথি, ওঁদের অসম্মান করতে নেই। মা, গুঁকে বারণ করুন !—তপন মিনতিপূর্ণ দৃষ্টিতে চাহিল মার পানে।

অকস্মাৎ তপতী চেয়ার ছাড়িয়া আসিয়া তাহার স্তন্যধী বেলীটাকে চাবুকের মত ব্যবহার করিল তপনের বাঁম বাহুতে—সপাৎ সপাৎ ! চীৎকার করিয়া বলিল,—ওরা তোমার অতিথি, তুমি ওঁদের সম্মান করবে...আর তোমার বিবাহিতা পত্নীকে ওরা বার বার অসম্মান করবে ‘মিস, বলে—নিশ্চিন্ত বসে দেখবে তুমি।।... কেন ? কিসের জহা বলা—তপতী আরো একটা আঘাত করিল সজোরে।

এই আকস্মিকতার আঘাতে নিথর হইয়া গেছে রঙ্গভূমি। তপনের স্তর্গৌর বাহুতে প্রত্যেকটি আঘাত রক্তলেখায় ফুটিয়া উঠিতেছে। মা কষ্টে আত্মসম্বরণ

করিয়া কহিলেন—কি তুই করলি, খুকী।

ক্রোধ-কম্পিত তপতী চাহিয়া দেখিল তপনের শোণিতাক্ত বাহ! উচ্ছ্বসিত ক্রন্দনে তাহার সীমন্ত লুটাইয়া পড়িল সেই রক্তের উপর—তপতী যেন আজ ঐ রক্ত দিয়াই তাহার গুত্র সীমন্ত রঞ্জিত করিয়া লইবে! অশ্রুধ্বজ কণ্ঠে কহিল,—বড্ড জ্বালা করছে না?

তপতীর আকুল কণ্ঠস্বরে আকৃষ্ট নিরুপায় তপন নির্লিপ্তের মতোই যেন বলিল,—এমন কিছু না। কাঁদবার কি হয়েছে? সেরে যাবে—তারপর তপতীর মাথাটি সম্মেহে তুলিয়া ধরিয়া মাকে বলিল,—মা, ধরুন ওকে,—পড়ে যাবে এখুনি—

মা গিয়া তপতীকে ধরিলেন। তপতী থর-থর করিয়া কাঁপিতেছে। একটা নীরব নমস্কার জানাইয়া তপন ধীরে ধীরে চলিয়া যাইবে—তপতী ছুটিয়া গিয়া তাহার পথরোধ করিল,—যাচ্ছ যে?

—আমি তোমায় মুক্তি দিয়েছি, তোমায় গ্রহণ করবার সাধ্য আর আমার নেই।

বিশ্ময়ে তপতীর চক্ষু বিস্ফারিত হইল—‘মুক্তি দিয়েছো?’

—হাঁ। আমার সত্য বজ্রের চেয়ে কঠোর, মৃত্যুর চেয়ে নিষ্ঠুর! সত্যভঙ্গ করে তোমায় আমার সহধর্মিণীর আসনে আর বসাতে পারবো না—

তপন চলিয়া যাইতেছে। কিন্তু বিমূঢ়া তপতী পড়িয়া যাইবে, তপন ক্ষিপ্রহস্তে তাহাকে ধরিয়া স্নেহের শীতলতম মাধুর্য্যে কহিল,—এতদিন পরে এমন করে কেন তুমি আজ এলে তপতী? তুমি মুক্ত বিহঙ্গের মতো নীল আকাশের বিপুল বিস্তারে পাখা মেলো—আমার ধরার ধুলিতে পড়বে এসে তার ছায়া—একটি মুহূর্তের তরে যেখানে তুমি গ্রহণ করলে তোমার আসন! মুক্তির সেই অবাধ অধিকারে রইল আমাদের চির-মিলনের আকুতি...

তপন চলিয়া গেল।

অকস্মাৎ তপতীর আর্ত চীৎকারে দিগ্‌প্রান্তস্থানিত হইয়া উঠিল,—ঠাকুরদা—ঠাকুরদা...

দিন, মাস, বর্ষ চলিয়া যাইতেছে...

বিশাল ‘তপতী নিবাসে’, তপনের পরিত্যক্ত কক্ষটিতে বসিয়া থাকে তপতী—একা, আত্ম-সমাহিতা কুণ্ঠিত পিতা আসিয়া বলেন,—তোরা আবার বিয়ে দেবো, খুকী, তুই আমাদের একমাত্র মেয়ে...

নিয়তির মতো নিষ্ঠুর ঊদাসীন্তে তপতী উচ্চারণ করে—তাই বুঝি ঠাকুরদার শ্রষ্ট দেবমূর্তিকে দানবী করে তুলেছিলে? কিন্তু ওর নিষ্ঠুর ছেনীর আঘাতে আবার



তাকে দেবী করে দিয়ে গেছে বাবা ।—এ মন্দিরে আর কারও প্রবেশ নেই ।—যাও ।

স্নেহ-দুর্বল পিতা পুনরায় বলেন—আমার কাছে ছ'লাখ টাকা নিয়ে আমারই  
বাবার নামে 'শ্রীমঙ্গল'র 'ভিক্ষুকাশ্রম' করেছে, এতো-বড়ো হৃদয়বান সে ! খুকী,  
চল ওকে ডেকে আনি ।

হাস্তদূত কণ্ঠে তপতী উত্তর করে,—ওর সহধর্মিণী আমি হয়েছি, বাবা, সত্যভঙ্গ  
করিয়া বিলাস সঙ্গিনী হতে আর চাইনে ।

মা আসিয়া স্নেহ-সজ্জল স্বরে কহেন,—এমন করে কতদিন তুই থাকবি, খুকী ?  
তপতী স্নিগ্ধ ঔদার্য্যে আত্মপ্রকাশ করে,—এমনি করে আমরণ রাখবো আমার  
বিরহের চিতা-বহ্নিমান !—

গভীর নিস্তন্ধ নিশীথে তপনের শূন্যশয্যা-প্রান্তে নতজাহ্ন তপতীর করুণ মধুর  
কণ্ঠবাক্য শোনা যায় :

—‘তোমায়-আমায় মিলেছি, প্রিয়, শুধু চোখের জলের ব্যবধানটুকু রইল।’

www.boiRboi.blogspot.com